



**АДИБ ҲАЁТИГА
БИР НАЗАР**
•
ХОТИРАЛАР

ТОШКЕНТ
"ШАРҚ" НАШРИЁТ-МАТБАА
КОНЦЕРНИНИНГ
БОШ ТАҲРИРИЯТИ
1998

Тузувчи ва нашрға тайёрловчилар:
Мурод МАНСУР, Темур УБАЙДУЛЛО

Масъул муҳаррир:
Омон МУХТОР

Шуҳрат.

Машраб: Роман; Адаб ҳаётига бир назар; Хотирапар//Масъул муҳаррир: О.Мухтор/.— Т.: «Шарқ», 1998.—304 б.

Бу китобга Ўзбекистон халқ ёзувчиси Шуҳратнинг қўлида сақлашиб қолган, вақтида эълон қилинмаган «Машраб» романи, Адаб ҳаёти тўғрисидаги ҳикоя ва шеърлар, шунингдек Ёзувчи шахси, унинг ижод йўли ҳақида ёзилган хотиralар киритилди. Китоб Шуҳрат номи ҳам, ижоди ҳам давр ўтиши билан унтилмаганидан далолат беради. У яхлит бир шакл касб этганидан, ўқувчилар кўнглида қизиқиш уйготади, деб ўйлаймиз.

Ўз2+83. ЗЎз

© «Шарқ» нашриёт-матбаа
концернининг Бош таҳририяти
Тошкент, 1998.

МУБОРАК ХОТИРА

Мен отамиз — Ўзбекистон ҳалқ ёзувчиси Шуҳрат домла ҳақида ҳали ҳеч кимга ёрilmаган, айтилмаган хотираларга, ажойиб кузатиш ва таассуротларга эгаман. Кўпчилик яхши билмайдиган ва ҳали-ҳануз тагига етолмаётган воқеаларнинг шоҳиди бўлганман. Буларни вақти келиб, батафсил қогозга туширарман ҳам, эълон қиласарман ҳам. Ҳозирча эса, умрларининг сўнгти йилларидағи баъзи воқеаларни эслагим, у кишининг айрим армон ва таскиnlаридан, энг оғир дамларда намоён бўлган ажойиб инсоний фазилатларидан сўзлагим келди.

Биласиз, отам умрларининг сўнгида оғир дардга чалиниб, ҳассага суюниб қолган эдилар. Тиллари яхши айланмас, гапиришга қийналар, фикрларини тушунтира олмаганларида мен у кишига кўпинча таржимонлик қиласар эдим.

Тўқсон биринчи ёхуд тўқсон иккинчи йиллар миёнаси эди. Телевизор орқали катта бир республика йигини олиб кўрсатила бошлади. Адам одатдагиdek курсида ўзларини бироз олдинга ташлаб, икки кафтларию даҳанларини ҳассага тираганча телевизордан кўз узмай ўтирап эдилар. Республика Президентининг сўзларини диққат билан тинглардилар. Кутилмагандга у кишининг кўзлари намланиб кела бошлади. Нима экан, деб қулоқ оссам, Президент ноҳақ жабр чеккан Ўзбекистон зиёлилари ҳақида гапирмоқда. Мен ҳам аниқ эшийтдим. Уша жабр кўрганлар қатори Ҳамид Сулаймон, Шуҳрат, Сайд Аҳмад, Шукруллолар номи тилга олинди.

Адам қаддиларини тиклаб, бир нималар демоқчи бўдилар: «Биринчи бор айтиляпти!» демоқчи эканликларини тушундим. Бунаقا катта йигинда, катта даврада ҳеч айтилмаган, тилга олинмаганди бу нарса. Шу вақтта қадар эътироф этилмаганди. Адамнинг кўзлари намланиб келгани шундан эди!..

~~СИЛОЛ ЙОПІШДИЧУТ~~
~~БОЛГАДИ~~
— бозум, адам жуда кучли ирода эгаси эканлар, ҳам кечиб ҳам, Қозогистон жерларида ётиб ҳам, оқланиб келиб ҳам йиламаган одам... мана
~~БОЛГАДИ~~

энди бутун республика миқёсидағи катта бир йигинда бу ноҳақлик, зулм эътироф этилаёттанидан... кўзлари жиндек намланиб келиб, менга бир нарсалар демоқчи бўлардилар. Шу дамда ҳатто мен ўзимни тутолмай қолган, ичимдан бир нима тўлиб-тошиб кела бошлаган эди. Шоирнинг адибнинг юрагини вайрон қилган ноҳақлик ўз номи билан аталмоқда эди. Зулмга лаънат ўқилмоқда эди. Миллат гулларини адо қилган адолатсизлик ўз баҳосини олмоқда эди. Бунаقا вақтда, наинки зулм кўрган инсон, барча пок кишиларнинг кўзига ҳам ёш келгай.

Кези келди, айтиб ўтай. Адам, у киши билан бирга лагерга жўнатилган зиёлилар ўша ерда ҳам жим турмай, адолатсизликка қарши тик бориб, исён кўтаришган ва бутун қамоқни бир неча кун қўлда тутиб туришган экан. Шўро ҳукумати билан шунча вақт келишомай кейин исён бостирилган экан. Мен яқинда ана шу исёнга багишланган ярим бадиий, ярим ҳужжатли фильмни кўрдим. Адам ўша воқеани бир эслаган эдилар.

Адамиз табиатан камтар, ўзларининг асарларини кўз-кўз қилишни учалик ёқтирмайдиган одам эдилар. Адолатпарварлик, тўгрисўзликни улардан ўрганмоқ керак эди. Ҳавас қиласирик даражада тўгри сўз эдилар. Бу борада ҳеч кимдан ва ҳеч нарсадан чўчимас, ҳайиқмас эдилар. Бундай юксак инсоний фазилатлар шўро замонасида шараф келтирмаслигини билсаларда, адам ундан тойган эмаслар. Ҳалигача биз шу хислатлари билан фаҳрланамиз. «Бошга қилич келса-да, тўгрисини сўзла, тўгри сўзингда тур. Ёлғон Омлоҳга ҳам хуш келмайди», дер эдилар у киши. Бутун ёзган асарларига шу руҳ сингиб кетгани учун ҳам улар ҳалигача севиб ўқилмоқда, қайта-қайта нашр этилмоқда.

Яна айтсам, у кишининг гариллар бошини силовчи меҳрибон қўллари бор эди. Йилт этган ёш истеъодни қидириб топиб, қўллаб юборищдан, сўз ёзиз бериб, нашриётларга йўллашдан, китоби, асарини чиқаришга жон куйдирисдан чарчамас эдилар. Ана шундай ноёб фазилатлар эгаси эдилар у киши.

Адам чин маънода миллий шоир эдилар. Бу нарса у кишининг табиатларида борлиги учун ҳам ёзганлари барчага тушунарли ва бир ўқищаёқ ёқиб қолар эди. У киши аждодларимиз қадриятларига содик қолиб, оғир кунда бардошли бўлишга ундовчи, тутувлик-

ка чақирувчи асарлар битдилар. Эркин ҳаёт, иттифоқлик ва бирлик учун сўз ва қалам билан курашдилар. У киши миљий маънавиятимиз сарчашмаларидан баҳраманд бўлиб, камол тошган эдилар. Юсуф ХосҲожиб, Алишер Навоий сингари зотлар туттан насиҳатгўйлик йўлини изчил давом эттиришни хуш кўрадилар. Шу туфайли ҳалқимиз қалбини ром эта оладиган асарлар битишга муваффақ бўлдилар.

Адамизнинг яна бир ажойиб фазилатлари шундаки, у киши нозик қалб эгаси, ижодкор бўлатуриб, ўзлари ўша жамият зулм машинасининг ичидан жабр тортиб чиқиб ҳам юрақда гина сақлаб қолмадилар. Бирорларга ўхшаб, бирорлар устидан чақимчилик қилмадилар, сафдошларини сотмадилар, елқадошларига туҳмат тошларини отмадилар. Бу ёгини Маҳшар кунига қолдириб, ўзлари инсондек яшай билдилар. У киши йигитлигининг энг масъул дамлари қамоқхоналарда кечди, лекин буни бирордан кўриб, бирорга истагани йўқ.

У кишининг ёзганлари минг мاشаққатлар билан ҳаёт юзини кўрди, қанча курашлар эвазига босилиб чиқди. Кўп йиллар эътироф этилмади. Лекин шундай ҳам адид нолиш нималигини билмади, ёзаверди. Отамизнинг лойи бардош ва камтарликдан олинган экан, маънавий гўзаллик қаршисида асрнинг оғриқлари, жабру жафоларини тан олмадилар. У кишининг руҳи эса ижоддан чарчамасди.

Ва ниҳоят, Шуҳрат домла ўзбек адабиётида роман ёзган адаблар сарасида биринчилар қаторида саналиш шарафига муяссар бўлдилар. У кишидан «Шинелли йиллар», «Олтин зангламас», «Жаннат қидирганлар»дек чиройли асарлар қолди.

Эл севган Шуҳрат домланинг қарийб олтмиш йил давомида дунё юзини кўрган маълум асарларини ҳам, адид ёзув столида, шахсий архивида қолиб кетган но маълум асарларини ҳам ўзбек Миллий Маънавиятидан ажратиб бўлмайди. XX аср тутаб борар экан ва ўтган юз йил мобайнида ёзилган у ёки бу жанрдаги асарларнинг ҳалқ маданияти тарихидаги ўрни холис белгиланар экан, домла қалами остидан чиқсан асарлар ҳам ўз муносиб баҳосини олиши шубҳасиз. Ахлоқий поклик ва ботиний гўзаллик, аждодлар қадриятларига садоқат, оғир кунда бардошли, оиласда ва жамиятда муроса ва тотувлик учун муқаддас сўз ва қа-

лам билан қурашган адид Катта Адабиётта даҳлдор мавзуларга қўл урди ва уларнинг хуш талқинини яратди.

Отамиз ҳаёт бўлганларида шу баҳорда саксонга кирап эдилар. У киши ўрик гуллагандага тугилган эканлар. Ва шу билан бирга ўриклар қийгос гуллаган кезда, 19 апрелда қамоқдан озод бўлиб, уйга кириб келган эдилар. Шу боисдан, биз бу кунни отамизнинг қайта тугилган кунлари, деб биламиз.



**Абдулла ОРИПОВ,
Ўзбекистон Ёзувчилар уюшмаси раиси**

ШУҲРАТ СИЙМОСИ

Биз тенгилар адабиёт даргоҳига кириб келаётган пайтларимизда азамат акаларимиздан иборат ёзувчилар авлоди айни кучга тўлган чоғлар эди. Устозларимиз Гафур Гулом, Ойбек, Абдулла Қаҳҳор, Миртөмир ва Шайхзодалардан кейин ижод яловини баланд кўтариб турган гайратли бу адиллар эллик ёшнинг нариберисида эдилар. Улар ҳар йили ўнлаб роман ва қиссалар, шеърий туркумлар ёзишдан чарчамас эдилар.

Ўша акаларимиз ҳозирги кунда саксонни қоралаб қолдилар. Афсуски, бу сафдаги қаламкашларнинг кўпчилиги тирикликни тарқ этиб кетишиди. Асқад Мухтор, Туроб Тўла, Раҳмат Файзий, Шуҳрат ака. Ҳозир биз катта ёзувчиларимиздан бири Шуҳрат акани хотирлаётирмиз. Кўпчиликка маълум, Шуҳрат қатагон йилларнинг жабрини роса тортган эди. Урушни ҳам бошидан охиригача кўрган. Ҳаммаёқ омон-омон бўлгандан кейин ҳам Шуҳрат ака тинчлик кўрган эмас. Абдулла Қаҳҳор шаънига отилган маломатларнинг чанг-тўзонлари Шуҳратнинг оппоқ бошига ҳам ёғилиб турди.

Аттанг, бу меҳнаткаш адид, бир тўғрисўз инсон бу дунёning яхшиликларидан бошқалар қатори баҳраманд бўла олмади. Умуман, тарихга назар ташлайдиган бўлсангиз, ҳамма томони бус-бутун сиймони учрата олмайсиз. Заррин косаларнинг ҳам бир чети кемтиқ бўлиб тураверар экан. Бас, маълум бўлдики, ўткинчи умрни ортда қоладиган ишу аъмол давом эттириши мумкин экан. Яъни, бирордан яхши, бирордан бундайроқ ном қолар экан. Шуҳрат ақадан, шубҳасиз, яхши ном қолди. Адид Шуҳратдан катта ижодий мерос қолди.

Шуҳрат ака табиатан ҳалол, пок инсон эди. У ёшларга хайриҳоҳлигини яшириб ўтирмас, қўлидан келганча ёрдам қиласарди. Дейлик, бирортанинг тўйи, маъракаси бўлса, ўзи бош-қош бўларди. Қозон-товоқдан тортиб ўчоқдаги ўтишнинг хуш кўради. Тўй қилиб эл олдидан ўтишни хуш кўради. Энди ўйласам, хайру садақа ҳам ана шу тўйларга қўшилиб кетаверган экан.

Меҳнатдан қочмайдиган бу инсоннинг ташкилотчи сифатида ҳам Ёзувчилар уюшмасига кўп хизмати сингган. Катта ёщдаги адаблар Шуҳрат aka фаолиятини яхши эслашади. Шуҳрат aka уюшма раҳбариятида, Адабиёт жамгармасида, журналларда қизгин иш олиб борди.

Менинг ўзим Шуҳрат аканинг оғалик меҳрини си-ра унутмайман. У киши бир маҳал «Кел, иккаламиз бир суратта тушайлик», дедилар. Тушдик ҳам. Шуҳрат aka кейинчалик кўп жилдлик асарларининг бир жилдига бирга тушган ўша суратимизни киритибдилар. Мен бу нарсадан бирмунча мутаассир бўлдим. Шуҳрат aka негадир ўзидан кейинги авлод вакилари билан хўшлашаётганга ўхшарди. Адабимизни оғир хасталик кўп йиллар мобайнида қийнади. Унинг дил ҳасратларини, ҳолатларини Саид Аҳмад aka кўп таъсирили қилиб ёзганлар.


Албатта, адабиётимиз тоглари силсиласида бошини оппоқ қор чулгаган чўққи сингари Шуҳрат сиймоси ҳам доимо кўзга ташланиб тураверади.



†



**АДИБ
ХАЁТИГА
БИР НАЗАР**



†

УЧ МУНГЛИ ҚЎШИҚ, СҮНГСИЗ ИМТИҲОН

Ҳама обод бўлди,
Бўлмадим обод дастингдан...

МАШРАБ

Ҳаёт одамни умр бўйи синайди, дейишганида, унчалик эътибор қилмасдим. Бу ҳам бир гап-да, деб қўя қолардим. Янгишган эканман.

Яшаб ўтган йилларимизнинг энг баҳтли дақиқаларини эслаймиз ва уни умр деб атаймиз. Аммо шу умр бўлса, айрилиқлар, маҳрумликлар, йўқотишилар билан ўтган изтиробли йилларимизни нима деб атаймиз?

Менимча, баҳтли дамларда инсон фаолияти бир қадар суст намоён бўлади. Айрилиқ, чекланиш, изтироб дамларида инсон битта мақсад билан яшайди. Тўсиқларни бузиб ўтиш, чекланишларга, тухматларга қарши кураш жараёнида тобланиб боради. Ҳаётда ўз ўрнини топишга интилади.

Менинг болалик дўстим, олтмиш йиллик қадрдом — шоир Шуҳрат етмиш ёшини нишонлаяпти. Унинг ижод ва кураш, кураш ва ижод билан ўтган етмиш йиллик умри осонликча кечмаганини яхши биламиз.

Ҳаёт ҳаммамиздан кўра Шуҳратни кўпроқ ва кескинроқ синади.

Ўттизинчи йилларда у ҳаётга ташна, бутун вужудини шеърият қамраб олган, олам кўзларига алвон рангларга чулганиб кўринган, дунё тиниқ, шаффоф нурлардан иборат бўлиб туюлган, эртанги кунни энтикиб-энтикиб кутадиган хаёлпараст, ранглардан кўзи қамашадиган, оҳанглардан май ичгандек маст бўладиган, бир сўз билан айтганда, ер-кўкка сигмаган шоир бола эди.

Шуҳрат ўша йиллардаёқ Гафур Гулому Усмон Носирларнинг назарига тушиб қолди. Бу устозлар эртанги куннинг яхши бир шоири дунёга келаётганидан қувонган эдилар.

Республика матбуоти унинг шеърларини тез-тез

эълон қиласиган, адабий доираларда у тўгрида илиқиссиқ гаплар айтиладиган бўлди.

Ёш, умидли шоир қайнаб-тошиб ижод қилаётган бир пайтда уруш бошланди. Шуҳрат жангга кетди. Унга шон-шуҳрат ваъда қилган қалами стол устида мунгайганча қолди.

Кавказ тогларида шиддатли жанглар кетарди. Немис фашистлари Боку нефтини эгаллаш учун жон-жаҳлари билан интилишарди. Шуҳрат ана шу энг даҳшатли жангларда қатнашди. Тог сўқмоқларида, довонларда ёвуз душман билан олишди.

Жанглар тинган, чўққилар тепасида гаригина бўлиб яримта ой сузуб юрган саҳарлар да Шуҳрат кичкинагина дафтарчасини харсанг устига қўйиб, шеърлар битарди.

Мен у пайтда «Қизил Ўзбекистон» газетасида адабий ходим бўлиб ишлардим. Шуҳратнинг жангдан юборган шеърлари менга келарди.

Шуҳрат оғир жангларда кўп қатнашди, шундай жангларнинг бирида яраланиб, беҳуш госпиталга тушди. Узоқ даволаниб, охири қадрдан она шаҳри — Тошкентга қайтиб келди. Қадрдан қаламини яна қўлига олди. Ўзини ижодга урди. Душманга нафрат қўзгайдиган газабли сатрлар қоғозга тўкила бошлади. Вафо, садоқат, муҳаббат ҳақидаги шеърлари газеталарда босила бошлади. Тошкент радиоси кунора унинг шеърларини эшитиради. У Тошкентта кўчиб келган ҳарбий госпиталларга бориб ярадор жангчиларга шеърлар ўқиб берарди. Қишлоқларга бориб, фарзандларини соғинган чолларга, кампирларга, эрларидан хат кутиб интизор яшаётган келинчакларга уларни юпатадиган, кўнгилларини кўтарадиган шеърлар ўқиб берарди.

Худди ҳозиргидек эслайман. 1945 йили Ҳамид Гулом, Шуҳрат, Туроб Тўла, Мирмуҳсинлар билан Тошкент радиосидан республика аҳлини Ғалаба байрами билан табриклаган эдик.

Ўша куни Тошкент кўчалари одамга тўлиб кетганди. Одамлар бир-бирларини қутлашарди. Бирори кулган, бирори йиглаган, бирори энг яқин кишисидан жудо бўлган — улар мунгайиб бир чеккада мотамсаро туришарди.

Шундай қилиб, Шуҳрат уруш йилларининг оғир синовидан сабот билан ўтди.

Тинч, ижодий йиллар бошланди. Шоир Шуҳрат қаламкаш дўстлари билан адабиётимиз ривожига яхши-

яхши асарлари билан ҳисса қўша бошлади. Урушда кўрган-кечирганларидан баҳс очувчи «Шинелли йиллар» романи устида жиiddий ишлади. У ижодга шунчалик берилиб кетган эдики, ҳафталаб кўчага чиқмас, кечасию кундузи ухламай ёзарди. Баъзан учрашиб қолган пайтларимизда унинг ҳоргин, лекин қандайдир қувонч акс этиб турган юзларидан қилаётган ишидан ўзи ҳам мамнунлигини билиб турадик. Аммо унинг бу қувончи узоққа бормади. Ҳаёт уни яна бир синовдан ўтказмоқчи бўлди. Шуҳрат шахсга сигиниш оғатига учради. Ҳали сўнгти боблари битилмаган роман ёзув столи устида қолиб кетди. Бу унинг ҳаётидаги энг даҳшатли синов эди. Шуҳрат букилмади. Тиканли симлар орасида сабот билан, сабру қаноат билан яхши кунларни кутди. Битмай қолган «Шинелли йиллар» нинг сўнгти бобларини кўнглида ёзди. «Олтин зангла мас» романининг воқеаларини бобма-боб дилида яратиб қўйди.

Ниҳоят, у кутган кун келди. Беш йил сарсон-саргардонлик, хўрликлар тугади. Шуҳрат дилида икки романни пишишиб, она юртига қайтди. Чинакам ижодкор ҳар қандай шароитда ҳам ижод қиласи. Шуҳрат ниҳоятда қийин дамларда ҳам қалами билан дардлаша олди. Чунки у яхши кун учун ўзини тайёрлаш кераклигини биларди. Ана шундай қилмоқ учун одамнинг дилини буюк эътиқод, ҳақиқат тантанасига чексиз ишонч ёритиб туриши керак. Шуҳрат ана шундай эътиқод билан яшаганди.

Шуҳрат мана шу энг даҳшатли синовдан ҳам эгилмай, букилмай ўта олди.

«Шинелли йиллар» китобхон қўлига тегди. У кўп вақт ўтмай «Воениздат» нашриёти томонидан рус тилида 100.000 нусхада босиб чиқарилди. Оғир ва машақкатли меҳнат тантана қилди.

Шуҳрат қанчалаб шеърий тўпламлар нашр қиласи. Қўшиқлар ёзди. Бу қўшиқларни атоқли ҳофизлар ҳамон тўй-ҳашамларда, байрамларда куйлаб, қўшиқ шинавандаларининг олқишини олмоқдалар. У оғир йилларда дилига битган «Олтин зангла мас» романини ёза бошлади. Бу унинг ижодий жасорати бўлмоги керак эди. Шуҳрат бу масъулиятли ишга ниҳоятда жиiddий қаради. Тунни тонгга улаб, роман қаҳрамонлари билан дардлашар, уларнинг кечмиши ва қилмишини сатрмасатр қоғозга туширади.

Мамлакат бўйлаб ҳукм сурган тургунлик балоси уни ҳам комига тортди. Редакциялар, нашриётлар эшиги унга беркилди. Ҳаёт уни яна синовга чақирди. Барабири у ижод қилишдан тўхтамади. «Кавказ туркуми» шеърларини тугатди. «Олтин занглашас»га нуқта қўйди.

Қисқагина фурсат мобайнида Шуҳратнинг йўлидағи говлар олиб ташлангандек бўлди. Янги роман ўқувчи қўлига тегди. «Кавказ туркуми» Тошкент ва Москвада икки тилда нашр қилинди. Аммо... тургунлик фақат қишлоқ хўжалигига эмас, саноатга эмас, ҳатто маданий ҳаётимизга ҳам соя соглан, тўсиқлар ташлаганди. Ана шу тўсиқقا биринчи бўлиб Шуҳрат дуч келди. Абдулла Қаҳҳорнинг жанозасидаги нутқи, «Гулистан» журналида босилган мақоласи учун таъқиб остига олинди.

Яна синов, яна имтиҳон...

Романлари босмахоналарда, шеърлари редакция папкаларида қолиб кетди. У тенгилар олтмиш ёшларини нишонлаганларида ҳукумат мукофотларига, унвонларига сазовор бўлдилар. Аммо Шуҳратнинг юбилейи муздеккина бўлиб ўтди. Бундай муносабатларга ўрганиб қолганданми, ё иродаси кучли эканиданми, ҳарқалай ўзини тутди. Ичидаги аламларини сездирмади. Но либ юрмади. Ўзини ижодга урди, қалами билан сирлашди.

Ёш эса кетяпти, умр ўтятти. Бўлар-бўлмасга куйиб, умрни ўтказиб юбормаслик керак, — дея Шуҳрат янги — «Жаннат қидиргандар» романини бошлади.

У Ёзувчилар уюшмаси назаридан четда, жимжит яшади. Лекин бир нафас бўлсин, ижод қилишдан тўхтамади.

Тургунлик йиллари ҳам гармседек ўтиб кетди. Шуҳрат учун завқ-шавқ билан ижод қиласидиган пайт келди. Келди, аммо... Ҳаёт уни яна бир бор, аммо даҳшатли синовга тортди. У хасталаниб тўшакка йиқида. Инсоннинг тани темирдан эмас-ку, ахир! Ўттиз йилдан ортиқ чеккан изтироблари ўз ишини қилди. Камсишишлар, унугишлар, назардан четга суришлар Шуҳратнинг соглигини сўриб олди. У шу аҳволда ҳам қўлидан қаламини қўймади. Титроқ бармоқлари бошқатдан хат ёзишни ўрганди. Шу меҳнаткаш нимжон қўллар шеър ёзишдан тўхтамади. Баъзи адабиётшунослар уни Николай Островскийга ўхшатишарди. Йўқ, биродарлар, Островский бутун мамлакат эътиборида эди. У гамхўр-

лик ва эътибор билан ардоқланган эди. Унга барча имконият ва имтиёзлар яратиб берилган эди. Шуҳратни эса эллик йилдан бери аъзо бўлган Ёзувчилар уошмаси эътиборига ҳам арзитишмади.

Ошкоралик, демократия тантана қилган бугунги яхши замонамида Шуҳратнинг асарлари тез-тез эълон қилинмоқда. Лекин бу асарларни ёзиш шу нимжон қўлларга қанчалик қийин бўлганини бир тасаввур қилиб кўринг-а!

Шуҳрат катта шоир, моҳир романнавис. У ҳар қандай шароитда ҳам ижод масъулиятини унутмайдиган ҳалол ёзувчиdir.

Шуҳрат тўғрисида ўйлаганимда, ҳаёт инсонни умр бўйи синовдан ўтказади, деган гапга ишондим.

Қадрдоним, болалик ўртоғим, ҳамтақдир, ҳамқалам, ижодкор дўстим, бугун сени муборак етмиш ёшга тўлишинг билан қутларканман, қўнглимда, хаёлимда сен юриб келган паст-баланд йўлларни кезиб чиқдим. Бу нурли, нурсиз йўлларда йиқилмай манзилга етиб келиш учун бардош, матонат керак эди. Сен шу йўллардан мардона ўтиб келдинг.

Дўстим, сен адабиётмизга астойдил хизмат қилдинг, уни яхши асарларинг билан бойитдинг. Бугун сен қуда-қудагайлар, келин-куёвлар, неваралар қуршовида иззат-ҳурматда яшаяпсан. Инсон боласига бундан ортиқ баҳт борми? Айниқса, китобхон муҳаббати чеккан азиятларингга берилган олtingга тенг мукофотдир.

Азизим, баҳтли кунларинг кўп бўлсин! Сен билан ҳалқимизга жуда чиройли китоблар совға қиламиз, деган умиддаман.

Етмиш ёшинг муборак бўлсин, қадрдоним!

РЎШНОЛИК КЎРМАГАН ШОИР

Азизим, олтмиш йиллик қадрдоним, наҳотки, энди йўқсан? Наҳотки шу ёруг жаҳонга ошиқ-сармаст кўзларинг бир умрга юмилди?

Ҳаёт ва ўлим оралигидаги жуда ҳам қисқа масофа ни қанчалик машаққат билан босиб ўтганингни қандоқ қилиб унугтай?! Ҳаёт бизни ўтдан олиб сувга, сувдан олиб ўтга ташлади. Жазирама саҳроларда сарсон-саргардон кездик. Ер ости конларида тирноқ билан маъдан кўчиришга мажбур қилишди. Тугилган оstonамиздан олисларга иргитиб ташлашди. Жондан севган қа-

ламимизни қарсиллатиб синдиришди. Лекин иродамизни синдиrolмадилар. Кўксимиздан имонимизни, қон-қонимизга сингиб кетган Ўзбекистон меҳрини юлиб ололмадилар.

Сен ижод учун, адабиёт учун тугилган эдинг. Ҳеч нарса — айрилиқлар, азоб-уқубатлар шеърият деб аталиши мўъжизакор кучнинг йўлига гов сололмади. Бир донишманд, қўшиқчининг оғзини бекитсанг, кўнгли билан айтади, деганди. Сенинг шеърларинг қоғозга эмас, кўнглингта битиларди.

Дўсттинам, сен чўмолидек меҳнаткаш ижодкор эдинг. Романларингни ҳар гал варақлаганимда, игна билан қудуқ қазиган қўлларингни гойибона силаб қўяман.

Инсоннинг икки умри бор: бири ҳаётлигида, бири оламдан ўтганида, дейдилар. Иккинчи умр асосий умр эмиш. Билмадим, бу гапни қайси бир донишманд ўйлаб топдийкин? Бу гап биронта қорни тўқ, омади чопган одамдан чиққан бўлса ажабмас. Ахир, инсон бу дунёга нима учун келади? Еруг жаҳоннинг жамолига тўйсам, роҳат-фарогатда яшасам, худо берган умримни одамдек яшаб ўтказсам, дейди.

Сен адабиётимиз учун тинмай меҳнат қилдинг. Қанчадан-қанча шогирдлар етиштиридинг. Аммо қадр топмадинг.

Узоқ йиллар интиқ кутган ҳуррият замони келган пайтда яна озроқ яшасанг нима қиласди? Мен ўзбекман, дейишга қўрқадиган, Ўзбекистон менинг Ватаним, дейишга журъат қилолмайдиган замонлар ўтиб кеттанини оз бўлса ҳам ўз кўзинг билан кўрганинг менга таскин беради. Тўлиб-тошиб ёзадиган пайт келганда тиљдан қолдинг, ҳеч бўлмаса шунча китоб биттан бармоқларинг қалам тута қолса нима қиласди? Армону қувончларинг, ҳасрату надоматларинг ичингда қолиб кетди-ку!

Фашизмга қарши курашда кўксини ўққа тутган қаҳрамон жангчи эдинг. Тиканли симлар орасида лахтак қоғозларга роман битган сабрли ёзувчи эдинг. Дўст ғамидан ғамгузор, қувончидан қувонган инсон эдинг.

Қани эди, бу гапларнинг биронтасини тирик пайтингда ўзингга айтган бўлсак, бунчалик алам қилмасди.

Бир ўкинчга бир юпанч, дейдилар. Машаққатли бўлса ҳам кечирган умринг бекорга ўтмади. Бутун ҳаётингни, уйқусиз тунларингни бағишлиаган адабиётимиз хазинасига жуда қатта бойлик ташлаб кетдинг.

Бундан кейин ўтадиган ижод гурунгларида бўлмаслигингни, олтмиш йил ўз саҳифасида шеърларингга жой берган қадрдан газеталаримиз таҳририятлари остонасидан ўтмаслигингни, уруш ва урушдан кейинги оғир йилларда бизга нон берган Тошкент радиосидан овозингни эшитмаслигимни, «зангори экран»да бошингга эрта қиров тушган нуроний қиёфантгни кўрмаслигимни ўйлаганимдА, бутун вужудимни аллақандай мунг, ҳазинлик чулгаб олади.

Бир келмакнинг бир кетмаги бор, деган гапга қандоқ кўнникай!

Юрак-багримни ўртаб кетдинг-ку, азизим!

ТИЛДА ҚОЛГАН НУТҚ,

Шуҳрат каттакон адабиётимизнинг заргар ижодкорларидан эди.

Энди бу гапни айтишга тилим айланмайди. Ахир, олтмиш йил ҳар куни ҳеч бўлмагандা бир мартадан кўришиб турган, қувончларингдан қувонган, гам-андуҳларингдан ўртанган энг яқин кишинг бир умр қайтиб келмас бўлиб йўқлик қаърига сингиб кетса, ўртанган, ўксиган кўнглингга қайдан таскин топасан?

Ич-ичимдан, «Э, худо, яхши одамларнинг умрини узоқроқ қилиб яратсанг бўлмасмиди?» деган аламли бир нидо бўғзимга келиб урилади.

Инсон тирик экан, бу дунёга сира ўлмайдиган бўлиб келгандек, ҳаёт юкини орқалаб юраверади, юраверади.

Ҳаёт бировга узоқ йўлни яқин қилса, бировга яқин йўлни узоқ қиласди.

Шоир Шуҳрат учун яқин йўллар жуда узоқларга чўзилиб кетди. Дўстлари уч кунда босадиган йўлни уйиллаб босиб ўтиши керак бўлиб қолди.

У ухлаб тушига кирмаган «гуноҳлари» учун 25 йил муддатга озодикдан маҳрум қилинди. Энди ижоди кучга тўлган, завқ-шавқ билан, илҳом билан ижод қилиб турган навқирон ёшида тугилган она юрти — Ўзбекистондан олисларга ҳайдаб кетилди. Урушда кўрган-кечиргандаридан баҳс қилувчи «Шинелли йиллар» романи поёнига етмай, нуқта қўйилмай қолиб кетди.

Адабиётда эндиғина ўз ўрнини топаётган, битта болага ота бўлган шоир хор-зорликда, азоб-уқубатлар ичида беш йил сарсон-саргардан бўлиб қайтиб келди.

Бу азоблар унинг иродасини буқолмади. Тушкунлик исканжасига қўлини тутиб бермаган Шуҳрат гина-кудуратларни унугиб, яна ўзини ижодга урди. «Шинелли йиллар» қайлардадир йўқолиб кетган эди. У кўз нурини тўкиб романни қайтадан ёзиб чиқди. Ва, ниҳоят, роман ўқувчи қўлига тегди.

Аста-секин фарзандлари ҳам, китоблари ҳам кўпая борди. Романи босилиб чиқсанда, ўғли Фикрат тўққиз ёшга кирганди. «Олтин зангла мас» дунё юзини кўрганда, ўғли Хондамир, «Жаннат қидиргандар» босмага топширилганда, ўғли Бобур дастёр бўлиб қолганди.

Унинг уч ўғли уч роман бўлиб дунёга келганди.

Унинг арзандагина қизи Зебо бир эмас, бир неча шеърий гулдаста бўлиб туғилди.

У ўз ҳаётидан рози эди. Китоблари севиб ўқилаётганидан қувонарди. Бу қувонч уни тинимсиз ижод қилишга ундарди. Аммо... қандайдир бир кўринмас куч уни дўстлари сафидан нари итариб турарди. Нега бунаقا бўлаётганини у билмасди. Тенгқурлари тақдирланган пайтларда у дилдилдан қувонарди. Аммо унинг ўзи... Инсон таги темирданмас, ахир: у ҳам вақти келиб емирилади. Бу хил муносабатлар бир куни келиб ўз ишини қилиши мумкинлигини ким ўйлапти, дейсиз?

Ким билади, ёзадиганингни тезроқ ёзиб қол, армон ўлиб қолмасин, деб худо кўнглига солганми, Шуҳрат кечаю кундуз тинмай меҳнат қиласарди. Охири у тиљдан қолди. Бармоқларининг қалам тутишга мажоли қолмади. Энди у на бир сўз айта олади, на дилидаги гапларини қозогзга тушира олади.

Қўксида қайнаган илҳом тутён урганча қолди. Ақлида ғалаён қилаётган фикрлар ғалаён қилганча қолди.

Шуҳрат ўн йил шу алфозда яшади. Шу ўн йил ичида унинг йил ора янги шеърий тўплами босилиб турди. У то дардга чалингунча бу шеърларни ёзиб қўйган эди.

Шуҳрат умрининг охирги йиларида ёзни ёзувчи-ларнинг Дўрмондаги ижод уйида ўтказарди. Бошқа пайтларда келолмасди. Неваралари таътилга чиқсан пайтдагина келарди. Улар боболарини қўлтиғидан олиб, саир қилишга олиб чиқардилар.

Богимда авжи луччак шафтолилар пишган пайтда Шуҳратни олиб киришарди. Бир вақтлар сўзга чечан, суҳбати ширин Шуҳрат энди мўлтираб, жимгина ўтиради. Ичида тўпланиб қолган гапларини айттолмай, аса-бийлашарди.

Шу хил сўзсиз, бир-биримизга мўлтираб қараб ўтиришларимизнинг бирида Шухрат алам билан кўксига муштлай бошлиди. Қўрқиб кетдим. Нега унақа қилаётганини билолмай, ҳайрон бўлиб қараб турардим. Ўрнимдан туриб елкаларидан қучоқлаб, юзларини силадим. Унинг кўзларидан юм-юм ёш оқарди. У ичим куйиб кетди-ку, багрим ёниб кетди-ку, демоқчи бўлган эди.

Бир қуни у пешона терини бармоги билан сидириб кўрсатди. Бу — пешонам бунча шўр бўлмаса-я, дегани эди.

Шундан кейин у чўнтағидан гижимланган бир қозг олиб узатди. Узаттан қоғозни тиззамга қўйиб, гижимини ёздим. Унда энди ёзувни ўрганаётган болаларнинг машқига ўхшаш қингир-қийшиқ ёзувлар бор эди. Ҳарфларнинг бири бутун қоғозни энлаб кетган, баъзилари чумолидек майда, бири нималигини билиб бўлмайдиган ҳарфлар эди. Минг уринсам ҳам ўқиёлмадим. Неварасидан ўқиёласанми, деб сўрадим. Ўқиёлман, деди. У бошқа қоғозга «хат»ни кўчирган бўлди. Бола ҳам ҳали унчалик ёза билмас экан. У иккинчи синфда ўқир эди. Ёзувни бир амаллаб ўқидим:

«Меҳнатни ўнг қўл қилади,
ТILLA соатни чап қўл тақади...»

Бу икки сатр Шухратнинг таржимаи ҳоли эди.

Бу икки сатр унинг орзу-армонлари эди.

Бу икки сатр ўксик қалбнинг аламли нидоси эди...

Шухрат кетди. Қайтиб келмас бўлиб кетди. У хайрдеёлмади. Ҳатто қўл силтаб хайрлашолмади ҳам. У сўзсиз, жимгина оламдан ўтди.

Кўз ўнгимда у билан соатлаб бир-биримизга жовдирраб қараб ўтирганларимиз қолди.

У дунёдан ном-нишонсиз кетмади. Ҳалқига уч роман, ўнлаб шеърий тўпламлар ташлаб кетди. Қалб ҳарорати, юрак қони билан битилган бу китоблар адабиёт хазинасидан муносаб жой олди.

Шухрат баҳона қачонлардир айтишим керак бўлган гапларни айтиб, ичимни бўшатиб олдим.

Дўстим, сенсиз багрим ҳувиллаб қолди-ку!

АЙ, ШУХРАТ АКАМ-А...

Шұхрат аканинг номларини тилга олишим билан күз одимда бақувват, барваста, оппоқ соchlари силлиқ тараплан, күкраги қалқондек магрур ва ҳаракатчан инсон келади. «Инсон» дедим, ўзимдан узоқлатгандағы бўлдим, йўқ, инсоним келади.

Мен у киши билан жуда унақа қалин, сирдош бўлмаганман, бундай бўлишга интилганим ҳам йўқ. Бизнинг муомала — устоз-шогирд, ёши улуг адиб билан ёш қаламкашнинг ўртасидаги холис муносабатлар дарражасида эди. Илло у киши ўзларини шундоқ тутар, мен ҳам ишқаланиб боравермас ва ўзимни жилла тортмас ҳам эдим. Қолаверса, ичимда...

Ичимдаги ҳадемай сиртимга чиқади: ана шу жараённи кўрсатувчи бир неча мулоқотлар ҳақида ҳикоя қилмоқчиман.

I

Усмон Германияда хизмат қиласади. Бир куни Эркин қўнгироқ қилиб: «Шукур ака, Усмон отпускага келди. Соат олтиларда уйингизнинг пастидаги «Лаззат» кафесига борамиз...» деди. Мен айтилган вақтда иссиқ кийиниб, пастга тушдим. Улар икковлон келиб туришган экан. Усмоннинг эгнида мalla, пахмоқ пўстин. Жуни ўнг қилиб тикилган бундай пўстинни сира кўрмаган эдим. Бориб қучоқлашиб кўришдим.

— Айиқ бўп кетинг-а!

— У ёқда шундоқ ҳам бизни «русский медвед» дейишади, — деб кулди Усмон.

Кафега кириб ўтиридик. Ёш офицернинг костюми ҳам антиқа эди. Бунинг устига, дастурхонни тўлдириб ташлатди. Мен кулиб, «солдат ҳам бой бўладими?» дедим. У хорижда хизмат қилаётган совет офицерларига яхши маosh тўланишини, умуман, у ерда бизнинг зоббитлар ўзларини эркин тутишларини айтди. «Бошини силаб қўйсак ҳам писибгина туради. Лекин иложи бўл-

са, билагимизга оғиз солгиси келади. Айниқса, ёши улуглари бизни ёмон кўради...

— Лекин ёшларида ҳам бор экан, — деб ўйчан давом этди ёш шоир. — Бир оқшом мана шундай ресторонда ўтириб эдик. Ундан столда бир немис йигит билан бир қиз ўтирган экан. Нимаям бўлиб дент, «Шу қизни тансага тортолмайсан», деди бир шеригим. Ўрнимдан шартта турдим. Уларнинг столига бориб, йигитдан сўрадим: «Хоним билан бир тансага тушайлик». Биз ўрисча гапирадик. Улар ҳам биз каби ўрисчани билиши шарт, деб ўйлардик. Ҳакиқатан ҳам йигитнинг қизи русчани биларкан: «Почему не спрашивашь у меня?» деб қолди. «Хўп, сендан сўрайман», дедим. «Это другое дело», деди-да ўрнидан турди. Бир-икки минут танса қилгандан кейин жойига обориб қўйдим. Эркакка раҳмат айтдим. Эркак шод бўлди... У ерда ҳатто хотинига бегона эркак яхши гапирса, ҳурмат қилса, эри хурсанд бўларкан... Хуллас, биз анча ўтиридик. Ресторондан чиқаётганда, ҳалиги иккови келиб, мени тўхтатди. «Эртага фалон соатда зоопаркнинг эшиги олдида учрашайлик», деди. Мен ваъда бердим. Биз офицерларга имконият берилган эди... Эртаси борсам, икковигинаси турибди. Суҳбатлашиб, фонтанни айландик. Морожний олдик. Булар ҳали турмуш қуришмаган — севишганлар экан-да... Кейин қиз менга айтди: «Юр, сенга Берлиннинг энг ажойиб жойини кўрсатаман. Сен бизга ёқиб қолдинг. Хурсанд қилмоқчимиз», деди. Кетдик. Кетяпмиз, кетяпмиз. Бир пайт бир тепаликка чиқиб қолдик. Пастда тиканли сим билан ўралган бир ваҳимали вайронга ётибди... Кўнглимга сал ваҳима тушди: биз маглублар мамлакатида эдик, Шукур ака. Улар биздан қўрқарди, холос. Баъзида айрим солдатларнинг йўқолиб қолганини эшиштардик: немислар ўлдириб, гумдан қилворишарди. Изи топилмас эди...

— Шундай экан, кўпчилик бўлиб юрмасдингларми?

— Уч-тўртта бўлиб юрардиг-у, ким билади ўша куни олифтачилик қилдимми, ресторондаги жасоратли офицернинг обрўсини сақдагим келдими, ёлгиз чиқувдим. Қолаверса, буларнинг таклифи ўзи мени қизиқтириб қўйган эди: галати-да... Хўп, шундай қилиб, ўша ҳайҳотдек вайронга устидан чиқиб қолдик. Бироз қараб турдим. Кейин: «Энг чиройли жойларинг шуми?» деб сўрадим. Қиз тап тортмасдан: «Ҳа, — деди. — Бу вайронга бизнинг энг улкан опера театримиз бўлган. Уни Советлар вайрон қилишган. Томоша қил». Каракт тортиб кетдим. «Аттанг, — дедим кейин. — Сен бизнинг ватанимизга борсанг, мени топ. Мен сенга минглаб

театрлар тугул шаҳарларнинг қабристонини кўрсата-
ман. Сизларнинг ишларингни...»

— Яхши жавоб айтибсиз, — дедим.

— Ҳа, Шуҳрат акам хурсанд бўлдилар, — деди Ус-
мон. Кейин Эркинга қўлини чўзди. Эркин чўнтағидан
узунасига буқланган «Меҳнат ва турмуш» журналини
олиб берди. Усмон журналнинг тегишли саҳифасини
очиб, олдимга суриб қўйди. — «Шарқ юлдузи» пўстин-
да қолди... — Кейин қўлининг орқаси билан журналга
урди. — Эй, бу Шуҳрат ака қанақа одам-а! Йўқ, мен
бунақа меҳрибон инсонни кўрганим йўқ. Ишонинглар.
Бугун танишдим, холос! Бир соат бўлди. Журнал ре-
дакциясига излаб бордим. Учрашдик. Ярим соат гап-
лашдик. Мендан Германия ҳақида сўрадилар. «Шинел-
ли йиллар»ни ёзаётган эканлар... Ҳалиги воқеани айт-
иб берганимда, мени ўпдилар. «Сени шундай тасав-
вур қиласдим», дедилар...

Журналнинг очиқ турган бетига тикилсам, Усмон
Азимовнинг шеърлари: «Мен сени ҳеч кимга бер-
майман...», «Мени севинг ва мендан нафратланинг...»

«Оқ йўл!» Шуҳрат...

— О-о, табриклайман, Усмонжон... Бу — биринчи
чиқишингиз-а матбуотда!

— Биринчи. Унгача шеър ёзишимни Эркин, сиз,
Муҳаммаджон, Ҳалима яна бир-икки киши билишарди...

— Шуҳрат ака-чи?

— Юборувдим-да шу шеърларни. Таваккал «Шарқ
юлдузи»га. Шуҳрат ака у ерда ишлар эканлар, қўлла-
рига тушпти. Мана, «Оқ йўл» билан чиқариптилар. Нимага? — Усмон — қайсар, баъзан шафқатсиз бўлиб
кетади. Аммо унинг таъсирланиши ҳам осон. Шунда
қарасам, кўзи гилт ёшга тўлган. — Нимага? — деб
панжаларини очиб кўрсатди. — Мен нима каромат
кўрсатдим у кишига? Нега мунча одамгарчилик, меҳ-
рибонлик? А, Шукур ака? Буни қандай тушунса бўла-
ди?.. Ёки катта шоирларнинг ҳаммаси ҳам шундайми?

— Йўқ, — дедим. — Мен насрда фақат Абдулла
Қаҳҳорнинг шунақалигини билардим.

— А, у киши сизга хат ёзган-а?

— Қизик. Абдулла ака Шуҳрат акани яхши кўрар-
ди, назаримда. Олтмиш йилларидан Шуҳрат ака ба-
ковуллик қилган... — Кейин, Шуҳрат ака билан ўша
даврада иккинчи марта мундай бемалол танишганимни
айтиб бердим.

Абдулла аканинг Дўрмондаги боғи. Музика, ўйин-

кулги. Бирор кириб, бирор чиқяпти. Уй олдидағи атрофи очиқ айвонда казо-казолар ўтиришишти. Раҳматли Шароф ақаям бор. У киши кетгач, Шукур Бурҳонлар келиб қолищди. Тепада жой бўлмаганидан пастдаги санобарлар тагига тортишди. Абдулла ака мамнун, пастга эниб, Шуҳрат аканинг ёнига бориб ўтирди. Бирпасдан кейин биз тарафга йўл олдилар. Биз — бир гуруҳ улфатлар бир саф бўлиб ўтиргандик: Турғун Азизов, Ўлмас Умарбеков, Учқун Назаров, Ўтқир Ҳошимов, мен... Устоз келиб дастурхонга дастлаб тикилдилар-да:

— Шишаларнинг ранги ўчиб кетипти-ку? — дедилар. Кейин елкалари оша қараб, чақирдилар: — Шуҳрат! Шуҳрат, қайдасан? — Шуҳрат ака айвон биқинидаги гаражда — товоонхонада эканлар. Лорсиллаб-гурсиллаб етиб келдилар. — Фақат вино қопти, — деди Абдулла ака. — Буларни олдиргин-у — конъяк қўйдиргин... Буларни биласанми? Шулардан фойда бор... — Биламан. Мана бу шляпасини ечмай ўтирган — Шукур, — деб санай кетдилар Шуҳрат ака ҳар биттамизга кўз қисиб. Кейин буюрдилар: — Қани бўлмасам, юрорқамдан, Шукур!

Орқаларидан бордим. Учта конъяк, бир лаган газак бердилар.

Кейин:

— Андижонга кетмоқчисизларми? — деб сўрадилар.

— Ҳа, — дедим. — Тўлан Қўзибоев уйланаётган экан. Умарбеков билан бирга ишлайди...

— Яхши ўтказиб келинглар... Шошма, йўл узоқ. Кетаётганларингда, менга учрагин. Кўп нарса ортиб қолади ҳали. Йўлда еб-ичиб кетасизлар...

— Раҳмат, Шуҳрат ака.

— Мен сенинг асарларингни ўқиб тураман. Ҳеч кимга ўҳшамайсан. Шу томонинг менга ёқади. Лекин сюжетни қизиқроқ қилиш учун французларни кўпроқ ўқиши керак...

— Хўп, Шуҳрат ака.

2

Мен ушбу воқеани айтиб берганимдан кейин Усмон пешонасини икки бармогида қисиб:

— Қаранг, йўлга деб... йўл гаминиям еб... Йўқ, у одамга мен қойил бўлдим, — деди. — Қайтиб кетгунингча уйга бор, дедилар. Албатта бораман... Эй, ке-

линглар, ўша одам учун ичайлик! Мен юртни соғи-
ниб келган эдим. Умуман, Берлинда мұваққат экан-
миз, керилишлар ҳам жонга теккан эди... Бир гал
бир кампирни ўрнидан турғизганимда йиглаб юбор-
ди. Күприқда ўтириб қолган экан. «Қўлингни бер»
дейман, бермайди. Худди қўлини берса, мен уни сув-
га отиб юборадигадекман. Охири тортиб турғаздим-
да, кетдим. Ҳей ундай жойга бориб қарасам, яна
ўтириб опти...

— Қани, Шуҳрат акам омон бўлсин... Эй, у одам
чиндан ҳам қизиқ. Ўзининг яхшилигини оддий бир
ҳаракатдай билади. Худди шундай қилиши керақдай...
Ҳолбуки мени, мени... шоир сифатида маълум қилди!
Бунинг маъсулиятини бўйнига олди. Тағин «сени шун-
дай деб тасаввур қиласдим», дейди. Демак, мени тасав-
вур ҳам қилипти, ўйлапти.

3

Бир куни Булунгурга борадиган бўлиб қолдим.

— Усмонжон, — дедим телефонда, — Булунгурда
тўй бор. Ўрол деган жиянимнинг тўйи. Бугун тонгда
биттаси айтиб кетди... Ҳозир соат тўрт. Ярим соатдан
кейин Марказий телеграфдаги касса олдида учрашсак.
Мен пул оламан. Бир таксига ўтириб кетамиз... Икки
соатлик йўл...

Мен Усмоннинг феълини билардим: бу тариқа «ил-
тимоссиз, вақтингиз борми-йўқми?» деб айтиладиган
илтимосларга кўра, шунача дангал гапни хуш кўради.

— Шундайми? — деди.

— Шундай, — дедим.

— Бўпти, ўша ерда учрашамиз.

Телеграфга етиб, троллейбусдан тушсам, кассага
чиқаверишдаги зинапоя устида Усмон нақ Шуҳрат ака
билан қучоқлашиб кўришаётган экан. Бориб мен ҳам
Шуҳрат ака билан кўришдим-у, узр сўраб, кассага ин-
тилдим. Қарасам, дарчаси ёпиқ, ичкаридан бир аёл
кетиш тарааддудини кўряпти. Ойнани тақиллатиб, омо-
нат дафтарчамни кўрсатдим. У «йўқ, кассир кетди»
деган ишора қилди. Мен ойнани тақиллатага бошладим:
«Пул олишим керак! Мошина кутяпти! Илтимос сиз-
дан...» Аёл бош чайқаб-чайқаб, нари томонга очилади-
ган эшиқдан чиқди. Эшик ёшилгандан кейин мен ҳам
ташқарига чиқдим.

Шуҳрат ака:

— Ҳа, қовоқ-тумшугинг осилиб кетди? Тинчликми? — дедилар.

— Пул ололмадим, кассир қетиб бўлган экан, — дедим.

Усмон орага тушди.

— Фозил Йўлдош совхозига бормоқчи эдик. Шукур аканинг жияни тўй қилаётган экан.

— Шуми? — деб кууди Шуҳрат ака. — Шунгаям қовоқ-тумшуқ... Қанча керак? — Кун иссиқ бўлишига қарамай кийиб олган оқчил костюмлари чўнтағидан бир қопчиқ чиқардилар. — Айт, айт. Қанча керак? Фозил Йўлдош Ҳа-а, бу ёқдаям қариндошинг бор эканде? Менинг ҳам битта бувим ўша томонлардан Тошкентга тушган. «Мангит момо» дейишарди...

— Шу, бирон беш юз сўм бўлса, бўлар, — дедим.

— Ма. Сени қара-ю... Боринглар, ўйнаб келинглар. Юртни кўринглар. Ҳар жойнинг тўйи ўзгача бўлади. Ўрганиш керак. Кейин уни ўрни билан ишлатиш керак. Қизиқ қилиб... Француzlарга ўхшаб. Улар жуда уста...

Биз шу ердаёқ бир шахсий машинани ушлаб, Булунгурга жўнадик. Ҳожатимиз чиқсан, кайфимиз чоғ эди... Билмадим, Шуҳрат ака учраб худди ўша вақтда ўша маблагни бермаганларида, қариндошларни хафа қилишим тайин эди. Чунки бизга кўз тикиб ўтиришган экан. Ҳатто базмни бошламаган экан. (Усмоннинг ҳам боражагини уларга телефон қилиб айтувдим. Улар Усмонни яхши билишар, бир гал Рауф Парфини ҳам олиб, Сурхондарёга ўтар чоғда акамнинг уйига қўнган эдик, ўша кечаси жиянларим шоирнинг бутун бошли бир китобини қўллэзма қилиб кўчириб олишган эди).

Хуллас, тўй ўтди. Йидини Тошкентга қайтдик. Мен дарҳол кассага бориб, пул олдим. Шуҳрат акани «Шарқ юлдузи» редакциясидан топдим. Пулни узатгандим, қўлимни қайтавориб, нима дедилар денг:

— Мен қарзга берувдимми сенга? Шу қаламкаш укамнинг ҳожатини чиқардим, деб хурсанд бўлиб юрсам, бунинг ишини қаранг! Нима, шу хурсандчиликдан маҳрум қилмоқчи бўлсанг, оламан-у...

— Бўлди, Шуҳрат ака.

— Бой бўлгин. Рўмонларинг чиқсин, ўшанда ман ўтириб қолган бўламан. Мани йўқлаб борасан... Усмонга салом айт. Ўзини эҳтиёт қилсин. Сандан ёш. Акалик қил... А, тўйда кўп ичмадими? Яхши, яхши бўлти...

Мен Усмон билан учрашиб, Шуҳрат ака пулни олмаганларини айтдим. У сўлжайиб, елкасини қисди.

— Қизиқ одам... Эй, Шукур ака, иккимиз ҳам би-ир тупканинг тушибидан келганмиз. Шуҳрат ака бу ерлик. Бизларни туташтирадиган нарса — фақат ўзбеклигимиз... Йўқ, адабиёт, а? Тавба, ундай десам, Шуҳрат ака тенгли қанча шоири ёзувчилар бор. Нимага бу одам ҳаммасидан ажралиб туради... Айтмоқчи, у одам фақат сизу менга эмас, бошқа адилларгаям яхшилик қилиб юрар экан. Қайси бирининг тўйи бор, азаси бор, барида бошқош... Вақтим кетди, дейишни билмайди. Ломбиллаб бораверади. Тавба.

— Мен ҳам ҳайронман, ука.

4

Мени тагин бир нарса ҳайрон қолдирдигина эмас, кўнглимни вайрон қилди.

Элликка кириб қолдим. Ўшанда халқ ёзувчиси, давлат мукофоти лауреати деган унвонлар олдим. Сир эмас, анчайин қаламкашлар ҳам бундай тугал саналарда Ёзувчилар уюшмасига кириб, юқоридаги маҳкамаларга мактуб битиб, ўзларининг ийликларини нишонлашни» сўрашар, табиийки, шу асно бир кўриниб қолишини, балки бирон нишонга зга бўлишини исташар эди. Қолаверса, «юбилияр»ни тугилгану тугилмаган вилюятларига олиб бориш, китобхонлар билан учраптириш, сўнг сарполар кийдириш — булар расм эди.

Бироқ, камина бу борада батамом тескари фикрда эдим. Ҳамон бу фикрим ўзгаргани йўқ, гарчи...

Ўшанда Дўрмонда эдим. Ёмғир ёғиб турганди. 24 март. Мени йўқлаб Усмон, Эркин, хотиним, қизим боришиди. У ерда ижод қилаётгандардан уч-тўрт киши қўшилишиди. Низом Комилов, Машраб, Николай Гадунаев...

15-хонани (люкс хонани) икки соатта ижарага олиб ўтирик. Кейин меҳмонлар кетишиди. Бор гап шу. 50 ёшимни нишонлаб бўлган эдим.

Ўша кезларда Ёзувчилар боғига қўшни бир боғ Адабий жамгармамиз томонидан сотиб олинган ва ерсиз адилларга бўлиб берилганди. Менгаям 5,5 сотих ер текканди. Баҳорнинг ўтишини кутдим. Ерни тартибга келтирмасдан бурун бирон нарса қилиш — фойдасиз бўларди. Ёзгача денг, пули бор ҳамкасларимиз имо-

рат қуришга киришиб кетиши. Бизнинг бог — иккинчи дача машиналар юрадиган йўлга айланди. Айниқса кранлиси юрса, ерни чўқтириб юбораркан. Хуллас, ёзга чиқавериб, ернинг атрофини четан девор билан ўрашга тутиндим.

Бир куни ҳаво дим, иссиқ эди. Мен кичкина ўғлим Жаҳонгир билан катта йўл ёқаларидан судраб келганимиз ҳар хил шохларни ерга қадаб, тагини шиббалаб, четан қураётган эдик. Каттакон дарвозадан яп-янги мовий «Волга» кириб келди. Тўхтаб сигнал берганди, мен бошимни кўтариб қарадим. Қандайдир таниш киши кўрингандек бўлди. Тахминан эшикча ўрнатаман деган жойдан нарёқча чиқсам, Шуҳрат ака мошинадан тушяпти

— Салом, Шукур ака! — деб бақирди рулда ўтирган Бобур. Кейин ниманидир қўлтиқлаб уям ерга тушди.

Шуҳрат акага яқинлашувимоқ бағрини очди. Кулиб, чаккамдан ўпиб:

— Кўпга кир. Эллик ёшга бир неча марта кириб чиқ, — дедиларда, ўғилларининг қўлидаги тугунни олиб очдилар. Банорас тўн чиқди, белбог чиқди, дўппи чиқди. Мен титраб кетиб, қотиб қолдим. У киши ҳеч иккиланмасдан чопонни елкамга ёптилар. Шляпамни олиб, дўппини кийдирдилар. Белбогни боғлаб:

— Ана энди ўзбек ёзувчиси бўлдинг, — дедилар. Кейин қўлларини фотиҳага очдилар. — Обрули адаб бўл, Шукуржон. Ҳея кимга номардлик қилма. Ундейлардан қоч... Билгингки, сен ўзбек ёзувчисисан. Шу ўзбек адабиётининг ўсиши учун хизмат қил. Шунга маҳкумлигингни тан ол, болам...

Мен йиглаб юбордим.

— Нега энди?

— Нима, нима — «нега?»

— Бу... мени сийлаш...

— Бир-биримизни сийлашимиз керак. Шундай кунларда йўқламасак, қачон йўқлаймиз, Шукур?.. Сен ёзувчисан, вассалом. Ўткир ёзувчи бўл. Саксонга кирганингда ҳам ўрган, ўқи, кузат... Гапларимга худо шоҳид. Оллоҳу акбар!

Учловон фотиҳа ўқидик. Кейин Шуҳрат ака жеркиброқ сўради:

— Нега бировга билдирамадинг? Ман ҳам яқинда эшиздим, Усмондан...

— Энди, нима кераги бор... Ўзимни кўрсатиб, нима топаман, Шуҳрат ака? Ёзганим — амал...

— Бир француз ёзувчисининг гапини эслатди бу гапинг, — деб жилмайди Шуҳрат ака.

— Ҳа, — дедим. — Флобердаям шундай нарсани ўқувдим... Айтиб берайми? Ҳўп... Флобер элликка киритти... Юринг, сояга ўтайлик, Шуҳрат ака...

— Ҳечқиси йўқ. Ўзинг кўчат ўтқаз, бօғ қил... Кейин сояда ўтирамиз. Эссиз, дараҳтлар дабдала бўпти... Ҳўш, Флобер нима деган экан?

— Элликка кирганини ўша куни эслаган экан. Мопассантга хат ёзибди. «Дорогой Ги, приезжай пожалуста. Милий москвич оставил у меня русскую водку. Вильям. Сегодня мне исполняется пятьдесят лет...»

— О, Бобур, эшитдингми? Худди шундай деган... «Милий москвич» Тургенев бўлса керак?

— Ҳа, — дедим. — Ҳолбуки у ўшанда олам танийдиган ёзувчи бўлган. «Бовария хоним»ни ёзган... Шуҳрат ака, улар таъмани билишмас экан. Айниқса, ҳукуматдан. Уларда ёзувчилар уюшмасиям бўлмаган экан... Қолаверса, Флобернинг ўзи шунаقا — холис, мағрур бир инсон ўтган экан. Лекин, кечирасиз, Шуҳрат ака, мен уларга тақлид қилганим йўқ. Ўзим, ўзим уялман: элликка кирдим, нишонласам, деб юргандан кўра, ўзимни бўгиб...

— Бас, бас! — Шуҳрат ака бир зум сукутга толиб турдилар-да, лаблари алланечук учиб, мени яна қучдилар. — Омон бўл. Лекин бундай яхлит саналарни яширма. Унда яна сени излаб келишимга тўғри келади...

Шуҳрат ака яна мошинга ўтиридилар. Бобуржон ҳайдаб кетди. Мен сарпони ечиб, қўлтиқлаб, пайҳон бўлган дараҳтзорга кирдим. Ўглим донг қотиб турарди. «Ким у, ада?» деб сўради. «Қўявер», дедим. Кейин шошиб, у инсоннинг кимлигини тушунтира кетдим.

— Жа, қизиқ-е, — деди уям. — Ғалати эканлар... Сиз у кишига бирон нарса кийдирувмидингиз?

— Бачканা бўлма!

Кейин буқчайган шафтоли томирига ўтиридим. Ҳеч ўрнимдан тургим келмас эди. Кун иссиқ, чигирткалар чириллайди. Лекин мен буни сезмас, чунки бошқа бир фарогат оғушида эдим: бу фарогат масканини таърифлаб бўлмайди. У соя-салқин бօғ ҳам эмас. Ана шундай боғдан ҳам салқинроқ, ҳар гиёҳи, ҳар кўчати тилли-забонли, осмони ҳам, тупроги ҳам меҳрға йўғрилган бир ажиб-афсонавий маскан эдики, шундай ҳолатта ҳам тушиш мумкинлигини биринчи марта ҳис этишим эди.

Меҳр, қадр, сенга шараф-шон бўлсин! Сизлар чиқиб келган қалб эгаси то абад барҳаёт бўлсин!

5

Шундай деяпман-у, Шуҳрат ака ётиб қолганларида, кўргани боролмадим. «Эрта бораман, индин бораман», деб Сурхондарёга бориб қолдим. Хуллас, у киши шифохонадан чиқиб, Ёзувчилар боғида ҳордиқ оляптилар, деган гапни эшитдим-у, кўнглим тинчили. Кейин ўзим ҳам учтўрт кун ишлагани дачага бордим.

Ҳали навбатчи билан гаплашиб, қалит олишга ултурмаган ҳам эдим, узун йўлақдан бир жужуқ етагида чиқиб келаётган Шуҳрат домлани кўрдим. У киши майдада-майдада қадам босар, шунда ҳам шиппаклари гилемдан деярли узилмас, эгниларида енги калта оқкўйлак.

Юрагим вайрон бўлди: қани у барваста қомат, қалқондек кўкрак, серҳаракат вужуд? Эй, тангрим, инсон... ҳатто Шуҳрат акадек киши ҳам шундай ночор аҳволга тушар эканми? Хўрлигим келиб, аммо дамими ни ичимга ютиб, у кишига йўналадим. Шуҳрат ака дарҳол тўхтаб, ўнг қўлини чўзиб турди.

Кўришчик. Дудуқланиб:

— Яхшимисан... Болаларинг... Мен яхшиман, яхшиман. Ҳечқиси йўқ, — дедилар.

Бу қисқа саволлару «ҳечқиси йўқ» калимасида ҳамма нарса бор эди.

Ташқарига чиқдим. Ёғоч ўриндиқча ўтиридик. Фотиҳа ўқиган бўлдик. Кейин Шуҳрат ака менга бир муддат тикилиб турди-да:

— Юртингга кетувдингми? — деб сўрадилар.

— Ҳа.

— Яхши қипсан. Бориб туриш керак... Тугилган жойдан ажралмаслик керак... Усмон қаерда?

— Билмайман.

— У катта шоир бўлади... Бўлиб бўлди... Мен адашмаганман... Мана шундоқ аҳволга тушишиммиям билардим... Ўтмиш азоблари изсиз кетмайди.

Шуҳрат аканинг эллигинчи йил бошларида «халқ душмани» деб қамаб юборилгани ва бир неча йил қамоқларда ўтириб келганларини билардим. Аммо ярасини янгламаслик учунми, бошқа бир андиша туфайлими, бунинг тафсилотларини сўрамасдим: бошдаям айт-

дим шекилли, Шұҳрат ака билан сирдош бўлмаганман, шунчаки холис устоз-шогирд мақомида эдик. Кейин...

— Мана, оёқ, — дедилар тиззаларини уқалаб, — яхши ишламай қолди. Қамоқда ўн соатлаб тикка турғазарди... Ўн соатлаб. Оёгим халта бўлиб қоларди.

Шунда шоир Мирза Кенжабек тушиб келиб, кўришди. Кейин менга айтди:

— Шукур ака, мен Шұҳрат ака ҳақида бир рисола ёзсан, — деди. — Айниқса қамоқдаги ҳаётлари... Мени билардилар-у, яхшилаб таништиранглар. Усмон ака-гаям айтувдим...

Шұҳрат ака бармоқларини қимирлатиб қўйдилар.

— Гаплашамиз, гаплашамиз ҳали... Сен ҳам яхши шоирсан. Биламан, биламан...

— Менга ишонсангиз...

— Мен ҳаммангга ишонаман. Аммо бизнинг авлодда... Майли, кейин айтиб бераман...

Шу куни тушлик таомга бирга кирдик ошхонага. Шұҳрат аканинг тирсакларидан ушлаб олганман, бир қўллари невараларида. Эшиқдан кириб, тўрга — жойларига ўтаётувдик, у киши бирдан тўхтаб қолдиларда, ён томондаги стол ёнида ёлгиз ўтирган кишига қўлларини узатдилар.

У киши — шоир Уйгун эди. Уйгун домла Ижод уйида қўшни богда кеннойи билан яшарди. Аммо негадир бизнинг ошхонада овқатланар, деярли ҳеч ким билан гаплашмасди. Бошқалар — ёшлар ҳам у кишига қатишиб бормасди.

Энди, мен Шұҳрат аканинг у кишига қўлини бигиз қилиб айтган гапларини қўйида битаман. Битмасам, ёлғончи бўламан, ахир бу ёзганларим — бор, бўлиб ўтган сұҳбатлар, гурунглар, учрашувлардир: марҳум одамнинг орқасидан ёлгон сўзласам, гуноҳга ботаман, ахир.

Қолаверса, Шұҳрат ака айтган ушбу қалиманинг тагида ńималар ётганини ҳам билмайман: кейинчалик ҳам қизиққаним йўқ. Бу қалиманинг рост-ёлғонлиги Шұҳрат акаю Уйгун домланинг виждонига — руҳига ҳавола.

Мен ўз вазифамни бажараман, холос.

Шұҳрат ака у кишига, яъни Уйгун домлага қўлини чўзиб:

— Бу, бу... Бундан қўрқинглар.... Бундайлар... — Мен олга жилдим. Шұҳрат акаям жилиб, давом этдилар, — шулар маниям шу кўйга туширди... Фақат кеч-

роқ чалиндим дардга. Жоним қаттиқ экан... Уҳ, унчамунча гапни, дардни ўзимга олмасдим. Вужудда қолаверар экан... Танинг ақдингга бўйсунавермас экан...

Бу гап-сўзлар атрофда ўтирганларни қандай ўнгайсиз ҳолга солган бўлмасин, барибир шу ўринда ҳам Шуҳрат ака — Шуҳрат ака бўлиб қолди: у киши жуда танти, мард инсон эдики, бу ҳолни оддий хатти-ҳаракатларидан ҳам сезиш мумкин эди.

Мен Усмонга қўнгироқ қилиб, ушбу воқеани айтиб бердим.

— Шу гаплари билан ҳам сабоқ берипти-да бизга, — деди Усмон. — Қизиқ... Ҳа-ҳа, ўша гапни сиз учун, атрофдагилар эшитсин учун айтганлар. Бўлмасам илгарироқ катта-катта йигинларда ҳам айтишлари мумкин эди.

6

Икки кундан кейин Усмон келди.

— Шукур ака, келинингиз Раъноям шу ерда. Шуҳрат акани кўргани келувдим. Еттинчи хонадамиз. Тушинг, — деди. — Мирза қайси хонадайкин? Унга иш бор...

Бирпасдан кейин айтган хонага кирсам, чандаги ҳужрада келиним каттакон карсондаги паловни кағирлаб олиб пахта гулли лаганга солаёттир. Мирзабек йирик-йирик помидорлардан танлаболиб, аччиқ-чучук қиласяпти.

Ҳорманг-бор бўл қилиб, тўгридаги хонага кирдим. Устоз билан шогирд, яъни Шуҳрат ака билан Усмон кичкина столчанинг икки ёнида, бир-бирига қараб ўтириб, гурунг қиласяпти.

Вей, қандай чиройли бўлар экан бундай ўтириш! Усмон айтганидек «тупканинг тубидан келган» бир ёш шоир билан «Парижда» яшаб турган каттакон шоирнинг бундай қамти ўтириши! Бир-бирига самимияти, меҳрибончилиги, ҳатто бирининг — кичигининг каттасига ҳайрат билан қарашию каттасининг кичигига шунчаки бир оғадек муомалада бўлиши!

Шудир-ов устоз-шогирд деганлари! Ўйлаб кўрсанг, устоз ўз фарзандларидан сир тутган айрим ҳақиқатларини ҳам шогирдига аytар экан. Ва шогирд ҳам устоздан ҳеч бир сирини пинҳон тутмас экан!

Бу — галати, ҳайратомуз алоқа!

— Ке, Шукур. Бу, бу — жойга ўт, — деди Шуҳрат ака диваннинг деразага қараган томонини кўрсатиб. Мен диваннинг эшик томонига ўтира қолдим. Даастурхонга фотиҳа ўқиган бўлдик. Дарвоҷе, даастурхон ҳам яхшигина тузалган эди. — Ҳа, мана келди, — деди кейин Шуҳрат ака Усмонни кўрсатиб.

— Бунинг tengқурлариям яхши. Хуршид, Шавкат, М-Муҳаммаджон...

— Ҳа, шундай, Шуҳрат ака, — дедим мен.

— Сен ичарсан?

— Бутун ишламайман...

— Ану... тортмани оч. Бор. Конъяқ. Сизларга олиб қўйганман. Ўйда ҳамма нарса бўлиши керак. Кўчада сарфламанглар, барака кетади...

Шунда Усмон ҳам кулимсираб туриб, портвелидан бир шиша оқ олди.

— Шукур ака бузгунчи, бизни ичишга ўргатдилар... Ҳе, бу кишига ўхшайман, деб кўп талантларнинг бели синиб кетди...

— Ёлғон айтяпти, Шуҳрат ака, — дедим мен. — Мана, ўзи соғ юрипти-ку, белиям, бақувват...

— Ҳ-ҳазиллашади, — деб кулди Шуҳрат ака. — С-сени қилигингният қилиб беради. Артис бўп кетади... Яхши. Шундай бўлинглар. Кўнгилга олманглар... Мирзажон, кел. Ке, ўтири. Сениям нафасинг яхши. Биз сен билан кўп суҳбат қиласиз. А-айтиб бераман... Э, паловку...

Усмон ароқни очиб, менгаям қуиди: конъяқ ичмаслигимни билади. Кейин Шуҳрат акага илиқ бир меҳр билан боқиб:

— Бир нарса дейсизми? Номига қуийб қўяй, — деди.

— Ҳа, ҳа. Мени... атаган гапим бор. Қуй. Э-эркак ичади буни. С-с... Қ-қизим, ўтиринг. М-мени гапимни эшишиб олинг сиз ҳам. Ман а-айтаман...

Ҳаммамиз у кишига тикилдик... О, Шуҳрат ака-е! Ичида гапи кўп экан бу инсоннинг. Даҳди дейсизми, ҳасратими... Афсуски, дудуқланиб сўзлар, у кишини толиқтириб қўйишдан ҳарчанд чўчимайлик, миқ этмай қулоқ солдик.

— Мен сизларни яхши кўраман. Сизлар — менинг келажагим... Адабиётимиззи келажагисизлар... О-ойдин, Муҳаммад Али... А-абдуллажон бошқа олам. Ман унга қойилман. «Сенга қойилман» деб шеър ҳам ёздим. Эркинлар... Сизлар зўр. Биздан зўр... Биз, биз...

бир-биримизни ей-ейишгача бордик. Қўрқоқлик т-туфайли. Юрак олдириб қўйдик. Жон ширин экан... Уф... Г-гапимми бўлманглар. Бизнинг ичимиздан с-сотқинлар кўп чиқди. Сотқинлик ёмон. Урушда билишади дарров. У ўлиши керак. Улар — имонсиз, худосиз. Сизлар биздай бўлманглар, ўҳшаманглар бизга. И-итимос... — Ажаб, Шуҳрат аканинг нигоҳи йилтиради. Кап-катта одам, улкан шоир ва носир бизларнинг бир-биримизга садоқатли бўлишимизни илтимос қилиб, хўрозқанд сўраган бесўнақай боладек йиглар эди.

— М-менинг ҳамишаги обрўйим шу бўлган... Турмада онт ичганман. Омон чиқиб борсам, ёшларни биздай бўлмасликка ўргатишим керак... Мен, мана шунга ҳаракат қилиб келдим. Бугунгача...

Шуҳрат ака жимиб қолди. Ошга тикилган кўзлари таомни кўрмаётгандек эди. Биз «гапларини бўлмаслик» учун жим турадик. Лекин кўзларимиз бир-бирига бир неча бор қадалиб олди. Мен Усмоннинг нигоҳидан ва хиёл бош чайқашидан: «Ана гап қаёқда экан. Бизнинг тарбиямиз — бу инсоннинг дарди экан», деган маънони уқдим. Ва ўзим ҳам шу фикрга келганимни билдиридим.

— Биздан олдинги авлод ҳам шундай бўлган-да, — деб давом этди Шуҳрат ака. — Сотқинлар ўз-ўзларидан чиқсан. — Кейин кўзлари иттифоқо ярақлаб бизга бир-бир тикилди. — Улар ҳам, биз ҳам аслида У-унга а-аппазицияда бўлганмиз... Ҳа, улар ҳам, биз ҳам озодликни, суверен бўлишни орзу қилганмиз. Ҳа. Ичимиздан чиқсан сотқинлар кўпайгандан кейин... У-у атай излай бошлади: орамизга одам қўйди. Озодлик, мустақилликни — ў-ўша замон деб билганларниям олиб тиқдилар. А-ана шуларни мажбурлаб қўл қўйдирди... Бизниям мажбурлади, ҳа. Л-лекин биз... уф-ф... Т-тушундингларми? Шундай қилиб, ёнгин тушди, ҳўл-қуруқ баравар ёнди... Чин шоир ҳамма вақт ҳалқ тарафида бўлади, қалбига қулоқ солади. Шунинг учун, билиб бўлмайди, бир кун келиб... Уф-ф. Ҳозир тугайди гапим. Ишқилиб сизлар иноқ бўлинглар, аҳиллик керак... Бир-бирингга меҳрли-оқ-қибатли бўлларинг... Ман шунда гўримда тинч ётаман. А-арвоҳим шод бўлади. Бизнинг озми-кўпми сабогимиз ў-ўтди, дейман... Гапни бўлмаларинг... Ман ҳаммангни яхши кўраман... ёмон кўриш лозим бўлганларни ҳам ёмон кўрмайман. Бу яхши бўлади, натижаси яхши... Сизлар ҳам ўзларингдан ёшларга насиҳат қилинглар... Қуруқ

насиҳатдан иш билан, қўлдан келган ёрдам билан қи-линган насиҳат с-самарали бўлади.... Сизларга умр, соғлиқ тилаб дуо қиласман. С-сўрайман Ўзидан, менинг авлодимни паноҳингда асра...

Биз ҳаммамиз ўрнимиздан турдик. Шу ҳаракати-миздаям, кўз қарашларимиз, нафас олишимиздаям ажид бир тантанаворлик, жиддийлик бор эдики, шу алфозда тили қаловланиб қолган барваста устозга онт ичаётган эдик: илло шу лаҳзада бу порлоқ жилмайшли, кўкраги қалқондек қабариқ, учраган ёш ижодкор борки, бошини силаб, аммо яхшилигини жила билдирамайдиган бағри кенг инсонни — ижодкорни — устозни кўриб турардик.

Шуҳрат ака худди шу қиёфада қолдилар...

7

Кунларнинг бирида эшитдимки, Шуҳрат ака бу оламдан кўз юмиптилар.

Үйларига етиб бордик. Оломон! Фарзандлари, қавм-қариндошлар кўк чопонда, тақдирга тан бериб мутелик билан туришибди. Шивирлашиб гаплашишади.

Бир замон ҳовлидан хотин-халажнинг йигиси,уввос тортаёттани эшитилиб, одамлар ёрилди. Ўртада қолган бўш ерга ичкаридан олиб чиқилган тобут қўйилди.

Ҳамма жим. Кўзлар тобутда. Шуҳрат ака кетяптилар. Бошқа оламга...

Сайд Аҳмад ака таъсирли бир овозда йигламсираб сўз айтди:

— Шуҳрат... шуҳрат чўққисига чиққан чогда ҳам бирордан бир нима таъма қилмади. На орден, медал, на амал курсиси... Йўқ, у адабиёт учун, халқимиз учун беминнат, таъмасиз хизматлари учун кўп азоб чекди... Шуҳрат мард инсон эди... Шуҳрат ёшларга чин мураббий, меҳрибон эди... Қаердаки бир адабнинг бошига иш тушса, Шуҳрат ёрдамга борар, унинг ўзи ҳам Шуҳратни излаб келарди. Шуҳрат адабиётни ҳам, ижодкорларни ҳам бағрига олгандай, бўлар... ўзининг хусусий мулкидай туяр, ардоқлар эди... Ёшлар уни отадек қўришар, у бир меҳрибон қиблагоҳдек уларни бошини си-лар, кўмаги ва насиҳатини аямас эди...

Сайд Аҳмад аканинг сўзларини эътибор билан тинглаб амин бўлдимки, Шуҳрат акани — сафдош

дўстларини, қамоқдош ҳамкасларини яхши билар эканлар.

Сайд Аҳмад ака сўзлари охирида шундай дедилар:

— Шуҳрат, азизим, қабрингда тинч ёт. Биздан, адабиётингдан, шогирдларингдан хотиржам бўл...

Ўша куни уйга қайтиб келганимдан кейин диванда ётиб, Шуҳрат ака билан учрашган чоғларим, у кишининг хусусан Усмон билан мулоқотлари, ўзимга қилган яхшиликлари ва бир гал йиглаганлари, хуллас, хотирамда борини бир-бир эслаб кўз олдимдан ўтказдим-у, қандоқ меҳрибон инсондан жудо бўлганимни, ҳа, шахсан ўзим ҳам жудо бўлганимни, шу онда ўзими ни тоғят гарип сезаёттанимни ҳис қилдим.

Кейин Сайд Аҳмад аканинг сўнгги — видолашув нутқини эслаб, агар мана шу ўйларга бормаган бўлсам, Аллоҳ олдида гуноҳкорман:

«— Сайд Аҳмад ака, борган жойингда тинч ёт, дедилар... Аттанг, бир кун келиб, орқангдан биз ҳам борамиз, демадилар. Балки ичларида айтгандир... Мен, мана сиртимда айтаман: Шуҳрат ака, вақти-соати келганда, мен ҳам орқангиздан етиб бораман. Ахир, руҳлар тирик! Менинг ҳам руҳим Сизнинг руҳингизни топади, албатта. Айтишларича, ёмон руҳлар ҳам бўларкан у оламда... Ўшандаям, Шуҳрат ака, Сизнинг руҳингиздан паноҳ топсан керак: паноҳ топса керак менинг руҳим ҳам...

Сиз — барҳаётсиз!»

Тошкент, 1997.



Темур УБАЙДУЛЛО

УСТОЗ ШУХРАТ ҲАҚИДА НАСРИЙ ДОСТОН

МУҚАДДИМА

Шоир Шуҳратнинг 1962 йилда чоп этилган ажойиб шеърлар тўплами бор. Номи ҳам дилбар: «Сенинг севгинг». Уни бутун синф бир зарб билан ўқиб чиққанимиз эсимда. Тўпламдаги лирик шеърлар, айниқса, «Кавказ дафтари» туркуми бизни лол қолдирган эди. Мен «Ваъдага шошгандек» шеъри ҳақида: «Шуҳрат хотини Турсунойни жуда севар экан, бўлмаса бир ойга Кавказга кетганида шу шеърини ёзмасди», деган эдимики, адабиёт ўқитувчимиз Эркин Носиров: «Билмайсизлар-да, Шуҳратнинг бошига кўп савдолар тушган», деб қўйди.

Бу гапнинг маъносига кейинроқ тушундим. Шуҳрат домла «халқ душмани» бўлиб, ноҳақ қатагонга учраган экан... Буларни билганимдан кейин «Сенинг севгинги» китоби фақат гўзал ёрга эмас, гўзал ҳаётта ҳам хитоб экан, деган фикрга келдим.

Шуҳрат домла том маънода ҳақиқатгўй, ёшларнинг чинакам устози бўлган адаб. Энг қизиги, бу ҳақда катта минбарларда туриб бирон оғиз сўзламаган.

Домла, таъбир жоиз бўлса, олтинга ўхшайди. У ўз бошидан турли гирди-балоларни кечирди, камситиди, таъқиб этилди, дардга чалинди, лекин ҳар ерда олтинлигини қилди.

Шуҳрат ҳақида кўплаб асарлар ёзилган. Мен ҳам шу Инсон ҳақида ёзишим керак!

Ахир, домланинг ҳар бир муҳлиси ўзларича Шуҳрат кашф этишган. Жумладан, мен ҳам.

БИРИНЧИ ҚЎШИҚ

ЖАСОРАТ

Киши бутун умри давомида ўз бошидан яхши кунларни ҳам, ёмон кунларни ҳам кечираади. Бир кун шод бўлса, бир кун изтироб чекади. Бу ҲАЁТнинг ёзилмаган, лекин метин қонуни: ойнинг ўн беши ёруг, ўн

беши қоронгу. Шу қонун инсон иродасини пўлатдек тоблайди, уни шакллантиради.

...Тақдир тақозоси билан мен «Гулхан» ойномасига ишга келганимда Шаҳрат домла билан илк дафъя учрашишимга тўгри келди. Раҳим Бекниёзнинг «Момиқжон» қиссаси ойномада эълон қилинаётганди. Масъул котиб Наримон Орифжонов:

— Шуҳрат домлага ўқитиб кел, — деди. Шуҳрат aka ўшаңда таҳрир ҳайъати аъзоси эдилар.

Мен қиссани домланинг уйига элтиб бердим.

— Яхши, — дедилар Шуҳрат aka, — уч кундан кейин келинг. Ўқиб чиқаман.

Уч кундан кейин бориб олиб келдим. Варақласам, мен қилган таҳрирнинг баъзи жойлари қайта кўрилган, ўчирганларим тикланган экан.

— Таҳрирингни кўп жойига қўл урдим. Хафа бўлма, — дедилар домла сенсираб. — Асарни таҳрир қилиш — уни ҳафсала билан бўяш эмас. Ёзувчининг услуби, фикри, мақсади бор. Булар билан ҳисоблашмасдан бўлмайди.

Мен Шуҳратнинг яна бир қиррасини кашф этдим: ҳар қандай адабнинг асарига ҳурмат билан қараш зарур!

Мен нима дейишимни билмасдим. Суҳбатлашгим келарди.

— «Сенинг севгинг» деган китобингизни ўқиганман, — дедим ахийри. — Яхши экан, ҳатто шеърларингизни ёдлаб олдим.

Шуҳрат aka бир зум менга тикилдилар.

— Сенга ёққан бўлса жуда хурсандман.

— Нега соchlарингиз оқ? Ҳали ёш бўлсангиз керак?! — деб юбордим бехосдан.

— Ҳа, энди, умр дегани муҳр босади. Умрнинг муҳри сочимга тущди. Айт-чи, «Шинелли йиллар» деган романимни ўқиганмисан?

— Ўқиганман.

— Бўлмаса яна бир бор ўқиб чиқ...

Шуҳрат аканинг таржимаи ҳоли билан шундан кейин яхшироқ танишдим. Доимо ҳақиқатни дегувчи, бирорвнинг сирини бирорвга айтмовчи юраги уммон инсон экан.

«Шинелли йиллар»ни икки-уч қайта ўқиб чиқдим. Элмурод билан Зебо энди кўзимга тамом бошқача бўлиб кўринди.

Бир сафарги учрашувимизда Шуҳрат акага роман ҳақида сўзловдим, у киши:

— Элмурод менинг ўзим. Урушда кўрган-кечирган-ларимни сира бўяmasдан ёзганман. Сочимгаям урушда оқ тушган, — дедилар.

Шуҳрат аканинг капитан унвони борлигини шу суҳбатда билиб олдим. Унинг умри жасоратга тўлиқлиги билан менга сурурли туюларди. Ўзимни у кишининг ўрнига қўярдим. Лекин ҳеч Зебони ўйлаб тополмасдим. Кейинчалик шу романнинг яратилиш тарихини ёзиш насиб қилган экан, ёзди. Роман биринчи нусхасининг нашриётда йўқолиши... Шуҳрат аканинг 25 йилга ҳукм этилиши... Оғир, гоятда оғир маънавий эзилиш... Оқланиб чиққач, ҳеч кимдан гина қилмай, яна ижодга ўзини уриш... Ўз гуноҳи нималигини излаш. Буларни қай сўз билан таърифлаш керак? Матонатли, юраги оқ, саховатли кишигина щундай қила олади. Буни, биз қалам аҳли ЖАСОРАТ деб атаемиз.

...«Замин муҳаббати» номли тўпламим нашриётда тақриздан ўтгач, менга қайтариб берилди. Шеърларим, умуман, йўққа чиққанди. Ўз-ўзидан маълум, мен бундай хулоса билан келишолмадим. Хунобим ошиб ўтирган эдим, таҳририятта Шуҳрат домла кириб қолдилар. Ҳол-аҳвол сўрашгач, менга синовчан тикилдилар.

— Ҳа, жуда кайфиятингни туман босган? — деб сўрадилар.

— Домла, шу тўпламни ўқиб беролмайсизми? — саволга савол билан жавоб қайтардим.

— Ўзингникими? — дея домла қўлёzmани варақлаб чиқдилар.

— Шу... тақриз...

— Қани, мен бир ўқиб кўрай-чи?

— Жон домла, менинг кўнглимни кўтарманг, рост бўлса, ортиқча уринишнинг кераги йўқ.

Шуҳрат ака тўпламни, тақризни олиб кетдилар.

Орадан ўн кундан ортиқ вақт ўтди. Шуҳрат ака кутилмаганда ишхонамизга эрталаб келиб қолдилар.

— Қани, бери кел-чи, сени бир бағримга босай, — дедилар. — Чиройли шоир экансан-ку! Айниқса, митти шеърларинг соз.

— Домла... Тақриз-чи?

— Ҳали бунаقا тақризлар, танқидлар кўп бўлади. Ҳали битта тақризга шунчами? Сен, ҳамиша, ҳар қандай танқиддан ижодий хулоса чиқар, ўзингга фойда бўлади.

«Замин муҳаббати» шеърлар тўпламим Шуҳрат аканинг сўзбошиси билан чоп қилинди. Қувончим бир

олам. Шуҳрат аканикига бордим. Китобимни варақлаш кўриб, менга ўтирилдилар.

— Муборак бўлсин, энди қаттиқ ишла, ўглим. Майдонга кирдингми, отингнинг бошини тортма...

Орадан ҳеч қанча вақт ўтмасдан оғайним Сабриддин қўнгироқ қилиб қолди:

— Шуҳрат акадан хабаринг борми?

— Тоблари йўқ деб эшичувидим, нима бўлибди?

— Инсульт бўлибдилар. 15-шаҳар касалхонасида эканлар.

Шуҳрат акани кўриб, танимай қолдик. Домла узукъолуқ гапириб, аҳволимизни сўрадилар.

— Шеър... — дедилар бир маҳал.

— Ёзяпман, — дедим овозим титраб.

— Ёз... Сен ҳам, — Сабриддинга имо қилдилар домла.

Турсуной опа бизни кузатаётib, «ёрилиб» қолдилар: «Тагин ҳам сал ўзларига келиб қолдилар. Бир ҳафта олдин жуда оғир эдилар. Ҳар қандай сабрнинг ҳам чегараси бор. Бир одамни шунча эзишадими? Шуҳрат акаям қизиқлар. Абдулла Қаҳҳор нима деганини айтиб қўя қолмайдиларми?»

Ўша пайт Шуҳрат ака нимани, кимга айтади — тушунмадик. Шу-шу Шуҳрат аканинг шифохонама-шифохона «саёҳат»и бошланди.

Ҳар гал у кишининг ҳузурларига борганимда, юзларига узоқ-узоқ тикилиб қоламан. Қанчалар Жасорат бор бу инсонда! Юраги ҳам арслон юрак экан-да.

ИККИНЧИ ҚЎШИҚ

МАТОНАТ

Оlamда яхшилик бор, ёмонлик бор,

Оlamда талантлилар бор,

талантсизлар бор.

Оlamда дўстлар бор, душманлар бор.

Оlamда мардлар бор, номардлар бор...

Шуҳрат ака билан суҳбатимизда бу сўзлар кўп бора тилга олинди.

Мардликнинг йўлдоши —

Матонат, Диёнат!

Номардликнинг йўлдоши —
Маломат, Хиёнат!
Бири — Ер, бири — Осмон!
Бири — сув, бири — олов!

— Мардлик нега барча одамларга баробар ёқмайди? — Домладан сўраган илк саволим шу бўлди.

— Агар шундай бўлганида эди, одам нақадар гўзаллашарди. Одамларни яхшиликка чорлаб эҳтиросли шеърлар ёзмасдик. Муҳаммад Юсуф айтгандек, «Юрагимиз шодиқдан ёрилиб» кетармиди. Афсуски, ундан эмас! Чунки йўлга чиққанда ҳамроҳинг ким бўлишини билмайсан. У сени тўлқинлардан, долгалирдан олиб ўтадими ёки сени сершовқин дарёга туртиб юборадими?

— Билгандан кейин қизиги йўқ-да, домлажон. Одамнинг яшагиси келмай қолади.

— Э-э, ундан дема, аксинча, яшашга иштиёқинг ортсин. Ҳаёт муаммолари билан қизиқ-да!

— Матонат, мардлик намуналарини кўрсатибми?

— Ҳа, кўрсатиб! — саволим сал истеҳзоли чиқдиими — билмадим, домла кескинроқ жавоб бердилар.

Тарих, агар мушоҳада юритадиган бўлсак, икки палладан иборат эканлигини кўрамиз. Бир паллада Ҳақиқат, Қаноат, Сабр, Эзгулик, Мардлик, Виждон, Адолат, Диёнат, Инсоф турса, иккинчи паллада Ёлғизлик, Ожизлик, Маккорлик, Номардлик, Ҳасад, Адоват, Разолат, Юэзизлик, Хиёнат, Тубанлик, Ноинсофлик ҳар лаҳзада эзгуликларнинг пайини қирқишига шай туради.

— Мардлик, — ўз-ўзига гапиргандек давом этди Шуҳрат ака, — бошлиган ишини охирига етказмай қўймаслиқда. Унга монеликлар бўлади, тўсиқлар қўйилади. Енгиш керак. Енгсанг мақсадингга яқинлашасан. Енголмасанг, тарозининг иккинчи палласига ўтиб бораверасан...

Ҳаёлим ўттизинчى йилларнинг охирига қараб учади. Қандай йиллар эди! Тонгда қуёш чиқарди, тунда ой нур сочиб, юлдузлар милтиарди. Сувлар айқириб оқарди. Фақат, фақат юракларда даҳшат ҳукмрон. Даҳшатни енгтан қўрқмас мардларни эса ҳибс, минг бир синоат кутар эди.

Ҳибс нима учун? Китоб ўқигани учун! Галати эшитилади-а, тўғрими? Тасаввур қилинг: севган шоирингиз, масалан, Эркин Воҳидовнинг «Ўзбегим», «Биздан

кейин ҳеч ким қайта кўрмасин» шеърларини ўқиганнингиз учун жавоб берсангиз, жазо олсангиз?! Сиздан шоирнинг номини атамасликни талаб қилишса?! Қанчаларadolatsizlik!

— Чўлпоннинг, Усмон Носирнинг шеърлари бизнинг тилимиздан тушмасди, Зўр шоир эди-да, ўзи ҳам Усмон Носир! Қандай қилиб ўқинмаслик мумкин! Мумкин эмас-да, ахир! — Шуҳрат ака жим қолди. — Усмон Носир нега хўрланди, бутун ҳам рўй-рост аниқлаш мушкул. Абдулла Қодирий-чи? У бечоранинг гуноҳи нима эди! Ёлгиз биз армонда қолмадик, уларнинг ҳам армони ичида кетди, нима иш қилганини билмай. Номардлик бўлди! Тегирмонга сув келганда кўнглида гарази борлар шоли деб курмак солишиб дўлга. Беҳад бетавсиф, бетаъриф номардлик бўлди.

Домла яна сукутга чўмди. Мен бўлсанм хаёллар оғушидаман. Халқимизда бир нақл бор: «Яхшилик қилиш кўлингдан келмаса, ёмонлик қилма». Ёмонликдан ўзини тийиш жуда катта Матонат талаб қиласди. Нима учун бир одамга ёқмаган одам билан иноқ бўлсанг, душманинг биттага ортади? Ахир «ҳар ким суйган ошини ичади-ку!»

— Суйган ошингни ичиш ўша пайтлар оғир эди, — Шуҳрат ака чуқур тин олди. — Бўлмаса шоирнинг шеърини ўқиганим, таниш бўлганим учун жазога тортиламаним? Шоир ким учун ёзади, ахир! Одамлар учунми?

— Усмон Носир шеърларини айтяпсизми?

— Ҳа. Барибир ҳозир ўқияпмиз-ку, ўша шеърларни. Тўсиб бўлмас экан-ку, ёргулкни!

— У киши усталик қилиб, омон қолса бўлардику!..

— Усталик қилиб? Йўқ, Усмон ҳам, Абдулла Қодирий ҳам усталик қилолмасди. Уларнинг қонида йўқ эди бу: ўз ижодидан тониб, хиёнат қилиб, номардлик билан ҳаёт тилаб олиш — ўлим-ку, ахир. Ана шунинг учун ҳам кўплар жимгина ўлимга бордилар. Лекин ўша йиллардаги «голиб»лар уларнинг кўзига қарамаганлар, қаролмаганлар. Агар қараашганда эди...

Агар қараашганда эди! Ўшанда мард билан номарднинг кўзлари қандай чақнар эди.

Мардлик — эзгу туйгу!

Агар эзгу бўлмаганда халқимиз юз йиллар мобайнида ёниб куйламасди... «Гўрўгли» туркумидаги достонларнинг ҳар бирида шундай сатрлар бор:

Йиглайман, йиглайман ҳаққа,
йиглайман...
Улуғ дейман, остонангни тунайман...
Бек Гурӯгли мардномардинг синайман...
Шу сафарга Гиротингни тилайман...
Ҳаққа йиглаш — марднинг иши.
Йўққа йиглаш — номарднинг иши.

Номоз Пиримқул ўглининг мардлигини нима билан ўлчаш керак эди? Тан бериш керакмиди? Керак эди! Лекин уни номардлик қўли мағлуб этди-ку!

Муқанна нима учун ўзини оловга ташлади?

Фирдавсий нега шоҳ берган қумушларни тужкашга, ҳаммомчига, бобонларга бўлиб берди? Жавоби оддий: шоҳнинг номардлиги учун. Чунки у олтин ваъда қилиб, қумуш берганди-да!

Ўттизинчи йилларнинг охиридаги номардлар унақабунаقا «беозор» номардлар эмасди. Мардларни, уларнинг ёнида юрганлар номардлик қилиб «сотди». Уларни ўлдириб бўлмаслигини била туриб, ҳақиқат барibir галаба қилишини била туриб, сотди.

— Уруш бошланиб қолди, — Шуҳрат аканинг овозда чексиз мунг акс этди. — Қирқ тўртингчи йилнинг охиригача жангларда қон кечдим. Тошкентта оғир ярадор бўлиб, қайтиб келдим. Во ажаб, Ватан учун жон олиб, жон берган бир аскарни талайгина номардликлар кутиб турган экан. — Шуҳрат ака соувуб қолган чойдан ҳўплади. Аммо бир ҳўплам чой унинг юрагидаги ташналикни қондиравмиди?! — «Ҳаёт чашмалари» номли тўпламим — биринчи фарзандим йўқ бўлиб кетди. Минг азоб билан 1947 йилда «Ҳаёт нафаси» деган китобим дунёга келди. Не изтироб, не машаққат билан дунёга келди. Мен нима қулган эканман, ҳали-ҳали ўйлаб тагига етолмайман. Кулфатларнинг биридан кейин иккинчиси бошимга тушаверди. «Шинелли йиллар»нинг биринчи қисмини ёзив, нашриётта топширдим. Ўзим қамоққа олиндим. Китобим нашриётда йўқолди. «Абдулла Қодирий ва Усмон Носирнинг думи», деб аюҳаннос солишган эди. «Дум»ни кесиб ташламоқчи бўлишгандир-да. Беш йил умрим тор, зах хоналарда ҳавога учди. Ноумидликка тушган кунларим ҳам бўлди. Лекин юрагимдаги бир нидони ҳамиша эшишиб турдим: бу кунлар абадий эмас-ку, ахир! Ўзингни қўлга ол! Умидларнинг этагиги тут! Мен шундай қилдим.

Шуҳрат акани омон сақлаб, ёруг кунларга етказган — аслида, Матонат!

МАТОНАТ ана шундай қудрат! Мақсуд Шайхзоданинг «Мирзо Улугбек» фожиасидаги Пири Зинданнийни эслайсизми? Унинг бош эгмасдан зинданда ўн йиллаб ўтириши — метин матонатдан дарак беради.

МАТОНАТ — инсон қалбидаги қуёш! Ирода қуёши! Қуёш эса ҳаммага баробар нур сочади. Матонат аталган Қуёш мардларнинг йўлини, умрини ёритади. Ҳаёт Шуҳрат домланинг матонатини, мардлигини синашда давом этаверди.

Шуҳрат ака бир неча йиллардан бери хаста. Хаста бўлган билан анчайин саломат кишилардан кўра кўпроқ ишляпти. Чунки домланинг қўш қаноти бор: бири матонати, бири ишончи. Ҳудди шунинг учун ҳам Шуҳрат аканинг бир китоби «Ҳали тун узоқ» деб номланган.

— Шуҳрат ака, романларингизни ўқиганимда худди ўзингизни кўргандек бўламан.

— Қаҳрамонларим ўзимга ўхшаб қолган бўлса не ажаб? — адаб беозор жилмайди. — «Олтин зангламас»даги Содиқжон ҳам, «Шинелли йиллар»даги Элмурод ҳам, «Жаннат қидирғанлар»даги қаҳрамонлар ҳам ўзимга ўхшаб қайсар...

— Қайсар эмас, матонатли...

— Матонат билан яшаган киши олдиндаги нурли уфқлардан кўзини олмайди. Чунки уни манзиллар чорлаяпти, — Шуҳрат ака жонланиб кетди, — номардлар бўлса бошқача яшашади. Уларнинг хавфи келажакда эмас, орқада, шу сабабли ҳадик билан босиб ўтилган йўлларидан кўзларини олмайдилар. Жавоб беришдан ҳар лаҳзада қўрқадилар... Бироннинг тўйида, бироннинг маъракасида сўзлашга маънавий ҳуқуқи бўлиши керак кишининг. Ўзинг ўйла, бироннинг бошига туҳмат тошини ёғдириб, кейин унинг тўйига раислик қиласанг? Ёки китобига муҳаррирлик қилиб, сўзбоши ёзсанг! Оҳ, қандай мусибат бу! Номардликнинг қандай тубан кўриниши!

— Ўтган кунлар тўгрисида қанча гаплар бўляпти. Лекин сиз айтарли ҳеч нима демадингиз? Матбуотда чиқиш қилмадингиз?

— Ҳамма бир-бирини чайнашга ҳаракат қиляпти. Бирон аламидан, бирон адоватдан. Мен нима дейман? Шунча қийналдим, бер берадиганингни дейманми? Ҳеч бўлмаса, мен жим турай...

Қадимдан қолган бир афсона бор. Бир донишманд ўзининг турфа табиати, ўткир ақли билан ном чиқарған экан. Бир йигит ундан илм ўрганмоқчи бўлиб шогирд тушибди. Донишманд унга ҳеч нарса айтмабди, фақат: «Сабринг етармикин?» деб қўйибди. Кунлардан бир куни уларнинг иккови юрт кезишибди. Қайси эшикка киришган бўлса донишманд тескари дуо қила-верибди. Қирқ тўққиз эшикдаги муомалага чидаган шогирд эллигинчисига чидамабди. Эшик эгаси бир ко-са сут берган экан, донишманд унга ҳам қалтис гап айтибди: «Илоҳим, сигиринг ўлсин!» Шогирд портлаб кетибди. «Ахир, у сут берди-ку, сиз бўлсангиз, сигиринг ўлсин, дейсиз? Бу қанақаси, ахир?!» «Ана, — дебди донишманд, — сабринг етмайди, деб эдим-ку! Шунисига ҳам чидаганингда сиримни очар эдим. Илмни, донишмандликни садоқатли, матонатли одамларга чиқарган. Сен билан бизнинг ошимиз пишмас экан».

Матонатли кишилар!

Яхшиямки, улар бор! Улар ёвузлар, ёмон ниятли кишиларнинг қилмишларини тузатиб, ҳақни жойига қарор топтириб келадилар. Лекин қанчадан-қанча ноёб орзулар, гўзал фикрлар қурбон бўлади. Матонатли кишиларни ёлгиз ана шу қийнайди.

— Дунёда икки ҳақиқат бор. Бири чин ҳақиқат, иккинчиси биз ўйлаб топган, таъбиатимизга мослаб олган ҳақиқат, —деди Шуҳрат aka хайрлашаётуб. — Афсуски, биз кўп йиллардан бери ўйлаб топган ҳақиқатимизнинг қули бўлдик. Бу ҳақиқат бизни йўқликка мубтало қиляпти. «Бу ҳақиқат эмас, ахир, бу уйдирма» дейишига мардик-матонатимиз етмади.

Бутун шу матонат юзага қалқиб чиқди. Даидил гаплар айтипмиз. Ўтмишимизнинг сўнгги етмиш йиллик қора доғларини йиглаб-йиглаб юваяпмиз. Келажагимиз нурли бўлсин, деб юваяпмиз. Яхшилик шабадалари гир-гир эсяпти. Кўксимиз илиқликка, кўзимиз ёругга тўлаётган пайтда яшаяпмиз. Ҳамиша яхши ният қилайлик: Она халқим, мард ўглонларинг кўлайсин. Уларнинг қалбини МАТОНАТ — асти-асти тарк этмасин!

УЧИНЧИ ҚЎШИҚ

МАШАҚҚАТ

Ўзбек адабиётида ҳарбий мавзуда ёзадиган адаблар орасида Шуҳрат домланинг алоҳида ўрни бор.

Устоз адиб билан бўлган сұхбатларимизда гап асарнинг яратилиши тарихи, унинг «бошидан кечган» воқеалар хусусида ҳам борди.

— Домла, — дедим, — ижодингизда уруш мавзусидаги асарлар ўзига хос ўрин тутади. «Шинелли йиллар дафтари» шеърий туркуми, «Оқибатли кишилар» қиссаси, «Шинелли йиллар» романи, қолаверса «Олтин зангламас», «Жаннат қидирғанлар» романларингиз ҳам шу мавзунинг узвий давоми. Шулар орасида сиз учун энг қадрлиси қайси бири?

— Ҳаммаси. Ёзувчи мана бу асарим яхши, буниси ёмон деёлмайди. Агар шундай дегудек бўлса, ёмонини ёзмаслиги керак бўлади. Шундай бўлса ҳам айтай, мен учун энг суюклиси, мени энг «қийнагани» — «Шинелли йиллар». Чунки романдаги воқеаларнинг барчасини ўз кўзим билан кўрганиман, қатнашганиман. Қийнаган томони шуки, роман насрдаги биринчи катта қадамим эди.

— Агар малол келмаса, ҳарбий ҳаётингиз ҳақида сўзлассангиз...

— Яна эслайманми? — Шуҳрат ака сўлиш олди. — Шимолий Кавказ фронтида жанг қилганиман. Краснодар, Моздок, Анапа, Таманъ, Майкоп сингари шаҳарларни озод этишдаги жангларда қатнашганиман. Ўндан ортиқ станцияни озод қилганимиз. Жангларни эсласам ҳануз вужудимга титроқ киради. Бир парча қўроғшин не-не азаматларнинг умрига зомин бўлмади. Жанглардан бирида қаттиқ яраландим. Умуртқамга, белимга снаряд парчаси тегиб, контузия бўлиб қолдим. Бир ой госпиталда даволандим. Согаявермагач, 1944 йилда Тошкентта қайтаришди. То менинг олти ойлик отпускам битгунча, уруш тугаб, омон-омон бўлиб кетди. У пайтларда ҳали жанговар насримиз йўқ даражада эди. Ойбек домланинг «Қуёш қраймас» романи, Абдулла Қаҳҳорнинг «Олтин юлдуз» қиссаси энди босилиб чиқкан. Ҳаммага маълум, ўзбек ёувчилари фронтнинг олдинги жабҳаларида бўлиб, жангчиларимизнинг мардликлари ҳақида шеърлар, достонлар, йирик насрий асарлар яратишиди. Мени шунда бир фикр чулгаб олди: ёзувчилар қалб даъвати билан бир-бир яrim ой фронтда бўлиб, асар ёзишяпти. Мен-чи? Ахир, шу суронлар гирдобида, қонли жанггоҳларда бўлганман-ку? Ёсам бўлмайдими? Шу ният билан қўлимга қалам олдим. Фронтда ўзим гувоҳ бўлган воқеаларни бир бошдан ёза бошладим. Назаримда, воқеалар бир романга сиг-

майдигандек туюлди. Уни икки китобга бўлдим. Биринчи китобни 1947 йили тутатдим.

— Романнинг сўнгидаги «1947—1957 йиллар» деб ёзилган. Айтишингизга қараганда, бунчалар эҳтирос билан ёзилганда унча узоқ муддатга чўзилмаслиги ке-рак эди-ку?!

— Ўртада беш йилча танаффус бўлди. Албатта, олдин айтганимдек, ўз ихтиёрим билан эмас. Шахсга си-гиниш йилларининг азобини кўпгина қаламкашлар қа-тори мен ҳам татиганман. Йўқ ердаги айблар, асосан, туҳматнинг кучи билан, яна ҳам очиқчасига айтсан, «учлик судлов» томонидан йигирма беш йилга ҳукм қилиндим. Адолат қуёшига ҳамиша шукроналар айта-ман. Ҳақни — ҳаққа, ноҳақни — ноҳаққа ажратди. 1955 йилда бегуноҳ эканлигим исботлангач, Тошкентга қайтдим. Ҳақиқат эгилар экан-у, аммо синмас экан... Келган кунимданоқ романни тутатиш фикрига туш-дим. Романнинг биринчи қисми Ўзбекистон Давлат нашриётига топширилган, ҳатто рус тилига сўзма-сўз таржима ҳам қилинган эди. Ўша пайтларда нашриёт директори Файзулла Юнусовга учрашдим. У «Наш-риётда йўқ, бўлса шу пайттacha романни кўрмасми-дим», қабилида жавоб қилди. Нима қилишимни бил-майман. Қаёққа боришимни билмайман. Диққатбозли-гим бисёр. Қўлёзма йўқ. Дарду дунёим қоронгу бўлиб чиқиб кетаётсан нашриётнинг бош бухгалтери Каса-бов учраб қолди. Қучоқ очиб, омонлашди. Ҳол-аҳвол сўрагач: «Менда бир китобинг турибди. Русчаси ҳам бор», деб қолди. Юрагимда зилзила бўлди чамамда. Унга миннатдорчилик билдириб, китобни оддим. Ўша «Шинелли йиллар»нинг биринчи қисми. Уйга келиб ўқиб чиқдим. Жуда бўш ва гариб кўринди кўзимга. Кейин уни икки китоб қилиш фикридан ҳам қайтдим. Янгидан ёза бошладим. 1957 йилда нуқта қўйдим. У Ёзувчилар уюшмасида муҳокама этилди. Кўпчилик «Таржимаи ҳол бўлиб қолибди, роман эмас», деб до-нишмандлик қилди. Бахтимга, бу орада романнинг рус-ча таржимаси битиб қолди. «Воениздат» нашриётига топширдим. П. Вершигора, Э. Казакевич каби номдор ёзувчилар унга тақриз ёзишди. Айниқса, Вершигора-нинг роман ҳақидаги «Армиямизда кўп миллатли роман йўқ. Шуҳратнинг романни бунга тўла жавоб беради», дейиши менга қанот бўлди. Роман Г. Соловьев таржимасида илк бор 1959 йили Москвада рус тилида катта нусхада босилиб чиқди. Декадада ҳам яхши баҳо-

ланди. 1960 йилда ўзбек тилида босилди. 1961 йилда рус тилида қайта нашр қилинди. Роман машхур бўлиб кетди. Марказий нашрларда Э. Казакевичнинг асар тўгрисидаги мақоласи, полковник Водицкийнинг тақризи босилди. Кейин рус тилида яна бир карра — учинчи марта чоп этилди. Умумий тиражи 525 минг нусхани ташкил этди. Ўзбек тилида икки марта босилиб чиқди.

— Романда ўзим кўрган билган воқеаларни қаламга олганман, дедингиз. Демак, роман қаҳрамонларининг прототиплари бор?

— Ҳа, бор. Иштирок этаётган персонажларнинг кўпчилиги мен билан ёнма-ён жанг қилган одамлар. Ҳатто уларнинг номларини ҳам ўзгартирумaganман. Асарнинг бош қаҳрамони Элмурод бошидан кечирган талай шўришлар, воқеаларни ўз бошимдан кечирганиман. Зебо ҳам ҳаётда бор қизнинг образи. Ҳамшира эди. Юраги пок қиз эди. Романда, гарчи ўққа учиб ўлса ҳам, аслида Зебо Каспий дengизига чўкиб ўлган. Унинг онаси Маръям ҳали ҳам ҳаёт. Акаси ҳам тирик. Дивизиямиз командири Ягудинни жуда яхши билардим. Қrimдагi горларда жони узилди. У ҳақда «Комсомольская правда» газетасида ҳам ёзишди. Роман босилиб чиққач, қизи Лариса (ҳозир Алупкада яшайди) мени излаб топди. «Ҳаммасини тўғри ёзибсиз», деб мактуб ёзди. Роман қаҳрамонларидан бири Махаловнинг тақдиди қизиқ бўлган. Ўзи мен билан бирга ўқиган, бирга жанг қилган. Ҳозир Ашхобода яшайди. Роман воқеаларидан келиб чиққанда у ҳалок бўлади. Бир йили менга мактуб келиб қолди. «Романдаги Махалов мен десам, ўглим ишонмаяпти. Нуқул у ўлган экан-ку, дейди. Мени ҳалок қилиб, балога қўйдинг. Романдаги қаҳрамон мен эканлигимни тасдиқлаб бер», деган мазмунда. Жавоб ёздим. Махаловнинг ҳалокати нега керак бўлганини тушунтирудим.

Мурzin ҳам, лейтенант Данилченко ҳам худди шундай қаҳрамонлардан. Романини яна бир карра варақлаган чоғларимда шу ўй хаёлимдан кечади: ҳар бир хонадон тинч бўлсин, дунё омон бўлсин! Кўрган-кечирганларимиз ўтган уруш хотиралари бўлиб қолсин!

Мен эса шундай деган бўлардим: машаққатли жанг, мешаққат билан ёзилган роман, мешаққатли тан олиниш... Ўзга сўзлар бу ерда бекор.

ТҮРТИНЧИ ҚЎШИҚ

МУҲАББАТ

Осмондаги миллардлаб сайёralар, юлдузларни тортиш кучи ушлаб туради. Тортиш қучини осмоннинг олмос камари, десак тўгри бўлади. Агар у сал бўшашса борми, юлдузлар ёмғирдек ёғилиб, она сайёрамиз бир лаҳзада кун-паяқун бўлади.

Оlamning олмос камари эса муҳаббат. Ёргу дунёни муҳаббат ушлаб туради...

Устоз ўз шогирдига ҳарф ўргатар экан, унинг кела-жакда қалби тоза инсон бўлиб етишишини орзу қила-ди. Унга бор муҳаббатини бағишлади. Номи шогирди-нинг эзгу ишлари билан бирга мангут қолади.

Бир сафар Шуҳрат домланикига илтимос билан бо-ришга тўгри келди. Шоир дўстим Сабридин Садрид-диновнинг «Мен йўлдаман» деган тўплами «Ёш гвар-дия» нашриётида чоп этилиши режалаштириб қўйилган экан. Яна бир гап: ҳар бир ёш шоирнинг китобига таниқли шоирлар сўзбоши битардилар.

Сабридин мен билан Абдумажид Шомирзаевга ай-тиб қолди: «Агар сўзбоши ёзмасалар ҳам Шуҳрат ака китобимга бирров назар ташласалар, қандай бўлар-кин?! Ўзим у кишининг шеърларини жон-дилим билан ўқисам...»

Алқисса, учовлон бошлишиб Шуҳрат аканинг уйига бордик. Илтимосимизни эшитиб майнин жилмайиб қўйдилар.

— Хўп, ёш шоирнинг шеърларини ўқиш — биринчи галдаги вазифа, — домла шундай деб Сабридинга юзландилар. — Беш-олти кун оралатиб бир йўқласан-гиз... Мен ҳаракат қиласман...

Хуллас, ўша китоб Шуҳрат аканинг сўзбошиси билан дунё юзини кўрди. Сабридин у киши ҳақида сўз очилса: «Шуҳрат аканинг яхшилигини сира унумайман», деб муҳаббат ила тилга олади.

Аслида, оқ йўл ёзиш унча оғир иш эмас: муаллифни билсанг, шеърларини ўқиб турсанг... Лекин унинг бир томони ҳам бор: оқ йўл — бу муҳрдек гап, «Шу боладан умидим катта, яхши шоир бўлади», дея масъу-лиятни елкага олиш демак.

Шуҳрат ака ишонч билдириб, катта адабиётимиз сари кузатган, ҳар лаҳза уларнинг ижодини ташвиш

ва қониқиши назардан қочирмай танишиб борадиган Жамол Камол, Муҳаммад Али, Усмон Азим сингари қалам аҳларининг асарларисиз шеъриятимизни тасаввур этиш мушкул. Уларнинг яхши шеърлари рўзномалар, ойномаларда чоп этилганда кўзлари чақнаб кетганинг кўп бор гувоҳи бўлганман.

...Домла Шифохонадан уйга келган пайтлари эди. Дийдорлашиш умидида кирсам, Муҳаммад Али ҳам келган эканлар. Самимий сўрашдик. Домла негадир тундроқ. Турсуной ая менга шивирладилар:

— Жуда машқлари паст. Бундоқ теша тегмаган гапларингиздан гапириб ўтиринг, зора чиройлари очилса.

Гап орасида бир-икки латифалардан айтувдим, Муҳаммад Али ака қотиб-қотиб кулдилар-у, домла паришон жилмайиб қўяқолдилар...

Кейин шеърлар ўқишидик. Ҳангомага ҳангома уланди. Домланинг чиройи анча очилди.

— Тез-тез келиб туринглар, — деди Турсуной ая, — домла сизларга ўхшаш шогирдларини жуда яхши кўрадилар. Келишса, эркаланиб, яйраб кетадилар...

Ўша эркаланиш, яйраш — аслида, муҳаббатдир. Домлани ҳам «бардам ушлаб» турган шу муҳаббат бўлса ажаб эмас.

БЕШИНЧИ ҚЎШИҚ

ИЖОБАТ

Инсон умрига, унинг тақдирига назар солиб, ҳукм чиқариш ниҳоятда мушкул. Сабабки, ҳар бир одам — алоҳида қисмат эгаси. Одамзод бир-бирига ўхшаса ўхшару лекин қисмати, тақдири, умр йўли асло ўхшамайди.

Улкан тарихга эга бўлган чархи кажрафторнинг бағрида яшаган лаҳзалик умрим давомида ажиб қисматларга дуч келдим. Қировли кунларда чамандек очилиб турган паҳтазорга уриб кетган сувни гавдаси билан тўсиб, ҳалок бўлган йигитни асло унутолмасам кепрак. Ёки бутифос сепилиб, ўтгач, азбаройи зўрлигини намойиш этибми, паҳтага ишқи зўрлигиданми дала айланавериб, заҳарланганларни эсласам вужудимда оғриқ туради. Бу каби тақдирлар қанча! Улар ҳақида ўз вақтида ёзилган, мақталган...

Ўзбекистон халқ ёзувчиси Шуҳрат ҳақида ўйлаш — ҳам оғир, ҳам хайрли. Чунки Шуҳрат ўзбекона сабрбардошнинг, тоқат-чиdamнинг намунаси, деб ўйлайман. Кечаги ўзининг «Сенинг севгинг», «Кавказ дафтари» сингари ажойиб шеърий китобларини ёзган навқирон Шуҳрат йўқ. Кечаги «Шинелли йиллар», «Олтин зангламас» каби улкан романлар муаллифи Шуҳратнинг бугун руҳи тирик...

...Борсам Шуҳрат ака ҳордиқ чиқараётган экан.

— Ҳозир чақираман, — деди Турсуной ая. — Сиз ўтиринг, баҳузур чой ҳўплаб туринг.

— Аяжон, келинг, домла бироз дам олақолсинлар, икковимиз суҳбат қурақолайлик.

— Нимани гапираман? — Турсуной ая, изига қайтиб ўриндиққа оҳиста чўқди. — Бир хил аёлларга ўхшаб сўзамолгина бўлмасам.

— Гаплашсак гап кўп, — дедим. — Масалан, домла билан илк учрашувингизни...

— Э, қўйинг, ёшим бир жойга борганда муҳаббатдан сўзлаш хижолатлик иш. Муҳаббат ўз жойида — юракда туратурсин.

— Ҳеч бўлмаса қачон турмуш қургансиз, шуни айтиш мумкиндири.

— Урушдан кейин. 1946 йилда турмуш қурганмиз. Ниятларимиз жуда ҳам катта, баҳтиёр эдик. Шуҳрат акангиз урушда кўрганларини айтиб, кўзларидан ёш оқиб кетарди. Орзуларимизнинг чеки йўқ эди. Лекин бошимизга тушадиган мусибатларнинг ҳам чеки йўқ экан...

Дарров кўз олдимга келди: икки баҳтиёр ёш. Бири жангларни кўриб дийдаси қотган, бири эса унга қанот бўлишга рози сумбулсоч қиз. Икки кишининг бардоши чамаси, тог ағдарилса кўтаришга етса керак.

— Мусибатлар дейсизми?

— Ҳа, мусибатлар. Қўлимда Фикратим олти ойлибola, қолган эди. Шуҳрат акангиз қамалдилар. Озод бўлгунларича, кўраримни кўрганман, укажон...

Эшик очилиб, Шуҳрат ака кирдилар. Чехралари ҳоргин туюлди менга. Омонлашиб, ўтиридилар.

— Кеннойинг билан суҳбатлашяпсанми?

— Ҳа, энди сиз айтмайдиган гапларни сўраб оляпман.

Домла хиёл жилмайдилар.

— Мен айтмаган гап ҳам бор эканми?

— Ҳа, бор экан. Қолганини ўзингиз айтинг, — деди Турсуной ая чой қуйиб узатар экан.

Шуҳрат ака менга узоқ тикилдилар. Кўзларида қан-дайдир норизолик аломатлари борлигини пайқадим. Бу нимадан экан? Нега? Ахир, тўрт фарзанднинг, ўн бир неваранинг сарбони бўлиб, тош келса кемириб, сув келса симириб, шу дориломон кунларга етиб келганидан шодлик учқунлари сочилмайдими?

Худди фикримни уқсандек, Шуҳрат ака бош иргадилар.

— Юрақда орзу, ният кўп эди. Чала ишларим бор. Уларни қачон тутгатаман, ким тутгатади... Истиқдолга ҳеч нима қилолмадим...

— Ахир, ижодингиз, ҳаётингиз истиқдолга баҳшида-ку! Айниқса «Олтин зангламас» романингиз, таъбир жоиз бўлса, истиқдолнинг ilk мардона қўшиги!

Шуҳрат ака асога суялди: шундоқ, шундоқ. Лекин умр ўтяпти! Бефойда эмасми бу ўтган умр...

Мен Шуҳрат аканинг кўзларига қараб ўйга толаман. Изтироб кўрдим бу кўзларда! Ижоддан холи адабнинг изтиробини кўрдим.

— Ҳибзиiddин аканинг ҳам йўқлиги билингапти, — гапга қўшилди Турсуной ая. — Доим кириб турадилар раҳматли. Янгиликларни айтиб турадилар. Кўп меҳрибон инсон эдилар.

Мен Шуҳрат ака ва Турсуной аяга қараб туриб, юрагимда ҳавасми, оғриқми уйғонди. Бири қоя бўлса, бири тог, икковлон бир-бирини суюб, яшашапти. Яна уч йил тангри умр берса улар олтин тўйларини нишонлашади. Турсуной аяда ҳам, Шуҳрат домлада ҳам қатъият уқдим. Бўйсунмас, ўжар қатъиятни кўрдим. Бу қатъиятни 75 ёшга кириб, ҳалол яшаган адабнинг умридан ризолиги деб англадим. Бу қатъиятни ўзи ноzik, лекин ўрни келса харсангни ҳам янчадиган аёл иродасининг намунаси, деб англадим.

— Шуҳрат ака, ҳаётингизда энг эсда қоларли воқеа нима?

— Шу, — Шуҳрат ака бош иргади, — кеннойингга уйланган куним энг эсда қолгани.

— Гапингиз бор бўлсин! — Турсуной ая кулди. — Бошқа эсингизда қолгани йўқми?

Шуҳрат ака бош чайқади:

— Агар шу аёл бўлмаганда, унинг меҳрибон кўнгли бўлмаганда, билмадим, нима бўларди.

Турсуной ая чойни янгилаш баҳонасида ташқарига чиқди.

— Ўн бир йил бўлди, — деди Шуҳрат ака. — Ўн

бир йилдан бери ўзимни гўдак ҳис этаман. Тузукроқ иш қўлимдан келмайди.

Мен домланинг китобларига ишора қилдим.

— Булар, ахир, гўдакнинг қўлидан келадиган иш эмас.

«Чақмоқ юлдуз», «Кечки нурлар», «Ҳали тун узоқ», «Шайдо қўнгил», икки томли танланган асарлар. «Умр погоналари» қиссалар китоби... Уларнинг барчаси дом-ла айтган ўн бир йил давомида чоп этилган.

Шуҳрат аканинг илк шеърий китоби «Ҳаёт нафаси» босилгандан бери қанчадан-қанча сувлар оқиб ўтди. Агар умр чиндан оқар сув бўлса, Шуҳрат ака ўкинмаса ҳам бўлади. Чунки шу оқиб ўтган сувнинг икки қирғоғида худди ҳалқоб майсалар каби олтмишдан зиёд китоблар қолди. Ҳар бирида бир қатим юрак ҳарорати, бир қатим кўз нури, умрнинг бир парчаси муҳрланган.

— Инсон боши — сатнинг тоши, — деди Шуҳрат ака ўйчан. — Шу тошнинг бошидан не-не тўлқинлар ўтмайди. Тош эса собит қолади. Собитлигига сабаб — унинг бардоши!

Қадимда бир донишманд киши яшаган экан. У тоумрининг сўнгти кунигача тазиикларга, хўрликларга дуч келган экан. Нима бўлибдию унинг юртига ёв босиб келибди. Лашкарбоши донишмандинг ҳарбий зақоватига ичидан тан берса ҳам, уни қамситар экан. Ахийри, бош этиб келибди:

— Юртни ёв босди. Бизнинг ожиз ақдимиз етмаяпти. Ёғий кучли кўринади. Кўмак беринг.

Аслида лашкарбоши кўп таъна-маломатлар кутган экан, донишманд эса дарров отланиб, йўлга тушибди. Ҳамжиҳатлик билан юртига келган ёвни бартараф этишибди. Лашкарбоши унга қуллуқ қилибди:

— Ахир, сенга озмунча тазиик ўтказмадим. Рости, ўрнимни оласан, деб чўчирдим, лекин сен бир оғиз сўзим билан жангга чиқдинг!

— Мен Ватанимдан ҳеч қандай ёмонлик кўрмадим, — дебди донишманд. — Сен эса ўз табиатингга мос иш қилдинг. Билки, юртимга хизмат қилиш — мен учун, ҳамиша муқаддас!

Шуҳрат домланинг ҳам юртга садоқати ривоят бўлгулик! Тўрт йил қонли жабҳаларда жон олиб, жон бериш. Кейин илк китоб романнинг йўқолиши! Ҳибсхонада бекорга сарф бўлган бир йиллик умр... Йўқ. Шуҳрат домла ҳеч қачон бирорвга чеккан адолатсизликлари-

ни айтиб, нола қилмади. Гина қилмади. Белни боғлаб, ишга киришди. У билардики, зое умр ўрнини фақат меҳнат билан, ижод билан қоплаш мумкин! Шу меҳнатнинг меваси ўлароқ «Шинелли йиллар», «Олтин зангламас», «Жаннат қидирганлар», «Оқибатли кишилар» асарлари юзага келди. Шу меҳнатнинг меваси ўлароқ «Беш кунлик күёв», «Құша қаринглар», «Дўстимнинг ўғли», «Она қизим» драмалари яратилди. Шу меҳнатнинг меваси ўлароқ домланинг кўксини «Ўзбекистон халқ ёзувчиси» нишони безади.

— Шуҳрат ака, ижод қалай бўляпти? — оҳиста сўрайман.

— Ижод йўқ, тамом, — деди Шуҳрат ака хўрсиниб. — Чамаси ўзим ҳам тамом энди.

— Эй, қўйинг, бунақа гапларни! — дедим капалағим учиб. — Ҳали қанча чала асарларингиз бор. Уларни тугатишингиз керак.

Домланинг юзига, кўзига ҳасрат чўқди. Мен шу ҳасрат аро кўп нарсаларни уқдим... Менинг устозларим Чўлпон, Қодирий, Фитратлар истиқлол орзусида яшадилар. Шу йўлда ўлимга ҳам тик боқдилар. Менинг не-не дўстларим озод Ўзбекистон учун жангларда жон бердилар. Мен эса шу қутлуг кунларга етиб келдим. Бахтим бор экан! Чиндан ҳам омадли эканман. Лекин шундай кунларда, айни ижод қиласидиган паллада дардим ичимда ўтирибман!

Шоирнинг кўзлари алдамайди. Мен бу минг бир машаққатни кўрган кўзларда умрдан, ҳаётдан ризолик достонини ўқидим. Мен бу кўзларда юртни севиш, энг оғир паллаларда ҳам унга содиқ қолиш дарсини ўқидим. Мен бу кўзларда ўзи эмас, фарзандларини ҳам камолга етказиб, эл-юрт хизматига йўллаган отанинг баҳтиёрлик туйгуларини ўқидим. Мен бу кўзларда на-биralар баҳти, иқболига бўлган иштиёқни ўқидим!

Турсуной ая чой дамлаб келди.

— Икковинглар жуда бир-бирингларга тикилиб қолибсизлар? — кулди ая. — Тинчликми?

Шуҳрат ака кулиб юборди. Унинг кулгуси ўн бир йил аввал бўлганлиги каби шод ва баҳтиёр эди.

Инсон боши — сойнинг тоши,
Не тўлқинлар ўтмас бошидан.
Инсон дўсти — сабр-бардоши
Айрилмасин шу йўлдошидан.
Машаққатлар ўткинчи асли,
Айрилмагин эл-қуёшингдан!

Шуҳрат ака икки қатор шеърларини давом эттирганим учун мендан ранжимади.

ХОТИМА

Гоҳида одамзодга нисбатан табиат хатоликка йўл қўймадимикин, деб ўйлаб қоламан. Бу шаккоклишка ўхшайди. Лекин, начора, ўзи берган феъл-атвор, ўйлашга мажбурман.

Одамга Ватан керак, Ватангэ эса садоқатли ўглон керак. Энди тақдир ўйинини қаранг: бир хил инсонлар юртидан олисларда азиз бўлади, у эса юртимда фаррош бўлсам, гадо бўлсам ҳам майлийди, фақат бир қултум сувини ичсам, бир кафт тупрогини ўпсам, дейди. Афсус, насиб этмайди.

Одам ўз Ватанида яшаяпти, дейлик. Атрофида қадрдан дўст-ёрлари, топиш-тутиши яхши. Уй-жой тайин. Энди у ҳаддидан ошади, денг. Ҳукмини ўтказади. Во-ажаб, истеъоддиларнинг устидан истеъодсиз кишилар ҳукм юргизгиси келади. Аслида ҳамма ўз ишини қилгани дуруст. Ҳаётда кўпинча бунинг акси бўлади. Не-не улуғ зотлар ҳақсизлиқдан қийналади. Халқимиз ҳалиги тоифа одамлар ҳақида топиб айтган: «Қазисан, қартасан, ахир аслингта тортасан!» Камситилган, ҳақоратланган фикри тиник, қалби ёргуғ кишиларга ҳам тасалли бор: «Олдингдан оққан сувнинг қадри йўқ!»

Шундоқку-я, лекин қачонгача?

Шуҳрат аканинг тургунлик йилларидағи бўйсунмаслиги «аслига тортганлар»га қарши «оққан сувнинг» исёни эди, жангга киргани, кураш бошлагани эди! Афсуски, Абдулла Қаҳҳордан кейин у яккаланиб қолди. Абдулла ака атоқли адаб Саид Аҳмадга: «Мендан кейин сизга жуда қийин бўлади, ҳеч ҳам хато қилманг» деган эканлар. Бу гап юз фоиз Шуҳрат ақага ҳам таалуқли.

Ҳа, Шуҳрат ака хато қилмадилар: улар устоз васиятига, номига содик қолдилар. Мислсиз садоқат кўрсатдилар. Садоқат кўрсатиб, саодатга эришдилар.

Мабода Шуҳратни бетакрор адаб сифатида эмас, садоқатли шогирд сифатида баҳоласак ҳам, Абдулла Қаҳҳорга бўлган садоқатлари туфайли у киши ўзбек адабиётида ўзининг муносиб ўрнини топарди.

Бу гап Шуҳрат акани неча йиллар кафтида ардоқлаб келган — рафиқаси Турсуной аяга ҳам таалуқли.

Бу муҳтарама аёл вафо ва садоқат тимсоли сифатида энг олий иззатларга муносиб!

Шуҳрат ака қитобларидан ҳам ёлчиган, фарзандларидан ҳам. Қитоблари қанчалаб ташна диллар учун оби ҳаёт бўлса, фарзандлари шундай оталари қилган ниятга муносиб инсонлар бўлиб етишдилар.

Шуҳрат аканинг Жасорати, пўлатдек МАТОНАТИ, халқига, устозига САДОҚАТИ унга абадий САОДАТ бахш этди. Чин инсон, содиқ шогирд, катта адиб сифатида ҳаёт уни халқ муҳаббатига абадий мушарраф этди...



Тўлан НИЗОМ

БИР ТЎКИН БОГ ЭДИ...

Муҳтарам устоз шоир Шуҳрат хотирасига

Қирқ йил бурун Шошда бир bog бор эди диловор,
Қучоги осмон эди, ҳиммати чексиз, кенглик.
Армонли Инсон эди, шоир эди бегубор,
Дунёда бўлсин, дерди — адолат, дўстлик, тенглик.

Бу боғда турли мева саралари бор эди,
Булбуллар сайроқ эди, қушлари шўх-шўх эди.
Дастурхонда кимлар ҳам нозу неъматдан еди,
Халқа берган улущдан боғбон қўнгли тўқ эди.

Аммо унга маломат кесаклари отилди,
Пайхон бўлди ям-яшил ўсиб турган майсалар.
Бунда туз ичганларнинг қай бирлари сотилди,
Инонмайман уларга бугун нима десалар.

Боғбоним ўтиб кетди, боги қолди ҳувуллаб,
Азиз руҳи сарбаланд — юксаклардан термулар.
Дараҳтларни тебратар шаббодалар гувуллаб,
Тилда қотган сирларни само билар.

Кўп меҳмон қилган эдим Бобурий Андижонда,
Шаҳрихонда ё Бўзда ё Сулаймон тогида.
Бугун иззат-икроми гуширап тоза қонда,
Меҳрига тўёлмадик аммо тирик чогида.

Жаннатда топган бўлсин энг азиз одамларин —
Мунис онаи зорин, падари бузрукворин.
Кўрсин буюк пирларин — энг улуғ ҳамдамларин —
Ойбегу Гафур Гулом ҳам Абдулла Қаҳҳорин.

Шоир дафтари очиқ, сатрлар жимиллайди,
Китоблар қатлам-қатлам, хонада абадийлик.
Лаҳзалар тўхтаб қолган, йиллар ҳам имиллайди,
Меҳрибон устоз қани, тақдирга нима дейлик?..

Турсуной она сокин, соchlарида оппоқ нур,
Азамат ўғилларга, қизларга қўяр кифтин.

«Олтин зангламас» дейди, яшанглар тетик, масур —
Юраклари кўтарар «Кавказ шеърларин»¹ тафтин.

Бир дам ўйланиб қолдим, ёдимга тушди мана,
Устоздан битта мактуб — келтирганди Муҳаммад.²
«Тўлан, сени мен бугун согиниб кетдим яна,
Элликка кирдингми-а, худойим берсин омад».

Дўстим кўзга ёш олиб, сўйлаб берди қолганин,
Ҳамон кўзим олдида Шуҳрат домла барҳаёт.
Ундан-да юққан ижод — қалбимда ўт олганин,
Аланга яллигини кўриб қўйсин одамзод.

Душман эса раشك қилсин, қувонсин дўст бўлса гар,
Қўлларимда ҳилпирад шеъриятнинг байроби —
Чунки менга муаллим — доно эди мухтасар,
Шул боис йиги бўлур эртагимнинг адоги.

Қирқ йил бурун Шошда бир bog бор эди диловор,
Қучоги осмон эди, ҳиммати чексиз, кенглик.
Армонли Инсон эди, Шоир эди бегубор,
Дунёда бўлсин, дерди — адолат, дўстлик, тенглик.

Октябрь, 1997 йил.



¹ — Шоирнинг машхур «Кавказ дафтари» шеърлар туркуми.

² — Ўзбекистон халқ ёзувчisi Муҳаммад Али.

ШОИР ҚАЛБИНИНГ ФАРИШТАСИ

Турсуной аяга

Шуҳрат кўчасида бир фаришта бор,
Ширин нафасидан гуллайди олма.
Шуҳрат ҳовлисида сўнмас шамъ ёнар,
Азиз шамъ, гўзал шамъ, сен ўчиб қолма!
Асли сен бўлмасанг, шоир бўлмасди.
Асли сен бўлмасанг, бўлмасди шеър ҳам.
Асли сен бўлмасанг, шону шавкат йўқ,
Сенсиз осмон йироқ, қаттиқдир ер ҳам.
Сен ўзинг минг битта саволга жавоб,
Сен совуқ музларни эритган баҳор.
Шоирнинг чироги ўчмагай асло,
Ўзинг бор, ўзинг бор, ўзинг бор!
Шуҳрат кўчасида сайрайди қушлар,
Шуҳрат кўчасида гуллар гунчалик.
Шуҳрат ҳовлисида бир покиза нур,
Аёл пари бўлса, бўлар шунчалик.
Ҳадеб йигламади, зорланмади ҳам,
Юраги тубида тоғларни кўрдим.
Кўкламга юзландим сўзлашиб туриб,
Хаёлида биллур боғларни кўрдим.
Мехрдан сўзлади, сўзлади баҳтдан,
Сўзлади: садоқат — қанча буюк сен!
Вафодан ўзгасин гапирмади у,
Вафодан бошқасин сўрамадим мен...



ОЛТИН ЗАНГЛАМАС

Шоир ва адид Шухратнинг ёрқин хотирасига

Умр ўтди синовда, кундуз ила тун
Гоҳ аччиқ айрилиқ олди комига.
Ҳасаду худбинлик кўрсатиб кучин,
Шафқатсиз иргитди туҳмат домига.

«Ўнг қўл меҳнат қилди, тополмади баҳт,
Сўлга тилла соат қўйдилар тақиб».
Кимдир амал олди, ким сохта шуҳрат,
Покиза инсонни айлагач таъқиб.


Не учун? не сабаб? қай гуноҳ учун?
Жавоб беролмасди ул жоҳил замон.
Бажо этганими инсонлик бурчин
Ёхуд ҳалқ дардими? дардки беомон.

Ёки одамзодга ибрат бўлгуси
Шогирд садоқати бекиёс мисол.
Балки ўқ сўзлиги, нозик туйғуси
Ёки чўнг меҳнати сут қаби ҳалол.

Ё тоза имони, миллат гурури —
Букилмас иродада, сўнмас эътиқод,
Мехрла порловчи кўзлари нури
Ёвузлар қалбига кўриндими ёт?

Нечун шунча ташвиш, гам, андуҳ, алам
Дерсиз шўрлик бошга, парча юракка?
— Кураш, деб ушланур одатда қалам,
Токим етмагунча эзгу ниятта.

Устоз, бу фазилат эди сизга мос,
Ўзини ўйловчи буни англамас.
Сиздаги қалб қўри улуғларга хос,
Олтин номи ўчмас, Олтин Зангламас...





ХОТИРАЛАР



ЎЧМАС ХОТИРА

Ўтгизинчи йилларнинг ўрталари. Мен Тошкент педагогика институтига кирадиган бўлдим. Ўқувга кириш учун ариза берганлар орасида қатор ҳамкасларим бор эди. Булар — мен билан «Ленин учқуни» газета таҳририятида ишлайдиган Зафар Диёр, матбуотга ўз шеърлари, хабарлари билан қатнашиб турувчи ёш қаламкашлар эди. Шулардан биттаси кейинчалик Шуҳрат тахаллуси билан адабиётимизда ном қозонган Гуломжон Алимов эди. Мен бу бениҳоя очик, қувноқ, дали-гули йигитчани газетамизнинг фаол ёш муаллифи сифатида олдинроқдан танирдим. Институтта имтиҳон топширишимиз чогида унинг яна бир яхши хислатини билиб олдим. У, ўзининг ҳожатбарорлигини кўрсатди. Бўлгуси талабаларнинг айримларини қийинчилиқдан қутқарди. Бир шеригимиз тўрт фандан имтиҳон топшириб бўлгач, бешинчи имтиҳон — кимёга келганда юраги бетламай турарди. Шуҳрат мактабни аъло битириб, кимёни ҳам яхши биларкан. «Сен қўрқмай имтиҳонга киравер, оғайнни. Мен қўллаб юбораман» деб далда берди. Шеригимиз эса қўрқа-писа дарсхонага кирди. Имтиҳон билетини олиб дераза ёнига ўтирганда, Шуҳрат дераза орқасидан имо-ишора билан билетдаги саволга жавоб айтиб юборди. Яна шу йўл орқали математикадан қийналиб турган бошқа ҳамроҳимизнинг ҳам мушкулини осон қилганди.

Тил-адабиёт факультетининг биз кириб ўқий бошлаган гуруҳи, юқорида айтганимдай, ижодчи ёшлар се-роблиги билан ажралиб турарди. Омадимиз юришиб, домлалардан ҳам ёлчигандик. Мақсад Шайхзода, Ҳамид Сулаймон, Ҳомил Ёқуб, Ҳоди Зарифлар дарс беришарди. Машгулотлар ниҳоятда жонли, руҳли, мазмунли ўтарди. Гуруҳимизда ижодий муҳит ҳукм сурарди. Бунда Шуҳрат алоҳида ўрин тутар, унинг овози баралла янграб турарди. Машгулотларга фаол қатнашиши, дарсларга пишиқ-пухта тайёрланиб келиши, китоблар мутолаасига берилганлиги, устма-уст дадил саволлари билан баъзан ўқитувчиларни шошириб қўйиши, зарур бўлганда шерикларидан ёрдамини аямасли-

ги уни аудитория ҳурматига сазовор қилганди. Яна кўпчилик диққатини тортган нарса — Шуҳратнинг ижодий фаоллиги эди. Гуруҳимиздаги ҳамкаслари Зифар Диёр, Восит Саъдулла, Неъмат Тошпўлат, Ёнгин Мирзалар билан ижодий мусобақада бўларди. Дарсдан ташқари соатларда мушоираларда янги шеърларини ўқиб, дўстлар маслаҳатини оларди. Баъзан эса ёшлар ўргасига кириб, мушоиранинг файзига файз қўшарди.

Ўша йиллари республикамиздаги ўқувчи ёшлар ва талабалар ўргасида Усмон Носир номи машҳур бўлганди. Чўлпон, Гафур Гулом, Гайратий каби устозлар сағида ёш Усмоннинг оташин шеърлари кенг ёйилган, оғиздан-оғизга ўтиб, йигинларда, тўй-ҳашамларда ва бошқа катта-кичик давраларда ўқиларди. Бизнинг гуруҳ талабалари ҳам шоирнинг «Лирикам», «Юрак» каби шеърларини ёддан ўқищда қизгин ўзишувга киришишганди. Шуҳрат билан Неъмат Тошпўлатнинг шеърларни маромига етказиб ўқиш билан ҳаммани қойил қолдириб, ўзишувда ютиб чиқишигани эсимда.

Шуҳрат адабий сұхбатларда нафаси ўткир шоир бўлган Усмон Носирнинг жўшқин, эҳтиросли ижодини тўлиб-тошиб тилга олар, ўшандай шоир билан танишиб олганидан фахрланарди. Шоирнинг сұхбатларидан олган таассуротларини мириқиб сўзларди. Усмоннинг Чўлпон билан яқинлигини, улуғ устози сифатида Чўлпондан маҳорат сирларини ўрганганинги эшитиш талабалар қизиқишини ортдиради! Уларда Усмонни кўриш, унинг сұхбатини олишга иштиёқ туғилди. Шуҳратдан: «Усмон Носирни институтимизга таклиф қилсанг, яхши бўларди-да» деб илтимос қилишади. Усмонга бу таклифни етказган экан. Усмон иши кўплигиданми ёки бошқа нарсанинг истиҳоласи биланми, тортиниб туради. Шуҳрат эса бўш келмасдан: «Сизни талабаларгина эмас, домлаларимиз ҳам кўргилари келяпти» деб Шайхзода, Ҳамид Сулаймонлар номини келтиради. Шундан сўнг Усмон рози бўлиб, институтга ташриф буюради. Шу кун институт учун байрам бўлган, залга одам сигмай кетганди. Қораҷадан келган, кўзлари ўткур, жуссаси ихчам, кўриниши содда бу йигитнинг саҳнада пайдо бўлиши гулдирос қарсакларга сабаб бўлганди. Шунда Усмоннинг қўл кўтариб, жилмайган ҳолда айтган биринчи гапи: «Чапаксиз ўтсин, барака топкурлар!» деган илтимоси бўлди. У ўқиган ҳар бир шеърни залдагилар жон қулоги билан, чуқур ҳаяжон ичида тинглашарди. Усмон ўз шеърлари

қаторида ардоқли устози Чўлпоннинг ҳам шеърларидан ўқиди. Чўлпон ҳақида меҳр тўла юрак сўзларини изҳор этди.

1937 йил бошларида ўтган бу учрашув талабалар қалбида унугимас хотира қолдирганди. Буни севинч ва гууррга тўлган ҳолда тез-тез ёдга тушириб туришарди. Аммо бу севинч узоқча бормади. Ўша вақтлар адабиётимиз даргалари Абдулла Қодирий, Чўлпон, Фитратлар бошига ёғилган фитна, бўхтон тошлари Усмон Носирни ҳам четлаб ўтмади. Унинг ёшлик чогиданоқ ижодда катта шуҳрат топганини кўролмаган ҳасадгўй ганимлар унга ҳам «халқ душмани» тамғасини ёпиширишган, уни ҳам устозлари кетидан қатагонга дучор этишганди. Табиийки, бундай ноҳақликлар, фожиаларга Шуҳрат бефарқ қараёлмасди. Унинг аҳвол руҳияси, кайфиятига ёмон таъсир этганди. Озмунча пинҳоний изтироблар чекмаганди у. Усмон Носир қамоқча олингач, уни яқиндан билган ва у билан бирга бўлганлар таъқиб остига тушганлари маълум. Бу ҳақда кейинроқ Шуҳратнинг ўзи: «Усмон билан кўп вақт бирга бўлганим, шеърларини ёд олганим, бир неча бор уйимизга боргани, қолаверса, китобларига мени «Ўзбек адабиётининг умиди» деб ёзиз бергани бошимга битган бало бўлиши мумкин эди. Шу боис, юракни ҳовучлаб юрар эдим...» деганди. Дарҳақиқат, ўша кезда Усмон Носирга қарши ёзилган мақолада Шуҳратни унинг думи деб айблашган, ижодига шубҳа билан қарай бошлашганди. Шу орада уруш бошланиб қолди-ю, Шуҳрат фронтга кетиб қутулди. Урушдан қайтгач, адабий ижодга жиддий берилди. Матбуотга ранг-баранг мавзууларда ёзилган шеърлари билан қатнаша бошлади. Радио тўлқинларида унинг янгроқ овози тез-тез янграб турди. Лекин ёмон кўз билан тикилган кучлар қутқуси билан, қирқинчи йиллар охири кутилмагандага у ҳибста тушиб қолди. Номини «миллатчи», «пантуркист», «халқ душмани» деган бўхтонларга chalpişdi. Бир неча йил қамоқ азобларини тортиб чиқди.

Мана шундай ноҳақликлар, қийноқлардан сўнг ҳам Шуҳрат тушкунликка тушмасдан, ўзи танлаган ижодий меҳнат йўлида катта самараларни қўлга киритиш учун метиндай сабр-бардошли, қатъиятли, маҳкам иро-да кучига эга бўлиши керак эди. Шуҳрат ўзида мана шундай сифатлар мужассам эканлигини яққол кўрсатди. Бу сифатларни у астойдил ихлос қўйган устозларидан, албатта Усмон Носирдан ҳам юқтирганлиги аён-

дир. Биз, дўстлари, чинданам Шуҳратнинг чидамли, бардошлиги, меҳнатдаги жонсараклиги, кўзлаган мақсад сари борищдаги собит қадамлиги, фидойилиги га тан берардик. Бўлмаса у навқирон умрининг қанча сара йилларини ноҳақ қатагонларга бой бергани ҳолда, яна адабиётга қанчаям салмоқли ҳисса қўшган бўлармиди!

Ҳа, тушкунлик, нолиш нималигини билмаган, табиатан оптимист бўлган дўстимиз ижодга ва жамоат ишларига бор кучи, гайрати билан шўнгиб кетганди. Етук адиллар сафига чиқиб олган Шуҳрат ўз ижодий тажрибасини ёшлар билан ўртоқлашишда обдан саҳиийлик, тантлий намунасини кўрсатарди. Ёзувчилар уюшмасида, нашриёт ва журнallарда ишлаган кезларида ёш ёзувчиларнинг қўлёзмаларини ўқиб, самимий маслаҳатлар кўрсатишда эринмасди, етук асарларни чоп этишда қўлидан келган кўмагини аямасди. Унинг феълида тўгрисўзлик билан куюнчаклик қўшилиб кетганди. Ёшлар билан апоқ-чапоқ бўлиб, тез тил топишиб кетгувчи эди. Бир ёш ёзувчининг туппа-тузук қўлёзмаси салбий тақризга учраб нашриётдан қайтганда Шуҳрат бунга дадил аралашган, қўлёзма босиб чиқаришга лойиқлигини очиқ исботлагани эсимда. Бошқа бошловчи муаллифнинг ҳикоялар тўплами муҳокама қилинганда эса Шуҳрат бир ҳикоя устида тўхталиб қолди. Бунда бир йигит билан қиззинг кўчада қучоқлашиб ўпишиб кетаётгани тасвирланган экан. «Булар кимлар, укажон?» деб савол берди Шуҳрат. «Булар севишганлар» деган жавобни олди муаллифдан. «Уларнинг миллати нима?» деди Шуҳрат. «Миллати ўзбеклар» деди муаллиф. Шунда Шуҳрат сал қизишиганини сездирмасдан деди: «Агар ўзбек бўлсаям, аммо ўз миллати шаънига доғ туширадиган ўзбеклар экан. Иннайкейин, ҳақиқий севишганлар ўзларини бунақангি шарманда қилмасалар керак-а, укажон?» Ўзи-ўзидан ёш муаллиф изза тортиб, нафаси ичига тушиб кетганди. Шуҳрат буни сезди ва: ёшлиқда одамдан бунга ўхшаш хатолар ўтиши, буни тузатиш мумкинлиги, тўпламдаги ҳикоялар орасида дурустлари борлигини айтиб, ёш муаллифнинг кўнглини кўтариб қўйганди. Шуҳратнинг бегараз кўрсатган ижодий кўмагидан баҳраманд бўлиб, миннатдорчилик билан эслаб юрадиганлар анчагина бор ижодкорлар орасида.

Мен бир болалар ёзувчиси сифатида Шуҳратнинг кичкинтойлар адабиётимиз ривожига қўшган ҳиссаси-

ни айтмай ўтолмайман. У қатталар адабиётида кўплаб шеър, достонлар, «Шинелли йиллар», «Олтин зангламас», «Жаннат қидирғанлар» каби йирик романлар яратиш билан қаттиқ банд бўлганига қарамай, болаларга ҳам асарлар ёзишга вақт топарди. «Болаларга ёзиш нечоғлик қийинлигини биламан-у, лекин ёзиз турмасам хумори тутади» деб қўярди фахр билан. Бу эса унинг болажонлиги, чин педагоглиги, одамохунлигини кўрсатиб туради. Болаларга ёзганда у худди қувноқ кичкинтойлар даврасига кириб қолгандай, улар билан чугур-чугур тиллашгандай, уларнинг шўх-шодон ўйин-кулгиларию қилиқларига қўшилиб кетгандай сезарди ўзини. Ҳикояларида ўзи қатнашиб келган даҳшатли урушнинг фожиаю оғатларини ошкор этиб, болаларда урушга қаттиқ нафрат уйготувчи воқеаларни келтирап, ҳалқлар ўртасидаги дўстликнинг кучини очиб берувчи, атроф табиатта меҳр уйготувчи мавзуларга кўпроқ диққатни тортарди. Шеърлари ҳам гўзал, шўхчан, хилма-хил бўлиб, ўғил-қизлар онги — қалбига маънавият уруғларини мўл-кўл сочар, ота-оналарни, ватанини жондан севишига ундарди, мусулмончилик одоб-ахлоқидан сабоқ берарди. Кичикларбоп сара асар ёзишнинг нақадар масъулиятли эканини теран англаган шоирнинг бир яхши одати шу эдики, қачон болаларга асар битса, уни дарров ҳамкасбларига келтириб кўрсатар, фикрларини олиб қиёмига етказарди. Шуҳрат болалар ёзувчилариға қўшилиб мактабларга бориш, ёш китобхонларга шеърлар ўқиб беришни яхши кўради.

Шуҳратнинг абадий хотирамизга сингиб қолган ибратли хислатларидан яна бири дўстларга чин садоқатию устозларга чексиз таъзим бажо келтириши эди. Ўзи табаррук ёшга этиб, кўпгина шогирдлар қуршовида юрган бўлса-да, ўзига ҳаётда, ижодда ҳақ йўлни кўрсатсан устозларидан салгина бўлса-да, ажралмади. Унинг Абдулла Қаҳҳорга бўлган ихлосу иззати бунга яққол далилдир. Устозга соғ-саломат вақтида қандай меҳрибонлик кўрсатган бўлса, хасталик тўшагига ёпишиб қолганида ҳам ёнидан бир қадам жилмади. Устозга охирги руҳий мададни кўрсатишга астойдил ҳаракат қилди.

Шуҳрат ҳалол кечирган умри ва яратган асарлари билан хотира қолдирган адидир.

ИЖОДКОР МАТОНАТИ

Баъзан айрим ижодкорлар ҳақида бирор истак билдириш зарур бўлса, ўйлаб-ўйлаб бир нима дейишга қийналиб қоласан. Зўрма-зўраки айтилган гап ижодкорга ҳам, китобхонга ҳам фойда келтирмайди. Айрим ёзувчilar ҳақида эса худди сенинг энг яқин дардкашингдек, у ҳақда дилингдаги гапларингни айта қолсам, деб шошиласан. Шундай адиблардан бири — севикли дўстим, улкан романнавис, ажойиб драматург, жўшқин шоир, ўзининг ахлоқий поклиги билан ҳамиша намуна бўла олган, ҳар қанча таҳсинга лойиқ Ўзбекистон халқ ёзувчиси Шуҳратдир.

Шуҳратнинг прозамиздаги салмоқли ўрни, драматургиямизга қўшган ҳиссаси, шеъриятимизнинг кекса авлоди вакили сифатида қилган хизматлари, бу ҳақда айтилиши лозим бўлган гаплар кишилар кўнглида неча йиллар давомида турли сабаблар билан йигилиб келган эди. Шу вақтгача унинг ижоди ўзининг тўла баҳосини ололмаган эди. Кишилар руҳиятини поклаш учун кураш бораётган бир даврда Шуҳратдек ижодкорлар ҳаётини кенгроқ таҳлил қилиш, унинг асарларини халққа етказиш амалий аҳамиятга эга. Ахир, Шуҳрат ҳаётда ҳам, ижодда ҳам чеккан машаққатларни бошқа бирорга ўзбек ёзувчиси кўрмаган. Унинг энг юксак инсоний фазилати шундаки, ижодкор ҳар қандай маломат, хўрлик, бўғтонлар чангалида, ҳа, худди шундай, қаддини ҳам қилмади. Дардкаш излаб, ҳар кўринингганга тақдидиран нолимади. Метин ирода, ўз инсонийлигини йўқотмай ижод қилди.

Ҳақиқат ва ҳалолликнинг бир кунмас бир кун голиб чиқиши ва қаҳрамонликнинг мashaққатлари тўғрисида кўпроқ китобларда ўқиймиз, кино ва театр саҳналарида кўрамиз. Ёзувчи Шуҳрат эса ҳалоллик, ўзининг ҳақлигига ишонч, инсоний гурур каби ажойиб фазилатли кишиларнинг орамиздаги тирик намунасиdir.

Шуҳрат 1950-йилларда ноҳақдан 25 йил муддатга озодлиқдан маҳрум этилди. Бир неча йил умрини лагерларда ўтказди. Ҳақ жойига қарор топиб қайтиб келгач, шахсга сигиниш даврининг фожиаларини акс эт-

тирувчи «Олтин зангламас» романини ёзишга кириши. Ойбек, Абдулла Қаҳҳор романлари даражасидаги асар деб баҳоланган бу романнинг ҳам, минг афсуски, китобхон қўлига тегиши осон бўлмади. Нашр этилгунча минг чигириқдан ўтди. Чунки у ҳаётий, ҳаққоний, катта журъат билан ёзилган асар эди. Ўша йиллар адабиётда ҳаётнинг ижобий томонларигина мадҳ этилаётган бир муҳитда бундай роман яратишга ҳамма ҳам журъат этавермасди. Шуҳрат эса журъат тоғди.

Шуҳрат асар ёзиб, ижод қилиб роҳат топмади, аксинча, кўпроқ машаққат тортди. Унинг «Олтин зангламас» романигина эмас, Ватанга садоқат мавзуида битилган «Жаннат қидиргандар» асари ҳам китобхонларга етгунга қадар, ҳозир ҳам тирик юрган шахсларнинг бўғтонларига учради.

Адаб ижода ҳам, ҳаётда ҳам ўзига содик қолди. Унинг ибратли фазилати шундаки, таъма билан ижод қилмади. Мукофот, унвонлар қетидан қувмади. У амалмартабаси, раҳбарларнинг муносабатига қараб дўст танламади. Виждони буюрган ишни қилиб ўзини эркин тутди. Шундан ором олди.

Абдулла Қаҳҳор кекса ёзувчilar орасида ҳаётдаги нуқсонларни кўриб индамасдан туролмайдиган, ҳамма ҳам айтишга журъат қилолмайдиган ноҳақликларни очиқ айта оладиган ёзувчи бўлгани учун «тили аччиқ» деган ном олган эди. Унга раҳбарларнинг муносабати яхши бўлмаган.

Айниқса, республика раҳбарлари иштирокида Наравий театри биносида унинг 60 йиллигига багишилаб ўтказилаётган тантанали юбилей кечасида минбардан: «Ёзувчи партияning солдати эмас», деган гапни айтганида, ҳайрат ва газаб билан бир-бирларига назар ташлаб, кеча охирида, юбилиярни қучоқлаб, яхши тилаклар тилаш ўрнига совуқ хайрлашадилар. Таёёрланган зиёфат дастурхонига ҳам иштирок этишини ўзларига эп кўрмайдилар. Ўша оқшомдан кейин Абдулла Қаҳҳор душманга чиқарилиб, ошкора жазоланмаган бўлса ҳам, умрининг охиригача уни руҳан азоблаш давом этди.

Буни билганлар, ҳукуматнинг мукофоту унвонларидан умидвор бўлганлар, ҳатто Абдулла Қаҳҳорни устоз деб билган айrim шогирдлар орасида ундан узоқлашганлар ва мукофотдан маҳрум бўлмайин, деб таъзиясига бормай қўйганлар ҳам бор. Аммо Шуҳрат шуларни била туриб, Абдулла Қаҳҳорга ўзини яқин тутади. Та-

бийики, бу нарса Шуҳратнинг фойдасига бўлмайди, ўзига жабр қиласди.

Абдулла Қаҳҳор Москва касалхоналаридан бирида оғир хасталиқдан вафот этган дамларда ҳам адигба муносабатни била туриб, Шуҳрат унинг ёнида бўлади. Машақатлар билан адиг жасадини Тошкентта олиб келишда ҳам жон куйдиради. Дағн маросимидағи расм-русларни, хуфия жанозасини ўтказишда ҳам ўзи бошқош бўлади. Ўлди, энди менга нима фойдаси тегарди, демади. Шуҳрат ана шундай одам эди.

У эътиқоди мустаҳкам, риёдан ор қиладиган, эътиқоди йўлида ҳар қандай машақатни тортишга тайёр ижодкор эди. Бирор ишга бироннинг зўрлаши билан эмас, ўз хоҳишим, ўз ақдим билан қўл урдимми, демак, энди унинг роҳатини ҳам ўзим кўришим, азобини ҳам ўзим тортишим керак, деб биладиган ва бундан афсус қилмайдиган, муҳаббатини ҳам, нафратини ҳам ўзгартирмайдиган собит иродали инсон эди. Баъзи бирорлар сингари эътиқодини сотмасди.

Абдулла Қаҳҳорга яқин бўлиш азобини фақат Шуҳрат эмас, ҳатто унинг вафотидан кейинги маросимларида адабиётдаги хизматлари, ёшларга ғамхўрлиги ҳақида сўзлаганлар ҳам торта бошладилар.

Бир куни, кутилмаганда мени Ўзбекистон Компартияси Марказқўмининг биринчи котиби Шароф Рашидов чақиргани тўғрисида хабарни етказишиди. Нима сабабдан эканлигини айтишмади. Негалигини ўйлай-ўйлай топа олмадим. Бу бевақт таклифдан нечукдир кўнглим гаш тортиб, тайинланган вақтда етиб бордим. Мен билан кўришган дамларида ҳамиша бирор асаримни ўқиганидан гап бошлаб, очиқ чехра билан гаплашадиган Шароф Рашидовнинг ўша кезлардаги ёрдамчиси бўлган Михаил Иванович Косих, «Нима масалада чақирибдилар?» деган саволимга рўйхуш бермай, иши кўп одамдай мендан ўзини олиб қочди ва: «Мен билмайман. Ҳозир кирасиз», деган совуққина жавоб қилди. Сездимки, яхшиликка эмас.

Кўнгил гашлиги тарқамасдан хоналарига кирдим. Кирсам, Рашидовнинг ёнларида ўша вақтлардаги Ёзувчилар союзининг секретарларидан Рамз Бобожон ва Раҳмат Файзий ўтирибди. Учрашиб қолганимизда ҳамиша мен билан самимий кўришадиган Шароф Рашидов ҳол-аҳвол сўрамасдан, дабдурустдан: «Нималар қилиб юрибсиз? Нималар деб юрибсиз?» деб сўради. Гап нима устида кетаётганидан бехабар бўлганим туфайли

қандай жавоб қилишимни ҳам билмай қолдим. Менинг жавобимни кутмасданоқ, у: «Абдулла Қаҳҳордан кейин бошимизни силайдиган қолмади, депсиз! Партия сизга раҳнамо эмасми?» деган гапни айтиб қолди. Бу жудаим даҳшатли айбнома эди.

Гап нима устида кетаёттани шунда менга аён бўлади...

Абдулла Қаҳҳор вафот эттанидан кейин ўтказилган маъракалардан бирида, уни дағнি этиш комиссиясининг раиси менга сўз берди. Мен: «Адабиёт олий қасрининг тўрт устуни — Гафур Гулом, Ойбек, Шайхзода, Абдулла Қаҳҳор қулади. Энди ким улардек бизга ғамхўрлик қиласиди?» деган гапларни айтдим. Ахир, марҳумнинг тепасида ҳеч ким уни ёмон демайди-ку? Шундан кейин Шароф Рашидовнинг ҳам, Ёзувчилар союзи раҳбарларининг ҳам менга муносабати бутунлай салбий томонга ўзгарди, четта суриб қўйилдим.

Мен Абдулла Қаҳҳор ҳақида айтган икки оғиз гапнинг партияга нима алоқаси бор эди? Авваламбор, Шароф Рашидов сўзлаган вақтимда бўлмаганлар. Бўлган тақдирда ҳам, иймоним комилки, айнан шундай деганимни эшишиб, ундан тескари холоса чиқариб, мендан ранжишга ҳам бормасдилар. Бу кўнгилсизликнинг сабабчилари бошқалар эди. Улар ўзларининг гаразли мақсадлари йўлида менинг гапимни қора бўёқча бўяб, ёнига қўшиб-чатиб:

— Шарофжон, Шукрулло ўз гапида Абдулла Қаҳҳор ўлганидан кейин ўзбек адабиётида энди унингдек меҳрибон, ундан талантли кекса ёзувчилар қолмади, адабиётимиз гарип бўлиб қолди, демоқчи бўлди. Сиз билан бизларни чиппакка чиқариб юборди. Абдулла Қаҳҳор бўлмаса, бошимизни силайдиган Сиз, партия бор-ку! — деб дод солиб Рашидовга борганлар, аслида Абдулла Қаҳҳорнинг ўртамиёна, шуҳратпараст «дўстлари» эди.

Кичик бир йигинда гапирилган бир оғиз самимиy гапим учун бир неча йил таъқиб қилинганимда Абдулла Қаҳҳор билан тириклигида ҳам, вафот эттанидан кейин ҳам қадрдан бўлган ва хотирасини эъзозлаган Шуҳратнинг аҳволини тасаввур қилиш қийин эмасди. Лекин Шуҳрат бунга афсусланмади. Бошқалар қандай муносабатда бўлишидан қатъи назар, Қаҳҳорга бўлган меҳридан воз кечмади. Абдулла Қаҳҳорнинг айрим шогирдлари:

— Мен ҳозир Ҳамза мукофотига қўйилганман, эн-

ди унга багишиланган маросимга бормайман. Сўз беришсалар, албатта, йўқ дея олмайман, гапириб қўйиб, тагин мукофотдан маҳрум бўлиб қолмай, — деб, унинг номини ҳатто, тилга олишдан ҳазар қилиб юрганларида ҳам, Шуҳрат Қаҳҳорнинг адабиётдаги хизматларини унумтади, унга садоқатини, устозининг меҳрибонликларини ва оиласига бўлган меҳр-оқибатини ўзгартирмади.

Шуҳрат мақтовга берилмайдиган, ҳаммадан мақтов кутмайдиган, ўзи ҳам бошқаларни ўринсиз мақташни хушламайдиган, ўзига ишонадиган ажойиб киши эди.

Ижодкорлар орасида мукофот олиш, унвонга эришиш учун кимларнидир мақтаб, кимларгадир хушомад қилувчилар ҳам оз бўлса-да топилади. Аммо Шуҳрат умр бўйи ҳалол меҳнати билан фаҳрланди-ю, ялиниб ялатоқланишни билмай ўтди.

Тенгдошлари 50 ёшида «Ҳамза мукофоти», «Ҳалқ шоири» унвонини олганларида, у етмиш ёшига қадар булардан ҳам бенасиб ўтди. Ҳатто дўстлари каби мукофотга сазовор бўлиш имкони тасодифан тугилганида ҳам у фойдаланиб қолишни билмади.

У дўстларга садоқати, вафодорлик олдида ҳамма нарсадан воз кечса кечардики, аммо риёга бормасди. Бу унинг қайсарлиги эмас, унинг ўжарлиги эмас, риёни, хиёнатни шармандалик, деб билишидан эди. Бир воқеа сира-сира хотирамдан ўчмайди.

Ўзбекистон Ёзувчилар союзининг раҳбарларидан бири марҳамат қилиб, Шароф Рашидов билан Шуҳрат ўртасидаги муносабатни илиқлаштириш мақсадидан бўлса керак, Рашидовнинг фронт ҳаётидан ёзилган асарини Шуҳратга: «Сиз ҳам уруш кўрган жангчи-ёзувчисиз, ўқиб чиқиб, фикрингизни билдирангиз, яхши бўларди», деб таклиф қилган. Аммо Шуҳрат қандайдир баҳоналар билан бунга истак билдирамаган. Мен буни кейинчалик эшишиб, Шуҳрат мендан бир неча ёш катта бўлса ҳам, ёшлиқдан дўст бўлиб сенлашиб гаплашадиган, ҳар қандай гапни айтишга бир-биримизга ҳаддимиз сигадиган бўлгани учун: — Имконни бой берибсан, яраш пайти келган экан, ҳар қандай ишингни ташлаб бўлса ҳам ўқиб қўя қолмасмидинг? — дегандим, бу гапларим унга ёқмади!

Мен шаҳд билан унинг нафсониятига тегадиган бир-икки қаттиқ-қаттиқ гаплар айтдим. Аммо, у одати бўйича жаҳл қилмай, бепарволик билан:

— Майли!.. Майли!.. — деди-ю қўйди.

Унда шундай одат бор эди. У бирор билан ўзига ёқмаган масала устида ортиқча тортишиб ўтирмасди. Гапига қўшилмаганлардан гина ҳам қилмасди. Мен шаҳд билан ачиниб:

— Одамлар талашиб, менга ўқишга берсалар, бир кунда ухламасдан ўқиб чиқардим, деб орзу қилгандарида... Сен! Қийноқдан, ахир, қутулар эдинг-ку, — десам, у юрагини очиб:

— Дўстим, ўқишга эринмасдим. Аммо оқибатни ўйладим. Шароф Рашидов кичкина одаммас, катта раҳбар, аммо асарларини, ўзинг биласан, жуда талантли деб бўлмайди. Бордию ўқиб чиқсан, унда менга ёқмади деб тўғрисини айтаманми? Шундай қилсан яхши кўринаманми? Муносабатимиз яхшиланиши ўрнига аввалгидан бешбаттар ёмонлашмайдими? Мабодо мендан нима кетди деб, яхши десам, у кишига ҳам, ўзимга ҳам жабр қилган бўламан. Ўқимаганимнинг сабаби шу!

— Извогарлар, ўқимади дея, шундан ҳам фойдалансалар-чи?

— Пешонамдан кўраман.

— Пешонангдан ўргилай!..

Унинг бу жавобидан катта эканлигига қарамай, ўз тенгдошларидан камситтириб, тортган азобларидан энди қутулиш фурсати келганда, бой берганини ўйлаб хурсанд бўлмаган бўлсан ҳам, аммо, ўзига ишончи, ҳалоллиги, событ фикрли одамлигига тан бериб, бағримга босгудек бўлдим. Ёмонни ёмон деса, ёмонлик қўшилиб, «жинни»ни жинни деса, арпа бўйи қўшилади деганлариdek, унинг қайсаrlигини яна авж олдириб юбормайин, деб ўйлаб, ўзимни тийдим. У пок, ўзига жуда ишонган одам эди. Адабиётдаги ўрнини билар эди.

Ҳакиқатни айтганда, унинг «Олтин зангламас» ро-манни Ўзбекистондаги қайси ёзувчининг асаридан кам эди? Шеърлари, достонлари-чи! Унинг айримлардек қатор-қатор увонлари, орденлари бўлмаса ҳам, у ўз қилган меҳнати билан ором олар эди. Халқнинг берган баҳоси билан фахрланарди. У халқа хизмат нималиги ни қалбига сингдириб олган эди.

Хукумат олдида бошқалардек қадр топмагани сабабларидан яна бири, у йигинларда, тўю маъракаларда сўзлагудек бўлса, совет халқи, халқимиз дейищдан кўра, миллатимиз, миллат деган сўзларни кўп ишлатар эди. Бу ҳам ҳукуматдаги айрим кишиларни чўчитиб,

унга нисбатан шубҳа уйготар эди. Чунки шахсга сиғиниш даврининг иллатлари ҳар қадамда ўзини намоён қилиб турар эди. Буюк Ойбекнинг бошига тушган кун ҳам, дард ҳам эркинлик даврида Шуҳратнинг бошида тақрорланди. У соглигини йўқотди, лекин қум билан булоқни кўмиб бўлмаганидек, ёзувчи қалбидағи жўшқинлик, ихлос янги-янги асалар бўлиб қоғозга тушаберди.

Шуҳрат ўз ишининг ҳақлигига ишонган сиймо. Ўзига ишонган одамга эса бошқалар ҳам ишонади. Мен ҳам Шуҳратга ҳеч тебранмасдан ишониб келганман, энг сирли дардларимни унга айтганман. Бизлар шу қадар яқин дўст бўлганмизки, яқинда газеталардан бири бирга тушган расмимизни сўраганида, тополмадим. Одатда унда-мунда кўришадиган кишилар кел, бир эсдалик учун расмга тушиб кетайлик, дейдилар. Биз эса ҳамиша бирга бўлганмиз, ҳар доим шундай қолади, деб ўйлаганмиз.



МАЊНАВИЙ ЖАСОРАТ

Бир пайтлар Тошкентда ҳозирги Матбуот Уйининг ўрнида Бирлашган Нашриёт бўларди. Шу жойда 1950 йилда «Студентлар» деган ҳикоям босилиб чиққан эди. Бир кун Бирлашган Нашриётда Шуҳрат акага дуч келиб қолдим. У киши — ватан уруши жангтоҳларидан сочлари бевақт оқариб қайтган салобатли шоир. Мен — ёш талаба — одоб билан қўл қовуштириб кўришдим. Авваллари «Шарқ юлдузи»га ҳикоя кўтариб борганимда, Шуҳрат ака мени таниб қолган эканлар.

— «Студенлар» ингизни ўқидим, — дедилар. — Биринчи қадамни дуруст қўйибсиз. Журналда тақриз ҳам чиқибди. Танқидчи «маҳорат етишмайди» дебди. Буни кўнгилга қаттиқ олманг. Сиёсий айб қўймаганидан хурсанд бўлаверинг. Сиздан ёзувчи чиқади. Дадил бўлинг!

Шуҳрат ака бу сўзларни оёқда тикка турган кўйича қандайдир ички бир оловнинг таптидан кўзлари ялтираб айтдилар. Сўнг хайрлашиб, нашриётдан чиқиб кетдилар. Мен жуда таъсирландим, раҳмат айтганимча қолдим. У кишининг гап оҳанглари хатарли сафарга кетаётган одамнинг ўз иниси билан хайрлашаётганда тайинлаб айтган дил сўзларига ўхшаганидан хиёл таажжубланиб қўйдим.

Кейин билсам, ўша кезларда Шуҳрат аканинг яхши кўрган домласи Мақсад Шайхзода қамалган экан. Унга оғир сиёсий айблар қўйилаётгани матбуотда эълон қилинди. Шуҳрат ака мана шу адолатсизликдан оташин бўлиб юрган пайтларида мен учраб қолган эканман.

Эллигинчи йилларда яна хуруж қилган бу машъум қатагон ижодкор зиёлиларга қарши қаратилган, айниқса қалам аҳли орасида қама-қамалардан қўрқиб-пусиб юрганлар кўпайган эди. Шу шароитда Шуҳрат ака кўкрагини баланд кўтариб юргани, бир ёш ёзувчининг илк китобчасини ўқиб фикр айтгани, яна «дадил бўлинг!» деб далда бергани урушда минглаб хавф-хатарни кўриб чиниқкан шоирнинг мањнавий жасоратидан ва адабиётимизнинг келажаги учун жон куйдирганидан далолат берарди.

Аммо мустабид тузум жасоратли ижодкорларга кун бермас эди. Ўша йили кеч кузда Шуҳрат ака ҳам қамалганини эшитиб, дилим хуфтон бўлди. Нега бундай бўляпти? Сабаби аниқ айтилмайди. Ҳадиксираш кучаяди. Номаълум хавф-хатардан одамни ваҳим босади.

Мен бу оғир туйгуларни «Уч илдиз»да ўз тенгдошларимнинг ўша давр қатагонларидан руҳан эзилганлари орқали тасвирилашга интилганман. Роман ёзилаётган пайтларда Шайхзода домла ва Шуҳрат акалар қамоқдан қутулиб келишди. Мен улар билан кўришганимда бир нарса ёдимда қолди: икковининг ҳам кафтлари жисмоний меҳнатни кўп қилган одамларнинг кафтидек қаттиқ ва залварли туюлди. Кейин бу туйгу ҳам романда Раҳим Умарович деган домланинг қамоқдан чиқиб келгандан кейин ўз талабалари билан кўришганда кафтлари Маҳкамга тошдек қаттиқ сезилгани орқали берилиди.

Булар-ку, қамоқ лагерларида ҳам энг оғир меҳнатларни қилиб, нонларини ҳалоллаб еган мард одамлар. Аммо уларни туҳмат билан қаматган Ҳакимов, Эшонбоев тоифасидаги номардлар-чи? Мен уларнинг ҳам ҳаётда прототиплари борлигини билардим. Улар шамол қаёқдан эсса ўша томонга паррагини тўғрилаб кун кўрадиган, гаразли мақсадлар йўлида ҳеч қандай разилликдан қайтмайдиган виждонсиз шахслар эди. «Уч илдиз»да биз мансуб бўлган ёш авлоднинг бутун меҳри Ойбек ака, Шайхзода домла, Шуҳрат ака каби ноҳақ жабр кўрганларга багишланган, нафратимиз эса уларга туҳмат тошини отган ўша манфаатпараст игвогарларга қарши қаратилган эди.

1957 йилнинг кузида Ўзбекистон ёзувчилар уюшмасида бу роман қўлёзмаси муҳокамага қўйилганда Шуҳрат ака ҳам уни ўқиган, «игвогарларни боплапсиз, танидим!» дегандилар.

Лекин биз мустабид тузум қатагонларининг фақат бир четини ташқарисидан кўрган бўлсак, Шуҳрат ака унинг барча даҳшатларини ўз бошидан кечирган эди. Бу ҳақда таржимаи ҳолда ўzlари шундай дейдилар: «Мен «Олтин зангла мас»да тасвириланган ҳаётнинг атрофида мас, нақ ичида бўлганман. Бу мавзуда бир нарса яратмасам кўнглим жойига тушмас эди. Буни виждоним тақозо этарди».

Маълумки, собиқ шўро тузуми ўзининг энг даҳшатли жиноятларини фош этадиган қатагонлар ҳақида ҳаққоний асар ёзган ҳар бир адигба адоват кўзи билан қарар,

уни турли-туман йўллар билан обрўсизлантириб, четга суриб ташлашга интиларди. Шуҳрат ака буни А. Твардовскийдек машҳур шоирнинг «Хотира ҳаққи» номли зўр достони босилмай ётганида, «Архипелаг ГУЛАГ»ни ёзган А. Солженициннинг зўравонлик билан ажнабий юртларга чиқариб юборилганида кўриб турарди.

Алоҳида жасорат ва фидойилик талаб қиласиган бу қалтис мавзуга киришишдан олдин Шуҳрат ака ўзининг улкан маънавий бисотини — Улуғ Ватан уруши даврида тўрт йил мардона жанг қилиб кўрган-кечирганларини катта асар саҳифаларида тасвирлаб ижодий тажриба орттириди, куч йигди. Ўнинг уруш даврида ёзган шеъларида шундай сатрлар бор:

Озмунча жанглар қилмадим мен,
Озмунча қонлар кечмадим.
Неча бора ўқ есам ҳам,
«Бас, етар жанг», демадим!
Энг оғир дамларда ҳам
Баҳт-саодат юлдузидан
Ҳеч умидим узмадим!

Бу сатрлар орқали иродаси мустаҳкам, сабр-бардоши чексиз, келажақдан умидини узмай доим олга талпинган жасур ўзбек йигити кўз ўнгимизда гавдаланади. «Шинелли йиллар» романида Шуҳрат ака бу йигитга Элмурод деб исм қўяди. Тўрт йиллик қирғин-барот урушнинг бошидан охиригача фидойиларча жанг қиласиган бу йигитни ўзбекона меҳр ва миллий ифтихор туйгуси билан тасвирлайди. Ахир, одамзод тарихида содир бўлган урушларнинг энг улкани ва даҳшатлисида минг ўлимларга бўй бермай, бутун-бутун мамлакатларни босқинчилардан озод қилиш ва жаҳон миқёсида байрам қилинадиган оламшумул галабага ўзбекнинг обрўсини оширадиган дараҷада ҳисса қўшиш — умр бўйи фахрланса арзийдиган ҳодиса эмасми?

Элмурод қиёфасида биз Шуҳрат аканинг ўзини кўргандай бўламиз. Чунки роман муаллифи ҳам урушни 1941 йилнинг ёзида оғир чекинишлардан бошлаб, 1945 йилнинг баҳорида галаба билан туттаган, олдинги сафда батальон командири бўлиб, фашист аждаҳолари билан юзма-юз олишган. Тўрт йил давомида неча бор оғир ярадор бўлган, даволаниб, яна сафга қайтган ва яна жанг қилиб, ниҳоят Польшадан галаба билан қайтган. Бу — чинакам қаҳрамонлик эди. «Шинелли йил-

лар» романни ана шу қаҳрамонона рух билан сугорилганлиги учун китобхонлар уни қўлдан қўймай ўқиди. Роман русча ва бошқа тилларга таржима бўлиб, сал кам миллион нусхада чоп этилди.

1958 йилда Москва ёнидаги Переделкино ижод уйида Шуҳрат ака билан бир ойча қўшни хоналарда яшаб, қалам тебраттанимиз ёдимда бор. Дам олиш соатларида қарагайзор йўлкаларда бирга айланардик. Қатагон йиллар тўгрисида гап очилса, Шуҳрат аканинг юзи оташин ва шиддатли тус оларди:

— Мен учун тўрт йиллик урушдан ҳам тўрт ярим йиллик қамоқ оғир бўлди. Урушда, ҳар қалай, қўлда қуролим бор эди. Лагерда бизни талончи, киссабурлар билан бирга қамаб қўйди. Ўгрининг қўлида пичоги бор. Биз — қуролсиз. Ўйдан майизми, патирми, соғинган бирон тансиқ нарсангиз келса, дарров талончи ўғрилар пайдо бўлади. Бир кун учтаси пичноқ кўрсатиб, уйдан келган посилкамни тортиб олмоқчи бўлишиди. Қани энди фронтдаги қуроллардан бўлса! Йўқ! Нарироқда узун бир хода турган экан. Югуриб бориб, ўшани икки қўллаб кўтардим. «Очкўз ўгрилар, мен фронтда қанча фашистни ер тишлаттанман, энди сен газандаларга кунингни кўрсатаман!» деб ходани жон-жаҳдим билан сермадим. Пичноқ ўқталганлардан бирининг елкасига хода тегиб, аганатиб юборди. Қолган иккитаси жуфтакни ростлаб қолди... Шунақа жондан кечиб тавакkal қилмасангиз кун кўролмайсиз. Бўш келсангиз синдиришади... Терговчилари ҳам, назоратчилари ҳам одамни синдириб, эгиб-букиб олишнинг пайидан бўлишиди. Синдириб букиб олганларидан кейин ёвуз ишларни қилдиришади. Қилмаган жиноятингизни «қилдим» деб, ёздириб, қўл қўйдиришади.

Шу шароитда иродаси синмасдан имони бутун инсон бўлиб қолиш қанчалик қийин ва машақкатли бўлганини Шуҳрат аканинг қўйидаги тўртлиги орқали ҳис қилиш мумкин:

Шунча кўп қоқилдим умримда, дўстим,
Оҳ, гурра бўлмаган ерим қолмади.
Шунда ҳам юрагим заҳа бўлмади,
Куймади имоним, дастим синмади.

«Олтин зангламас» романига ана шундай иродаси мустаҳкам, юраги заҳа емаган ва имони пок ўзбек зиёлиси бош қаҳрамон қилиб олинади.

«Шинелли йиллар»даги каби бу романда ҳам муалиф ўзи бошдан кечирган ўта мураккаб ва мушкул ҳаётий воқеаларни ичдан тасвирлайди.

«Олтин зангламас» ёзилган олтмишинчи йилларда «цензура» деб аталадиган таъқиқ ва тазииклар ҳали жуда кучли эди. Шуҳрат ака шу таъқиқ ва тазииклар орасидан йўл солиб ўтди, ҳалол бир зиёлини ноҳақ ҳибс қилган ва унга куракда турмайдиган ёлғон айбларни таққан риёкор золимларни фош этадиган катта романни ўзбек адабиётида биринчи бўлиб яратди.

Албатта, кейинги ўн йилларнинг ошкоралик даврида бу мавзунинг бутун кўлами ва барча қирралари адабиётда атрофлича акс этди. Аммо олтмишинчи-етмишинчи йилларда «Олтин зангламас»дай роман билан майдонга чиқиш учун катта ижодий жасорат кепрак эди. Ёзувчининг дилида борини ошкора ифодалашга ўша замона йўл бермаганини Шуҳрат ака яна бир тўртлиқда келишириб ёзганлар:

Мен олам китобин бир-бир варақлаб
Кўп нарса тушундим, кўп нарса билдим.
Замин-у, замону оқимга қараб
Ўнтадан биттасин ошкора қилдим!

Бироқ мустабид тузум мухлислари адиб аяб айтган шу ҳақиқатнинг «ўнтадан биттасини» ҳам кўтаролмас, Шуҳрат акага яна тұхмат қилувчилар топилса, уларни энг баланд даргоҳлардан туриб қўллаб-қувватлашга интиларди.

Адолатсизликни қарангки, Россия, Украина, Польша ва бошқа юртларни фашистлардан озод қилиш учун узоқ йиллар жанг қилган, неча ўлимлардан қолган, урушдан кейин эса «Кавказ дафтари», «Дунай соҳиллари» шеърий туркумлари, ажойиб балладалари билан турли эл-юртларга биродарона меҳр уйғотган ёзувчини дабдурустдан миллатчиликда айблайдиган қозоз Москвадан, «Правда» газетасидан келганига ва Ўзбекистон Марказкомида маҳсус кўриб чиқилганига мен ўзим гувоҳ бўлганман.

31 декабрда — ҳамма янги йилни қутиш тарааддуидида юрган бир пайтда, тўсатдан бизни Марказкомнинг фан ва маданият бўлимига чақириб қолишиди. Борсам, Яшин домла, Хамид Гулом, Асқад Мухтор, Одил Ёқубов, Матёкуб Кўшжонов, — жаъми ўндан ортиқ таниқли ёзувчи ва адабиётшунослар йигилишибди. Адашма-

сам, 1981 йилнинг охири эди. У пайтда Ш. Р. Рашидов ҳаёт эдилар. Фан ва маданият бўлимида «Правда» газетасининг муҳбири ҳам ўтирибди. Бўлим бошлиги беш-үн бетлик машинкада кўчирилган мақолани қўлига олиб гап бошлади:

— Ёзувчи Шуҳратнинг «Жаннат қидиргандар» романи ҳақида... Ўзимизнинг ўзбек қаламкашларидан бири «Правда»га ёзибди. «Шуҳратнинг мазкур романни миллатчилик руҳида ёзилган» деб айб қўйибди.

Йигилганлар бир-биримизга хиёл таажжуб билан қараб қўйдик. Паст товушда кимdir:

— Тавба! — деб қўйди.

— Шароф Рашидович сизларнинг бу роман тўғрисидаги фикрларингизни билмоқчилар, — деди бўлим бошлиги. — Адабий жамоатчиликнинг фикрини бил, кейин «Правда»га жавоб юборишмиз керак.

Сўнгги гапдан мен ўзимча бир қадар енгил тортидим. «Шароф Рашидович адабий жамоатчиликнинг фикрига қараб жавоб қилмоқчи бўлсалар, демак,adolatli йўл тутмоқчи эканлар» деган ўй дилимга илик туюди.

«Жаннат қидиргандар»ни ҳаммамиз ўқиган эдик. Бу романда ҳеч қандай миллатчилик йўқ, унда молдунёнинг кетидан қувиб, ватанга хиёнат қилиш энг оғир фожеъаларга сабаб бўлиши тасвирланган, демак, ватанпарварлик туйгуси улугланган эди.

Ҳаммамиз шу мазмунда гапирдик. Шуҳрат аканинг ватан урушида жасорат кўрсатганини, ижодида халқлар дўстлиги мавзуси муҳим ўрин эгаллашини, унинг романларида бошқа халқларга қарши қаратилган бирор гап йўқлигини ҳар биримиз билганимизча айтдик. Сўзларимиз баёнини «Правда»нинг муҳбири ёзив олди. Назаримда, у ҳам байрам арафасида бегуноҳ ёзувчига отилган шу тұхмат тошидан тезроқ қутулишни истарди.

Хуллас, йигилганлар бир оғиздан Шуҳрат акани ёқладик. Шароф Рашидович бу нозик масалада адабий жамоатчиликнинг фикрига таянганидан, илгари ноҳақ жабр кўрган адабни навбатдаги тұхматдан ҳимоя қилишнинг оқилона йўлини топганидан мамнун бўлдик. Лекин бошқа бир нарсадан кўнгил хира тортарди. Ўз халқини севган, адолат учун курашган ёзувчига қандайдир гаразгўйлар «миллатчи» деб ёлгон айб тақса, нега уларнинг тұхматига Москва бу қадар катта аҳамият беради? «Правда» чинакам адолат тарафдори

бўлса, ҳалол адабни ёқлаб, тухматчини фош қилиши керак эмасмиди?


Шуҳрат акани мана шу саволлар қанчалик эзганини, руҳига азоб берганини тасаввур этиш мумкин.

Мен ўша куни «Олтин зангламас» романидаги тухматкаш Мирсалимни ва унинг хўжайини бўлган терговчи Чухановни яна бир эсладим. Ёзувчи романда уларнинг бутун кирдикорларини фош қилган эди. Энди улар гўё роман саҳифаларидан чиқиб келиб, Шуҳрат акага яна тухмат тошини отаёттандай туюларди. Чунки саксонинчи йилларда ҳам шўро тузуми Мирсалим ва Чухановга ўхшаган нопок кимсаларнинг хизматларидан ҳазар қилмай, ҳамон уларга таяниб иш олиб борар эди.

Орадан кўп ўтмай Гдлян ва Ивановлар Ўзбекистонда амалга оширган ёвузликлар аҳвол шундайлигини бутун дунёга намойиш қилди.

Эллигинчи йилларда бошлиланган ва саксонинчи йилларда ҳам кети узилмаган тухмат зарбалари Шуҳрат aka жанг майдонларида ортирган яра асоратларига қўшилиб, адабнинг соғлигини зимдан емирған экан...

Шуҳрат aka орамиздан бевақт кетдилар. Лекин бу нодир сиймонинг ватан ҳимоясида ва ижод соҳасида кўрсатган жасоратлари умрбод дилимиз тўрида яашашга муносибdir.



СИЙМОСИ ҲАМОН КЎЗИМ ОЛДИДА

Фашизмга қарши Уруш йилларида юртимиизда ҳеч ким галабага ҳисса қўшмай четда туролгани йўқ. Қўпчилик қатори ўзбек ёзувчилари ҳам бир қўлида қурол, бир қўлида қалам, қўйнида ёзув дафтари билан жанг қилдилар. Уларнинг кўплари, Султон Жўра, Оқилхон Шароғиддинов кабилар жанг майдонларида қурбон бўлдилар. Кўплари ярадор бўлиб қайтдилар-да, фронтларда кўрган-кечирганларига шеърда, достонларда, драма ёхуд насрый асарларда ўз ҳалқини ошно қилдилар. Шуларнинг бири ажойиб ижодчи инсон Шуҳратдир.

Мен Шуҳрат билан урушгача таниш эдим. Урушдан кейин эса қадрдан бўлиб қолган эдик. Таниқли шоир, кўзга кўринган романчи, яхши драматург Шуҳратнинг Қизил Армия сафида хизмат қилиб, жангларда иштирок этиб, Ватан ҳимоячиси сифатида ном чиқарганини ҳам яхши билардим.

Эндиғина шеър машқ қилаётган навқирон Шуҳрат 1940 йилда Қизил Армия сафига чақирилди ва қўшинларда аскарий хизмат қилиб юрган пайтида, фашизмга қарши урушда иштирок этишига тўғри келди. Гитлерчи босқинчиларга қарши курашда чиниққан Шуҳрат оддий аскарлиқдан капитан унвони олиш даржасигача ўсади, жангчиликдан ўқчи батальон командири даражасига етди. Жангларда уч марта яраланди, яраси битгач, яна фронтта, жангларга кирди. Ижодкор қалби жанг майдонларида ҳам тинмай шеър битиш, жанговар дўстларининг ҳаҳрамонлиги ҳақида дивизия, армия газеталарига хабар ёзишдан толмасди. Унинг хандақларда битган шеърлари аскарлар орасида қўлма-қўл бўлиб ўқиларди. Шунинг учун ҳам солдатлар ўз командирини беҳад севар эдилар.

Мен бу оташин қалб этаси, жангчи шоир билан урушдан кейин ёзувчиларнинг Тошкент шаҳар Биринчи май кўчасидаги маҳкамасида учрашгандим. Германиядан эндиғина қайтиб келгандим, Шуҳрат эса, мендан аввалроқ қайтиб келиб Ўзбекистон ёзувчилари ўюшмасининг «Шарқ юлдузи» журналида ишлаётган

экан. Иккаламиз ҳам бир-бировимизни аввалдан китоблар орқали билардик, асарларимизни ўқиб гойибдан таниш эдик. Мен аскарликда юрган чоқларимда унинг оҳанграбо, дилрабо шеърларини кўпинча «Ёш ленинчи» газетаси саҳифаларида ўқиб турадим.

Биринчи учрашувимиз икки қуролдош қадрдан қаламкашларнинг учрашувидай илиқ бўлди. Нимагадир гапимиз фронт ҳаёти ҳақида бошланиб кетди. Фронт ҳаёти тўгрисидаги гапимиз уруш қаҳрамонлари тўгрисида ёзилган ва ёзилажак асарлар мавзусига уланиб кетди. Шуҳрат ҳам, мен ҳам бир жабҳада уруш ва тинчлик мавзусида ижод қилаётган эканмиз. Дўстлигимиз ана шу онлардан бошланиб, қадрдан бўлиб кетдик.

Шуҳратнинг ёшлиги қатагонлик йилларда, нотинч ўтганини билардим. Мен ҳарбий хизматда юрган вақтларда бир неча илгор фикрли зиёлиларимиз қатори зукко шоиришимиз Шуҳрат ҳам тутқун бўлганди. Унинг ҳақида газеталарда тухматлар ёзилиб турди, ёзувчилар қаторидан ўчиришди, ҳатто «Сибир қилиб юборилди» деган гапларни эшишиб ачиндим. Чунки унинг айби йўқ экан, келиб чиқиши савдогар, уйидаги турмуши ўзбекона, ёзган шеърлари миллий руҳда, ўқийдиган китоблари орасида Қодирий, Чўлпон асарлари бор эмиш. Ана шулар уни айбсиз айбдор қилган эди!

Иродали Шуҳрат бўхтонларга ҳам, беш йиллик қамоқ азобига ҳам мардона чидаб, қаддини букмай, ижодини тўхтатмай ҳаёт билан ҳамнафас эканини кўриб, ўшандан унга бўлган муҳаббатим ошганди. Ўшандан кейин Шуҳрат билан ҳамкорлик қила бошладик.

Ёзувчилар уюшмасининг Биринчи Май кўчасидаги биноси айвонида менинг «Чин муҳаббат» романимнинг қўллэзмаси муҳокама қилинди. Унда Шароф Рашидов раислик қилди, Ойбек, Шуҳрат, Парда Турсун, Маъруф Ҳаким, Туйгуналар сўзга чиқдилар. Ойбек ака билан Шуҳрат жуда яхши фикрлар айтдилар. Ойбек ака устоз сифатида маъқул гап айтган бўлса, Шуҳрат ҳарбий ҳаётнинг яхши билагони сифатида яхши гаплар айтди. Кейинча мен ҳам Шуҳратнинг «Шинеллийиллар» романининг муҳокамасида ва уни тарғиб қилишда қўлимдан келганини аямадим.

Замонанинг зайли билан «Гулистон» журналининг қайтадан тикланишида мен муҳаррир бўлиб қолдим-да, унда иштирок этишга Эркин Воҳидов, Абдулла Орипов ҳамда Шуҳратни таклиф қилдим. Улар жон деб

ижодий ҳамкорлик қилдилар. Эркин Воҳидовнинг «Ўзбегим», Абдулла Ориповнинг «Коммунизм билан юзма-юз» асарлари қанчалик машҳур бўлиб журналхон эътиборини қозонган бўлса, Шуҳратнинг Абдулла Қаҳҳор ўлими тўғрисида ёзган одаси шунча шов-шувга сазовор бўлди. Аммо бу шов-шув шоир Шуҳратни оқибатда хаста қилиб қўйди. Шуҳрат тенгдошларига нисбатан ноҳақ камситилди.

Шоирнинг 50 йиллик юбилейи ана шундай шароитга тўғри келди. «Юбилей комиссиясини мана, мен бошқараман», дедим-да, шоирни водий шаҳар, қишлоқларига бошлаб бордим. Учрашувлар юқори савиядга ўтди. Тошкент матбуоти орқа-олдига қараб бўлса-да, шоир ҳақида мақолалар чиқарди, аммо водий газеталари зукко шоирни бўй-басти билан кўрсатиб, мақолалар босди.

Комиссия номидан жангчи шоир, носир, драматург Шуҳратта ҳалқ шоири фахрий унвони берилишини сўраб тавсияномалар бердик, буни Комил Яшин бошлиқ уюшмамиз қўллаб-қувватлади. Аммо материал қаерлардадир йўқ бўлиб кетди.

Кейин Галаба кунларининг бирида уюшма раиси марҳум Сарвар Азимов раислигида ўтган мажлисда мен бу масалани яна кўтардим. «Шинелли йиллар», «Олтин зангламас», «Жаннат қилдиргандар» каби машҳур романлар муаллифи, қатор шеърий китоблар, «Беш кунлик куёв», «Қўша қаринглар» каби комедияларни яратган, бетоб-ногирон ҳолида ҳам тинмай Ватан ишқида ёниб ижод қилаётган инсонни муносиб тақдирлашни қаттиқ талаб этдим, ҳатто эътиборсизлик учун уларни танқид қилдим.

Камсухан, камтарин шоир Шуҳрат Луначарскдаги шифохонада даволаниб ётган жойида менинг ачиниб қуйинганим учун раҳмат айтди-да, «Иброҳим ака, қўйинг, қуйинаверманг, ҳалқ билади. Худо билса бас...» деди.

Бутун умрини заҳматда, ижодий меҳнатда ўтказган ва меҳнатсиз туролмайдиган ижодкор Шуҳрат, касалхоналарда бетоб ётган пайтларида ҳам қўлидан қаламини туширмади. Хасталик туфайли тили зўрга айланяётган пайтларда ҳам лирик шеърларини куйлаб, янги-янги асарлар ёзди. Шоирнинг бевақт ўлимидан сал аввал Ҳамид Гулом билан уни кўргани борганимизда bemor адаб кўрпода ҳам ёзиб ётганини кўрдим. Шуҳрат умрининг охирида янги роман ёзаёттанини бил-

дирди. Унинг кўзлари нурсизланиб қолган бўлса ҳам узоқ-узоқларга боқиб тургандай эди.

Унинг гўзал сиймоси ҳамон кўзим олдида!

Зукко шоир Шуҳрат дўстларига садоқатли, оиласига содик, фарзандларига ниҳоятда меҳрибонлиги билан бошқалардан ажralиб турарди. Ҳатто сочининг оқини олиб қолиб, қорасини фарзандларига берарди. Биз буни ҳар ишда, ҳар қадамда сезиб турардик. Оиласи ҳам уни ўн ҳисса меҳр-муҳабbat билан эъзозлаганинг гувоҳиман. Узоқ йиллар бетоб бўлиб ётган Шуҳратни ҳалоласи Турсуной янги куёвлардай оппоқ қилиб эъзозлаганидан ҳамма мамнун. Фарзандлари эса падари бузрукворини ҳеч нарсадан камситмай бошлирга кўтариб ардоқлаганларидан ота рози кетганининг ҳам гувоҳимиз. Барака топишсин!

Шуҳрат орамиздан бевақт кетди, ёш, авжи ижодий кучга тўлган чогида кетди. Унинг қўпгина ижодий режалари, умид-армонлари рўёбга чиқмай ичидаги кетди. Афсус. Аммо ўзидан яхши ном қолдирди. Унинг номи ўчмайди, фарзандлари идрокида, асалари саҳифаларида, китобхонлари дилида ҳамиша яшайди. У жўшиқин, лирик ижоди билан орамизда юрибди!



УЛКАН ИСТЕЬДОД

Таниқли шоир ва адаб Шуҳрат ўзининг дилнавоз шеърлари, достонлари, қиссаю ҳикоялари, драматик асарлари ва айниқса, кенг кўламли романлари билан халқимиз ичида донг таратган, минг-минглаб ўқувчилар дилига тушган қалам соҳиби эди. У «Маликул қалом», яъни Ўзбекистон халқ шоири, деган юксак унвонга сазовор бўлди. Адаб ҳақида сўз айтарканман, озгина бўлса-да, яқин тарихга мурожаат этишни лозим топардим.

Йккинчи жаҳон урушидан аввал, ўттизинчи йил ўрталарида пойтахт Тошкентимиз маданий ҳаётида Педагогика институтидаги адабий ва илмий жараён довруг таратган. Кўплар қатори камина ҳам толиби илм ва адабиёт ошиги сифатида тўппа-тўғри Беш-Ёғоч қайдасан, деб шу институтга келиб кирган эдим. Бу олийгоҳда Ҳамид Сулаймон, Айюб Гулом, Айн Шарафиддинов, Сиддиқ Ражабовлар дарс бериши, Зафар Диёр, Шуҳрат, Ҳамид Гулом, Шукрулло, Аҳмад Алиев, Ҳибзиiddинхон, Бурҳон Зиёев...лар талаба экани қуломизига еткан. Ўша «адабий аланга» — машҳур домлалар меҳригиёси тортиб, бўйнидан бойлагандек эмас, иштиёқу муҳабbat билан олийгоҳ остонасига қадам қўйдик.

Профессор Ҳамид Сулаймон бош муҳаррир бўлган деворий газета ҳайъатига кириб, шу ерда таниқли шоир Шуҳрат билан танишган эдим. У ўша йиллардаёқ вақтли матбуотда фаол иштирок этар, номдор шоирлар билан танишлигини айтарди. Ватан муҳаббати, қардошлиқ, ўзбек халқининг заҳматкашлиги, инсоний муҳабbat шоир шеърларининг мазмуни мағзи эди. Ҳозир баъзи одамлар билмайди, биз ўша даврда, профессорларимиз раҳнамолигида Шуҳрат aka билан замбилинг бир томонида у киши, бир томонида камина, чуқур жарлиқдан тупроқ ташиб, ҳозирги Беш-Ёғоч кўли («Комсомол кўли»)ни қазиганмиз.

Шоир Шуҳрат зийрак, ниҳоятда одамохун, чин зиёли, сарвқомат гўзал йигит эди. Бизнинг танишишимиз ҳамда узоқ йиллар адабиёт майдонидаги ҳамкорлик,

ҳамдўстлигимиз чин дилдан эди, тинимсиз ижодий меҳнат қилишимиз баъзи ҳасадгўй «ошналаримиз»га ёқмаслигини сезардик.

Ватан уруши бошланиши билан шоир жанг майдонларига жўнади, ўзи айтгандек чиройли галстук ва костюмларни ечиб, шинел ва керзовой этик кийди. Урушда жанговар ҳаётни кўрди, офицер бўлди, сог-саломат юртига қайтиб келди.

Шуҳрат кўп ўқиидиган, китоб ошиги, жаҳон адабиёти дурдоналаридан хабардор, мулло шоир эди. Умар Хайёмана рубоийлари, Алишер Навоий асарларини кўп ўқигани кейинги шеър ва газалларидан сезилиб турди. Шоирнинг урушдан кейинги даврда ёзган бир кўп шеърлари, «Истак ва ўч» достони, «Ҳаёт нафаси», «Қардошлар», «Сенинг севгинг», «Ишқингда ёниб», «Қавказ дафтари», «Буюк муҳаббат», «Қиз табассуми» каби шеърий китобларининг нашр этилиши шоирга катта обрў келтирган.

Ватан урушида қатнашган, офицер шоир Шуҳрат Алимов кейинчалик «Шинелли йиллар» романини ёзиdi. Бу асар ўзбек адабиётида дастлабки катта, кўламли роман эди. Шуҳратнинг «Олтин зангламас» романида маърифат соҳиби — ўқитувчи шарафланса, «Жаннат қидиргандар» романида ватангадолик фожеаси бадиий ифодасини тошган.

Кўплаб шеърлару достонлар, публицистик мақолалар, рубоийлардан ташқари, уч катта роман муаллифи Шуҳратдай мўътабар адаб таъқибга учради. Изтироблар чекди, мустабид совет тузумининг зулми уни хасталикка олиб келди. Халқ учун шунча ажойиб асарлар яратиб берган, заҳматкаш адаб Мустақил мамлакатимиз, озод юртда асло унутилмайди.

Адабнинг порлоқ номи абадийлаштирилмоғи лозим. Иншоollo, мустақиллигимиз, буюк мамлакатимиз шарофати ила, муҳтарам адаб Шуҳрат номи албатта абадийлаштира лажак, у халқ дилига тушган улкан адидбидир.



ОРЗУЛАРИ КҮП ЭДИ

Аллоҳ раҳматига олсин, Шуҳрат-Гуломжон Алимов билан бизнинг ёшимиз баровар десам бўлади. Апрелда у 80 ёшга кирган бўлса, шу йили майда мен 80 ёшлигимни нишонлайман.

Шуҳрат билан кўп соҳада бир-биrimizga ўхшаш жойларимиз бор. Лоақал урушни олиб кўрайлик: унинг биринчи кунидан бошлаб охиригача икковимиз ҳам фронтда бўлганмиз. Ҳаттоқи раҳматли вафот этиши олдидан ҳам шифохонада бирга даволангандик. Мен Москвада ишлаган пайтларимда, 1957 йилда Шуҳрат ва Абдулла Қаҳҳор бизнинг уйда бўлишар ва биз учовлон Ватан, Ўзбекистон, адабиёт ҳақида суҳбатлашардик. Сурияга элчи бўлиб кетиб араб дунёсида 9 йил юртимдан узоқда яшаганимда ҳар йили Тошкентта дам олиш ёки бошқа сабаблар билан келардим. Биз Шуҳрат билан албатта кўришардик, ўзининг, бошқа адиларнинг китобларини олиб қайтардим.

Бизлар фаҳрланишимиз мумкинки, ўзбек адилари қобилиятли ижоди билан она Ватанимиз Ўзбекистоннинг адабиёти, маданияти, ҳамма соҳалари тараққий топишида чин юрақдан қалам тебратган, меҳнат қилишган, шундай ватанпарварларнинг биринчилари қаторида Гуломжон Шуҳрат туради. Унинг «Шинелли йиллар» романини ҳамма ўқиган. Мен ўзим урушнинг нималигини, фронт ҳаётини, ўлим билан юзма-юз туриш қандай таъсир этишини яхши биламан. Ана шу кунлардан роман ёзиб, етти ёшдан етмиш ёшгача ўқувчига манзур қила билди. Ҳатто бошқа миллатлар ҳам бу романни ўқиб, адигба ҳурмати ошди.

Шуҳрат иродалик, кучлик, эътиқоди мустаҳкам инсонлардан эди. Қирқинчи йилларнинг охирида йигирматача Ўзбекистоннинг кўзга кўринган адилари қамоқца олинди, маҳфий суд қилиниб, узоқ муддатларга сургунга жўнатилган эди. Даҳшатли томони, ҳукм ҳам, сургун жойи ҳам маҳфий бўлган эди, ҳеч кимга айтилмаган эди. Ишларни ўрганиш вақтида шу нарсага амин бўлдимки, адилар қандай турмада, камерада, сургунда азоб-уқубат чекмасин, биронта одам устидан

бирон оғиз тап гапирмаган, иғво қилмаган. Шуҳрат билан бир пиёла чой устида соатлаб сұхбатлашғанмиз бу ҳақда. Одамзоднинг иродаси кучли бўлса, инсоний бурчини бажаришга ҳамма вақт шай турар экан-да! Усмон Носирнинг ҳам бошига шундай кунлар тушган, афсуски, у Сибирда вафот этганди.

1956 йилнинг ўрталарида Ўзбекистон зиёлилари-нинг биринчи съездини ўтказдик. Унга турмадан озод бўлиб келганларнинг ҳаммасини делегат қилиб сайладик. Мен маъруза қилганимдан кейин Мақсад Шайхзода илҳом билан гапирди. Уқубат кўрган адилларимизнинг яна бир умумий хусусиятлари шу эдикি, уларнинг ҳаммаси ҳам бир неча кун уйда бўлиб яна меҳнатта отланишди, ижодга шўнғишиди. Уларнинг ўша йиллардаги ижоди Ватанимиз адабиёти тараққиётига катта ҳисса бўлиб қўшилди.

Шуҳрат дўстликка бутунлай содиқ инсон эди, дўстларга муҳаббатли эди. Унинг дўстлари кўп эди. Ҳаммасининг ҳурматига сазовор эди.

Абдулла Қаҳҳор билан Шуҳрат ўртасида мустаҳкам алоқа бор эди. Энг истеъододи, маҳсулдор адаб саналган Абдулла Қаҳҳор тил устаси сифатида машҳур эди. Қаҳҳор билан Шуҳратнинг дўстлиги чин дўстлик эди. Бир-бирига ҳавас қилгудек яқин эди. Икковининг ижод ҳақидаги, адабиёт ҳақидаги сұхбатларидан кўп марта баҳраманд бўлганман. Уларнинг асқияси, шўхлигига ҳавасим келарди.

Бундан беш йил илгари, 1992 йилда шифохонага даволаниш учун ётдим. Мажруҳ бўлган оёғимни жарроҳлар қайта кўришди. Раҳматли Шуҳрат ҳам реанимацияда экан. Бироз согайгач, мен ҳам, у ҳам араваларда юра бошладик. Икковимиз имкон қадар бирга бўлдик.

Шуҳратнинг юраги илҳомга, янги-янги мавзуларга тўла эди. Қанча-қанча ёзилажак асарлари режаси бор эди. Соғайсам, ёзаман, деб ният қиласарди. Минг афсус, шундайин улуг зот, эътиқоди чексиз, иродали инсон дунёдан кўз юмди. Ҳамма-ҳамма ниятлари ўзи билан бирга кетди... Хурсандлигим шундаки, унинг ишларини фарзандлари давом эттирмоқда. Ҳар гал эслаганимда: «Дўстим Шуҳрат, жойинг жаннатда бўлсин» — дейман.

ҲАЛОЛЛИК

Шуҳрат домла шеър ва достонлари, драма ва романлари билан адабиётимизда ўзига хос овозга, ўзига хос тасвирга эга бўлган, маданиятимиз равнақига улкан улуш қўшган ижодкордир.

Талабалик чоғларимизда адабнинг романларини иштиёқ билан ўқирдик, ўзимизча мулоҳаза қиласардик...

Адашмасам, «Шинелли йиллар» романни университетда муҳокама қилинаётганида мунаққид домлалардан бири асардаги бир лавҳага эътиroz билдири. Душман ҳужум қилган пайтда асар қаҳрамони, яъни жасур совет жангчиси хандаққа беркиниб олади. Қиёматқойим. Бомбалар ёрилган, миналар портлаган, қулоқ том биттан... Даҳшат! Шунда асар қаҳрамони окоп бурчагида ётган бақага кўзи тушади. Бақанинг парвойи палак. Кўзини мўлтиратиб, бемалол ўтирибди. Роман персонажининг ўша бақага ҳаваси келади. Мунаққид, наҳотки одамнинг аллақандай қурбақага ҳаваси келса, деди. Шуҳрат ака, ўша вазиятга ўзингиз тушсангиз, уруш қанақа бўлишини билардингиз, деб жавоб қилди...

Бир қараашда оддий бу савол-жавоб эсимда қолгани бежиз эмас. Ўша пайтда ёзилган уруш ҳақидаги асалар нуқул «қаҳрамонлик»дан иборат бўларди. Шонли совет жангчиси ҳеч нимадан қўрқмайди, ўқи тугамайди, нуқул душманни қираверади... Шуҳрат ака эса ўз асарида ўша замон қолипига сигмайдиган ҳолатни акс эттирган. Уруш деган палакат ифлос нарса эканини, урушда инсоннинг қадри бир маҳлуқчалик ҳам эмаслигини тасвирлаган. Балки муаллиф бу манзарани романга атайлаб эмас, интуитив равишда киритгандир. Чунки, Шуҳрат аканинг ўзи уруш даҳшатларини кўрган. Кавказ фронтида қон кечган. Балки, худди шу ҳолат унинг ўз бошидан ўтгандир. Буни ўлим билан юзма-юз келган одамгина ҳис этади... Эҳтимол адаб уруш ҳақидаги ҳавоий тасвирлар ёлғонлигини билгани учун ҳам айни шу тасвирни китобига киритгандир...

Шуҳрат аканинг романлари ҳалқ орасида кенг тарқалганини ўз кўзим билан кўрганман.

Бир йили олис қишлоққа бордик. Қўлимни ювиб чиқсан, хонадон соҳиби сочиқ тутди. Сочиқ қиррасига ипак билан «Олтин зангламас» деб ёзиб қўйилибди... Уйга кирсам, токчада Шуҳрат аканинг «Олтин зангламас» китоби турибди. Демак, китоб шу хонадон аъзоларида чуқур таассурот қолдирган...

Шуҳрат ака кўп йиллар «Шарқ Юлдузи» журналида масъул котиб бўлиб ишлади. (Афсуски, мен у киши билан бирга ишлай олган эмасман. Бироқ ўз машқларимни энг мўттабар журналга олиб борганимда Шуҳрат ака билан кўп кўришганман. Суҳбатида бўлганман). Домла қаддини гоз тутиб юрадиган, салобатли, соchlари оппоқ, юзи нурли одам эди. Ҳар гапини кесиб-кесиб, қатъият билан айтар, бაъзан ноҳақликни кўрса, тутақиб кетар, ҳеч кимни аямасдан, ўзбекча айтганда «тўнни ечиб ташлаб», жангга кириб кетар эди. Бунинг ҳам ўз сабаби бор. Шуҳрат ака урушда қон кечди, инсон боласи чидаши қийин бўлган азобларни кўрди, Совет юрти учун жонини фидо қилди ва эвазига... эллигинчи йилларда «сиёсий душман» сифатида Сталин ГУЛАГига тиқилди! Инсон учун, айниқса, қалби нозик ижодкор учун бундан ортиқ адолатсизлик бўлиши мумкиними?

Адаб шунда ҳам дод демади. Ёлғон-яшиқ шиорлар эмас, инсон қисматини ҳалол тасвирловчи асарлар ёзиш кераклигини ҳис этди ва шундай китоблар ёзди... Катта-кичик йигинларда майда гаплар ўртага солинса, бор овоз билан ҳақиқатни ҳимоя қилишга уринди...

Домланинг яна бир фазилати бор эди. Ўзгаларнинг ютуғидан чин дилдан қувона олар эди...

Эсимда, «Дунёнинг ишлари» китоби чиққан кезлар эди. Шуҳрат акадан хат келди. Аввалига ҳайрон бўлдим. Домла азза-базза хат ёзиб ўтириши шартми, мени ҳузурига чақириб, ёки телефон қилиб гапини айтса ҳам бўларди-ку, деб ўйладим. Қарасам, хат Қора денгиз бўйидан келган экан. Домла дам олиб ётган жойида китобни ўқибди. Асар маъқул бўпти... Хатдаги айрим гаплар менга қанот бергандек бўлди. «Укам, деб ёзибди домла, оналар ҳақида ёзиш осон ва... жуда қийин! Бу эски ва абадий мавзу! Сен шу мавзунинг янги қиррасини топибсан. Оддий ўзбек аёлини дунё миқёсига олиб чиқибсан! Кўз тегмасин! Оналар руҳи сенга мададкор бўлсин!» Бундан чиқди, Шуҳрат ака Тошкентта келишга сабри чидамай, ўша ёқдан хат ёзган, қувончимга шерик бўлган... Ростини айт-

сам, бундай багрикенглик ҳаммагаям насиб этилган эмас...

Домланинг яна бир «соф Тошкентча» одати бор эди. Яхши кўрган шогирдларини «сан» деб гапиради. Башарти менга «сиз» деб мурожаат қиласа, бирон сабаб билан у кишини ранжитиб қўймадиммикан, деб, ташвишга тушиб қолардим. (Оқсоқоллар орасида ўзини яқин олганидан ёки, шунчаки ёши улуглигини писанда қилиш учун «сен»ладиганлар, ҳатто дуч келиб қолганида «яхши юрибтсанми, боплабтсан, зўр атсар ёзитсан», деб елкамга қоқадиган, икки қадам нарига бориб, гийбат қиладиганлари ҳам учраб туради. Устозларимдан икки кишининг «сан» деб мурожаат қилиши менга гоят табиий туюлади. Бири Шуҳрат домла эди, бири — Сайд Аҳмад!)

Бир сўз билан айтганда, Шуҳрат домла ҳалол одам эди. Ижодда ҳам, ҳаётда ҳам! Адабиётимизнинг чинорларидан бири Абдулла Қаҳҳор умрининг сўнгги нафасида айнан Шуҳрат акага васият қилгани бежиз эмас. У пайтлар мураккаб замон эди. Шуҳрат домла ўз устози Абдулла Қаҳҳорниңг сўнгги сўзларини қандай эшигтан бўлса, айнан шу тарзда матбуотда эълон қилиди ва эвазига анча маломатларга қолди... Начора, искеъодли одам Шахс бўлади. Шахс эса қаторга туриб, «бир шеренга»да юролмайди!

Шоир, адаб, драматург Шуҳрат замон азобларидан ииқилиб, тўшакка ёпишиб қолган чогида ҳам титроқ қўллари билан ҳақиқат олдида титрамайдиган асарлар ёзди. Ҳаётда ҳам, ижодда ҳам ўз номини қолдирди... Бу ном узоқ йиллар яшайди, деб умид қиласман...



ШУҲРАТНИНГ ШУҲРАТИ

Кўпинча шоирлар ўзларига тахаллус танлашади. Яхши ният билан, албатта. Кўпларига ярашгандан ярашади, узукка кўз солгандай. Гоҳо ижодига мос ва хос бўлиб қоладики, муҳлислар ҳам ихлос қўйишида.

Бўлажак шоир Гуломжон aka ҳам яхши ният билан Шуҳрат деб тахаллус танлагани бежиз эмасди. Қаранг, ўша ўттизинчи йиллардаёқ яхши тахаллуснинг шарофати билан шуҳрат қозона бошлагани эсимда. Аслида, ҳазрат Навоий ҳам яхши исмнинг фазилатларига кўп эътибор берганлар, шу боисдан бўлса керак, наво фарзанди бўлиб қолганлар нафосат оламида.

Шуҳрат aka наинки ўзига яхши тахаллус танлаган, ўз фарзандларини ҳам Фикрат, Хондамир, Бобур, Зебо каби муборак номлар билан шарафлаганларида ҳикмат борга ўхшайди.

Шуҳрат номини шеърда ўқий бошлаганлар, ўша пайтдан бери ўз фарзандларига олий ният билан Шуҳрат исмини қўя бошлаганларини сезиб келаман.

Мен Шуҳрат aka билан қирқинчи йилларнинг ўрталарида, болалар газетасида ишлаган қезларимда танишганман. Ундан один эса, уруш тугаши олдидан, институтда ҳарбий формадаги келишган йигитни шу Шуҳрат деб кўрсатишган эди, дўстларим.

Болалар газетасига тез-тез келиб турадилар, ҳар сафар келганларида янги-янги балладалар келтирадилар. Баъзи пайтларда ўз машқларимни кўрсатардим ийманиброқ. Яхши маслаҳатлар бериш билан чекланиб қолмай, айрим жойларини зумда тузатиб қўярдилар.

Кейинчалик Ёзувчилар уюшмасида, Абдулла Қаҳҳор уюшма раиси бўлганида Шуҳрат aka ҳам адабий маслаҳатчи эди, мен ҳам болалар адабиёти бўйича маслаҳатчи эдим, кейинчалик билсан бу вазифага мени Шуҳрат aka тавсия қилган эканлар.

Ўшанда Шуҳрат aka олдига жуда кўп умидли ёшлар келарди, уларнинг ҳар бирига ўз маслаҳатини аямасди. Айниқса, шоир Хайриддин Салоҳга ихтимат қўйганди-

лар, натижада яхши шоир бўлиб етишганда увол кетди раҳматли, ҳалқ ибораси билан айтганда етай деганда «ийқилди»...

Шуҳрат акадаги мадад истаганларни қўллаб-қувватлаш фазилатларидан камина ҳам баҳраманд бўлгандир. Кўп йиллар «Шарқ юлдузи» журналида котиб бўлдилар. Мен олтмишинчи йиллар бошида болалар учун «Қовоқвой билан Чаноқвой» шеърий пьесани ёзгандим. Уни болалар театри саҳнасида кўриб, журналга олиб келишимни тайинладилар, олиб бордим, одатда адабий ходим таҳрир қилиб, сўнг котибга топширилади. Қарасам, ҳалиги ходим пьесамни роса «бўябти». Мен рози бўлмай, қайтиб олиб кетмоқчилигимни эшитиб, ҳалиги ходимга ётиги билан тушунтиридилар ва охир-оқибатда асар Шуҳрат ака кўмагида нашр этилди.

Кўпинча ижодий сафарларда бирга бўлардик. Одамнинг поклиги, меҳрибонлиги сафарда билинади, дейишади. Шуҳрат ака учрашувларда бошқаларни ўзидан юксак қўйишга одатлангандики, бу олийжаноблик кам учрайди.

Бир йили Намангандаги Чорток шифохонасида шеърият кечаси бўлганди. Учрашув бошқарувчиси ҳар биримизни навбат билан таништира бошлиди. Шуҳрат акани таништириш асносида ажойиб тўлқин гуруллаш, одамлар орасида «Шуҳрат шуми?!» деган овозлар пайдо бўлдики, улар мўъжиза кўришгандай бўлишди ўшанда. Бу ҳолат шоир Шуҳратни чинакам эъзозлаш эди. У шеър ўқиди, одамлар жон қулоги-ла тинглашди, одамлар тинглаб, англаб, маза қилишди, шоир шеър ўқиб... Шеърлари тингловчиларнинг дардини оларди гўё, завқ улашарди уларга.

Шоир Шуҳрат, устоз Миртемир таъбири билан айтганда, ижодий ҳаракатдаги шоирлардан бири эди, аслида. Унинг қиёфаси ҳам шоирона; ҳар шеърида янги гап айтардики, ҳавас қилгулик эди. Лирик шеърлар устаси, айниқса қисқа шеърларни қўйиб қўярди. Ҳар шеърида қиссадан ҳисса — якун бўларди, албатта. Юракка тегадиган бир гап учун ёзарди, эшитганлар «яшавор» дерди. Бу даврлар Шуҳратнинг «Кавказ дафтари» шеърий туркуми машҳур ва манзур бўлганди китобхонлару ижод аҳлига. Пушкин ва Лермонтовлар ҳам Кавказни ёзишганди ўз даврларида. Бизнинг даврага келиб Шуҳрат ака ҳам Кавказ ҳалқининг ўқтамлигини, ўзига хослигини, бетакрор табиатини ўзбек ўқув-

чиларига намойиш этаолган шоирларимиздан бири бўлди.

Шуҳратнинг балладасида, романларида, драмаларида шоирлиги сезилиб турарди шундоққина. У ўз иктидорини барча соҳада кўрсатаолган ижодкор эди. У нима ёсса, топиб ёзарди, янгича гап айтарди, албатта. Айниқса, романларида, қаҳрамонлар тилидан айтилган, ихтиро қилинган гапларни китобхон ўқиётиб, янгилигига қойил қолар, тамшаниб қўярди. Буни «Олтин зангламас»ни ўқиганимда, Қодирийга хос ифодаларига тан берганман. Шуҳрат асарлари тилининг миллий оҳори унинг аслигини кўз-кўз қиласарди, шоирлик аслида топқирлиқдан иборат эмасми?

Ул зот доимо самимий маслаҳаттўй бўлганлиги — фазилатига жило берарди кўпинча. Қайси бир йили денг, севимли лирик хонанда Фахриддин Умаровнинг уч шоир — Шуҳрат, Ёнгин Мирзо ва камина шеърлари асосида концерти бўлганди, Билимлар уйида. Ўшанда шеър ўқиларди, сўнг қўшиқ куйланарди навбат ила. Навбат Шуҳрат акага келганда, роса шеър ўқитишиди, қўшиқдан ҳам кўпроқ манзур бўлганди шоир шеърлари ! Хассос шоиримиз Ёнгин Мирзо ўзининг талай газалларидан ўқиди, одамлар қўшиқقا ҳам, шеърга ҳам тўйгандай бўлишиди. Ўшанда қайним Баҳтиёрхон ҳам бор экан, — одамлар чарчаган, энди Пўлатхўжа акам нима қиласар эканлар? — деб ўйлабди. Чиндан ҳам мен оғир ҳолатда эдим-да. Шунда Шуҳрат aka менга: — Пўлатхўжа, сен энди қизиқроқ, кулгили ва танқидий шеърларингдан ўқигин, — дедилар. Маслаҳатларини бажо қилгандим, тингловчиларда янгидан жонланиш пайдо бўлди-да, оғир аҳволдан енгилгина қутулиб олдим.

Шуҳрат aka бошқалар ютутига ҳавас билан қарапди, омадлар тиларди кўпинча дўстларига берган дастхатларида! Яна яхши фазилатларидан бири шулким, ҳамкаслари асарларини қолдирмай ўқирди, яхшиларини табрикларди ўрни келганда.

Тақдир тақозоси билан, каминага ҳам «халқ ёзувчиси» унвони берилгани ҳақидағи фармонни эшитиб, ўша куни тонгда чопон кўтарган ҳолда ташриф буюрсалар бўладими? Бетобликларига қарамай келганларига ҳайратда қолдим. Ўшанда болаларча қувониб табриклаганлари ҳозиргилик кўз ўнгимда.

— Пўлатхўжа, бу сенинг ижодда тан олинганинг, — деб севингандан севинган эдилар.

Атоқли адаб, Ўзбекистон халқ ёзувчиси Шуҳрат ака ўз ижоди, одамийлиги, самимийлиги билан шуҳрат қозонган Шуҳрат эдилар!

Ўйлаб қарасам, ул зот ҳам ўзбек адабиётимиз алломали Абдулла Қодирий, Гафур Гулом, Ойбек, Ҳамид Олимжон, Абдулла Қаҳҳор, Миртемир, Шайхзодалар каби халқона ижод соҳиби эканлар.



ЎТДАН ҲАМ, СУВДАН ҲАМ...

Эллигинчи йилларнинг бошлари. Марказқўмнинг масъул ходимиман. Эндиғина университетни туттаган эдим ўшанда. Ҳали тажрибам йўқ. Дастлабки кунлари иш сокинлик билан бошланаётгандек кўринди менга. Кўп ўтмасдан, бу ер — кўзга кўринган одамларнинг тақдири ҳал бўладиган жой эканини сеза бошладим. Менинг ишим илмий ва маърифий муассасалар билан боғлиқ эди. Бошқа бўлимлардаги ходимлар билан астасекин таниша бордим. Улардан биринчиси — масъул ходима, ёзувчи Ойдин Собирова бўлди. Иккинчиси — шоир Туроб Тўла эди. Тез орада бир-бирларимизга ўрганиб, бемалол фикр алмашадиган бўлиб қолдик. Бир гал Ойдин опа олдига кирганимда, стол устида турган китобларга кўзим тушди. Ойдин опа билан гаплашаётаб, беихтиёр уларни кўздан кечирдим. Шайхзода, Шуҳрат, Шукруллоларнинг китоблари бор эди. Ойдин опа ҳол-аҳвол сўрашарди-ю, кўзини мендан олмасди. «Чакки қўйибман-да, китобларни бу ҳолда», деган маъно бор эди унинг қиёфасида. Мен Ойдин опанинг ҳолатини тушундим. Китоблардан нигоҳимни узиб, сухбат мавзуини бошқа томонга бурдим. «Бу маконда ҳар нарса, ҳатто ҳар бир қоғознинг қаерда туришида маъно бор!» — ўйладим ўзимча ва тез гапимни тутатиб, хонадан чиқиб кетдим.

Бир неча кундан кейин қоши-кўзи номутаносиб жойлашган котиб ҳузурида бўлдим. Унинг чақируви муносабати билан, албатта! Қарангки, Ойдин опа столида турган китоблар унинг столида ҳам тахланиб туриби. Уларнинг ёнига Ойбекнинг «Навоий» романи ҳам қўшилган эди.

Котиб менинг кўз қарашимни пайқади шекилли:

— Сиз адабиётчисиз-а? — деди ўрнидан хиёл қўзгалиб. Негадир у қошларини чимириб, менга тикилди. Кейин дарров топшириқقا ўтди:

— Сиз олий ўқув юртларида ижтимоий фанларнинг ўқитилиш сифатига жавобгарсиз. Қайси домла қандай нафас олади, бу саволга тайёр бўлишингиз керак! — У қайтиб китобларга назар ташламасин дегандек:

— Боринг, ишингизни қилаверинг, эртадан бошлаб назоратни кучайтириңг, — деб буюрди.

Эшик томон йўналар эканман, котиб мени тўхтатди-да:

— Зойконинг олдига кирасиз, у сизга вазифани батафсил тушунтиради, — деб қўшиб қўйди.

Зойко у пайтларда Марказқўмда маҳфий ишлар билан шугулланадиган маҳсус бўлимнинг бошлиги эди.

Зойконинг олдига кирдим. У мени куттганини англадим. Олий ўқув юртларида ижтимоий фанлардан дарс берадиган домлаларнинг рўйхатини қўлимга бериб, буйруқ оҳангидা:

— Зудлик билан мана буларнинг лекцияларини степнограмма қилдирасиз, — деди. Мен бир-икки ой шу иш билан банд бўлдим.

Маҳфий равишда лекциялар степнограмма қилинар, матнлар Зойконинг қўлига обкелиб топшириларди. Бу ҳол менга ўта сирли тадбир бўлиб кўринди.

Иш кўпайган сари қизиқ ҳолатларни кўрадиган бўлдим. Атрофдагилар — котибдан тортиб оддий ходимларгача асабийлашган ҳолатда эди. Тез-тез ҳар хил йўсиндаги маълумотномалар талаб қилинарди. Ходимлар ҳам бир хонадан иккинчи хонага ўтадиган бўлса, «биров кўриб қолмасин» дегандек қадамларини тезлаштирадигандек, бир-бирлари билан паст товушда, шивирлашиб гаплашадигандек кўрина бошлади менга.

Кунларнинг бирида шундай воқеа рўй берди: тинимсиз иш. «У ҳақда маълумот ол», «бу ҳақда маълумот етказ», «фалончини топ», «фалончини чақир»... Кечга томон ҳамманинг асаби тараанг тортиди. Иш тун соат иккиларда тугади. Бир маҳаллада яшайдиган шеригим билан кўчада, эшик олдида навбатчи машинани кутиб турибмиз. Ичкаридан ўша қоши-кўзи номутаносиб жойлашган котиб сўлгин ҳолда чиқиб келди. Биз билан хайрлашишга ё мадори етмади, ё хоҳламади. Эшик олдида уни кутиб турган машина томон ўгирилиб ҳам қарамади-да, тезлиқда кўчанинг чап томонидаги йўлкага бурилди. Назаримда, унинг кўзига ҳеч нарса кўринмас, кўринса ҳам балки парво қилмасди. У йўлкада, машина эса паст тезлиқда у билан измайиз катта кўча бўйлаб бораради. Қоровул бошлиги бу ҳолатдан хабардор бўлган шекилли, дарров иккита милиционерни котиб орқасидан жўнатди. Котиб олдинда, икки милиционер орқада йўлка бўйлаб, узоқлашдилар.

Биз икки шерик бир-бirimizga қарадик ва қараш-

ларимиз маъносини сўзсиз тушунардик. Бизни олиб кетадиган навбатчи машина келгунча иккинчи котиб ҳам ичкаридан чиқди. У серрайган, ҳеч кимни, ҳеч нарсани пайқамаётган одам ҳолатида эди. Атрофга на- зар ташламас, қалтис йўлда кетаётган сингари фақат оёғи остига қарап, гўё шундан бошқа ҳеч нарса унинг кўзига кўринмас эди. Шу пайт уни кутаётган машина- нинг ҳайдовчиси зийраклик қилди шекилли, дарров ма- шина эшигини очиб, уни ўтиришга таклиф этди. Ма- шина ўрнидан тез жилди-да, кўчага сингди. Энди тепа- да биринчи котибнинг ўзи қолди, холос. Шу орада бизга ҳам навбатчи машина келиб қолди, жўнадик. Машинанинг олдинги ўтиргичида гаражда миниб ол- ган, биздан даражаси юқорироқ бир ходим бор эди. Унинг фамилияси — Сталь. Марказқўмдан атиги икки юз метр келадиган масофа — Хоразм кўчасида истиқо- мат қиласиди у. Эшиги олдига борганда одатдагидек, машинадан тушди-да, «тура туринглар» деди ва йигир- ма қадамлик ўз эшигигача чопиб борди. Эшигига қа- лит солиб, «кетаберинг» маъносида бир қўлини кўта- риб қўйди. Машина силжиди. Биз шеригим билан узоқ жойда турардик. Бироқ то тураг жойимизга етиб боргунча жим эдик. На ундан садо чиқди, на мендан. Бир-биrimiz билан сўзсиз, лаҳзалик назар ташлашлар билан фикр олишардик.

Кунлар шундоқ ўтаверди. Бир неча ойдан кейин йигилиш бўлди. Унинг чақирилиши ҳам сирли ва пин- ҳоний эди. Уни Марказқўм пленуми деб атардилар ўша пайлари. Расмий равишда биз бу мажлисга қат- нашишга ҳуқуқсиз эдик. Бироқ керак бўлиб қолармиз, маъносида шу атрофда ўралашиб юрадик. Кириб-чи- қишига ҳуқуқли ходимлар эшикни очиб-ёпганда, нотиқ- ларнинг гаплари узуқ-юлуқ қулоққа чалинарди. Нотиқ- лар тилидан баъзи олимлар ва ёзувчиларнинг номлари- ни эшишиб қолардим. Булар ичida мазкур мақоланинг қаҳрамони — Шуҳрат ҳам бор эди.

Пленум тутади. Эрта-индинига ёк унда кўтарилиган гаплар катта шов-шувларга сабаб бўлди. Бу гапларнинг бир қисми матбуот саҳифаларида эълон ҳам қилинди. Зиёлилар орасида «фалончини олиб кетганмиш», «фа- лончи қамоқقا олинибди» деган гаплар тарқалди. Шуҳ- рат ҳам шу сафда эди.

Пленумдан олдинги Марказқўм муҳитида кўзга ташланган асабият, баъзи ходимлар ҳадиксирашлари- нинг сабаби маълум бўлди. Ўша пайларда мен кузат-

ган бу ҳолатлар республикани ларзага соладиган катта тӯфоннинг белгилари экан...

Шоир Шуҳратнинг ижодини маълум даражада билсам ҳам, у билан шахсан таниш эмас эдим. Эллигинчи йилларнинг охирларида, «Шарқ юлдузи» журналининг муҳарририятида танишдим. У кўринишда хушбичим, бўйдор, оқпаранг, нигоҳи ўткир одам эди. Биринчи учрашувдаёқ ўзига тортадиган хислат бор эди унда. Муҳарририятта бориб қолганимда, у билан учрашмасдан, озгина суҳбат қурмасдан кета олмайдиган бўлдим. Суҳбат мавзусининг ҳам доираси кенг бўларди. Оддий ҳаёт ташвишларидан тортиб, катта ижод муаммоларигача! Ҳақиқат учун ўтдан ҳам, сувдан ҳам қайтмайдиган одам бўлиб кўринарди у менга, бу суҳбатларда. Ўзига ишонадиган, ўз кучини, қобилиятини билиб иш тутадиган, майда игволарга учабермайдиган одам эканини англадим.

Эллигинчи олтмишинчи йилларда бадиий ижод, адабий жараён ҳақида қатор мақолалар эълон қилдим. Шуҳратнинг «Шинелли йиллар» романи босилиб чиққан эди ўша пайтлари. Масковдан келиб юз-хотир қилмасдан барчага баробар муносабат билдиришни мен ўз бурчим ҳисоблардим. Ойбекнинг «Олтин водийдан шабадалар», Абдулла Қаҳҳорнинг «Қўшчинор чироқлари» хусусида ҳам бадиият талабидан келиб чиқиб, танқидий фикрларни дадил билдирганим бор. Ойбек, Абдулла Қаҳҳорлар билан қай даражада яқин бўлмай, улар менга бирон марта эътиroz билдиришмаган, норозилик изҳор қилмаганлар. Баъзи истеъоди заиф ёзувчилар хусусида арзимаган танқидий муносабат билдирган чоғларимда дўй-пўписалар эшиштан пайтларим кўп бўлган. Шуҳрат ҳам Ойбек ва Абдулла Қаҳҳорлар сингари менинг танқидий фикримга нисбатан бирор марта норозилик билдирган эмас. Бардошли, ўз кучига ишонган, қадр-қимматини билган истеъододларга хос хислатдир бу!

Бугун ҳарбий мавзуда яратилган асарлар сафига бир назар ташласак, Шуҳратнинг «Шинелли йиллар»ни яратиб адабиётимиз тараққиётига катта ҳисса қўшганини англаймиз. Гап шундаки, тўрт йил давом этган иккинчи жаҳон урушида ўзбек халқи бир миллионга яқин жангчини қурбон берган. Халқимиз уруш орқасида туриб, моддий ва маънавий жиҳатдан кўп азият тортган. Шу маънода тўрт йил давомидаги оғир воқеалар ҳанузгача адабиётимизда етарли даражада ўз

аксини топа олгани йўқ. Бу ишда биринчи жиҳдий қадамни Шуҳрат қўйғанлигини бугун алоҳида таъкидлаш зарур!

Танқидий фикр билдириши, бардош ўз йўлига. Пайти келганда Шуҳрат сафдошларига фидоийлик кўрсата оладиган инсон эди.

Минг тўққиз юз етмиш биринчи йил. Мен докторлик диссертациямни ҳимоя қиласяпман. Мавзуум — «Абдулла Қаҳҳор ижоди». Зал одам билан тўла. Марҳум Абдулла Қаҳҳор билан республикамиз раҳбари Шароф Рашидов ораларида совуқлик аломатлари туғамаган пайт эди. Бу икки улуг шахслар орасидаги асоссиз зиддиятдан манфаатдор одамлар бор эди, бу вақтларда ҳам. Аслида, бу икки шахс бир-бирини эъзозланган пайтлари ҳам бўлган. Диссертациянинг автореферида Шароф Рашидовга нисбатан озгира танқидий фикр ҳам айтилган эди. «Диссертациянинг қисмати нима бўларкин?» Шу масала қўпчиликни қизиқтираш эди. Ҳатто Комил Яшин ҳимоя ташвишлари билан банд юрганимда рефератимда Рашидовга муносабат билдирилган ўша жумлани кўрсатиб, «сизга керакмиди шу гап, усиз доктор бўлолмасмидингиз? Баъзи одамлар рефератингизни кўтариб, Марказқўм атрофида юришибди, каттага қабул сўраб», дегани ҳамон эсимда. Залнинг тўлалигини ҳам шу хавотирга боғлиқ, деб тушундим ўшанда.

Оппонентлар сўзларини тугатишди. Раис норасмий оппонентлардан муносабат кутиб, залга мурожаат қилди. Бир зум жимлик чўқди, «ҳеч ким қувватламаса-я?» деган ташвишли фикр хаёлимдан ўтди. Жимлик узоқ давом этмади. Раис Шуҳратга сўз берди. Мен беихтиёр залга назар ташладим. Шуҳрат секин ўрнидан турди-да, минбарга чиқди.

У аввал Абдулла Қаҳҳор ижоди, кейин диссертация ҳақида қисқа нутқ сўзлади. Унинг фикрлари аниқ, далилли ва қатъий эди! «Менимча», «ўйлашимча», «назаримда» деган шубҳага ўрин берадиган сўзларни ҳам ишлатмади. Зал жим бўлиб, унинг нутқини эшилди. У минбардан тушгач, ўзаро шивир-шивирлар қулоқча чалинди. Ким қандай фикрда эди, Худо билади.

Вақтлар ўтди. Кейинчалик ўшандаги хавотирлар ортиқча ваҳима экани маълум бўлди. Раҳбарият муносабати менга нисбатан ҳам, Шуҳратга нисбатан ҳам ўзгармади. Аксинча, орадан бир оз вақт ўтгач, Шароф Рашидов менга ўзининг ижобий муносабатда эканли-

гини билдириди. Мен бу ҳақда ўзимнинг бошқа асарларимда батафсилоқ тўхталганман.

Шуҳрат ҳақиқат учун ўтдан ҳам, сувдан ҳам қайтмайдиган ижодкорлардан эди. Олтмишинчи йилларда «Олтин зангламас» номли романини ёзib тутатди. Тутатди-ю, тегишли идораларнинг домига тушди. Кирмаган эшиги, учрашмаган одами ҳам қолмади.

Асар эллигинчى йилларда рўй берган адолатсизликлар, хусусан зиёли зотига кўрсатилган жабр ва зулмлар тасвирига багишланган эди. Шуҳратнинг ўз иқрорига қараганда, асар марказида ўзининг бошидан ўтган воқеалар туради. Тоталитар тизимлари бироз бўшаган бўлса-да, бу хилдаги ҳақиқат хусусида очиқ фикр баён қилиш, хусусан асар битиш ўта хатарли иш эди. Шуҳрат мана шу хатарли ишга қўл урганди.

Ижодкорни тушуниш мумкин. Ўша даврдаги адолатсизликлар унинг кўнглида оғир дард бўлиб ётарди. Бу дардни ўз вақтида юзага чиқармаслик унинг учун оғир фожеага юз тутиш билан баробар эди. Улуг Шекспир «Хамлет»идагидек, ё ҳаёт, ё мамот масаласи унинг олдида кўндаланг турарди. Шоир учун йўл битта эди: кўнгилдаги тутунни ошкор қилиб, оғир дардан қутулиш.

Роман катта шов-шувларга сабаб бўлди. «Наҳотки, бу сирли муаммони очиқдан-очиқ баён қилиш мумкин бўлса», деб ўйладилар баъзилар. Шуҳрат қисмати қай йўсинда борар экан, деювчилар ҳам бўлди. Бугун шу нарса аниқ бўляптики, «Олтин зангламас» романининг яратилиши фақат Шуҳратнинг эмас, балки китобхон, адабиёт, қолаверса умумижодкорлар ютуғи экан!


Ҳа, Шуҳратга ўт ҳам, сув ҳам писанд эмас эди! Навбатдаги воқеа Абдулла Қаҳҳор қисмати билан боғлиқ бўлди.

Абдулла Қаҳҳор беморлиқдан најжот истаб, Москва-га борди. Ҳаётдан кўз юмиб, у ёқдан келтирилди. Ўзбек зиёлилари учун мотам кунлари эди ўшандা. Шуҳрат Қаҳҳор қисматига тегишли кўп ташвишларни ўз зиммасига олди. Адид вафотидан кейин «Устознинг охирги куни» деган мақола эълон қилди. Бу мақола ҳам катта шов-шувларга сабаб бўлди. Гап шунда эдикни, Абдулла Қаҳҳор оғир қасал ҳолда баъзи мансабдорларнинг найранглари туфайли кўп азият чеккан экан. Шуҳрат ўша вазиятларни тап тортмасдан, батафсилоқ ошкор қилди. Бу ошкоралик ҳаммага ҳам ёқавермади.

Жасорат сифатида бу мақола «Олтин зангламас»нинг бамисоли давоми эди!

«Олтин зангламас» романи, «Устознинг охирги куни» мақоласи адабни китобхон олдида, қолаверса халқ олдида яна бир даража қандай кўттарган, унинг номини машҳур қилган бўлса, шундай уни ёқтирмайдиган мансабдор тўраларнинг гашини уйготди. Шу боисдан, йиллар давомида обрўли рўйхатлардан Шуҳратнинг номи ўчирилди, узоқ йиллар у мукофотлару рағбатлардан маҳрум бўлди.

Шуҳрат замонавий маданий ақидалар билан бир қаторда, миллий расм-русумларни, ҳалқнинг маънавий эҳтиёжини қондирадиган урф-одатларни яхши биладиган, умуман, одамлар орасидаги муносабатни жойига қўябилалигиган инсон эди...



АДИБНИНГ БАХТИ

Шуҳрат ака билан салкам ўттиз йил дўст тутинган эдик. Орамизда 12—13 ёш фарқ бўлса-да, у менга худди тенгдош одамидай муомала қиласр эди. Шу йиллар давомида бу оловқалб одамнинг ҳаёти, шахсияти ва ижодини яқиндан кузатишга, ўрганишга тиришдим; у билан кўп сафарларда бирга бўлдим, ҳаёт ва ижодга оид масалалар бўйича қизгин баҳс-мунозаралар олиб бордим; ижоди тўғрисида қатор мақолалар, бир рисола ёздим; 50 ва 70 ёшлик юбилей тантаналарида у ҳақда маъруза қилиш шарафига мусассар бўлганман.

Шуҳрат аканинг ҳам ижодкор-адиб, ҳам она-юрт фуқароси, қуюнчак инсон сифатида талай ибратли хислатлари бор эди. У аввало Ватан учун бир қўлда қурол билан жанг қилган, бир қўлда қалам билан шу азиз Ватанини қўйлаган, улуғлаган — сўзи ва иши бир адиди эди. У ниҳоятда меҳнатсевар, тартиб-интизомли, озода, саронжом-сариштали, фариштали одам бўлган; ҳаётнинг кўп аччиқ-чучугуни татиган, бошига оғир савдолар тушганда ҳам ўзини йўқотмаган, имон-эътиқодига гард юқтирган букилмас иродга эгаси эди. У ўта ҳаётсевар, дўстларига содиқ, ёру биродорларига, фарзанду набираларига меҳрибон, ўзгалар хизматига ҳамиша ҳозири нозир, миллй удумларимизни яхши биладиган, қадрлайдиган, халқимизнинг энг яхши фазилатларини ўзида мужассам этган нуроний бир сиймо эди. Одам боласи тоғдо энг азиз пинҳоний туйгуларини, юрак сирларини кимгадир айтгиси, қалбини тушунадиган кимса билан сирлашгиси келади. Шуҳрат ака шахсан мен таниган, билган ёзувчилар орасида ана шундай табаррук зотлардан эди. Улкан адид Абдулла Қаҳҳор умрининг сўнгти дақиқаларида Шуҳратни Москвага ўз ҳузурига чақириб, энг сўнгти юрак розини шу одамга ишониб айтгани бежиз эмас...

Шуҳрат ака ҳамиша ҳаёт, адабиёт билан ҳамнафас, ҳамқадам, адабиёт оламидаги янгиликлардан хабардор, адабий ҳодисаларга, асарларга одил баҳо бера оладиган, ўз асарлари, уларнинг савия-дараҷаси, адабиётдаги ўрни, кам-кўстларини нозик фаҳмлай биладиган,

ҳаққоний танқидга доимо тан берадиган зуқко, мард қаламкаш эди. Салқам ўттиз йил давомида мен бу адиб ижодини мунтазам кузатиб бориб, асарларининг ютуқ ва камчиликлари ҳақида гоҳ даҳанаки, гоҳ ёзма тарзда кўп марта гапирган, баҳслашган, анча кескин танқидий гаплар айтган пайтларим бўлган. Аммо бирор марта бўлсин, бу одамнинг танқидни ўзига қаттиқ олганини билмайман; фақат гапимга қўшилмаган қезлари ётиги билан ўз фикрини айтган... Айни пайтда у ўзининг инсонлик шаънини, гурурини баланд тута биларди; шахсиятига тегадиган, асарларини асоссиз ерга урадиган ғаламислар билан мардана туриб олишганини неча бора кўрганман.

Уни оловқалб инсон, ҳаёт, адабиёт билан ҳамнафас адиб, дедим. Бу хислат оғир ҳасталик чөгларида ҳам уни тарқ этмади. 1986 йилнинг ёзида ёзувчиларнинг Дўрмондаги ижод уйида Шуҳрат ака билан бир ой бирга бўлдим. У яқингинада оғир қасаллиқдан турган, ҳали роса ўзига келмаган, бироқ етмиш ёшни қоралаб турган адибдаги гайрат-шижоатни, аввалгидек ҳаётсеварлик, ишда, ижодда батартибликни кўриб, қойил қолдим. Унинг иш столи қўллэзмалар, газета ва журналарнинг янги сонлари билан тўла. Ўша кезларда «Новыи мир»да Чингиз Айтматовнинг «Кунда» («Қиёмат») асари босилаётган эди. У, бу романни боғдагилар орасида биринчилардан бўлиб ўқиб борар, у ҳақда бениҳоя қувониб, тўлиб-тошиб, ҳасталик оқибати — тутилиб-тутилиб гапирав эди. Дарвоҷе, ёзувчи, хусусан оқсоқол адиб учун ўзгалар, ҳамкасб қаламкашлар, айниқса ёшлар, шогирдлар ютуги, камолидан қувона билиш катта баҳт. Ўзгалар ютуги, шогирдлар камолидан ҳасад қиласидиган адиб — баҳтсиз, омадсиз адиб. Шуҳрат ака қалби ҳамиша шогирдлар камоли, ютуги туфайли қувончлар билан чарагон эди. «Шоир Абдуллаға» шеъридаги «Мен оддий бир шамман, сен улкан чироқ!» деган сўзлар шу қувонч-самимиятнинг бир ёлқини...

Энди Шуҳрат аканинг адабиётимизда тутган ўрни, ижодига хос айрим хусусиятлар ҳақида бир неча оғиз сўз айтсан дейман. Шуҳрат XX аср адабиётимизнинг ўрта авлоди вакилларидан. Бу авлодга гоят мушкул, чигал ижодий тақдир насиб этди. Улар 30-йилларнинг зиддиятли муҳитида, бир томондан, мамлакатда улкан бунёдкорлик ишлари жўш урган, иккинчи томондан, маънавий-ижодий ҳаётта шахсга сиғиниш, қатагон балоси таҳдид солиб турган, Қоди-

рий, Чўлпон, Фитрат сингари улкан истеъдодлар бошида қора булатлар қуюқлашган, катта фожиалар содири бўлаётган кезлари қўлга қалам олдилар. Сўнг иккинчи жаҳон уруши, урушдан кейинги машаққатлар, адабий ҳаётдаги тангликлар, оғир йўқотишлар... Ўрта авлод деб атаганимиз Асқад Мухтор, Саид Аҳмад, Шукрулло, Мирмуҳсин... Шулар қаторида Шуҳрат узоқ йиллар ёзиг-чизиб юрган бўлса ҳам ижодда ўзлигини тўла намоён эта олмади. Сафдошлари қатори фақат 50-йилларнинг ўрталарига келиб, ўша кезлари ижтимоий ҳаётда юз берган ўзгаришлар таъсирида ҳақиқий ижод йўлига тушиб олди, зўр гайрат-шижоат билан ишга киришди, бирин-кетин «Кавказ дафтари», «Шинелли йиллар дафтари», «Дунай соҳиллари» каби шеърий туркумлар, балладалар, шеърий таржималар, ҳикоялар, «Шинелли йиллар» «Олтин зангламас», «Жаннат қидирғанлар» романларини эълон этди. Мана шу асарларнинг ҳаммаси ўн-ўн беш йил ичида яратилди. Мен ўша кезларда Шуҳрат акадан бундай сермаҳсул ижод сирларини сўраганимда, у: «Мен ва мен тенглилар 30-йиллар мураккаблиги, уруш даври машаққатлари, урушдан кейинги кўргуликлар туфайли йигирма йиллик вақтимизни, энг кўркам йигитлик давримизни бой бериб қўйдик. Кўнгилда айтадиган гаплар кўп. Шошилмасликнинг эса иложи йўқ. Диљдаги гапларимизни маромига етказиб айтолмаётган, шошилаётган бўлсанқ, китобхон бизни тўғри тушунар, деб ўйлайман» деган эди. Шуҳрат ва умуман, ўрта авлод адаблари ижоди ҳақида фикр юргандан шу ҳолатни, улар адабиёт майдонига қадам қўйган кезлардаги чигал муҳитни албатта назарда тутмоқ даркор. Шуҳрат шеърияти, насрий асарлари, драматургиясидаги қатор кам-кўстлар, заифликлар, бир чекаси, ана шу ҳолат билан изоҳланади.

Айни пайтда биз яқдиллик билан 60-йиллари ўзбек адабиёти тараққиётида янги этап бошланганини, мана шу босқич ривожига забардаст адабимиз Шуҳрат ҳам энг яхши шеърлари, романлари билан муносиб ҳисса қўшганлигини, адабиётимизнинг галдаги ривожига муайян ижобий таъсири кўрсатганлигини мамнуният билан эътироф этамиз.

Шуҳратнинг 60-йиллар шеърияти икки жиҳатдан ибратли: аввало улар жангчи шоирнинг, кўпни кўрган одамнинг дил розлари, ҳаёт тажрибалари ифодаси; ик-

кинчи томондан, бу шеърлар ўзининг самимийлиги, ҳаққонийлиги, жўшқинлиги, ҳаётбахш романтик руҳи билан ажралиб туради. Шуҳрат лирикаси шеърияти-мизда бир вақтлар кенг тарқалган риторика ва ваъз-хонлик касофатидан, ўртамиёначилик касалидан кутулиш жараёнини ўзида акс эттириш жиҳатидан ҳам характерли. Атоқли шоир ва олим Мақсад Шайхзода «Қалам ва бурч» мақоласида Шуҳратнинг ўша давр лирикасига одилона баҳо бериб: «Шеъриятимизда реалистик ҳақиқатни романтик жўшқинлик билан омухта қилиб, гўзал ва нафис лирик асарлар яратган шоир Шуҳрат умуман ўзбек поэзиясини ўртамиёначилик савиясидан олиб чиқиб, юқори кўтаришга астойдил хизмат қилган меҳнаткаш, истеъодди, изловчи шоирлар дандир», — деб ёзган эди.

Шуҳрат умрининг охирига қадар шеъриятда баракали ижод этди, бир неча тўпламлар чоп эттирди; баъзан кўтарилиш, баъзан ўз имкониятлари даражасидан тушиб кетиш, ўз-ўзини тақрорлаб қўйиш ҳолари ҳам бўлиб турди. Аммо у шеъриятда тўхтовсиз изланди. Афсуски, Шуҳратнинг поэтик ижоди ҳануз жиҳдий тадқиқотлардан четда қолиб келмоқда.

Шоирнинг 60-йиллар шеърларига хос реалистик соддалик ва романтик жўшқинлик ёнига сўнгги йиллар шеърларида бой ҳаётий тажрибалар самараси ўла-роқ, ўйчан фалсафий мушоҳадакорлик келиб қўшилди. Шоирнинг «Юлдуз нурлари» деб аталган шеърини олиб кўрайлик. Шеър «Юлдуздан нур оқар» деган оддийгина хабар билан бошланади. Шу заҳоти шоир «Балки нурмас» деб бу табиий ҳолатга шуҳба билдиради. Ўқувчи бирдан шоир шубҳасига қизиқиб қолади. Шоир ўй суриб кетади, ўзининг хилма-хил тахминларини ўртага ташлайди: балки бу «юлдузни ер сари йўллаган сўзи», «балки у бир куйдир нурга йўгрилган», «балки у ўз шаклини топмаган асар», «балки у порлаган ажиб бир маъдан» ва ҳоказо... Шоир секинаста асосий муддаога келади:

Балки у сиридир ўзга оламнинг,
Кўмакка чақирав балки у бизни.
Биз эса англамай бу дард-аламни,
Шуъла деб овутиб юрибмиз ўзни!

Шеърда бир қарашда кўз-кўз қиладиган доно гап, фалсафийлик йўқдек. Бироқ лирик қаҳрамоннинг ҳо-

лат-руҳияти — юлдуз шуъласи ҳақидаги ўйлари, тахмин, мулоҳазалари бизга ҳам дарҳол «юқади», хаёли-мизни олисларга олиб кетади, биз олис юлдуз шуъласи қолиб замин ташвишлари, одамлар аро муносабатлар ҳақида ўй суреб кетамиз, ҳаётдан шеърдаги ҳолатга ўхшашликлар ахтарамиз... Шеърдаги чинакам фалса-фийлик боиси ана шунда.

Шоирнинг «Дунёнинг кўрки шунда» деган яна бир гўзал шеъридаги мана бу сатрларни ўқиб кўринг:

Сенингча, бир оддий юлдуз у ёнган,
Менимча, бир олам тенги йўқ қўшиқ.
Сенингча, бир қиздир ишқда ўртанган,
Менимча, нур ичра йўғрилган ошиқ.
Сен кўм-кўк майсани кўрсанг, ўша он
Бузогинг етаклаб чиқасан мамнун.
Мен эса майсалар кўркидан ҳайрон,
Балки у шеърга айланажак ун!
Сен тунни уйқута айни пайт дейсан,
Мен эса, илҳомнинг сокин булоги.
Сен тоққа назаринг тушса, ҳуркийсан,
Ахир, у энг гўзал оху ётоги!

Шу хил руҳий ҳолат — баҳсу мулоҳазалардан ке-йин шоир ўзининг севган усулини қўллайди, гўёки қиссадан ҳисса ясайди:

Демак, биз икки қалб,
Икки хил олам.

Лекин лирик қаҳрамон ўзини оқлаб, ўзгани қора-лаш йўлини тутмайди. Унингча:

Дунёнинг кўрки ҳам эҳтимол, шунда.
Дунёда бир хилда бўлсайди одам,
Ким шоир, ким косиб бўларди унда!

Кўринадики, бу шеърда ҳам фикр-хулоса тайёргина ялонгоч тарзда берилган эмас, руҳий ҳолат, кайфият, қиёс-мулоҳазалар маҳсали тарзида рўёбга чиқсан.

Ёки шоирнинг бошқа бир «Ёлғизликда...» деб аталган шеърини эслайлик. Шеър оддий кундалик ҳодиса, ҳар куни такрорланадиган кечки табиат манзааси, ўша дамдаги шоирнинг ҳолати, кайфияти ифодаси тас-виридан бошланади:

Кеч ҳам кирди. Қоронғи тушди.
Қоронғидә қолди мавжудот.
Құшлар аста инига учди,
Сукут ичра чұмди бу ҳаёт.

Шоир қалбидаги ҳазин бир қайфият ўқувчи күнгли-
га ҳам күчиб ўтади, шоирга құшилиб алланечук маъюс
холга тушамиз. Шу орада ўзга бир ҳол іуз беради:

Бирдан күкда порлади юлдуз,
Девор оша йұталди бир чол...

Бояги маъюс қайфият дарҳол барҳам топади:

Ҳаёт бирдан жонланиб кетди,
Күзим яшнаб, дил ёниб кетди.

Ҳаётда инсонга құпинча йүлдош бўлиб юрадиган
зиддиятли руҳий ҳолат — ёлғизлик, маъюслик ва та-
биат ҳамда одамлар билан ҳамнаfasлик туфайли киши
қалбидаги нур, умид ҳақидаги фалсафа нақадар содда-
самимий, ҳаёттій акс эттан бу кичик шеърда.

Шоирнинг «Ёшлигимнинг давоми» тўпламидан жой
олган «Шоирга» деб аталган:

«Ақлингни ақлимга құшмай құя қол,
Мард бўлсанг, қалбимга жиндай гавго сол»

типидағи иккиликлари ёки:

«Кечқурун шафақни ўтирилаб кеча,
Эрталаб уфқа қайтадан сочди.
Кечқурун ўқинчдан хўрсинган гунча
Эрталаб шод-хандон лабини очди»

сингари тўртликлари ҳам теран фалсафий фикр ва
нозик туйгу, күнгил эҳтирослари уйғунлигидан туғил-
ганлиги учун ҳам гўзал, таъсирчан.

Шу қисқа таҳдил, мулоҳазалардан ҳам кўриниб ту-
рибдики, Шуҳрат 60, 80-йиллар ўзбек шеъриятида ўзи-
га хос ўрин тутади.

Бадий асарнинг тақдирі баъзан мураккаб кечади:
асарни кенг китобхонлар оммаси хуш қабул қиласи,
аммо танқидчилек уни қабул қымай оёгини тираб туриб
олади. Ёки, аксинча танқидчилекка маъқул тушган,

танқидчилар кўкларга қўтариб мақтаган асарни баъзан китобхонлар қабул қилмайди, мақтovларга бепарво қарайди... Ҳар икки ҳолат ҳам бадий асар учун ўзига хос кўргулик; ҳам кенг китобхонлар оммаси хуш қабул қилган, ҳам танқидчиликнинг чин олқишига сазовор бўлган асар ёзувчи учун, менингча катта бахт, омад, зўр муваффақият. Шуҳрат прозада, романчиликда шундай бахтга сазовор бўлган адиларимиздан. Шуҳратнинг «Шинелли йиллар», хусусан «Олтин зангламас» романини китобхонлар яхши қабул қилди, адабий танқидчилик уларга юксак баҳо берди.

Бу икки асарнинг муваффақият қозониш сири аввало шундаки, ҳар иккиси ҳам, биринчидан, адабининг шахсий ҳаётига даҳлдор, иккинчидан, асрнинг улкан фожейй ҳодисалари — иккинчи жаҳон уруши ва большевизм қатагон ҳодисаларига алоқадор воқеалар ҳақида баҳс этади.

«Шинелли йиллар» ёзувчининг роман жанридаги биринчи тажрибаси, аммо илк тажрибанинг оқибати ёмон бўлмади. «Шинелли йиллар» собық иттифоқ миқёсида ҳарбий ватанпарварлик адабиётининг яхши на муналари қаторидан ўрин олди, роман ўзбек ва рус тилларида қайта-қайта нашр этилди. Шуҳрат бу асарида ўзбек халқининг иккинчи жаҳон урушидаги бевосита иштирокини, қардош халқлар вакиллари билан биргалиқда фашист босқинчиларига қарши олиб борган оғир, аммо шонли курашини кўрсатишни мақсад қилиб қўйган.

«Шинелли йиллар»ни роман-хроника деб аташ мумкин. Асар асосида ўзбек йигити Элмурод тақдири ётади. Ёзувчи Элмуродни урушнинг бошидан то охирига қадар олиб ўтади. Бу образ саргузаштлари орқали ёзувчи жанг хроникасини беришга, урушнинг турли этапларидағи вазиятни кўрсатишга муваффақ бўлади. «Шинелли йиллар» жанг кўрган ёзувчининг қаламига мансуб бўлгани учун унда тахминийлик, мавҳумийлик йўқ, жанг манзаралари, ҳарбий ҳаёт тасвири аниқ, ҳаётий ва ҳаққоний.

Шуҳрат галдаги романни «Олтин зангламас»да «Шинелли йиллар»га қарагандა маҳорат жиҳатидан анча илгарилаб кетди. Агар «Шинелли йиллар» роман-хроника бўлса, «Олтин зангламас» проблематик роман. Бу ерда ёзувчи халқимизнинг уруш арафасидаги, уруш йилларидағи, урушдан кейинги давр ҳаётидан қатор жонли лавҳалар яратади; шу билан чекланмай ўша

йиллар ҳаёти билан бөглиқ ўткир маънавий-ахлоқий, ижтимоий муммолосарга эътиборни тортади.

«Олтин занглаамас» адиднинг бошқа романларига нисбатан тез, шиддат билан ёзилиди, асар қўлёзмаси Ёзувчилар Союзида муҳокама этилиб ижобий баҳоланди, А. Қаҳҳор, А. Мухтордек наср усталари адаб жасоратини астойдил қўллаб-қувватладилар. Бироқ асарнинг рӯёбга чиқиши — китобхонларга етиб бориши хийла мушкул кечди. Романнинг биринчи ва иккинчи қисмлари «Шарқ юлдузи» журналининг 1965 йил 7—8-сонларида босилди, аммо давоми тўхтатиб қўйилди. Романда акс этган қатагон қурбонлари тақдири ҳақида ошкора ҳақиқат баъзи ғаламисларга маъқул тушмади, улар тегишли идораларга ҳар хил бўғтон гаплар етказиши; баҳтилизга ўша кезларда соглом кучларнинг хайриҳоҳлиги, саъий-ҳаракати туфайли асарнинг давоми журналининг ўша йил 12-сонида эълон этилди. Бу ҳол адабиётимиз учун катта байрам бўлди.

Ёзувчи бу китобни «юрагимнинг очиқ яраси ва шукронаси» деб атайди. «Олтин занглаамас»даги ҳаётни мен яхши биламан, — деб ёзади муаллиф, — улар мен билан бирга бўлган, менга учраган кишиларнинг ҳаёти. Мен бу ҳаётнинг атрофидамас, нақ ичида бўлганман. Бу мавзуда бирон нарса яратмасам кўнглим ўрнига тушмас эди».

Шуҳрат ўзбек адабиётида биринчи бўлиб қатагон қурбонлари ҳаётини ичдан ёритиш, бу мудҳиш ҳодисанинг туб моҳиятини очиш, «халқ душмани» деб қоралангандар аслида киму, ўша кезлари ўзларини совет ҳокимияти посбонлари, социалистик гоялар ҳимоячиси деб санаганлар ким — уларнинг асл қиёфасини кўрсатишга жазм этади. Ёзувчи романда ўз гоя-мақсадларига мос ҳаётий фабула топа билган: «халқ душмани» деб аталган одамлар аслида ҳалқнинг, ватаннинг содиқ фидойи фарзандлари, ўзларини совет ҳокимияти посбони, социалистик гоя ҳимоячиси санаган кимсалар эса қаллоб, сотқин, ватан хоинлари бўлиб чиқадилар... Роман муаллифи ана шу мураккаб вазият туфайли қалбидағи тугёнларини — юртнинг чин ўғлонларига бўлган чексиз мурувват, меҳр-муҳаббатини, хоин, хиёнаткорларга нисбатан қаҳр-газабини, дўйсту душманни бир хил қисматга мубтало этган мудҳиш ҳодисага нисбатан изчил муносабатини ошкора изҳор этади.

Ёзувчи бош қаҳрамон Содиқни ҳаётнинг гоят сер-

машаққат ва мураккаб йўлларидан олиб ўтади; унинг бошига кўп оғир савдолар тушади, лекин Содиқ шунчаки жафокаш бир кимса эмас, у ҳаммадан бурун курашчи, мардона шахс. Қаҳрамон сермашаққат онларда ҳам тақдирга тан бериб, ўзини йўқотиб, довдироб қолмайди, аксинча эътиқодига гард юқтирумайди, юксак идеалларга содиқ қолади, шу идеал йўлида мардларча кураш олиб боради. Қаҳрамондаги бу муқаддас эътиқод — олтин, бу олтин эътиқоднинг олижаноблиги, метинлиги, синовлардан голибона ўтиб тантана қилиши, яъни олтиннинг зангламаслиги бош қаҳрамон туб моҳиятини, романнинг асосий пафосини ташкил этади.

Шуҳратнинг айтарли барча асарлари каби «Олтин зангламас»да Ватан, инсоннинг қадри, шаън-шавкати туйгуси улугланади. Худди шу гоявий мотив, олижаноб инсоний туйгу адиднинг кейинги романи «Жаннат қидирганлар»да ўзгача ҳаётий материаллар асосида янги томондан очилади. «Жаннат қидирганлар» «Олтин зангламас»нинг мантиқий давомига ўхшаб кетади. Роман бош қаҳрамони Умматали гўё «Олтин зангламас» қаҳрамони Содиқдан ҳаёт эстафетасини қўлга олади. Умматали образи орқали ёзувчи Содиқни қийнаган жумбоқларнинг ечимини бермоқчи бўлади.

«Жаннат қидирганлар» романида муаллиф гарчи ўзининг шоирона, ошкора лиро-публицистик услубига содиқ қолса-да, бир қатор персонажлар тасвирида ранг-баранг бўёқларни ишга солади. Бу хислат айникса Сайдакбар ҳожи образи тасвирида яққол кўзга ташланади. Сайдакбар ҳожи — мураккаб шахс. Муаллиф бу одамни осонгина ёмонга чиқариб қўя қолмайди, унга бўлар-бўлмас салбий сифатларни ёпиширавермайди. Бу одам шахсиятини бутун мураккаблиги, қарама-қаршиликлари, кучли ва заиф томонлари билан кўрсатишга интилади. Сайдакбар ҳожи, бир томондан, гоят маккор, худбин, тошмехр шахс. У бир вақтлар кўп жиноятлар қилган, бузук йўлларга ҳам юрган, ҳаётти таҳлика остида қолганда ўз жонини, мол-мулкини асраб қоламан, деб қабиҳликдан ҳам қайтмаган, ўгли Абулбаракани она меҳридан бенасиб, уч қизалоқни эса тирик етим қилган, соддадил Қурбоналини бир умр оиласидан, суюкли ўғлидан, ватанидан жудо этган. Иккинчи томондан, бу одам табиатида талай ижобий сифатлар ҳам бор. У қизи Таманно билан ўгли Абулбаракани меҳр қўйиб ўстиради, ўқитади. Таманнонинг

кўнгли учун уйланмай танҳо ўтади, ғамгузор Қурбоналининг кўнглини овлаш йўлини ахтаради — у кўп йиллар хорижда юрса ҳам она юргта меҳр, миллий гурур, ифтихор туйгусини сақлаб қололган. У ғоят тадбиркор, билимдан шахс...

«Жаннат қидиргандар» романни бугунги китобхон учун 60-йиллардаги тарихий жараёнларни, у давр одамлари кайфиятини яхшироқ тушуниб олишга ёрдам беради.

Шуҳрат ака ҳар қанча жасур ижодкор бўлмасин, барibir ўз даврининг одами экани, унинг қатор шеърларида даврнинг ҳукмрон гоялари таъсири борлиги, ҳатто бу ҳол «Олтин зангламас» ва «Жаннат қидиргандар» романларида ҳам мавжудлигини унутмаслик даркор. Бунинг учун бугун шоир ва носир Шуҳрат шаънига маломатлар ёғдиришга ҳақимиз йўқ. Мустабид тузум шароитида муайян чекланиш, бирёзламаликларга қарамай ўша давр ҳақиқатини, ўша давр одамларининг қалбини, асл қиёфасини очиб берувчи асарлар яратиб қолдиришнинг ўзи катта ижодий жасорат, баҳт!

Айрим дўстларимиз Шуҳрат акани нуқул жабрдийда, баҳтсиз одам қилиб кўрсатишга уринадилар. Бир қараашда шундай туюлади. Дарҳақиқат, ҳаёт бу одам бошига кўп мушкул савдолар солди: фашизмга қарши жангларда неча бор яраланиб бадани илма-тешик бўлди; асрнинг энг даҳшатли вабоси — большевизм қатагони қурбони бўлди; умрининг сўнгти ўн йили оғир хасталикда кечди... Бунинг устига, ҳаётлигига ижоди муносаб қадрланмади. Бироқ у Оллоҳ инъом этган мустаҳкам эътиқод, чексиз сабр-бардош туфайли шунча кўргиликларни енгиб ўтиб, ўнлаб жилдарга жо бўладиган нурли туйгулар билан йўғрилган асарлар яратишга эрищди, умрининг сўнгти кунларига қадар қўлдан қаламини қўймади. Булар Баҳт эмасми! Вафодор умр йўлдоши билан ўтган тотли кунлар, катта, файзли оиласа бош, аломат қиз ва ўғлонларга ота, ўнлаб набираларга бобо бўлиш насибаси баҳт эмасми! Ўнлаб ёш ижодкорларга устоз бўлиш, муҳтожлар кўнглини олиш, юзлаб дўсту биродарлар, ҳамкаслар кўнглида яхши хотиралар қолдириш баҳт эмасми! Шуларга асосланиб, мен Шуҳрат акани баҳтли инсон, дегим келади.

ҲАМИША УЙФОҚ АДИБ

Шуҳрат ака «курорт»дан эсон-омон келибдилар!

Шуҳрат ака омонатни топширибдилар! Шу икки жумла бир умр қалбимга муҳрланиб қолган...

«Шоир Шуҳрат ака курортдан қайтиб келибдилар!» Илк бор курсдошим, шоир ва носирнинг маҳалладоши — Абу Боқи Ҳасан ўғлидан шоду хуррам, қувончларга тўлиб-тошган ҳолда айтилган ана шу биргина жумла мени, дўст-биродарларимни беҳад қувонтириб юборганди! Ўша пайтларда Ўрта Осиё Давлат университетининг тил ва адабиёт куллиёти тупргини ялаб юрган биз ёшлар қайси шоир ёхуд ёзувчини, санъаткор ёки олим номини эшитиб қолсак, уни кўриш ва икки-уч оғиз сўзини эшитиш иштиёқида ёнардик. Улар билан учрашиб, суҳбатлашиш баҳтига мұяссар бўлиш эса — ҳаётимиздаги энг баҳтли, бир умр эсда сақданиб қоладиган онлар ҳисобланарди... Буюк инсон, машҳур адид Шуҳрат ака билан ҳам шундай бўлган эди. Дарҳақиқат, Шуҳрат ака билан илк бор учрашувим, танишувим ва суҳбатлашишим, бир умрга севиб қолиш баҳтига мұяссар бўлишим жуда қизиқ ҳамда ҳаяжонли бўлган эди...

Аввал ўзбекчиликдаги яна бир қизиқ, ибрат олса арзигулик одат, феъл-атворни айтиб ўтмоқчиман.

Шуҳрат аканинг номини китобларда учратиб, ёзган-нетгандарини илк бора ўқигач, ўзим билмаган ҳолда унинг бу исми қалбимга муҳрланиб қолди. Кейин ҳафталар, йиллар ўтди.

Мен Тошкентта ўқишига келган кунларимданоқ ёшлигимда аҳд қилиб юрагимга туғиб қўйганим — мактаб дарсликларида ўқиганим, суратлари орқали таниш бўлиб қолган, қадрдан кишиларимга айланган ёзувчиларни кўриш истагимни амалга ошира бошладим...

Шуҳрат ака «курортдан қайтгач» бир гуруҳ адабиётсевар ёшлар хонадонига зиёрат қилгани бордик. Шунда мен бу азиз ва табаррук инсонни илк бор кўрдим... Шуҳрат ака ўзбекона ёзилган дастурхон устида биз билан суҳбатлашиб ўлтирибди-ю, мен тасаввурим

алдамаганини англаб турар эдим. Ўша куни узоқ гаплаша олмадик. Шоирни кўргани кўп кишилар келар эди. Ўша илк бор кўрганда мени ҳайратга солган нарса Шуҳрат ака қишлоқ кўчаларининг чангига кетмаган, гапини ҳам эплаб-сеплаб айта олмайдиган, уятчан, содда, ёввойироқ қишлоқ болалари билан бемалол, тенгқур кишилардай муносабатда бўлишлари ва мулоқотга тортишлари бўлди. Ҳа, Шуҳрат ака биз билан очиқ-ойдин, бемалол гаплашар эдилар, қаршимизда ўзбек адабиётининг йирик вакили эмас, балки оддий суҳбатдош ҳамроҳимиз турарди...

Кейинча ҳам, то омонатни топширгунча ҳам суҳбатларда бўлғанман. Ўша-ӯша Шуҳрат ака бўлиб қолаверардилар. Ўша очиқ юз, ўша табассум меҳригиёси бор инсон. Камтарин ижодкор.

Шуҳрат ака билан кўп маротаба учрашиб, суҳбатда бўлдим. Уларнинг кўпчилиги Мақсуд Шайхзоданинида бўларди. Шайх ака раҳбарлигида ёзаёттан ўзбек Гўрўги туркум достонларига оид номзодлик диссертациясидан нимаики қораласам, дарров домланикига олиб бориб кўрсатиб, фотиҳаларини олардим. Кўпинча Шайх ака уйларида Шуҳрат акани кўрадим, уларнинг қизгин суҳбатлари устидан чиқардим. Суҳбат мавзуи адабиёт, санъат, маданият, маънавият, маърифат бўларди. Мен жим ўтириб суҳбатни тинглар эканман, ҳайрон бўлардим. Иккови ҳам ноҳақ қамалиб, кўп азоб-уқубатларни тортишган бўлса-да, бирон бир маротаба шикоят қилишмасди. Ҳар икковлари ҳаётни, инсонни, адабиёт, санъатни шу қадар севишар эдики, айтишга сўз етишмайди... Шуҳратнинг бирон-бир шеъри босилиб чиққан кун биз учун байрам бўлиб кетарди.

Эсимда, муаллимларга аталган шеърлар халқ орасида шу қадар кенг ёйилган эдики, қаерга бормай — узоқ, четдаги қишлоққами ёки шаҳаргами, ана шу шеър ёддан ўқиларди. Ўқитувчилар анжуманлари, ўқувчилар йигинлари, ота-оналар анжуманлари ана шу Муаллимга аталган мадҳиясиз ўтмасди. Шайх аканинида навбатдаги учрашувимизда узоқ қишлоқ-овулларда яна шу шеърнинг вариантлашиб, фольклор асарларига айланиб кетганини айттанимизда, Шайх аканинг билдирган фикрлари ҳамон қулогим остида янграб турибди:

— Шуҳратбей, шеърларингизки халқ тили ва дилига кўчиб, фольклорлашибди, демак Сиз ҳам ўзингизга

ҳайкал қўйибсиз! Халқ унча-бунча шоирнинг шеърини фольклорий вариантиларини яратиб, ўзиники қилиб олмайди. Ҳа, Сиз, азизим, халқ қалбига кириб, ундан абадул-абад жой олибсиз!

Ҳа, аллома Шайхзода айтганларидаӣ, Шуҳрат ака ҳамиша уйғоқ, ҳамиша барҳаёт...



САБОҚ

Шуҳрат акани биринчи марта ёзувчилар уюшмасида кўрган эдим. Рўзномаларга хат орқали шеърларимни юбориб турардим. Ҳар куни умид билан рўзнома сотиб олар, лекин шеърим кўринмасди. Онда-сонда адабиёт ва санъат бўлими мудиридан мужмал жавоб хати келарди.

Бир куни Ёзувчилар уюшмасига бориб, шеърларимни кўрсатишга жазм қилдим. Йигирма тўрт варақли дафтар тўла шеърларимни олиб, йўлга тущдим.

Излаб-излаб топдим. Хона эшиги очиқ экан. Рухсат сураб, хонага кирдим. Тўрдаги стол ёнида нуроний чеҳрали киши нимадир ўқибми, ёзибми ўтирган экан.

— Келинг, келинг, — деб ўрнидан туриб илиқ кўришди. Овозидан раҳмдил, меҳрибон одамлиги билиниб турарди. Сочлари кумушидан ҳам, паҳтадан ҳам оқ. Тунда ёққан қалин қор, эрталабки қуёш нурида қандай оқ ва тиниқ кўринади. Менга ўриндиқдан жой кўрсатиб турган кишининг соchlари шундай тиниқ ва бегубор, биронта ҳам қораси йўқ эди. Бу машаққатли ҳаёт ва ижод изтироблари маҳсули бўлса керак, деган фикр кўнглимдан ўтди.

Шеър олиб келганимни, адабиётта қизиқишимни айтиб дафтаримни кўрсатдим. Домла оҳиста олиб, шеърларга кўз ташлаб, варақлаб чиқди-да:

— Ҳозир мажлисга киришим керак. Икки кундан кейин келинг. Ўқиб қўяман. Бемалол гаплашамиз. Ёрдам берамиз, — дедилар.

Икки куннинг ўтиши жуда қийин бўлди. Кўнглимга ҳар хил гаплар қутқу солади. Шуҳрат аканинг шеър, ҳикояларини рўзнома, ойномаларда ўқиган, расмларини ҳам кўрган эдим. Шеърларимни олиб қолган, овозида меҳрибонлик балқиб турган киши шоир Шуҳратлигини билардим. Фақат, гоҳ ширин ўй-хаёллар қанотида парвоз қиласман. Шуҳрат ака: «Туппа-тузук шоир экансан-ку. Нега олдинроқ келмадинг? Ёшлиқ қилгансан-да! Тортингансан. Бекор қилгансан. Майли, зарари йўқ. Шеърларинг менга ёқди», деётгандай... гоҳ: «Шуям шеър бўлдими? Шеър нималигини биласанми,

ўзинг? Эсиз шуни ўқишига кетган вақтим. Қўлингдан келмаса, нима қиласан бошимни қотириб», дёйтгандай туюларди. Икки ўт орасида ёниб, узоқ икки кунни қувончу умид, азобу пушаймон, аламу илинж билан ўтказдим.

Ниҳоят, юрак ҳовучлаб кириб бордим. Шуҳрат ака отимни айтиб кутиб олди. Юзма-юз ўтириб, раҳмдил, меҳрибон овозда гапира бошлади. Шоирлик ҳақида, сўз санъати ҳақида, нафосат, назокат, муомала маданияти, ҳалоллик ҳақида гапириб туриб:

— Гафур Гуломни кўп ўқиркансан, — деди. — Шеърларингда ҳаво кўп! Баландпарвоз сўзлар мазмун парокандалигини бекитолмайди. Битта шоирни ўқийверсанг, унинг йўлига тушиб қоласан. Кейин ундан чиқиш қийин бўлади. Кўп ўқиши керак. Яхши шоирларни ўқи. Лекин ўз гапингни айт. Ақлинг етган, ўзингга таниш, ўзинг билган нарсаларни ёз. Ана шунда ўз йўлингни топасан.

«Устоз кўрмаган шогирд ҳар мақомга йўргалар», деган мақолни шу куни умримда биринчи марта Шуҳрат домладан эшитганман. Ҳар бир ҳаваскор ёшга устоз ўтити, маслаҳати керак экан. Ўша дафтардаги биринки шеър рўзномаларда босилган эди. Кейинроқ, ўқиб кўрсам, ҳақиқатан ҳавоийи, санъатдан йироқ гаплар экан.

Шу суҳбатдан кейин шеър ҳақида жиддийроқ ўйлайдиган бўлдим. Унга қадар мен суҳбатлашган кишилар: «Фалон мавзуда ёзсанг, ҳеч қачон шеъринг босилмайди, фалон мавзуда ёзсанг босиладио, лекин жуда кўп тўсиққа учрайсан, партияни, Ленинни, пахтани мақтаб ёзсанг, чиқариш осон бўлади», дейишарди. Кўпчилик шу фикрда эди. Шунинг учун шеърнинг сўз санъати эканлигини эмас, қандай қилиб тезроқ бостиришни, рўзнома, ойномаларда номи кўринишини ўйлашарди. Мени маълум мақсадга хизмат қилиш, тезроқ матбуотда кўринишга уринмаслик ҳақида огоҳлантиргани учун Шуҳрат домладан умрбод миннатдорман.

* * *

Орадан йиллар ўтди. Шуҳрат домланинг «Сенинг севгинг», «Ишқингда ёниб» сарлавҳали шеър китоблари кетма-кет босилиб чиқди. Китобхонлар уларни қизғин кутиб олди. Айниқса, ёшлар орасида машҳур бўлиб кетди. Қўлма-қўл ўқилар, мақтов ва таҳсинларга сазовор бўларди. Муҳаббатга интиқ ёки кимгadir кўнгил қўйган

ошиқ-маъшгуқлар китобдаги оҳанграбо ишқий шеърларни дафтарга кўчириб олар, ёдлар, дўстлар даврасида тўлиб-тошиб ёдаки ўқир, ўз кечинмаларини изҳор қилаёттандай ҳаяжонга тушар эди. Мустабид тузум мафкураси, қатагонлар туфайли шиорбозликка, сохта баҳтиёрик мадҳиясига айланиб қолган шеърият таназзул қолипидан чиқиб, ҳаётий мазмун касб эта бошлади. Ҳайиқибоқ бўлса ҳам инсоннинг табиий кечинмаларини ифодалаш сари юз бурди. Бу жараённи Шуҳратнинг шу икки тўплами бошлаб берди назаримда.

«Муштум»да ишлаганимда ҳам, нашриётда ишлаганимда ҳам Шуҳрат ака билан кўп учрашганман. Таҳририятта келиб, узоқ-узоқ суҳбатлашиб ўтириб, Чўлпон, Фитрат, Абдулла Қодирий, Усмон Носир, Авлоний, Тавалло, Хуршид, Гулом Зафарий каби ижодкорлар ҳақида ўзлари гувоҳ бўлган воқеаларни ҳикоя қилиб берардилар.

Шуҳрат аканинг қамалиб чиққанини кейинроқ эшигдим. Ўнга қадар ҳам ҳурматим чексиз эди. Эл-юрт, тил, миллат тақдирига бефарқ бўлмагани учун қамалиб чиққанини билгач, меҳрим яна ҳам ошди. Шуҳрат ака элу юрт озодлиги учун курашиб, миннатдорлик ўрнига жабр кўрган қаҳрамон бўлиб кўринарди. «Халқ душмани» деб қамаб, отиб юборилган Абдулла Қодирий, Фитрат, Чўлпон сингари миллатсевар, фидойи қаҳрамон эди Шуҳрат ака ҳам. Уларни кўрмаганим, сўзларини эшитолмаганим учун тентдошларим каби мен ҳам армон қиласдим. Шуҳрат ака қамоқда азоб чеккан, омон қолган қаҳрамонлардан эди. Лекин ўша даврлар ҳақида сўрашга юрагим дов бермасди. Кўнгил жароҳатларини янгилаб қўяманми, деб қўрқардим.

Бирор рўзнома ёки ойномада шеърим босилган куни Шуҳрат ака албатта хонамизга кириб келар, узоқ суҳбатлашиб ўтирас, умр қадри, вақт ганиматлиги ҳақида гапиравди.

— Ҳозир ёзадиган пайт. Ёшлиқда ёзиб қолинглар. Ёш эллиқдан ошгандан кейин ёзиш қийинлашади. Ҳаёт қизиқ. Ёшлиқда танинг sog, кучинг кўп, лекин тажриба етмайди. Қариганда тажриба ортади, лекин куч етмайди. Шунинг учун ёшлиқда кўпроқ ёзиш керак.

Бир куни (1980 йил кузи) Шуҳрат ака хонамизга кириб келдилар. Нуроний чеҳраларида мамнунлик табассуми бор эди.

— Кеча телевизорда кўрдим. Яхши шеърлар ёзибсан. Шеърларингни эшитиб, Чўлпонни эслаб ўтиредим.

Шуҳрат ака беҳад самимий, биронинг муваффақиятидан терисига сизмай қувонадиган, биронга озор бермайдиган одам эди. Бошимга оғир кун тушиб, қийналиб юрган пайтларимда ҳам, гоҳ йўлда, гоҳ ишхонамда Шуҳрат акани кўрар, самимий муомаласи, нуроний чеҳрасидан мадад олиб, кўнглим ўсар, руҳим енгиллашарди.

«Бирни кўриб фикр қил, бирни кўриб шукр» дердилар.

Домла Машраб ҳақида роман ёзаётганларини айтардилар. Машрабнинг авлиё одамлиги, феъл-атвори, манбаларда ҳикоя қилинган воқеалар, мажозларни тўғри тушуниш, тўғри талқин қилиш, Машраб ҳақида асар ёзиш учун одам ҳалол бўлиши лозим, деб таъкидлардилар. Асар домла тириклигида босилмади.

Шуҳрат аканинг оғир дардга чалингланларини эшишиб, афсус-надоматлар чекдик. Ёзувчилар уюшмасида хизмат қилар эдим. Уюшма котиби Тоҳир Малик билан домланинг «Галаба» борги яқинидаги ҳовлиларига бордик. Домла шифохонадан, узоқ даволаниб чиқсан эдилар.

Ҳовлига стол-стуллар қўйилган. Домлани ўғиллари уйдан суюб олиб чиқди. Келинойи парвона бўлиб юрибдилар. Домлани кўриб ўпкам тўлиб, томогимга бир нарса тиқилгандай бўлди. Кўзларимдан ёш оқа бошлади. Ўзимни тўхтатолмайман. Касал одам йиглаётганимни кўриб, дарди оғирлашмасин, деб хижолат бўламан. Ниҳоят, ўзимни қўлга олиб, аҳвол сўрадим.

Яқиндагина соппа-соғ, ҳаммага яхшилик тилаб, яхшилик қилиб юрган одамнинг аҳволини ўйлаган сари яна кўзимга ёши қалқди.

Кейинги йил август ойида ёзувчиларнинг Дўрмондаги ижод уйида эдим. Шуҳрат акани ҳам олиб чиқишиди. Барака топкур болалари меҳрибонлик қилиб, хабар олиб туришарди.

Кечки овқатдан кейин салқин хиёбонда сайр қилиб айланардик. Шуҳрат ака ёғоч ўриндиқда ўтирган экан. Саломлашиб, ҳол-аҳвол сўрадим. Бирпас гаплашиб ўтирдик. Шунда домла:

— Маъруфжон, Сизни бир хафа қилган эдим. Шундан бери ўйлайман, — дедилар.

— Домла, мен сиздан хафа эмасман. Бунаقا гапларни ўйламанг. Ўша ишим учун ҳалиям пушаймон қиламан. Ҳечам сизни ранжитмоқчи эмас эдим. Сиздан кечирим сўрайман, домла.

— Мен хафа эмасман. Сендан кечирим сўрайман, деб юрган эдим. Ранжитиб қўйган эдим.

Воқеа бундай эди...

Шуҳрат ака машҳур гуржи шоири Бараташвилиниг шеърларини таржима қилган, тўплам нашриёт режасида бор эди. Тўпламни таҳрир учун менга беришди.

Таржимани русча матн билан солиштириб, баъзи сўз ва мисраларни ислоҳ қила бошладим. Тажрибали, катта шоир. Шунча романлар, достонлар, манзумалар ёзган, қатор шеърий китоблар муаллифи. Рус ва жаҳон адабиётидан кўплаб асарларни таржима қилиб, нашр эттирган, китобхонга манзур қилган ижодкор... Шундай одамнинг асарига ёш бир муҳаррир ўзича тузатиш киритавериши одобдан эмас. Маслаҳат қилмоқчи бўлиб домланинг уйларига қўнгироқ қилдим. У киши Москва томондаги ижод уйига кетган, ёз охирларида қайтарканлар. Китоб тез босмахонага туширилиши керак. Бошлиқларга айтган эдим, русча матнга мослаб таҳрир қилаверинг, дейишиди. Қўлёzmани қўлдан чиқариб, босмахонага топширдик. Терилиб келди.

Шуҳрат ака Москвадан қайтиб келганда, китоб босишига тайёр бўлган эди. Корректурани ўқидилар-да, хафа бўлиб, таҳриримни «брак» қилдилар. Домла Бараташвили шеърларини бошқа таржимон таржимасидан ағдарган эканлар. Мен бошқа таржимон таржимаси билан солиштириб таҳрир қилибман. Домланинг олдида ҳам, нашриёт олдида ҳам гуноҳкор бўлиб қолдим. «Таржима бундоқ бўлади» деб ўзимни кўрсатмоқчи бўлгандайман. Шуҳрат акага ҳурматим чексиз. Ўзбекча таржимани русча билан солиштирган одам, Шуҳрат акага ҳам, менга (муҳаррирга) ҳам дашном беришмасин деган маънода, мазмун аниқ бўлишига ҳаракат қилган эдим.

Домла шуни эслаб, Маъруф мендан хафа, деб кўнглимдан чиқармоқчи бўлибдилар. Мард одамлар бегараз бўлади. Домла мард одам эди!

Шунда мен: «Шуҳрат ака, ўттиз йил илгари 24 варақли дафтарда шеър кўтариб келган бола эсингиздами? Шеър нима учун ёзилади? Шоирнинг бурчи нима? — деб сўраган ва Устоз кўрмаган шогирд ҳар мақомга йўргалар, деб сабоқ берган эдингиз. Ўша бола менман. Ўша сабоқ ҳамон эсимда», дегим келди. Лекин касал одамни толиқтирмай, деб кўнгилларини кўтаришга ҳаракат қилдим.

1994 йил 15 июн.

ЯХШИЛИК

Шоир Шуҳратнинг китоблари талабалик йилларимиз қўлимиздан тушмас, унинг оташин меҳру муҳаббат, самимият тўла шеърлари адабий гурунглар, мушиоралар файзи бўлар эди. Айниқса «Сенинг севгинг» тўпламидаги деярли барча шеърлар бизга ёд бўлиб кетганди. Улар содда, ўйноқи, халқ қўшиқларидаи равон эди, шу боис тезгина ёдлаб олардик. Шеър дафтарларимизга уларни кўчириб олардик, байрамларда, пахта даласидаги кечаларда, тунги гулханлар атрофида шавқ билан Миртемир ва Шуҳрат шеърларини ўқирдик. Бизнинг ёшлигимиздай жўшқин, орзуларга бой, ҳаяжонли мисраларни Шуҳрат фақат биз учун битгандай, бизнинг ўйларимизни қоғозга туширгандай туюларди. Аксар шеърлар сарлавҳаси остида багишлов ёки қизларнинг исмлари бўларди. Бокудами, Дунай бўйларида, гўзал Крим bogларида, шоир қайдা сайр қилса унинг ошиқ нигоҳлари Аёл гўзаллигига, Оlam маъбудасининг ҳусну малоҳатига тушар, Аёл сиймосида Ҳаёт ва Мангаликни, Гўзаллик ва Нафосатни кўрган шоир мафтункор байтлар битганга ўхшарди. У пайтлар биз ойнаижаҳонни кам кўрардик. Шоиру ёзувчиларнинг овозларини радиодан тинглардик, холос. Ўзларини кўриш биз учун байрам, тенги йўқ қувонч бўларди. Миртемирнинг «Мен сени» шеърини ҳар куни ҳар дарсда ёд айтардик. Гафур Гулом, Шайхзода, Асқад Мухтор мисралари бизга эгизак юради. Шуҳратнинг шеърларини ўқиб навқирон, булоқдай қалби жўшиб турган ёш шоир деб ўйлардик.

Иттифоқо, ҳозирги Турон кутубхонасида шоир Шуҳрат билан учрашув бўлар экан, деган гап қулогимизга чалинди.

Шеърнинг ҳақиқий муҳлиси, шоирнинг ихлосманди асли талабалар бўлади-да! Кутбихон, Мамлакат, Заҳро — бир йўл бўлиб учрашувга отландик. Мўъжазгина кутубхона лиқ тўла эди.

Бир гуруҳ ёзувчилар савлат тўкиб кириб келишиди. Ўртада оппоқ сочли, басавлат, кўркам, пешонаси кенг киши. Ёнларида Барот Бойқобилов, Ҳуснидин Шариф

пов, Юсуф Шомансур, Хайридин Салоҳлар. Биз уларни кўп кўргандик, семинарларда сұхбатларида бўлгандик. Лекин, Шуҳрат қани? Устоз домламиз Озод ака учрашувни очаётуб, Шуҳрат акани таништирилар: кумушдай оқ сочли басавлат киши ўша ёшлик куйчиси, жозибали лирик шеърлар муаллифи Шуҳрат эканлар... Бемаҳал қор ёқсан экан бу донишманд бошларга. «Шахста сифиниш» даври изтироблари, Сталин қатагони қор-бўронлари бу соchlарга қор ёғдирган экан!

Бу аччиқ ҳақиқатни йиллар ўтгач, сўнгроқ эшигидик.

Оппоқ қорли тоғлар кўксидага зумрад булоқлар кўз очади. Оқ қорли тоғлар этагида алвон лолазорлар, яшил майсалар гуркираб, баҳор шалолалари куйлаб ётади. Шоирнинг мангуга ёш қалби ҳам шундай сеҳрли кудратга эга экан: Инсон зотидан жабру жафолар кўрса-да, ҳаётга меҳри заррача сўнмаган, оловли йиллардан шинел билан ёнмай ўтган шоир Шуҳрат чинакам ҳаёт ошиги, яхшиликлар элчиси эди.

Ўша учрашувда мен ҳам сўзладим, ҳайратимни яширмай, жарангдор мисраларини ёд ўқиб бердим. Маъқул келди, шекилли, нуроний чехраларига кулгу ёйилди, яшанг, қизим, деб алқаб қўйдилар.

Дорилфунунни тутатгач, устоз Зулфияхоним ҳузурларига бордим. Иш излаётганимни айтдим. Дарҳол «Шарқ юлдузи»га қўнгироқ қилдилар. Шуҳрат ака бу журналда мастьул котиб эдилар.

— Сиз чиқиб туринг, олдингизда мақтасам бўлмас, — дедилар устоз...

Хуллас, «Шарқ юлдузи»дай обрўли нашрга адабий ходим этиб қабул қилишди.

Шуҳрат жуда меҳнаткаш, меҳрибон, қаттиқўл эдилар. Ходимдан ўтган ҳар бир имло хато, матн тайёрлашдаги пала-партишилик учун оталарча койиб берардилар.

— Бир қўлингизда қалам, бирида ўчиргич бўлсин. Ҳарфларнинг «думи»ни узун қилиб сиёҳда ўчирманг, оқ гуаш билан бўяб қўйинг, — дердилар.

Қўлэзмаларнинг тоза, сифатли бўлишига алоҳида эътибор берардилар. Таҳрирни қўлэzmага солиштириб ўқиб, яхши таҳрир учун мактаб қўйсалар, ўрнига тушмаган сўз бўлса, муаллифнинг ўз матнини тиклаб қўярдилар. Гоятда интизомга риоя қилардилар.

Ўша пайтда «Шарқ юлдузи»да Ҳамид Гулом бош муҳаррир, Ваҳоб Рўзиматов ўринбосар бўлиб ишларди-

лар. Ҳусниддин Шарипов, Юсуф Шомансур, Турғун Пўлат, Носир Фозиловлар чинакам жонкуяр муҳаррирлар эди. Шуҳрат ака ёшларни ўз фарзандидай севар, уларни мoddий жиҳатдан кўп қўллардилар. Қалам ҳақи қўйганда ёшлар учун гонорарнинг пилигини кўтариб-роқ қўярдилар. Ёш боласи билан ижарада туради, рўзгорига барака бўлсин, дердилар. У кишининг остонасидан ёшларнинг қадами узилмасди. Ширин ташвишларини ҳам, мушкул савдоларини ҳам кўп ёшлар Шуҳрат билан баҳам қўтар, унинг кўмагида ҳал қиласдилар. Оппоқ сочли бошини эгиб, шогирдларини не балолардан қутқариб қолганларини ҳеч таъна қиласдилар.

Байрамларда харид қилсалар, ходимларининг болалари учун бир дона апельсинми, мандаринми, олмами қўлига тутқазиб юборар, маош охирида эса, мана, қалам ҳақи олувдим, кичкинагина бир нарса оларсан, деб пул тутқазиб кетардилар. Бу олийжаноб, бағри дарё Инсон қанча шогирдларининг қаддини тиклаб, уларни катта йўлларга солиб юборган. Эвазига яхши инсон бўлишларини тилаган, холос.

«Жаннат қидиргандар» романининг корректураси жуда узоқ муддат таҳририятда туриб қолди, улкан ёзувчи ичидан зил кетиб, ичидан нураёттан төгдай сир бой бермас, маҳзун юрадилар. Орадан анча ўтиб, бир мунча таҳрирлар билан асар чоп этилди. Уруш оловларида тобланган, ўқлар ёмгиридан омон ўтиб келган забардаст Инсонни зимдан киши билмас қилинган ҳужумлар қаритгани рост эди. 1988 йили Муқимий театрида адабнинг 70 йиллик юбилейлари бўлиб ўтди. Қанийди ўшанда бу беназир Инсоннинг, ҳақиқий меҳнаткаш, хаёл уфқи кенг шоирнинг кўкрагига «Халқ ёзувчиси»дек муносиб нишон тақилсайди! Унинг «туғилган» тили ўшанда «ечилиб» кетармиди?

Шуҳратнинг дўстлари, шогирдлари, таниш-нотанишлар учун ҳамиша очиқ бўлган хонадони бекаси — Турсуной опа ўшанда Шуҳрат аканинг дил сўзларини ўқиб бераётган ўғлини тинглаб, унсиз йигларди.

Шоирнинг рафиқаси бўлиш осонми? Тогдаи барваста жуфтини «халқ душмани» атаб олиб кетганларида у гўзал келинчак эди. Тўнгичи Фикратжон қўлида эди. Сўнг... келиб, уйни тинтуб ҳам қилишди. Шуҳратнинг ойиси — ҳақиқий Ўзбекойим, хуромон Аёл бешик тебратиб ўтиради. Болани бешиқдан ечиб олдилар, суннат қилганмисиз, деб сўроққа тут-

дилар. Улар учун бешик, суннат тўйлари ўтмиш сарқити эди...

Юртимизга Истиқдол келди. Истиқдол шабадалари Шуҳратнинг ҳам бағрига тегди, ҳуррият насимлари шоирга илҳом берди. Тилдан қолганда бу азим чинорнинг кўксига «Ўзбекистон ҳалқ ёзувчиси» нишони тақилди. Шуҳратнинг юраги қайнар булоқ эди; айтар сўзлари кўп эди. Шеърга сигмаганлари, шоир қайдлари бўлиб дунёга келарди. Романлар, пьесалар қоғозга кўчарди...

Мажлисларга, давраларга гоҳ ўғиллари, гоҳ невара-лари билан келиб, олдинги сафларда қўр тўкиб ўтирадилар, донишманд Шуҳрат ака. Бу ажойиб Инсон, Шоир, Устоз ҳаётини таърифласак, ўзбекларнинг энг сара, энг азиз, севган сўзи тилимга келади: Шуҳратнинг турган-битгани ЯХШИЛИК эди. Яхшиликни эса ҳалқ ҳам, ўзини билган ҳар қандай одам ҳам асло унутмайди.



БАҲОРНИНГ ОППОҚ-ОППОҚ ГУЛЛАРИ

Эски қадрдоним Темур Убайдулло телефон қилиб, Шуҳрат домла ҳақида чиқаётган хотира китобида қатнашишга таклиф этди. Муҳаббат ва ёшлиқ қуйчиси, қатор-қатор шеърий китоблар, достонлар, балладалар, кичкинтойларга багишланган тўпламлар муаллифи бўлган улкан шоир, ҳар бири сўз санъатида воқеа даражасига кўтарилган «Шинелли йиллар», «Олтин зангламас», «Жаннат қидиргандар» романлари ва яна қиссалари, адабий-бадиий мақолалари билан шуҳратли бўлган Шуҳрат устоз ҳақида ёзиш фахрли, аммо сўз айтиш қўлимдан келармикин?

60-ва 70—йилларда кўкарған назм ва наср ниҳолларининг энг оқил ва саховатли bogbonlariдан бири ҳи-собланган шундай зоти киром олдида қарздорлигимни ҳис этяпман. Кўлимга қофоз-қалам олишим билан ўрта бўйлидан баланд, тўлиқ гавдали, юзи бугдой ранг, тиник, бўйни хиёл узун, нигоҳлари хаёлчану ўткир, сухбатдошини диққат билан тинглайдиган, айтмоқчи бўлган гапига бирорта ҳам ортиқча сўз қўшмайдиган, ҳар бир дақиқанинг қадрига етадиган, ўта зиёли, нурли қиёфа худди ҳозир кўриб турганимдай кўз олдимга келди. Оппоқ соч, баҳорнинг оппоқ-оппоқ гуллари, оқ кўнгил ҳақидаги бадиий бўёклари ранго-ранг сатрлар Шуҳрат акадан кейин шунчалар кўпайтан эдики, ҳатто соchlari қора шоирлар ҳам оқ сочдан фазилат қидириб, шеър ёзганлар.

Биз ёшлар Шуҳрат аканинг эътибори тушган тенгдошларимизга ҳавас билан қарап эдик. Кўпчилик қаторида у билан бир неча бор қўл олишиб саломлашган эдим. Ўз машқларимни кўрсатишини, маслаҳатларини олишини орзу қилсан-да, «Шарқ юлдузи» масъул котиби «деб ёзилган хонага кириб боришга ботинмас эдим. Журналнинг публицистика бўлими мудири, таниқди адаб ва таржимон Турғун Пўлат таклифи билан Ҳамза Ҳакимзода Ниёзий ҳаётининг сўнгги кунларида Шоҳимарданда бирга бўлган Абдулла Ҳотамов ҳақида ёзилган «Оқ сув қўшиғи» очеркини бир ой илгари ташлаб кетган эдим. Шуни хабар олгани келдим. Турғун Пўлат

салом-алиқдан кейин очерк маъқул келиб, тайёрланиб, котибиятта тушганини суюнчилади.

— Ҳозир Шуҳрат аканинг столи устида турибди, — деди у, — эҳтимол ўқиб, босмахонага топширгандир.

Шуҳрат аканинг номини эшитиб, юрагим дукиллаб кетгандай бўлди. Ёзганим унинг қўлига тушишини хаёлимга келтирмаган эдим. «Ёқмаса-я. Шуҳрат домланинг ўқишини билганимда бошқачароқ ишлармишим, — чиндан хавотирландим. — Катта одамнинг назаридан қолищдан ёмони йўқ». Тарвузим қўлтигимдан тушиб, бўшащдим, бу ердан тезроқ жўнаб қолишни ўйладим. «Ҳозир келаман» ишорасини қилиб, хонадан чиққан Турғун Пўлат ўша дақиқада қайтиб кириб:

— Юринг, — деди, — Шуҳрат ака Сизни сўраяпти.

Хаяжонимни сездирмасликка уриниб, унинг орқасидан эргашдим. Шуҳрат ака ўринларидан туриб:

— Ие, мулла Йўлдош, яхши келдингизми? — деб яқин танишдай кутиб, қўл узатди. Адҳам Ҳамдам билан Чархий домланинг соглиқларини суриштириди. Адҳам Ҳамдам билан болалиқдан ўртоқ эканликларини гапириб, қизиқ воқеаларни эслади. Кейин бирпас жим қолиб, менга яна қаради. — Ўт-ўланлар ичида ёлгиз пориллаб турган лола тасвири ва яна бир-икки топилмаларингиз очеркингизни суюб турибди. Баён жозибаний йўқотади. Янги шоҳи кўйлакнинг у ер-бу ерига бўздан, бунинг устига эски бўздан ямоқ солинганини тасаввур қилиб кўринг. Шундай жойларини билдирмай-билдирмай қисқартиридик. Журналда босилар экан, деб ташлаб қўйманг. Жонли тасвирлаш мумкин бўлган қанча воқеалар бор экан. Озгина шошилмай, озгина эринмай қайта ишласангиз ҳужжатли қисса бўлади-қўяди.

Шуҳрат акага «Раҳмат, домла» дейишидан бўлак сўз айттолмадим. Мен учун энг қувончлиси — устоз билан танишиб олганим бўлди. Кўп ўтмай, пахта йигим-терими қизиган кунларда Узбекистон ёзувчилар уюшмасининг халқ шоири Уйгун бошлиқ Шуҳрат, Йўлдош Шамшаров, Зоҳиджон Обидов, Ҳусниддин Шарипов, Азиз Абдураззоқ, Толиб Йўлдошдан иборат шоир ва ёзувчилар гуруҳи Фарғонага келди. Уларга истеъододли ҳажвчи Адҳам Ҳамдам билан мен ҳамроҳ бўлдик. Сафарнинг иккинчи куни Шароф Рашидовнинг Фарғонага ташриф буорганини эшитдик.

— Далаларда юрганимизни Шарофжонга эшитдирив қўйиш керак, — деди Уйгун ака, — албатта, хурсанд бўлади.

— Пахтакорлар хурсанд. Ўзимиз мазза қилиб юрибмиз, — деди Шуҳрат ака. — Айтдирсак, менимча, миннатга ўхшаб қолади.

— Бу гапингиз ҳам тўғри, — деди Уйгун ака, — қани, мулла Адҳам, бошланг.

Жўнашимиз олдидан Адҳам Ҳамдам борар манзилимизни аниқладими ё бошқа масала биланми — у ёқбу ёққа қўнгироқ қилди. Қувавининг Толмозорига кичик автобусда йўл олдик. Машина қишлоқда озгина тўхтаб, кейин адр тарафга йўл олди. Шинам шийпон ёнида тўхтадик. Адҳам ака яна «Сизлар ўтириб туринглар» деб машинадан тушиб, шийпондагилар билан гаплашиб, изига тез қайтди.

— Бизни бошқа ерда кутишяпти, — деди.

— Адҳам биздан ниманидир яширяпти, — деди Шуҳрат ака ёнида ўтирган Адҳам Ҳамдам тепасидан Уйгун акага қараб, — у бир шумликни ўйлаяпти-да!

— Нега адашиб қолдингиз, — деди Уйгун ака Адҳам Ҳамдамга қулимсираб, томогини чертиб, — ё кечачиздан кейин ҳам бўлдими?

Адҳам Ҳамдам гапни чалгитиб, қизиқ-қизиқ ҳанго-маларни бошлаб юборди. Ўшанда Қува билан Тошлоқ тумани қўшилган йиллар эди. Анча йўл босиб, Заркентни қиялаб, Қумариқча, «Фаргона» колхозига кириб бордик. Машинамизни милиционер тўсди.

— Бу ёққа ўтиш мумкин эмас, — деди у. — Ҳозир юқоридаги шийпонга Шароф Рашидов келадилар.

— Булар Шароф Рашидов билан бирга келган шоирлар-ку, ана, қаранг, Уйгунни, Шуҳратни танимайсизми? — деди Адҳам Ҳамдам жиддий.

Милиционер индамай қолди.

— Оббо, Адҳам-еў, қўймайди. Бизни Шароф Рашидовга рўбарў қилиб, Яшин акадан раҳмат оладиган бўлди, — деди Шуҳрат ака, — лекин бу «қилвирлигинг» менга ёқмади. Ёзувчиларнинг Тошкентда навбат пойлаб, безор қилаётганлари етмай Фаргонада ҳам рўбараёсидан чиқиб турсак!

Автобусдан энди тушиб турганимизда, ҳукумат машиналари ҳам шийпонга етиб келди. Шароф Рашидов ҳаммага бир-бир қўл узатиб саломлашди. Қалам аҳлини кўриб, ниҳоятда хурсанд бўлганлиги шундоққина сезилиб турарди. Уйгун билан Шуҳратдан алоҳида ҳолаҳвол сўради. Ўша куни учрашувлардан кейин Яккатут қишлоғининг катта бодигали мөҳмонхонада зиёфат берилди. Уйгун сўз айтди. Шуҳрат муҳаббат шеърларини

ўқиди. У ёш Ҳусниддин Шарипов ижодига тўхталиб, унинг йирик шоир эканини таъкидлади. Навбат келиб, Толиб Йўлдош тариқ донини «сўзлатиб», шеър ўқиди. Шунда Адҳам Ҳамдам кулиб:

— Тариқнинг яхши емишлигини билар эдим, — деди, — аммо бунчалар ақлли гаплар айтишини билмас эканман.

Кулги кўтарилиди. Айниқса, колхоз раиси Йўлдошали Рустамов ва бошқа мезбонлар роҳат қилиб кулишиди. Ҳазил Толиб Йўлдошга оғир ботиб, ўсиқ қошларини чимириди.

— Адҳам ҳазиллашибди, — деди Шуҳрат ака унинг кўнгли учун, — яхши масал ёзибсиз.

Шундан билдимки, Шуҳрат ака ҳеч нимани эътиборсиз қолдирмайди, инсонни жуда авайлайди, меҳрини аямайди, кимнинг асари ёқса индамай туролмайди. Унинг Ҳусниддин Шарипов ҳақидаги фикри Уйгун акани ҳам ўйлантириб қўйганини сездим.

70-йилларнинг бошида устоз Носир Фозилов хонадонида, назаримда, айни ёз кунларида улуг бир учрашувнинг шоҳиди бўлдим. Дастурхони ҳамиша тузовлоқ, якандозлари ҳамиша тўшалган бу очиқ кўнгил, меҳмондўст хонадонга Собит Муқонов, буюк адабнинг умр йўлдоши Марям ойи билан бирга Асқад Мухтор, Шуҳрат, Ваҳоб Рўзиматов, Ҳайдарали Ниёзов ва бошқалар ҳам кириб келишди. Суҳбат давомида Собит Муқонов қозоқларнинг Кўқон хонлигига bogлиқ тарихи ҳақида янги роман ёзиш ниятида эканини айтди. Ҳамма маъқуллади.

— Илдизимиз бир, тарихимиз бир, — деди Шуҳрат ака аллақандай ички эҳтирос билан. — Аммо ҳозир бир-биrimizdan узоқлашиб бораётганга ўхшаймиз...

— Шуҳрат юрагимизнинг ич-ичида турган тутундан гап очди, — деди Асқад Мухтор, — туркнинг ҳамма ҳамма уруглари бир-бирларини таржимонсиз тушинишган! Навоийни қозоқларга бирор таржима қилиб берганми?! Мухтор Авезов Қодирийни ўзбекчада ўқиган-ку?! Сиз ҳам, шундайми?!

— Тўғри-тўғри, — деб маъқуллади Собит Муқонов. — Тилимизни бир-биrimiznинг ҳисобимизга бойитишни унтиб қўйдик.

— Ойбек ака йўқ, Қаҳҳор йўқ, — деди Асқад Мухтор. — Собит ога, энди Сизга эргашамиз...

— Бир-биrimizdan йироқлашиб бораёттанимизни

келажак авлод кечирмайди, — деди ҳамон эҳтирос багрида турган Шуҳрат ака, — бу маслаҳатни қолдирмасдан амалий ишга кечикмай киришиш зарур.

Ҳозир бундан йигирма етти йил илгари ўтган ана шу тарихий сұхбат ёдимга тушиб, Асқад ака билан Шуҳрат домланинг ич-ичини қемирган армонларни юрагим чигириғидан қайта ўтказяпман, уларнинг айтган гапларидан айттолмай қолган дардли гаплари қўплигини ўйлаяпман!



СҮНМАС ЧИРОҚ

Шуҳрат ака адабиётимизнинг чинакам заҳматкашларидан бири эди. У меҳнат қилиб толмас, бу маънода биздек шогирдларга ўрнак эди. У аввало ажойиб лирик шоир сифатида ўқувчиларга севимли ва ардоқли эди. Шоирнинг довруқ таратган «Кавказ дафтари» туркуми, бошқа бир кўп шеърлари, балладалари шеъриятимизда воқеа бўлганлигини айтиб ўтаман. Шуҳрат шеъриятини ўқувчиларга ардоқли этган нарса, фазилат, бу — улардаги теран самимиятдир. Самимият шоир шеърларидан уфуриб туради. Ҳақиқий шоирнинг ўз ўқувчисидан яширадиган сири бўлмайди, балки бор сири, дарди, нияти, мақсадини bemalol ўртоқлашади. Шуҳрат ака шеърияти шу маънода самимий шеъриятдир. Умуман, самимият Шуҳратнинг бутун ижодига хос фазилатдир. Адивнинг ўзига хос романлари эълон этилиши биланоқ, қўлма-қўл бўлиб кетар, мунозаралар, баҳсларга сабаб бўлар эди. Ёзувчининг асарлари — унинг фарзандлари, ҳар бирининг ўз қисмати бор. Бу аксимома, исбот талаб қилинмайдиган ҳақиқат. Шуҳрат ака романлари ҳам — адаб «рўмон» деб, оғиз тўлдириб, суюб гапиришни яхши кўрарди — ҳар бири ўз тақдирига эга бўлди. «Шинелли йиллар» биринчи роман сифатида муаллифига катта шуҳрат келтирди. Роман ўзбек тилида эълон этилгач, рус тилига таржима қилинди ва Москвада «Воениздат» нашриёти орқали бир неча марта нашр этилди, нусхаси ҳам, эслашимча, ҳар бири юз мингдан кам эмас эди. Умуман, «Шинелли йиллар» ўтган уруш йиллари ҳақиқада ўзбек адабиётида ёзилган энг етук романлардан бири ҳисобланади.

«Шинелли йиллар» билан боғлиқ бир воқеани айтиб ўтмоқчиман. Шуҳрат ака адабиёт учун меҳнатни кўп қилган, лекин замон марҳаматини, сийловини кам кўрган адиллардан эди. Ҳар хил мукофотлардан бебаҳра қолди, гарчи унинг асарлари шунга арзирди. «Ўзбекистон халқ ёзувчиси» унвонини ҳам ҳаммадан кейин олди, кеч бўлса ҳам бу яхши бўлди, албатта. Буларнинг сабаби бор эди: Шуҳрат ака тўғри сўз, тили аччиқ,

ялтоқланишни зинҳор ёқтирмайдиган, ҳамиша ҳақиқат томонида турадиган инсон ва адид эди. Турли пайтларда ҳар хил адабий камситишларни бошдан кечирарди. Менимча, етмишинчи йилларнинг охири бўлса керак, Шуҳрат акага нисбатан ана шундай камситишлар бўла бошлади, ҳеч қаерда унинг асарларини босмай қўйидилар, чиқиб турган китоблари ҳам тўхтаб қолди. Сабабини билмоқчи билиб редакцияларга борса, адигба, газета расмий материаллар билан банд бўлиб қояпти, дейишар, нашриётда бўлса, қозоғ танқислигини рўкач қилишарди. Ҳолбуки, ўзгаларнинг китоблари тўхтагани йўқ, чиқиб турибди... Шуҳрат ака ўша вақтдаги Ўзбекистон раҳбари Шароф Рашидовга, қабул қилишини сўраб мурожаат этади. Бироздан кейин адид Шароф Рашидов ҳузурида бўлади. Учрашувда, Шуҳрат аканинг кейин айтиб беришларича, шундай суҳбат бўлиб ўтади:

— Шароф ака, — дейди ҳол-аҳвол сўралганидан кейин Шуҳрат ака. — Сизга бир нарсани маълум қилмоқчи эдим... Нима учундир менинг асарларимни босмай қўйишиди...

— Нимага босишимас экан?.. — ҳайрон бўлади Шароф ака. Шу заҳоти телефонда мафкура котибидан сўрайди. — Нима учун ёзувчи ва шоир Шуҳратнинг асарлари босилмаётир? Ким уларни тўхтатиб қўйди? Нима учун жойларда буни Марказий Комитетнинг фикри қилиб кўрсатишмоқда? — Бироз телефонга қулоқ солиб тургандан сўнг, Шароф ака давом этади: — Шундай бўлсин! Дарров жойларга кўрсатма беринг. Шуни айтингки, адид Шуҳрат ҳақида фикримиз яхши! Дарвоқе, сиз унинг «Шинелли йиллар» романини ўқиганмисиз?.. Яхши. Бу роман, уруш ҳақидаги асарлар орасида энг яхшиларидан бири. Нашриётга айтинг, шу романни қайта нашр этсинлар.

Шароф ака телефон гўшагини қўйиб, юрагига нур инган адигба юзланади:

— Биласизми, Шуҳрат, орамизни бузгувчилар кўп, шунга эҳтиёт бўлайлик. Бирорлардан эшиштан гапларга ишонманг. Бирон гапингиз бўлса келинг, тортинманг, ўзимга айтинг. Ижодингизга муваффақиятлар тилайман.

Шу куннинг эртасига ёқ етакчи газеталарда биринкетин Шуҳрат асарлари эълон қилинади. Шу йили «Шинелли йиллар» романи кўп нусхада қайта нашр этилади...

1965 йилда бўлган бир воқеа. Мен Москвада Адабиёт институтида таҳсил олардим. Шуҳрат ака ўз асарларини кўпинча Москва ёнидаги Малеевка деган жойдаги Ижод уйида қогозга туширарди. Бу ўрмон ичида жойлашган хушмандзара бир маскан эди. Шуҳрат ака икки ой шу ижодхонада босим ўтириб «Олтин зангламас» романини ниҳоясига етказди. Дарвоқе, Шуҳрат ака Ойбек аканинг қандай қилиб «Олтин водийдан шабадалар» романини ёзганини айтиб берганди.

Ойбек ака уч ой Москвада «Москва» меҳмонасида бир хона олиб, ўз асарини битирган экан... Шуҳрат ака узоқ йиллар ёзид келаётган асарини битирган, кайфияти аъло, кўнгли равshan эди. У Тошкентта жўнар экан, буюмларини саранжомлашга киришди. Бирдан «Олтин зангламас»нинг қалин қўлёзмасини олиб менга кўрсатди. Бинафша рангда ёзилган тоза қўлёзманинг биринчи саҳифасини мамнуният билан овоз чиқариб ўқий бошлади. Бир саҳифа ўқигач, саҳифани жойига қўйиб, қўлёмани қўлига одди, бир-икки салмоқлаб кўрди-да, портфелга авайлаб жойлай бошлади. Мен чарм чамадонда жой борлигини, қўлёзмани кўтариб юриш оғирлигини айтиб, уни чамадонга солайлик, деб маслаҳат бердим.

— Борди-ю, чамадонни багажга топширсак, у йўқолиб қолса... нима бўлади? — қошларини чимирди Шуҳрат ака. — Ҳеч қачон бундай қилма! Ҳар қанча оғир бўлса ҳам қўлёзмани ўзим билан олиб кетаман!

Шуҳрат ака айтганидай қилди — қўлёзмани портфелига жойлаб қўлига олиб одди. Тошкентта боргач, қўлёзмани кимга машинкага беришини ҳам режалашиб кўйган эди.

— Қўлёзмангни, айниқса, романдай катта қўлёзмангни машинкага берганда эҳтиёт бўл! — маслаҳат берди менга Шуҳрат ака. — Уни зинҳор идорада ишлайдиган машинисткага бера кўрма! Саҳифалар ўша ердаги иш қоғозларига аралашиб кетиб, йўқолиши мумкин. Қўлёзмангни ҳамиша уйда ўтирадиган машинисткаларга топшир!


Шуҳрат ака ўз шогирдларининг ютуқларидан қувонадиган, уларни ошиб-тошиб мақтаб, тарғиб этиб юрадиган мураббий ижодкор сифатида маълум. 1966 йилда мен Бобораҳим Машраб ҳақида бир достон ёзишга журъат этдим. Табиийки, бу пайт мен москвалик талаба, Машраб ҳақида турли-туман қарама-қарши фикрлар мавжудлигини, бу мавзу қандайdir норасмий табу

остида эканлигини билмас эдим. Ёшлика хос бўлган жасорат билан орқа-олдини ўйламай ёзилган асар эди бу. Шуҳрат ака «Машраб» достонини ўқигач, қувониб мени табриклади, аммо унинг ҳали иши кўп эканлигини, муҳокамадан ўтказиш лозимлигини ҳам айтиб қўйди. Муҳокамани ўтказища ва достонни ишлагандан сўнг журналда эълон бўлишида — шу пайт «Шарқ юлдузи» журнали муҳаррири Ҳамид Гулом эди — Шуҳрат аканинг хизмати катта бўлди.

Шуҳрат акани ёзувчи ва шоир, драматург сифатида халқимиз қанчалар суюб ардоқлашининг кўп бор гувоҳи бўлғанман. 1978 йили унинг 60 ёшга тўлиши арафасида Иброҳим Раҳим, Шуҳрат ака, Абдулла Орипов ва мен улфати чор бўлиб Фаргона водийсига машинада сафар қилдик. Сафаримиз Қўқондан бошланиб, Фаргона, Қуба, Асака, Андижон, Наманганд, Поп орқали доvon ошиб Тошкентга келиб якунланди. Қишлоқ, шаҳарларда, институт ва мактабларда бўлиб ўтган ижодий учрашувлар чинакам адабиёт байрамига айланиб кетди. Водийлик адабиёт муҳлислари «тўйбола» адаб Шуҳратни қувонч билан кутиб олишар, ўзи ва ижоди ҳақида саволларга кўмиб ташлашар эди...

Ён, чирогим! Тонгта қадар ён!
Ёругингдан ёрисин жаҳон! —

деб ёзган эди Шуҳрат ака. Адабнинг чироги эзгуликлардан, адолат нуридан қувватланган. Шунинг учун бу чироқ ўчмайди, балки пориллаб ёнища давом этади.



ВАТАНПАРВАР АДИБ

1962 йил, кунлардан бирида кабинетимга қўнгироқ бўлиб қолди. Телефонда ўша вақтдаги Марказий Қўмита котибаси Зуҳра Раҳимбобоева ҳаяжонда, тўлқинланиб гапирияпти. Гапнинг қисқаси, зудлик билан ҳузуримга киринг, деган топшириқни олдим. Котибамиз овозининг оҳангидан сезилдики, қандайдир кўнгилсиз ҳодиса юз берган. Чунки бу истеъодди, билимдон раҳбар билан анча вақт ишлаб, унинг феълатворини, иш услубини бироз бўлса ҳам билиб олган эдик. Ҳа, ўйлаганимиздай бўлиб чиқди. У жаҳл билан «Кеча радиода соат 12 яримдан 1 тача Шуҳратнинг реакцион, миллатчилик руҳидаги шеърларини берибди, эшидингизми?» деб сўраб қолди. «Зоя Раҳимовна (биз у кишини шундай исм билан атардик — Ҳ. А.), кечаки ишда бўлсан, ишим бошимдан ошиб ётган бўлса, радиони қаёқдан эшитаман?» деб жавоб қилдим. Котибамиз жиддий, буйруқона оҳангда: «Убайдулла Ёқубовичга (Радио қўмитанинг раиси эди — Ҳ. А.) телефон қилинг-да, Шуҳратнинг радиода берган шеърларини тездан олиб келиб берсин. Сиз кабинетингизни қулфлаб олиб, синчилаб ўқиб, фикрингизни менга айтасиз».

Бу гап қалбимни ларзага солди, бошимга болта билан урилгандай бўлди, даҳшат гирдобига шўнгиб кетдим. Не-не қўнгилсиз хаёлларга берилдим. Наҳотки, бир истеъодди санъаткорни яна ҳисбсга олиб, қамоққа тиқамиз, адабиётимизнинг жўшқин намояндаси ижодидан ажраб қоламиз, илгари туҳмат асносида озодикдан маҳрум этганимиз, қанчадан-қанча азоб берилгани етмас эдими?

Бу ачинишимиизнинг боиси ҳам бор. Биз Шуҳратнинг достонлари, шеърлари, «Шинелли йиллар» каби романларини ўқиб, унга меҳримиз тушиб қолган эди. Ҳа, севикли адабимиздан бизни ажратиб олиб, қалбимиздаги муҳаббатимизни сугириб ташлашга уриниш бизга мashaққат, азоб-уқубат бўлиб тушганлигини, изтироб чекканлигимизни ўзимиздан бошқа одамнинг англаши, тушуниши қийин.

Мен (у вақтда партия Марказий Қўмитасида фан ва маданият бўлими мудирининг ўринбосари эдим) худди раҳбаримиз атгандай қилдим. Гап шундаки, ҳақиқатан ҳам Шуҳратнинг «Дунай соҳиллари» туркум шеърларини радиода эшиттиришган экан.

Шуҳратнинг шу туркумдаги ҳар бир шеърини, унинг ҳар бир мисрасини лупадан ўтказгандай, қайта-қайта ўқиб чиқдим. «Дунай соҳиллари»ни ҳар томонлама мутолаа қилганимдан кейин, қалбимни севинч ҳис-туйгулари забт этди, бошим кўкка етгандай бўлди, елкамни босиб турган тог ағдарилиб кетганини ҳис этдим. Бу туркум чуқур ватанпарварлик руҳи билан сугорилганлиги, унинг мазмуни ҳалқнинг мардлиги ва олижаноблигига тараннумдан иборат эканлиги билан ажралиб турарди.

Шоир теплоходда Дунай мамлакатларига сафар қилганлиги, Ватанининг бир бўлаги бўлган Теплоходда Ватанин согиниб қолганлигини бадиий маҳорат билан ифода этган. «Дунё соҳиллари» туркуми фақат Шуҳрат ижодигина эмас, балки миллий шеъриятимизнинг ютуғи эканлигига ишонч ҳосил қилдим.

Ўзимда йўқ хурсанд бўлиб, котибанинг кабинетига отилдим. Бор гапни тўкиб солдим. Туркумда ҳеч қандай реакцион гаплар, миллатчилик руҳидаги шеърлар йўқлигини далиллар билан исботлаб, мисоллар ўқиб бердим. Аммо туркумда фақат икки мисра мавҳумроқ бўлиб, уларни турлича талқин қилиш мумкинлигини ҳам айтаб қўйдим. Зоя Раҳимовна бир соатча гапларимни диққат билан эшилди, ўртага луқма ташламади. Менга зид фикрлар ҳам айтмади. Фақат айрим мулоҳазаларимни қайтадан сўраб, янада аниқлаштириб олди. Кейин котибамиз ҳанг-манг бўлиб, нима қилишини билмай, ўйга чўмди. «Майли, кўрамиз» деб якун қилди. Оқибатда Шуҳрат ҳақ бўлиб чиқди, бизнинг берган баҳомиз ҳам инобатга олинди, шекилли. Марказий Қўмитада ҳам, Республика Ёзувчилар уюшмасида ҳам бу масалага қайтилмади.

Аммо ҳалигача бир нарса муаммо. Биз ўша вақтда ҳам, кейин ҳам игвогарлар ким эканлигини аниқлай олмадик. Ҳа, қани энди бундай тухматчилар ошкора қилинса, ҳалқнинг ҳукмига ҳавола этилса, ҳаммага ҳам катта сабоқ бўларди, игвонинг қадами кесиларди ёки олди олинарди. Соғлом адилларимиз сақланиб қоларди, уларнинг асабларини эговламасдан, ижоддан ажратиб қўймасдан, илҳомига илҳом қўшардик.

Лекин ачинарли томони яна шундаки, игволар, турли-туман бўйтонлар тўхтамас, фурсати келиши билан ишга солинар эди. Марказий Қўмитада хизматимиз даврида кўп bemaza, кўнгилсиз, қингир гаплар келиб турганлигининг шоҳиди бўлганмиз. Гўё «Шуҳрат Абдулла Қаҳҳор билан бирлашиб, ярамас ишлар қиляпган эмиш? У Марказий Қўмитани ёқтирумас, шунинг учун маломат тошларини отиб турармиш, дўстларининг ижодий ютуқларини кўра олмасмиш...» ҳоказо, ҳоказо.

Бундай игвонинг каттаси бирдан ўз кучини кўрсатиб қолди.

1968 йиллар бўлса керак, Ўзбекистон Республикаси Ёзувчилар уюшмасининг раиси Комил Яшин каминани ҳузурига чақириб, 30 бетдан ошиқ машинка қилинган аризани қўлимга тутқазди. У аризани чукур ўрганиб, объектив, адолатли муносабат билдиришни талаб қилди. Аризани қобилиятли таржимон, бир қанча ўзбек муаллифларининг бадиий асарларини рус тилига ўтирган, Ёзувчилар уюшмасининг аъзоси ёзган экан. Бу материал билан танишиб ҳайрон бўлиб қолдим. Гап Шуҳратнинг «Жаннат қидирғанлар» романни устида эди. Бу асар балчиқقا шу даражада булғаб ташланган эдик, ундан ортиқ қора бўёқ топиш амри маҳол эди. Шуҳрат романида «аксилинқилобий» гояларни оддинга сурғанлиги, «миллатчилар»ни турли йўллар билан ҳимоя қилиб, тарғиб эттанлиги, бу асар душман тегирмонига сув қуйиб бериши қаҳр билан айтилган. Оббо, Шуҳрат бир балога йўлиқиб қолдими, деб ташвишга тушдим-да, романни синчиклаб ўқиб чиқиб, кўнглим ёришиб кетди.

Бир гурӯҳ ватангдоларнинг ачинарли тақдирини бадиий таҳлил қилиб берган бу асар менда катта таас-сурот қолдирди. Ижобий мулоҳазаларимни К. Яшинга изҳор этдим, унинг ҳам кўнгли равшан тортди. Раҳбаримиз «...комиссия тузамиз. «Жаннат қидирғанлар»ни уюшма раёсатида мухокама қиласиз» деб қолди. Орадан бир ойларча ўтгандан кейин уюшмада роман кенг таҳлилдан ўтказилиб, унга ижобий баҳо берилиб, аризачининг хатидаги даъволари, қўйган айблари тасдиқланмаганлиги қайд этилди. Ҳа, энди масала ҳал бўлди, деб хотиржам бўлиб юрдик. Йўқ, тухматчи қиличини қинга солмаган экан, уни қайраб яна ишта солди. Энди аризани ўша вақтдаги мамлакатнинг энг юқори ташкилоти — КПСС Марказий Қўмитасига жў-

натади. У ердан муҳокама қилиш учун материални республика партия Қўмитасига юборишган экан. Ўша вақтда маданият бўлнимининг мудири бўлиб ишлаган С. Шермуҳамедов бу ишга бош-қош бўлиб тайёргарлик кўриб, бир неча кишиларни жалб қилиб муҳокамани юқори савияда ўтказди. Йигинда олимлар, шу билан бирга Давлат хавфсизлик Қўмитаси раисининг биринчи ўринbosари Азимов ҳам қатнашиб, романни ҳимоя қилишди, унинг ижобий томонларини бирма-бир санаб ўтишди. С. Шермуҳамедов қатъий қилиб, фикрини билдириди: «Биз «Жаннат қидиргандар»ни маъқуллаймиз, унда катта масала бадиий шаклда ифода этиб берилган». Кейин у сўзига қўшимча қилиб: «Бундан кейин романни бошқа муҳокама қилмаймиз» деб масала узил-кесил ҳал бўлди, деган холосани чиқарди.

Шуҳрат билан бояги кимса ўртасидан ола мушук ўтиб қолган эдими, аризачи адабни тинч қўймасдан, фурсати бўлса ҳам, бўлмаса ҳам оёғидан чалишга ури-наверди. Тил ва адабиёт институтининг илмий кенгашида Каримова деган ёш олима Шуҳрат прозаси ҳақида номзодлик диссертациясини ҳимоя қилишида у сўзга чиқиб, яна ўша эски ашуласини айта бошлади. Шуҳратни доим муҳофаза қилганимиздай, бу сафар ҳам хато баҳоларга зарба беришга тўгри келди. Каримова диссертациясини муваффақиятли ёқлашга сазовор бўлди. Шуҳратнинг бу гаплардан хабари бор экан, Ёзувчилар уюшмасида учрашиб қолганимизда ўзининг миннатдорчилигини билдирганини эсдан чиқариб бўлмайди.

Шуҳрат истеъодди шоир, қобилиятли романчи, тажрибали таржимон, ўзига хос драматург эди. У адабиётнинг қайси тур ва жанрида қалам тебратса, уни қойил қилиб бажарган.

Санъаткор ижодининг кейинги йилларида қалами ни энг қийин жанрда синаб кўрди. Унинг биринчи саҳна асари «Беш кунлик куёв» А. Ҳидоятов номли театр саҳнасида қўйилганда қойил қолиб, ижобий фикрларимизни изҳор этганлигимизни эслаб ўтишни жоиз деб биламиз. Наманган вилояти театрида «Она қизим» репертуарни безаганлигини қайд этганлигимиз ҳам ҳақиқатдан холи эмас. Бу асарлар муаллифнинг драма ва театр сирларини яхшилаб эгаллаб олганлигини яққол исбот қила оди. Шуҳрат ижодига хос бўлган — тилидаги ширалик ва образлилик, характерларни пухта, ишонарли қилиб яратиш, сюжет, композиция

ва конфликтларни усталик билан тузиш хусусиятлари унинг драматургиясида ҳам яққол намоён бўлган; Шу сабабдан ҳам санъаткорнинг достон ва шеърлари, роман ва драмалари халқимизнинг севимли асарлари бўлиб қолди, бир қанча чет тилларга ўтирилиб, уларнинг ҳам маънавий мулкига айланди.



ДУНЁНИНГ ШОДЛИГИ ШОИР МУЛКИДИР

1936 йил ёзида бир гуруҳ шоирлар Пушкин асарларини ўзбек тилига ўтириш учун она диёримизнинг сўлим масканларидан бири Чимёнга чиққан эдилар. Уларнинг олди қирқقا яқинлашган, кенжаси эса ҳали йигирма бешинчи баҳорни ҳам кўрмаган қирчиллама йигитлар эди. Шайхзода ана шу навқирон авлоднинг Чимён этакларидаги ҳаётини тасвирилаб, бундай ёзган:

Шоир дўстлар тог бошига
Чиқамиз, деди,
Шоир дўстлар ҳаммаси ёш,
Ҳаммаси гўзал.
Шоир дўстлар шеърга кўп
Саждакор эди,
Дилларида ёзилмаган
Жилвали газал...

Камина 50-йилларнинг бошларида Ёзувчилар уюшмасида ўтказилган адабий кечалар, баҳс ва анжуманларга бора бошлаган кезларимда бу аводнинг айрим вакиллари мустабид тузум томонидан аллақачон маҳв этилган, Шайхзоданинг ўзи ҳам мудҳиш ертўлада ётган, қолганларининг бошида сталинча социализмнинг қиличи лапанглаб турган эди. Нафақат Шайхзода тилга олган авлод, балки шу авлод билан изма-из келаётган ёзувчилар ҳам шу даҳшатли қисматдан бенасиб қолмаган эдилар. Ушбу хотира «қаҳрамони» Шуҳрат ҳам ўша кезларда темир панжаралар ортида эди.

Шоир дўстлар ҳаммаси ёш,
Ҳаммаси гўзал...

Мен бу сатрларни такрорлар эканман, кўз олдимдан 50-йиллардаги навқирон авлод — Асқад Мухтор, Сайд Аҳмад, Ҳамид Гулом, Мирмуҳсин, Шукрулло, Тураб Тўла, Шуҳрат, Рамз Бобожонлар бирма-бир ўтади. Уларнинг айни ёш, айни гўзал пайтлари. Аммо юлдзулар шодасида ҳам бирортаси кўпроқ шуълакор бўлга-

нидек, бу навқирон ёзувчилар орасидаги шуълакори, менимча, Шуҳрат эди.

Парвардигор Шуҳратга Юсуф ҳуснини берганлиги ни айтмаса ҳам бўлади. У қирчиллама ёшда бўлишига қарамай, соchlari ёзниг бегубор булутларидек оппоқ бўлган. Ана шу кумуш соchlар унга ўзгача ҳусни камоллик багишлаган. Ўша пайтда Ёзувчилар уюшмаси атрофида парвона бўлган қизлар ҳам, Шуҳратнинг оёти теккан ўқув юртларида талабаларнинг гўзал бўлаги ҳам унга ошиқу беқарор бўлишган. Унинг шуълакорлиги биринчи навбатда ташки қиёфаси билан боғлиқ эди. Лекин у китобхонлар ўртасида катта ҳурмат ва эътиборга муяссар бўлганига қарамай, гоят камтар, кибр-ҳаводан олис инсон эди. Шуҳрат ана шу фазилатлари билан ижодкорлар даврасида ҳам бирдек азиз эди.

Шоир дўстлар шеърга кўп
Саждакор эди,
Дилларида ёзилмаган
Жилвали газал...

Бугун аксар шоирлар билан суҳбатда бўлар экан-сиз, уларнинг шеърий ҳолатдан, шоирона кайфиятдан узоқлиги сезилиб туради. 50-йилларда яшаган шоирлар эса, Шайхзода айтганидек, шеърга кўп саждакор кишилар бўлиб, улар дили ёзилмаган шеърлар билан тўла бўларди. Шуҳрат ҳам шу маънода истисно бўлмаган. Бугун унинг шеърий китобларини варақлар экан-сиз, шеърият оламидан четда кечган ойлар ва йилларни асло кўрмайсиз.

Мен ана шу сўзларни ёзар эканман, 70-йиллар охирида кечган бир воқеа хотирамга келади.

Ўшанда, ёз ойларининг бирида, мен бир домламиз билан Чортоқ санаторийсига борган эдим. Иттифоқо шу пайтда Шуҳрат ҳам Чортоқнинг шифоли суви билан даволаниш мақсадида ўша ерга қадамранжида қилган экан. Биз даволанувчилар учун ажратилган биноларнинг бирида туардик. Шоир эса санаторий бош врачига қарашли шинамгина хонада жойлашган эди.

(Ҳурматли ўқувчи, шу ерда лирик чекиниш қилишга тўғри келади. Шуҳрат 50-йилларда менга қанчалик яқин шоир бўлишига қарамай, ҳар қалай у шоир, мен эса китобхон эдик. Лекин орадан йиллар ўтиб, у билан тобора яқинлашганимдан сўнг у менга маълум маънода aka бўлиб қолди ва мен уни Шуҳрат aka деб атайди-

ган бўлдим. Агар эътиroz қилмасангиз, хотирамни шундай аталма билан давом эттирсам.)

Шуҳрат ака бизларни санаторийда учратиши билан ўз хонасига таклиф этди. Бу хонанинг шундоққина ёнида кичик бир ошхонаси ҳам бор экан, ўша ерда ҳар куни уч маҳал унинг учун махсус овқат тайёрланар экан. Бир оз суҳбатлашганимиздан кейин ошхона соҳибаси хуш бўй таратиб турган дўлма олиб кирди. Шуҳрат ака бизни таомга таклиф этди. Шу пайт «хаста» шоирдан хабар олиш учун бош врачнинг ўзи ҳам ким биландир келиб қолди. Давра кенгайди. Шуҳрат ака бизни бош врачга шундай илиқ сўзлар ҳам таништирдики, биз бегонасираш ўрнига бир зумда шу давранинг тўлақонли аъзоларига айландик-қолдик. Орадан кўп ўтмай, ёш Ҳабиб Саъдулла наманганлик бир режиссер билан пакет кўтариб келиб қолди. Ошпаз аёл бир дунё овқат тайёрлаганми, дўлма уларга ҳам етди. Сал ўтмай, Шуҳрат аканинг Чортокда даволанаётганини эшигтан бир шеърхон дўсти ҳам пакет кўтариб келди. Дастурхон мева-чевалар билан тўлди. Ширин суҳбат давом этди. Меҳмонлар Шуҳрат акага шундай катта эҳтиром билан муносабатда бўлдиларки, худди ўзбек адабиётида фақат битта шоир бору бошқаси ҳали тугилмагандек ажиб бил тасаввур қанот қоқиб турарди.

Биринчи бўлиб Ҳабиб Саъдулла ўрнидан қўзғолди. Шуҳрат акани Намангандга, албатта, кутишини айтди. Наманганд театри шу кунларда унинг пьесаси асосида «Юсуф ва Зулайҳо» спектаклини тайёрлаганлигини айтиб, спектаклга ҳаммамизни таклиф қилди. Кейин қўшни тумандан келган муаллим қўзғалди. Ниҳоят, қош қорая бошлагандга, биз ҳам турдик. Шуҳрат ака, муни қаранг, қўлимга бояги пакетлардан бирини қистирди. «Домланинг ҳурмати», — деди у менинг хижолат бўлганимни кўриб. Кейин маълум бўлишича, бундай ташрифлар оддий бир ҳодисага айланган экан. Шеърият ва шоирлар ўша йилларда кўпроқ иззатда бўлгани учун Шуҳрат аканинг Чортокқа келгани бутун Наманганд бўйлаб тарқалган ва вилоятдаги шеърхонлар, Шуҳрат акани навбатма-навбат зиёрат этиб туришган экан.

Хуллас, биз Чортокда қанча кун ҳордиқ олган бўлсак, шунча Шуҳрат ака билан ҳамсухбат бўлиб, унинг бағри кенг табиатини кашф этишда, шеърият мухлислиари ўртасидаги ҳурмат-эътиборига гувоҳ бўлишда да-

вом этдик. У меҳмон кутишдан, меҳмонлар эса уни зиёрат этишдан чарчашибасди.

Мана бу сатрлар ўша кезларда ёзилганми, билмадим:

Мен сизга керакми, дирёлар, айтинг,
Бўлмаса яшашнинг ҳеч қизиги йўқ.
Мен сизга керакми, дунёлар, айтинг,
Бўлмаса яшашнинг ҳеч қизиги йўқ.

Мен сизга керакми, сайхон далалар,
Мен сизга керакми, гулу лолалар.
Мен сизга керакми, амма-холалар,
Бўлмаса яшашнинг ҳеч қизиги йўқ...

Гар керак бўлмасам элга-элатта,
Гар мадор бўлмасам юртга, миллатга,
Гар таянч бўлмасам она давлатга,
Яшашнинг қизиги йўқдир мутлақо!

Йўлимдан бир кимса олмаса ибрат,
Боримдан ошмаса юртимда қудрат,
Ишимдан ёғмаса халқимга раҳмат,
Яшашнинг қизиги йўқдир мутлақо!

Бир қарасангиз, ўзбек шеъриятида бу шеърга қарандан теранроқ, ўйлашга мажбур этадиган, магзини чақиши лозим бўлган, ҳайратомиз ташбеҳлару шеърий шакллари билан оғзингизни очириб қўядиган асарлар бордек. Шундай асарларни ўқиганингизда, чиндан ҳам, яйраб кетасиз. Лекин мен айрим шоирларимиз шеърият кечаларида, китобхонлар билан учрашувларда шундай шеърларни ўқиганларида, залнинг сесканганини, ҳайратга тушганини камдан-кам кўрганман. Оддий китобхон, аниқроги, халқ бундай фалсафий теран, мураккаб мазмунли шеърларни эмас, Шуҳрат аканинг юқорида бир лавҳаси келтирилган «Яшашнинг маъноси» сингари шеърларни яхши қабул қилиб, улардан ларзага тушади. Шу маънода Шуҳрат aka халққа кўпроқ яқин шоирлар сирасидан эди.

(Мен яна четта чиқиб кетдим, чоги. Юқорида берилган ваъдага кўра, бошқа гапни айтмоқчи эдим. Шунинг учун ҳам Шуҳрат aka шеърлари ҳақидаги мушоҳадани баён қилишни бошқа сафарга қолдираман, ҳурматли ўқувчи!)

Шундай қилиб, Шуҳрат ака Чортокда неча кун яшаган, тўгрироги, даволанганд бўлса, шунча кун унинг хонаси меҳмонлардан аримади. Лекин мени ҳайратга солган нарса шуки, туннинг қайси пайтида у яшаган бино яқинидан ўтмай, унинг иш столидаги чироқ ёниб турган бўларди. Демак, у ишларди. Баъзан бу чироқ тонгта қадар ўчмай, шеъриятга саждакор шоирлардан бирининг ҳамон ишлаб ўтирганидан дарак берар эди.

Ён, чирогим, тонгта қадар ён,
Ёрутингдан ёрисин жаҳон!
Ён, чирогим, қалбим кутар, ён,
Ён, чирогим, ором олсин жон!

Сен ёниб тур, мен қилай ижод,
Қарзим кўпдир элдан, юртимдан!
Умрим ўтгач, қараб ортимдан
Демасинлар: — Кўрди бўш ҳаёт!

Ён, чирогим, тонгта қадар ён!

Мен Шуҳрат аканинг ўша кезлари қандай шеърлар ёзганини эслай олмайман. У ҳам Кисловодск ёхуд Ереванда ёзган шеърлари остига улар тугилган манзилни кўрсатгани ҳолда Чорток бешиги бўлган шеърларни паспортсиз қолдирган. Эҳтимол, бу шеърларнинг ҳаммасини ҳам баланд шеърлар сирасига киритиш маҳолдир. Одатда мерганлар учиб бораётган гозни бир ўқ билан ерлатиш учун қанчадан-қанча ўқларни осмондаги хаёлий гозга отадилар. Агар Шуҳрат аканинг ўша кезлари ёзган ўнлаб шеърлари орасида икки-учтасигина узоқ яшаш кафолати билан тугилган бўлса, шунинг ўзи шоир сарф қилган меҳнатни, албатта, оқлади.

Мен Шуҳрат ака ҳақида ўйлаганимда, ҳар сафар ўша чироқ кўз олдимга келади ва қулогимда Шайхзоданинг «Шоир дўстлар шеърга кўп Саждакор эди..», деган сатрлари жаранглаб кетади.

Оддий китобхон назарида Шуҳрат ака бу дунёдаги энг баҳти шоирлардан бири бўлган. Ижоди булоқдек тошиб, китоблари кетма-кет чиқиб турган, шеърият майдонидагина эмас, наср ва драматургияда ҳам жавлон урган, тагида «Волга»си, ортида қўша-қўша азamat ўғиллари бўлган шоирдан ҳам баҳтлиси бўладими,

ахир! Яна, бунинг устига, китобхонлар томонидан ардоқланганини айтмайсизми!..

Аммо Шуҳрат ака шундай замонда яшаганки, бу замонда қалам тебратган ва фикрлаш иқтидорига эга бўлган ҳар бир кишининг орқасида ўнлаб кўзлар ва қулоқлар бўлган. Сал ўзгача қадам қўйдингизми, ўша кўзлар дарров тегишли жойга хабар берган, сал ўзгача сўз айтдингизми, ўша қулоқлар дарҳол етказганлар.

Шуҳрат ака Тошкент Педагогика институтида таҳсил кўрган кезларда 37-йил гулхани гуруллаб ёнган. Институтнинг қатор сара домлалари териб олинган. Институтда ўқимаган, лекин талабаларнинг илтимоси билан учрашувга келган Усмон Носир туфайли яна қанчадан-қанча ёшлар сўроқ қилинган. Бу сўроқлардан Шуҳрат ака ҳам четда қолмаган. Лекин у шўро ҳукумати шаънига номаъқул сўзни айтмаганига қарамай, уни Ёзувчилар уюшмасининг аъзоси сифатида жазолаганлар. Эмиш — отасининг савдогарлигини яширган эмиш, эмиш — хотини жиякли лозиму атлас кўйлак кийиб, шўролар даврига эмас, ўтмишга бўлган ҳурматини кўз-кўз қилиб юрган эмиш, эмиш — боласини караватга эмас, бешикка белар эмиш, яқинда уни хатна қилас эмиш... Бу миш-мишларнинг бир қисми айни ҳақиқат бўлган, албатта. Аммо уларнинг ҳақиқат бўлгани Шуҳрат аканинг гуноҳини ўн чандон оширган. Хуллас, у «халқ душмани» деб эълон қилинмаса-да, уюшмадан ўчирилган. Бу деган сўз «Эсингни йигиб ол, Шуҳрат! Мен билан ўйнашма! Мен Шўролар ҳукумати бўламан! Хоҳласам, сени кўкларга кўтараман, хоҳласам, етти қават ернинг тагига киритиб юбораман!» дегани эди.

Иккинчи жаҳон урушининг бошланиши қамоқ навбатида турган кўпгина ижодкорларнинг «жонига оро» кирди. Мен иккинчи жаҳон уруши деб 1941—1945 йиллардаги олмон-шўро урушини эмас, 1939 йили бошланган жаҳон урушини назарда тутяпман. Яқинлашиб қолган уруш қатагон қиличининг қинга солинишига сабабчи бўлди. Шўро давлати ўз ҳудудларининг мудофааси ҳақида ўйлашга мажбур бўлди. 1940 йил кузида Шуҳрат ака ҳам армия сафига чақирилди. Кўп ўтмай, олмон-шўро уруши бошланиб, шоир ярадор ва контузия бўлиб қайтгунига қадар иккинчи жаҳон урушининг жанггоҳларида бўлди. У фронтдан қайттач, узоқ вақт мобайнида даволанишга, дори-дармондан кўра тинчлик ва осойишталик деган «укол»ларни олишга

тўгри келди. Шунда у мутолаага берилди. Мопассану Лондондан тортиб, Тургеневу Толстойга қадар бўлган жаҳон классикларини, уларга қўшиб, Ойбек, Гафур Гулом, Абдулла Қаҳҳорнинг насрый асарларини эзид ўқиди. Ва кўнглида ўзи гувоҳи бўлган уруш даври ҳаётидан роман ёзиш иштиёқи туғилди.

«Тўсатдан туғилган бу фикр, — деб ёзган эди у таржимаи ҳолида, — мени шунчалик қамраб олдики, кечалари ухломай қолдим. Аввалига бир қисса ёзишга жазм этиб, қўлимга қалам олдим. Бир неча бетларни қораладим. Бироқ қарасам, қисса билан юрагимни бўшата олмайман. Нимадир каттароқ нарса чиқадиганга ўхшайди. Шундан кейин жиддийроқ бош қотириб, образларим устида кенгроқ ўйлаб, ўзбек солдат-офицерларининг уруш майдонларидағи жонбозлигини кўрсатиш ниятида воқеани уруш арафасидан бошладим. Асосий материал бўлиб ўз биографиям хизмат қилди ... Табиий, бир кишининг биографияси билан бадиий асар ёзib бўлмайди. Адиг шунинг учун ижодкорки, у ўзи танлаган биографиясига ўз фикр-ўйи, орзу-умиди, идеяларини, дард-армонларини, ўқинч ва афсусларини бадиий воситалар орқали қўшади, мослаштиради, тўқийди, бойитади...»

Шундай қилиб, Шуҳрат аканинг наср соҳасидаги биринчи йирик асари «Шинелли йиллар» романни майдонга келди. Аммо у эндиғина романни тутатиб, уни нашрга тайёрлаётган кезларда яна қатагон қузгуналари пайдо бўлиб, уни қонли тумшуқлари билан юлиб олиб кетди. Бу мудҳиш воқеа 1951 йил февралида юз берди. Орадан бир йил ўтгач, суд Шуҳрат акани йигирма йилга ҳукм қилиб, жазо муддатини ўташ учун совуқ ўлкаларга юборди. Фақат Сталиннинг ўлимигина уни Усмон Носир қисматини такрорлашдан асраб қолди.

Шоир ўлим лагеридан қайтганидан кейин романни қайтадан ёзишга мажбур бўлди. Зеро, машаққатли меҳнат эвазига дунёга келган роман қўллэзмаси тинтув пайтида олиб кетилган ва йўқотилган эди.

1955 йили Сибири Шимолий Қозогистоннинг тиқанли сим билан ўралган совуқ манзилларидан қайтиши билан Шуҳрат aka яна ижодга шўнгиди. Шеърлар, ҳикоялар, достонлар, романлар ва пьесалар ёзди. Асарлари ўзбек ва рус тилларида кетма-кет нашр этилди. «Шинелли йиллар»дан кейин «Олтин зангламас», «Жаннат қидирғанлар» романлари яратилди. Галамис кимсалар ёвуз даҳолари билан бирга ёвуз даврлар ҳам

ўтганидан бехабар, бу романларни гаразли ниятда ўқиб, ёзувчини миллатчиликда айловчи сатрларни топдилар. Мирза Солиев деган уюшма атрофида ўралашиб юрган кимсанинг Шуҳрат акани яна қаматиш ниятида чақувнома ёзмаган жойи қолмади. Унинг бошини силаган, «Баракалла, сендеқ мард одам айтмаса бу гапларни ким айтади!» деган муртадлар ҳам топилди. Хуллас, Замон ўзгарган бўлса ҳам Шуҳрат акани ҳоли-жонига қўймадилар.

Шуҳрат ака ана шундай баҳтли замоннинг баҳтли шоирларидан эди.

Шундай «баҳтли замон»да яшаган шоирнинг ўзи ва ҳаёт ҳақидаги катта ҳақиқат билан йўғрилган асарларни ёзиши маҳол эди. Аввалом бор, бундай асарларни чоп этишнинг иложи бўлмаган, мабодо фалакнинг гардиши билан чоп этилиб қолгудек бўлса, танқидчилардан ҳам, Мирза Солиев сингари кимсалардан ҳам баҳлога қолиши ҳеч тап эмас эди. Шунинг учун ҳам шўро даврида шоирларимиз ширин хаёллар оламида яшашга кўпроқ интилганлар. Шунинг учун ҳам Шуҳрат ака «енгил мавзулар»га кўпроқ қўл урган, шеърларига орзу ва умид нурларини пуркаб, севги ва вафо, дўстлик ва аҳиллик, эзгулик ва меҳрибонлик каби абадий қадриятлар ҳақида кўпроқ ёзишга уринган. Бугун унинг ана шу йўналишдаги ижодига губор қўниши ўрнига, аксинча, бу ижод биз учун тансиқ бўлиб туриби.

Шоир ўзининг бир шеърида бундай ёзган эди:

Эҳтимол мен зийрак бўлмадим,
Оғир пайтда керак бўлмадим?
Сўйламадим лозим сўзимни,
Балки қалтис тутдим ўзимни?

Шубҳасиз, тариҳда қандай шоирлар ўтган бўлмасинлар, уларнинг ҳаммасини ҳам баҳт ва саодат денгизида чўмилган, деб бўлмайди. Уларнинг аксари ўзи яшаган давр билан зиддиятда бўлган. Давр улар бошида тегирмон тошини ўйнатган. Аммо шунга қарамай, улар кишиларда яшашга иштиёқ уйготувчи асарларни битишган. Шуҳрат ака ҳам ўзи сезмаган ва олдиндан режалаштиргаган ҳолда ана шу йўлдан борган. Зотан, ижод табиати шуни тақозо этарди.

Дўрмондаги Ижод боги ёз ойларида ёзувчилар билан гавжум бўлади. Мен ҳам меҳнат таътилини кўпинча ёз ойларида Дўрмонда ўтказганман.

Одатда Дўрмонга ижод аҳли муайян режа билан чиқади. Мен ҳам ҳар сафар Дўрмонга чиққанимда, қандайдир юмуш билан банд бўлиб, кейинги режалар бўйича тайёргарлик кўрганман.

1984 йил ёзида Дўрмонда бўлар эканман, Шуҳрат ака сингари Усмон Носирни кўрган ва уни яхши билган ёзувчиларнинг хотираларини эштишига иштиёқ сезган эдим. Бугун Усмон Носир бўйича тўпланган санадларни назардан ўтказар эканман, Шуҳрат ака билан ўша йилнинг 21 июлида бўлиб ўтган суҳбат хотирамга келади. Шуҳрат ака уч қаватли, ўша пайт учун ҳашаматли бўлган бино олдидағи скамейкада ўтириб, оташнафас шоир ҳақидаги хотираларини сўзлаб берган эди. Мен, одатта кўра, суҳбатдан кейин Шуҳрат аканинг хотирамга михланиб қолган сўзларини, конспект тарзида бўлса-да, ёзиг қўйган эдим. Кейинчалик Усмон Носирга багишланган китобларимда бу хотиралардан самарали фойдаланганиман. Аммо шу билан бирга китобларга кирмай қолган лавҳалар ҳам бўлиши мумкин. Шунинг учун ҳам ушбу хотирада ўша конспектни тўла келтиришни ўринли, деб топдим.

ШУҲРАТ АКАНИНГ БИРИНЧИ ҲИҚОЯСИ

Усмон Носир Самарқандда ўқиб юрганида, Улуг Турсун билан уришиб қолган. Аллақандай иммий масалада. Ва дарсдан чиқа солиб, вокзалга борган-да, поездга чиқиб, тўғри Тошкентта келган.

У дастлаб Тарас Шевченко кўчасидаги, кимё факультетининг рўбарўсида жойлашган меҳмонхонада турган. Меҳмонхона мудири унинг таниши бўлганлиги учун у ҳар сафар Тошкентта келганида, шу меҳмонхонага тушар экан. Бу сафар ҳам у тўғри шу меҳмонхонага тушиб, шу ерда яшай бошлаган.

Орадан бир мунча вақт ўтгач, у «Ёш ленинчи» газетасига адабий ходим бўлиб ишга кирган. Ҳасан Пўлат шу вақтда адабий бўлим мудири экан. У Усмон Носирнинг Тошкентта бутунлай келганидан хабар топиб, уни газетага ишга таклиф этган. Шу вақтда «Қизил Ўзбекистон» газетасида Тўхтасин Жалолов билан Юнус Латиф ҳам ишлашган.

(Узр, ҳурматли ўқувчи, Шуҳрат ақанинг хотиралари узук-юлуқ воқеалар тизмасидан иборат бўлганлиги учун шу ерда нуқта қўйиб, баъзи бир сўзларни изоҳ

тарзида айтаман. Биринчидан, юқорида тилга олинган Улуг Турсун дастлаб Самарқандаги Педақадемияда, сўнг шу илмгоҳ негизида ташкил этилган Ўзбекистон Давлат университетида хизмат қилган тилшунос домла эди. У қадар ишончли бўлмаган маълумотларга қаранганд, Усмон Носир у билан қандайдир бир қиз туфайли уришиб қолган ва бу воқеани «Атлас» пьесасида тасвир этган. Шуҳрат аканинг айтишига кўра, Усмон Носир тилшунос олим билан ишқий масалада эмас, илмий масалада тортишиб қолган.)

Усмон Носир бундай дерди: «Ҳар бир катта адиднинг бош асари бўлади. Максим Горькийда «Она», Толстойда — «Уруш ва тинчлик» ва ҳоказо. Менинг бош асарим Ленин тўғрисидаги достон бўлиши керак. Ленин бўлмаганда, мен шоир бўлмас эдим. Биз Ленин тўғрисида ёзишимиз керак. Ҳозир мен шу достоннинг ярмини ёздим...»

Усмон Носир айтган достоннинг ярми 10 минг мисрадан иборат эди. «Волга, Волга!..» деб бошланувчи шеър шу достоннинг муқаддимаси. Усмон Носир рус шоирлари орасида Некрасовни кўпроқ яхши кўрарди. Энг халқчил шоир, дер эди уни. У, вақти келиб, Некрасов, шунингдек, Генрих Гейне асарларини ўзбек тилига, албатта, таржима қилишини айтарди. У бу икки шоирни ниҳоятда севарди. Унинг назарида, агар Пушкин ва Лермонтов тирик қолганларида, реакцион шоирларга айланган бўлардилар. Зоро, улар чоризмнинг маддоҳларига айланиб қолишлари ҳеч гап эмас эди. Шунинг учун ҳам уларнинг романтик шоирлар бўлган пайтларида ҳалок бўлганлари яхши бўлган.

Унинг фикрича, шоирнинг у ё бу тузумнинг маддоҳига айланиши унинг реакционлашиши, халқ манфаатларидан узоқлашиши эди. У Некрасовни сиёсий тузум эмас, халқ манфаатларининг куйчиси бўлганлиги учун севган. У Некрасовни ўзбек тилига таржима қилибгина қолмай, келажакда рус шоиридек халқчил ижодкор бўлмоқчи ҳам эди.

Усмон Носир ўзбек шоирларидан Чўлпон билан Ойбекни айниқса қадрлаган. Ҳатто уларнинг шеърларини ёддан билган. Лекин...

1937 йил бўлса керак, биз Усмон Носир билан 1-Май кўчасидаги пивахонада пиво ичиб ўтирган эдик. Шу пайт кўчанинг нариги томонида Ойбек кўриниб қолди. Усмон Носир ҳурмат қилган шоирнинг келаётганини кўриб қувонди-да, уни пивохўрликка таклиф

этди. Лекин Ойбек нима учундир унинг таклифини қабул қилмай, ўтиб кетди. Шунда Усмон Носир: «Ана, мен уни яхши кўрардим. Уни энг демократ шоир, деб билардим. Лекин у мени назарга ҳам илмади», деб қаттиқ хафа бўлди ва кетма-кет икки-уч кружка пиво-ни ичиб юборди.

(1937 йил сентябрь ойида бўлиб ўтган Ўзбекистон Ёзувчилар уюшмасининг даҳшатли IV пленумида шу воқеа ҳам тилга олинган. Лекин стенограммада Усмон Носирнинг ўша соатда ким билан пивохўрлик қилгани айтилмаган эди. Чамаси, у ўша куни фақат Шуҳрат aka эмас, балки бошқа ижодкор ёшлар билан ҳам бирга бўлган кўринади.

Усмон Носирнинг Ойбекка нисбатан ҳурмати бир томонлама бўлмаган. Ойбек ҳам уни эъзозлаган. «Евгений Онегин»нинг таржимаси муҳокама қилинган куни, айтишларича, Усмон Носир «Онегин банди»ни тўққиз ҳижолик бармоқ билан ўтириб, уни ўқиб берганида, Ойбек шоир дўстини чин қалдан табриклаб қучган. У Усмон Носирни юксак истеъоди учун ҳам, мард ва танти феъли учун ҳам сўйган. Лекин 1937 февралида Москвада Пушкин вафотининг 100 йиллигига багишланган тантаналар чорига ҳам, ўша йилнинг майида бўлиб ўтган ўзбек санъати ўн кунлигидан қайтишда ҳам Усмон Носир ичиб, ўзини ҳам, ҳамроҳларини ҳам бир оз ноқулай вазиятга қўйганидан кейин Ойбек ичаётган дўстидан қочадиган бўлган.

Кечирасиз, ўқувчи, Шуҳрат аканинг сўзларини бўлдим. Энди ҳикоянинг давомини эшитинг.)

Усмон Носирнинг «Юрак» ва «Мехрим» тўпламлари китоб дўконларига чиққанда, ҳамма уларни талашиб олиб ўқиди. У бошқа шоирлардан ўтиб кетди. Халқ бошқа шоирларни ўқимай қўйди. У шеърият мухлисларининг энг севимли шоирига айланди. Шундан кейин унга гайрлик қила бошлашди. Ҳатто кечаги дўsti Уйғун «Ёш Ленинчи» газетасида Усмон Носирни «халқ душмани» деб чиқди.

«Юрак» тўплами босилиб, эл-юорт оғзига тушганидан кейин Педагогика институти талабалари Усмон Носир билан учрашмоқчи бўлдилар. Усмон Носир: «Агар институт мени расмий равища учрашувга таклиф этса, бораман», деди. Шундан кейин адабиёт тўтарагининг бошлиги Зафар Диёр қоғоз ёзиб берди. Мен бу таклиф қоғози билан Усмон Носирнинг ҳузурига бордим. Ў таклифномани ўқиб, «Мана бу бошқа гап», деди.

Усмон Носир институтга келганда, зал талабалар билан лиқ тұла әди. Залға киролмай қолған кишилар күчада туриб, дераза орқали әшитдилар. Уйгун Усмон Носирнинг ўн йиллик ижоди ҳақида маъруза қилди. (Чамаси, Шұхрат ака Усмон Носирнинг педагогика институтида бўлиб ўтган кечасини 1937 йил январида Ёзувчилар уюшмасида бўлиб ўтган кечаси билан араплаштириб юборган кўринади. Н. К.) Қайси бир шеъридан сиёсий хато топди. Шундан кейин тўплам муҳаррири Ойдин билан Уйгун ўртасида мунозара бошланди. Мунозарада Уйгун енгиб чиқди. Сўнг Усмон Носир шеърларини мен, Неъмат Тошпўлат ва бошқа талабалар ўқидик. Амин Умарий шоир дўстига бағишиланган «Соз» шеърини ўқиди. Эргаш эса «Ижод» деган шеърини. Кеча сўнгида минбарга Усмон Носирнинг ўзи чиқиб, янги шеърларини қарсиллатиб ўқиди.

Усмон Носир Ўқидағи Шампань виноси заводига ёндош күчада Абдулла Қаҳҳор, Темур Фаттоҳ, Амин Умарий, Мадамин Дағрон билан бир ҳовлида туар экан. Адабий кечадан кейин яхшигина ичдик. Усмон Носир хийла кайф қилиб қолди. Биз уни уйига кузатар эканмиз, у йўлда дамба-дам тўхтаб, менга:

— Сен ўзбекмисан? — дерди.

Мен: «Ҳа, ўзбекман», деб жавоб берсам, у:

— Йўқ, сен қулсан! — дерди.

Бошқа ҳамроҳларига ҳам: «Сенлар ўзбек эмас, сенлар русларнинг қулисан», дерди. У ичиб олган пайтларида кўпинча шундай сўзларни айтар экан. Умуман, у ичиб олганда, мутлақо ўзга бир одамга айланар әди.

Усмон Носир катта қоғозни узунасига иккига бўлиб, унга қора қалам билан араб алифбосида майдა қилиб ёзар экан. Бир куни у шундай қоғозларни бир даста қилиб олиб келиб қолди. Билсак, у «Демон»нинг таржимасини машинисткага диктовка қилиш учун олиб келган экан. Аслида, у «Демон»нинг ҳам, «Боқчасарой фонтани»нинг ҳам таржимасини ёдан биларди. Некрасовнинг шеърларини ҳам, ўзининг шеърларини ҳам ёдан ўқирди. Унинг хотираси ниҳоятда ўткир әди. Ўша куни у қўллэzmани менинг қўлимга бериб қўйиб, ўзи ёдан ўқиди ва шу йўл билан таржимани қанчалик ёдан билишини текшириб кўрди.

Ёдимда, «Боқчасарой фонтани»нинг таржимаси муҳокама этилган куни Чўлпон минбарга чиқиб, «Мана, ҳақиқий таржимон! Мана, Пушкиннинг таржимони! У

таржимани оригиналдан ҳам ўтказиб юборипти», деб роса мақтаган.

Дастлаб «Евгений Онегин»нинг таржимасини Чўлпонга бермоқчи бўлишган. Лекин Чўлпон «Менда шоирлик ҳисси қолмади. Мен таржимада фақат асар мазмунини беришим мумкин», деган. Шундан кейин бу катта асарни Ойбекка беришган. «Лўлилар»ни эса Темур Фаттоҳ таржима қилган. У Пушкиннинг бу галати номли асарини таржима қилгани учун Усмон Носир дўстини «Цыган» деб чақирап эди.

Чўлпон Пушкиннинг қайси бир асарини таржима қилганида, Усмон Носир уни обдон мақтаган: «Мана бу таржима! Мана бу ўзбек тили!» деб. (Чўлпон А. С. Пушкин вафотининг 100 йиллиги муносабати билан унинг энг мураккаб асарларидан бири «Борис Годунов» шеърий драмасини таржима қилган. Бундан ташқари, у улуғ рус шоирининг «Дубровский» қиссасини, «Поп ва унинг хизматкори Балда ҳақида эртак»ни «Булбул билан гул» ва «Банди» шеърларини ўзбек тилига қойилмақом қилиб ўтирган. Н. К.) «Она»ни бошқа бир одам бундай таржима қилолмаган бўларди. «Ҳамлет»ни ҳам. Чўлпон бу асарларнинг барчасини боплаб таржи-ма қилган! Ундан ўрганишимиз керак!

Усмон Носир шу йиллари Пушкин ва Лермонтовнинг достонлари билан бирга грузин ҳалқининг Сталинга ёзган шеърий хатини ҳам ўзбек тилига таржима қилган. Бу таржима «Қизил Ўзбекистон» газетасида босилган. Ўша йиллари Сталин номига ёзилган шеърий хатларнинг дебочаси грузин ҳалқининг хати эди. Лекин ўзбек ҳалқи номидан Сталинга шеърий хат ёзганларида, Усмон Носирни қўшмаганлар. У бундан қаттиқ ранжиган.

Ўша йилларда «Нишондорлар» тўплами чиқадиган бўлиб қолди. Усмон Носирни бу сафар ҳам унугиб қўйишган экан. У тўпламнинг тайёрланаётганидан дарак топиб, «Нега менга тема бармадинглар?» деганида, Ҳамид Олимжон: «Унугибмиз», деган. «Хоҳласанг, Наманганинг қизиқчилар маҳалласидан чиққан ҳаҳрамон ҳақида ёз.Faқат эртага-охирги кун», деган. Усмон Носир кечаси билан 200—300 сатрлик «Исройл» деган шеърини ёзиб, эртасига менинг қўнимга берган». Шоир бу шеърини ҳам тешиб қўйган эди.

Усмон Носирнинг орқасидан Ризошоҳ (сўз Ризо Қораشاҳарли устида бормоқда Н. К.) деган бир озар қўйилган экан. Усмон Носир Ёзувчилар уюшмасида

бўлиб ўтган муҳокамадан: «Сен бошимни единг. Йўлда қўшилган йўлдош бўлмайди», деб Ризошоҳни сўкиб чиқиб кетган. Эртасига трамвай плошчадкасида уни ушлаб олиб кетганлар. У кайф устида яна «Ўзбеклар — қул, русларнинг қули», деб турган экан.

(Шуҳрат аканинг Усмон Носир тўғрисидаги биринчи ҳикояси шу билан тугади. Бу ҳикояда Усмон Носир ҳаётининг тўғри талқин қилинган саҳифалари билан бирга миш-мисхлар ҳам йўқ эмас. Айниқса, Шуҳрат аканинг сўнгги сўзлари ҳақиқаттага тўғри келмайди. Усмон Носир Ёзувчилар уюшмасида бўлиб ўтган муҳокаманинг эртасига уйидан олиб кетилган. Бу воқеа 1937 йил июлида содир бўлган. Трамвай билан боғлиқ воқеа эса, чиндан ҳам, рўй берган. Трамвай ҳайдовчиси билан ширакайф шоир ўртасида бўлиб ўтган қуллар ва қулдорлар мавзуидаги сўз жанги ҳақида ҳатто «Правда» газетаси саҳифаларида ҳам ёзилган.

Аммо бундай чалкашликларнинг мавжудлигига қарамай, Шуҳрат аканинг биринчи ҳикояси сиз, ҳурматли ўқувчида муайян қизиқиш уйғотса ажаб эмас.)

Ўша йили Дўрмонда дам оловчилар орасида бир кекса аёл ҳам бор эди. Озгингина келган бу татар аёл билан, чамамда, ҳеч кимнинг иши бўлмаган, у ҳам таниш-нотанишлар билан бир зумда элакилашиб кетадиган кишилар жумласидан эмас эди.

Кунларнинг бирида мен Шуҳрат аканинг шу аёл билан суҳбатлашиб ўтирганини кўрдим. Улар суҳбатини бузмаслик учун ўз хонам сари оҳиста кўтарилимоқчи эдим, Шуҳрат aka чақириб қолди: «Бу кишини танийсизми?» деб сўради. Мен «йўқ» ишорасини қилганимда, «Отажон Ҳошимнинг хотини», деди ва у билан танишитирди.

Отажон Ҳошим бир пайтлар биз хизмат қилаётган тил ва адабиёт институти (ҳозирги Алишер Навоий номидаги Адабиёт институти)га директор бўлган. Ўзбекистон фанининг ташкилотчиларидан бири бўлмиш бу зот 30-йилларнинг биринчи ярмида ижтимоий фанларнинг шаклланишига катта ҳисса қўшган. Марксча адабиётшунослик фанининг пешқадам вакили бўлганига қарамай, талайгина хайрли ишларни амалга оширган ўта зиёли, маданиятли, билимдон киши эди. 1937 йили қатагон машинаси ишга тушиши билан у ҳам олиб кетилган. Орадан кўп ўтмай, хотини Зайнаб опани ҳам ҳибста олиб, уларнинг уй-жойи-ю мол-мулкини мусодара этганлар. Зайнаб опа маълум вақтдан кейин озод-

ликка чиққан бўлса-да, бир умрга руҳан ва жисмонан майиб бўлиб қолган. Шўро қамоқхоналари ва лагерларининг нималигини ўз кўзи билан кўрган Шуҳрат ака бундай кишиларга нисбатан лоқайд бўлолмас ва бошқалар улардан четланган пайтда ҳам улардан у меҳрли сўзини аямас эди.

Мен Шуҳрат аканинг маслаҳати билан Дўрмондан қайтганимдан кейин Зайнаб опа билан учрашиб, унинг Отажон Ҳошим тўғрисидаги хотираларини эшиздим. У академиклар шаҳарчасида, шундоққина институтимизнинг ёнгинасида яшар экан. Кўп қаватли уйда истиқомат қилганига қарамай, унинг хонадонида ёлгизлик ва кексаликнинг дилни гаш қиласидаган ҳиди ҳукмрон эди. Яп-ялангоч уйдаги мол-мулкларни НҚВД ходимлари ҳозиргина олиб кетишганидек совуқ бир таассурот мияга урилди. Мен тезроқ чиқиб кетишга ошиқдим.

Лекин Зайнаб опани зиёрат этишим беҳуда кетмади. Орадан бир йил ўтгач, биз Отажон Ҳошим таваллудининг 80 йиллигини нишонладик. Шунда Зайнаб опадан олганимиз расм ҳам, унинг хотиралари ҳам айниқса асқотди.

Орадан йиллар ўта бошлади. Собиқ шўролар жамиятида қандайдир ўзгаришлар рўй бергандек бўлди. Лекин Қораشاҳарлилар, Солиевлар ҳамон тирик бўлганлари учун эзгу ниятли, пок қалбли кишилар озор чекишида давом этдилар. Шуҳрат ака ҳам улар туфайли оғир хасталикка йўлиқиб, қийинчилик билан сўзлайдиган ва юрадиган бўлди.

Тошкентнинг жазирама ёзида шаҳарда яшаш осон эмас. Айниқса, кекса ва хаста кишилар учун саратон кунларини шаҳарда ўтказищдан азоброқ нарса бўлмайди. Шунинг учун ҳам Шуҳрат ака ёз ойларининг иссиқ кунларини Дўрмонда ўтказиш, дўст-ёрларини кўриб овениш ва хасталигига қарамай, озми-кўпми қалам тебратишга интиларди. Шундай пайтларда унинг ёнида, албатта, Турсуной опа бўлар, фарзандлари Хондамир, Бобур ва Фикрат ҳар куни оталаридан хабар олиб туришарди.

1989 йилнинг ёзимикан, Дўрмонда бир гуруҳ санъаткорлар пайдо бўлдилар. Тошкент консерваториясининг бир гуруҳ домлалари бир неча истеъододли ўш хонандаларни Дўрмонга олиб чиқиб, уларни Ригада ўтиши кўзда тутилган Глинка номидаги вокалистлар танловига тайёрлаш билан банд бўлдилар. Бу домлалар орасида Алишер Навоий номидаги Катта опера ва ба-

лет театрининг собиқ хонандаси Насим Ҳошимов ҳам бор эди.

Бир куни тушки овқат пайтида Шуҳрат аканинг қийинчилик билан ошхона сари қовун кўтариб бораётганини кўрдим. Чамамда, у фарзандлари олиб келган қовун билан даврадошларини меҳмон қилмоқчи бўлган. Ба, албатта, ўзи ҳам — агар ширин чиқса — бир икки карж емоқчи. Мен Шуҳрат акага ёрдамлашмоқчи бўлиб борганимда, қаердандир Насим Ҳошимов пайдо бўлди-ю, Шуҳрат аканинг қўлидаги қовунни даст кўтариб олди. У олдинда, бизлар кейинда ошхона сари йўл одик. Санъаткорларнинг столи юқорида эди. Насим Ҳошимов қовунни тўпса-тўғри ўз столига олиб бориб, пичоқ топтириди-да, сўйиб, ҳаскаслари билан пок-покиза тушириди. Бир тилимини ҳам на қовуннинг эгасига, на бошқа бир ёзувчига узатди. Мен Шуҳрат акага оҳиста назар ташладим. У менга қараб, мийигида кулади-да, «Майли», деб пичирлади. Унинг чеҳрасида на таажжубланиш, на тараддуланиш ифодаси бор эди. Шу пайт менинг ёдимга Чортоқдаги таниш-билишларга тақсим этилган пакетлар тушди. Хаста шоир қалбидағи тантлилик чечаклари ҳали ҳам гуллаб турган эди.

ШУҲРАТ АКАНИНГ ИККИНЧИ ҲИҚОЯСИ

1989 йилнинг 15 июль куни хаста шоир билан Дўрмонда, ёзувчилар яшайдиган бино олдидаги ўша скамейкада ўтирибмиз. У ёқ-бу ёқдан гаплашиб турганимизда, Шуҳрат aka мендан бугун радио орқали Абдураҳмон Азизов деган кишининг хотирасини эшитган ё эшитмаганимни сўраб қолди. Мен транзисторсиз чиққаним учун радио орқали берилаётган эшиттиришлардан бутунлай хабарсиз эдим. Шуҳрат aka эса жажжигина транзисторини қарийб ўчирмас, худди Робинзон — кимсасиз оролда яшаётган кишидек, радио орқали дунё хабарларидан воқиф бўлиб туришни ўзининг инсоний ва ижодий бурчи, деб биларди.

Менинг собиқ Октябрь тумани комсомол ташкилотининг котиби Абдураҳмон Азизовнинг сўзларини эшитмаганимдан афсусланиб, қийналиб бўлса-да, ҳикоя қила бошлади:

— Абб... дураҳмон Аз...зизов 1937 йилда Октябрь рай...йони партия ттт...ташкилотининг кк...отиби билан бирга қамалган экан. У қққ...моқда Абб...дулла Қққ...одирий билан бирга ккк...амерада ётибди.

Қққ...одирий қққ...амоқда ҳам нималарнидир ёзиб юрар экан. Худо хоҳласа, омон-эсон бу ззз...индоңдан ччч...иқсан, керак бўлиб қққ...олади, деб. Лекин назоратчилар ва ттт... ерговчиларнинг муносабатлари батт...тар ёмонлашганини кўриб, озодликка чиқишидан умм... иди қққ... олмапти. Шундан кейин у ббб... арча ёзганларини йииртиб тт...ашлапти. Фақат битт...та шеърини шу одамга ёдлатипти. «Сен ёшсан, худо хоҳласа, сени қўйиб юборишади. Шунда шу шеъримни мmm... ендан ёдгорлик, деб ўқиб юрасан», депти у. Шу шиши... еър ҳозир ҳам Абб... дураҳмоннинг ёдида экан. Афсус... эсимда қолмади.

Шуҳрат ака бир нафас сукут қилиб, сўнг давом этди.

— НКВДнинг ккк...амералари ҳам, Ттт... ошутрманнинг камералари ҳам ўша пайтда маҳбуслар билан ттт... ўлиб кеттан экан. Шунинг учун уни Ялангоҷдаги қққ...амоқхонага юборишипти. У ббб...ошқа Абдулла Қққ... одирийни кўрмапти.

Ҳа, атгандек, у Ттт... оштурмада ббб... еш кун Усмон Носир ббб... илан ҳам бирга ётган экан. Лекин Усмон Носир ттт...ўғрисида ҳеч нарса демади. Ббб...алки олдинги эшигтиришларда Усмон Носир ббб...ilan бир камеради ётганлигини айтгандир.

Мен Тошкентта тушганимдан кейин маълум вақт ўттач, радиодаги таниш-билишлар орқали Абдураҳмон Азизовнинг Абдулла Қодирий ва Усмон Носир тўғрисидаги хотиралари матнини қидиртириб кўрдим. Афсуслар бўлсинким, бу матнни топишнинг иложи бўлмади. Собиқ маҳбус чиқиши мумкин бўлган таҳририятларнинг ходимлари ҳатто Абдураҳмон Азизовнинг исм-шарифини ҳам эслолмадилар.

Шуҳрат ака Усмон Носирнинг қамалиш тарихига тўхтаб, унинг фожиали тақдирида бир ёзувчининг «хизмати» катта эканлигини айтди. Сўнг бадоҳатан бошлиланган сұҳбат шу тарзда давом этди.

— Абдулла Қққ... аҳдор «Сароб» романидаги Муродхўжа образида Ашурали Ззз... оҳирийни тасвирланган. Ашурали Ззз... оҳирий Абдулла Қққ... аҳдорнинг домласи бўлган. Ббб... илмдан одам бўлган, дейишади. «Русча-ўзбекча лугат»ни ббб...иринчи марта шу одам тузган. «Сароб» романидаги Сайдий бўлса, Усмон Носирнинг образи. Бу образнинг ттт... алқинидан маълум бўлишича, Абдулла Қққ... аҳдор билан Усмон Носирнинг оралари яхши бўлмаган. Аммо шиши... унга қарамай,

Уйғун 1936 йилда 9 январь күчасидағи квартирасидаң чиқарыб юборганда, Усмон Носир ўқчи маҳалласидағи Абдулла Құқ... аҳдор яшаган ҳовлига борган. Эҳтимол у бу уйға Мадамин Давронними, Амин Умарийними, Темур Фаттоғними құқ... ора қилиб боргандыр.

Усмон Носирнинг Тошкентда ёш дўстлари ва шоғирдлари кўп бўлса ҳам, нима учундир, ўзига қўқонлик дўстларини кўпроқ яқин оларди. Лекин бирор юмуши ббб... ўлса, кўпинча мmm... ендек ёшларга мурожаат этарди.

Усмон Носир «Исройл» деган шеърини ббб...ир кечада ёзган. Эртасига келиб, менга ўқиб берган. Бу шеърни унга мен кўчириб берганман. Хатим яхши эди. Усмон Носир янги ёзган шеърини қайта кўчиришга эриниб, кўпинча менга берарди. Мен унинг кўпгина шеърларини кўчириб берганман. «Исройл»ни ҳам мmm... ен кўчириганман. Бу шеърнинг асли менда қолган эди. Аммо тtt... интуб пайтида бу шеърни ҳам уйимдан олиб кетишган. Ббб.. ир кечада шундай катта шеърни ёзишнинг ўзи бўлмайди. Ббб... унинг учун қайноқ илҳом бўлиши керак шоир-да! Усмон Носирнинг илҳоми шундай жиловсиз илҳом эди. У ббб...ир сутқада йигирма тўрт соат илҳом билан яшарди. Агар у тирик қолганида, ҳаммаёқни шеърга тtt... ўлдириб юборган бўларди.

Мен Шуҳрат акага Усмон Носир ва адабиётимизнинг бошқа атоқди намояндаларига доир кўп саволларни бериб, уларга мароқди жавоблар олганман. Шубҳасиз, унинг ҳам, бошқа ёзувчиларимизнинг ҳам замондошлари ҳақидағи хотираларини бошдан-оёқ ҳаққоний деб бўлмайди. Аммо шунга қарамай, биз улар хотирасидаги Ойбек, Гафур Гулом, Абдулла Қаҳдор, Миртепмир, Шайхзода, Усмон Носир сингари улуг ёзувчилар образига кўпроқ ишонамиз. Зоро, улар бу адиллар ҳақидағи ҳақиқатни ўз кўзлари билан кўриб, ўз қулоқлари билан эшигтанлар ва шу ҳақиқатни бизга тўгри етказишига уринганлар.

Чамамда Шуҳрат аканинг Усмон Носир ҳақидағи хотиралари яна шу жиҳатдан қимматлики, уларда унинг ўзининг ҳам образи жилваланиб туради. Шуҳрат ака юқорида номлари тилга олинган адиллар сийратининг ўзига, дили ва дидига яқин қирраларини хотирасида сақлаб қолган ва бизга шу қирраларни нурлантиришига интилган. Қайсиdir маънода шу қирраларда унинг ўз инсоний сажиясига яқин ёғдулар ҳам порлаб туради.

Биз 1984 йили Дўрмонда саратон кунларини шун-

дай сұхбатлар билан ўтказаётган пайтда Шуҳрат ақанинг янги шеърлар китоби чиқиб, беш-үн нусхаси унинг қўлига келиб теккан. Хаста шоир бу тўпламга «Ҳали тун узоқ...» деб ном қўйган эди. Чиндан ҳам, у яна үн йилдан зиёд ҳаётга, ижодга ташналиқ билан яшади ва босиб келаётган тунни бутун кучи билан ушлаб, ўзига яқинлаштиrmай турди.

Шуҳрат ака шу китобнинг бир нусхасини менга қўйидаги дастхат билан совға қилган: «талантли олим, дўстим Наимжон Каримийга ижодий уфқлар тилаб, умид билан автор: Шуҳрат. 10. 6. 84. Дўрмон».

Ҳозир шу китобни варақлаб, қўйидаги сатрларни худди унинг ўз оғзидан эшитаётгандек бўляпман:

Бир оғиз сўз билан шоир кўнгли шом,
Бир оғиз ширин сўз жонига малҳам.
Баъзида кўнглини яйратса илҳом,
Баъзида тиг бўлиб ботади маҳкам!..

Дунёning ташвиши — муқаддас ташвиш
Шоирнинг қалбида ёниб туради.
Шу ёнган қалб билан ёзу баҳор, қишиш
Сиз билан, биз билан бирга юради.

Ҳақиқат гадойи, инсоф жарчиси,
Эзгулик қўшинин содик солдати.
Эртани кўради бугундан кўзи,
Рост сўзни айтмоқлик унинг одати!

Дунёning шодлиги унинг мулкидир,
Дунёning кўркига ҳокими мутлақ.
Дунёning тинчлиги ёниқ эркидир,
Шу эрким бўлсин, дер, ҳамиша порлоқ!

Назаримда, Шуҳрат ака шундай шеърлари билан ўзи севган адабиётимизнинг пурвиқор чўққиларига анчагина яқинлашиб қолган.

1995 йили, ниҳоят, ўша мудҳиш тун Шуҳрат аканинг чақноқ қўзларига қўнди, унинг юрагидаги порлоқ туйғуларга қора пардасини ташлади. Шуҳрат ака шу қоп-қора туннинг орқасида қолди. Лекин унинг сўлим шеърлари, умрбоқий романлари, сўнмас чироқлар каби, ҳар бир хонадонда, адабиётимизнинг ҳар бир мухлиси қалбида тилларанг жилваларини таратиб турибди.

МЕХРИБОНИМ

Шоир ва адид Шуҳратнинг ижоди бир томон, одамийлиги бир томон эди, десам хато бўлмас... У муҳтарам зот ниҳоятда меҳрибон инсон эдилар. Бир иборани тез-тез такрорлаб қўйдилар: «Ари чақди, деб аразлама, боли бор!»

У вақтларда бу иборанинг маънисига ким етибди, дейсиз. Айтдилар, қўйдилар-да, деб кетаверар эканман...

...Аммо йигитлик умрининг расо саккиз йилини ҳарбий кийим кийиб, машқларда, ертўлаларда, кейинроқ «виз-виз» ўқ учиб, бомбалар дайдиб тушиб, ерни ола-тўполон қилиб ташлаган қонли майдонларда ўтказган, кейин... ҳа, кейин... Галабадан кейин, Иккинчи жаҳон уруши қатнашчилари эъзозланиш ўрнига, булар жамиятга ва коммунистик партия юргизаётган бераҳм сиёсатга ўт очиши мумкин, деб хавфсираб, бу кўзи очиқ, ҳушёр, кўпни кўрган, Европадан яёв юриб ўтган инсонларни хавфсиз жойга олиб бориб қўйиш сиёсатини қўллаб, баҳонасиз баҳона топиб бундай эл меҳрини қозонган одамларни тирик мурда шаклига келтирган тоталитар тузум — уларни қамашга — шу билан ўз сиёсатини тегирмонтошидай bemalol юргизаверишга шароит яратаман, деб ўйлаб, Шуҳрат акалар бошига қаро кунларни солди.

Мирзакалон Исмоилий, Миркарим Осим, Сайд Аҳмад, Ёнгин Мирзо, Неъмат Тошпўлат, Шайхзода каби қатор адилар ана ўша қаро зулмнинг тутқунлари бўлдилар. Бу энди бошланган қаро кун эмасди. Октябрь инқилоби фавқулодда, ҳеч ким қутмагани ҳолда галаба қилиб қолганидаёқ бошланиб, кейин ўттиз еттинчи йилда авжига минган қаро кунларнинг узвий давоми эди. Бу қаро кунлар сал илгарироқ Абдулла Қодирий, Фитрат, Чўлпон, Усмон Носир каби фикри теран, аллома ёзувчи, шоир, драматург, олимларни қора қузгун қаноти остида маҳв этган эди...

Тутқунлик қисмати шунаقا оғир бўларкан. Ўртacha ҳар ўн йилда уни ё буни баҳона қилиб, бугдойдай бошоқ тортиб етилиб келаётган у ё бу халқ вакиллари-

ни чолғуда ўриб ташлаб, хотиржам бўлиш ўша даврнинг яшаш тарзига айланган эди.

Бу аслида большавойларнинг: хоҳлаган ишимни қиласман, инсон — сен менинг қўлимда чапагимга ўйнагувчи nocturnal қўгирироқсан! деганлари эди...

Устоз Шуҳратнинг авжи кучга тўлган, қувватта кирган йигитлик йиллари ўз иборалари билан айтганда: «пўстимбага» чиқиб кетди...

Иродаси метиндан бу инсон урущдан кейин яна беш йилини тутқунлиқда ўтказишга мажбур бўлди.

...Ниҳоят, Сталин қулагандан кейин, унинг қора қузгун қаноти энди мусаффо осмон юзидан юлиниб ташланди... Шуҳрат ака қабилар жуда озодликка бўлмаса ҳам омонликка қайтдилар. Аллоҳ уларнинг ноласига ҳам қулоқ тутгани шу бўлса керак...

У киши тутқунлиқда одамийликни йўқотмадилар. Аксинча, ундоқ зиндоңсифат манзилларда одамни қаттиқ согиниб яшадилар. Бекор ўтаётган кунларини рўмолчанинг учига маҳкам тугиб бораверган эканлар... Омонликка чиқдан кунларидан бошлиб рўмолчанинг учини шашт билан ечиб, енгни шимариб, бекор ўтган кунлар учун ҳам меҳнат қилишга киришдилар...

Гоҳида:

— Мен бугун ўн иккита шеър ёздим! — десалар, бизга эришроқ туюларди. Хом эканмиз, бу гапнинг таг-заминига фаҳмимиз етавермас экан. Ҳозир ўйлаб қарасам, у киши шеър ёза олмай қолган кунлари учун ҳам шеър ёзар эканлар. Ҳамма фазилатлари устига Аллоҳ у кишига тинмай самарали меҳнат қилиш фазилатини ҳам ато этган эди. «Шинелли йиллар», «Жаннат қидиргандар», «Олтин зангламас» романлари, «Балладалар», «Бизнинг кўча», «Сенинг севгинг» каби ўнлаб шеърий китоблари у кишидан бизга мерос қолди. Шундоқ йирик асарлар билан бир қаторда «Беш кунлик куёв» каби қатор саҳна асарлари ўз даврининг долзарб муаммоларига багишланиб, инсонлар тақдирiga кўчди. Булар Шуҳрат муаллимнинг бир томони. У киши ёш ижодкорларнинг ҳақиқий ўз акаси эдилар. Шундай жанг бўронлари, тутқунлик заҳматлари у кишининг ёнида турган инсонларга меҳрини елга солиб, олисларга учириб юбормади. Акс ҳолда биринчи шеъри, ўргамчик мисралари бирозгина умид тугдирган ёшлар борки, у киши дарров ўз қанотлари ости-ҳимоясига олар эдилар ва ўзлари хизматда бўлган ёзувчилар уюшмаси эшигининг икки тавақасини кенг очиб

қўйиб, бағриларини очиб, икки қўллаб марҳамат кўргазиб кутиб олардилар. Биз Азиз Абдураззоқ, Эркин Воҳид, Тўлқин, Барот Бойқобил, Ҳусниддин Шарипов, Эркин Самандар, Қамчибек Кенжа, Охунжон Ҳаким, Тошпўлат Ҳамид ва мен кабилар у киши атрофида гала-гала бўлиб юрадик. Менинг «Бошсиз ҳайкал» достонимдан сўнг ҳаммамиз умид ва ишончга тўлиб, астойдил ижод қила бошладик. Чунки ижод қилсак, яхши нарса ёzsак, чиқар экан, деган ишонч пайдо бўлди бизда. Ҳусниддин Шариповнинг «Қўёшга ошиқман», Эркин Воҳиднинг «Буюк ҳаёт тонги» кетма-кет пайдо бўлди ва «Шарқ юлдузи»да босилди. Буларнинг ҳаёт юзини қўришида Миртемир, Шайхзода, Асқад Мухтор қаторида Шуҳрат аканинг улкан ҳиссаси бордир.

Сўзим қуруқ бўлмасин учун у муҳтарам устознинг кўп хатларидан бирини келтиришни лозим деб билдим. Бу 21 ноябрь 1960 йилда менга Москвага, бир фақир талабага ёзилган: «Сайёр! Сенинг шунча хатинг ва телеграммангта шу биргина журнал номери жавоб бўла олади, чунки сенга хат ёзмасам ҳам сени ўйлаб юрганимга қаноат ҳосил қиласан. Бу сонда сенинг сўнгти арзанданг — поэманг бор ва менинг анча-мунча шеърим.

Биз тошкентликлар сог-саломат. Отанг билан иккамиз тупроққа ва гиштга ҳужум қилиб ётибмиз. Сен отангта рўмол учун озроқ пул юборибсан, улар бени-ҳоя хурсанд. Демак, «Ёш гвардия»дан 25 фоиз олган-дирсан. Яхши бўлибди. Мана поэма ҳам чиқди. Ҳақини ўзингга юборайми, ёки уйга ишонч хати юборасанми? Хабар қил.

Мен журналга ўтиб, сенлар учун ютдим, бўлмаса ўзим учун ҳали ҳеч иш бўлганича йўқ. Мана I-сонда Эркиннинг поэмасини берамиз, наборда. Сеникини атайин хабар қилмай ўтирган эдим, билишимча кимдир жосуслик қилиб сенга хабар бериб қўйибди. Мана энди ўзини кўр, қувон, руҳлан, қанотлан. Бу сенинг союзга киришингта — пропуск!!!

Энди шошма, ҳовлиқма, соғлиғингни эҳтиёт қилиб яша ва ижод эт!

Сени согиниб,
жигаринг: *Шуҳрат*

26/XI-60"

Бундай хатлардан талайини келтириш мумкин. Ушбу хат у киши уй қураётган даврларига тұғри келади. Шу биргина мактубданоқ Шухрат аканинг меҳрибон, акаларча ғамхүр юраги борича намоён бўлиб турибди...

Ёки бўлмаса, у киши адабиёт жамгармаси директо-ри бўлган кезларда Москвага тез-тез келиб турардилар. Шунда ҳар гал бизни йўқлаб, тушган жойларини дарҳол хабар қиласдилар. Мана, масалан: «Сайёр! Мен Москвадаман. «Украина» меҳмонхонасида. 19 қават, 19 хона. телефоним: Г-3-22-39;

Телефон қилинг, келинглар! Декада ишлари ва ўз романим русчаси масаласида келдим. Азизга салом! Сизларни кутиб:

Шухрат.

I/XI-57.»

Ёки мен учун нақадар азиз бир мактубдан: «Жига-рим Сайёр! Аввало улкан бошимни (яъни, оппоқ бо-шимни) эгиб, Сендан узр сўрайман — кўп хатингга «бўлар-бўлмас» нарсалар билан банд бўлиб хат ёзолма-дим. Сен, азиз жигарим, асло бу нарсани кўнглингга олма, Сен менинг қиёматли инимсан, бағримсан, жига-римсан!»

Шундай ёшини яшаб, сочи оқарган, таниқли инсон-нинг бир талаба, шоирча болага меҳр-муҳаббат билан мактуб битаётганини қаранг. Камтарлик, олижаноб-лик, инсонийлик олдида тиз чўкасан, киши.

Тошкентта хатларим бирор кунлар узилиб қолгудай бўлса, дарҳол телеграмма жўнатишларини айтмайсизми?

«Сендан хавотирдамиз, ўзингдан хабардор қил» ва ҳоказо. Бундай олижанобликка осонликча жавоб бе-риб бўладими? Бир умр хизматларини қилсанг ҳам, у кишининг бир кунлик эътиборларини ўтаб бўлмас...

Горький номидаги Адабиёт институтининг учинчи курсига ўтганимда семинар машгулотларининг бирида ҳамма ёзганларимнинг савиясини аниқлаш муҳокама-си бўлди. Ё чикка ё пукка деганларидек жуда хавотирга тушдим. Чунки яроқли асар топилмай қолса, инсти-тутни тарк этиш керак бўлади. Ярагудек... гап бор бўла-са... бир нав... яна ўқиш давом этади.

Муҳокамага Бутуниттифоқ ёзувчилар уюшмаси ёш

котиби Владимир Соколов, Вероника Тушнова, Светлана Сомова, Семен Липкин, Инна Лисянскаялар ташриф буюриши. Бу шоирларни таништириш шарт эмасдир. Машгулот давом этәётганды Павел Антакольский ленинградлик шоир Вадим Шеффнерни бошлаб келди. Юрагим қинидан чиқаёзди. Тамом. Алвидо, институт! Маъруза қилувчи семинардошим Ирина Озерова деган шоира ва таржимон эди... Ўшанды монгол шоири Шагдасурен Цокт билан санаганды ўн тўрт киши гаппирди. Юзларим ловуллаб кетди. Бу менга — ҳаётимда жиддий имтиҳон бўлди... Шагдасуренни эслаганим, у «Бошсиз ҳайкал» достонимни монгол тилига ўтирган экан. Монгол тилида парча ўқиб берди...

Семинар машгулоти қария шоир Павел Антакольский таклифи билан, шеърлар ва достонлар китобимни «Молодая гвардия» нашриётига бир овоздан тавсия қилди. Шу хабарни айтиб, қувончимни Шуҳрат акамга етказишга ва бир йўла уюшмамиздан тавсия хати олишга Марказий телеграфдан қўнгироқ қилдим.

Шуҳрат акам мени чин қўнгилдан қутлаб, лекин Уюшмадан тавсия хати олишни ўзим бевосита Ҳамид Гуломдан илтимос қилишимни маслаҳат бердилар. «Ўзимнинг бўйим баробаридағи ишга мен уринай, бўйим етмайдиган жойга қўл узатиб, уялиб қолмай», — дедилар. Ана шунда у кишининг нақадар мулоҳазали эканликларини, ҳаётда ўз ўрниларини аниқ билиб олганларини, бирорга малол келиб қоладиган ишга огоҳ туришларини тушундим. У кишига яна ҳурматим ошди.

Уюшмамиз котибига қўнгироқ қилдим. Зудлик билан ушбу хат келди:

«Ҳурматли Сайёр! «Молодая гвардия»га хат ёзиб юбордик. Ўқишингизда, ишингизда муваффақиятлар тилайман. Ҳамид Гулом. 2/IV 1960 Тошкент».

Сих ҳам куймабди, қабоб ҳам. Иш юришиб кетди. Адабиёт институтида қолиб ўқишини давом эттирдим. Энди, оғир имтиҳондан ўтиб олганимдан сўнг ўзимга бироз ишонч ҳам тугилди...

Шуҳрат акам шеърларига Мақсуд Шайхзода атрофлича, кенг тўхталиб ўз адолатли фикрларини ёзганлар. Улардан ўтказиб фикр билдириш биз шогирлари қўлидан келиши амри-маҳол. Шунинг учун шоир Шуҳрат шеър, баллада, туркум ва достонларига тўхталмадим. Фақат айтишим мумкинки, улар эрта оқарган оппоқ соchlари ҳақида қирқдан ортиқ шеър ёзган эдилар...

Улкан ёзувчи Абдулла Қаҳхор қўлларидан келганча ёзувчи Шуҳратни қўллаб кедилар. Гарчи аямай, гоҳида ушбу асарингизни қовоқ ари чақиб олибди, деб, асарнинг кўпсўзлигидан огоҳ этсалар ҳам, ҳар ёзувчинг ўз ёзиш усулини инкор этмас эдилар.

Шуҳратнинг ҳикмат тўла, шеърдай мусиқага бой, ёғдай ёқиб тушгувчи тили ва у киши қалами остидан чиққан ўзбекона иффат-такаллуф тўла лавҳалар ва улар остидан яшина бўриниб тургувчи удумлари ва ўзбек хонадони манзаралари Абдулла акани ҳам мафтун этган бўлиши табиий...

Яна инсон сифатида, доно, сермулоҳаза, мулоим, сабрли, қалби нафис ва нафосатга мўл инсон сифатида Мирзакалон Исмоилий ҳам Шуҳрат акамга яхшилигини аяган эмас. Оилавий ишларда ҳам, жамият юмушларида ҳам у киши чиндан катта ака эдилар... ва бир умр Шуҳрат акам юрагим тўрида улуг сиймо бўлиб қолдилар.

Бу ёқда ниҳоятда ўткир дидди, ўқимишли, сермулоҳаза адабиётшунос Ҳибзиiddин Муҳаммадхонов ҳам бор эди. У киши ҳам Шуҳрат акамга оғир синов кунларида ҳақиқий бардошли биродар бўлиб, қаторда турганлар... Ҳаммаларининг жойлари жаннатда бўлсин. Аллоҳ ярла-қаган бўлсин!

Кунлардан бир кун, йиллик наср муҳокамасида менинг: «Бир кеча хаёли» қиссанни Жонрид Абдуллахонов булғалаб ураётган эди. Аммо ҳеч бир нотиқ у кишини қўлламади. Ҳайрият, деб ўтирсан, Шуҳрат акам минбарга чиқиб қолдилар. Гапларини айтиб, йиллик насримизга ўз назарларини ошкор этиб бўлгач;

— Бир ўтинчим бор, биродарлар, — дедилар. — Менинг шогирдим бўлгани учун Сайёрга қаҳр қила-верманглар. Бироз йўл беринглар. Қани барини қоғозга ташласин-чи. Ҳали атак-чечак қилмасдан оёғини синдирмайлик. Бироз кутайлик. Уриш қочмас. Мехрибон инсон бўлайлик. Балки унинг қўлидан ҳам иш келиб қолган кунларни кўрамиз. Ахир, Миртемирдек зукко, Шайхзодадек доно, Аскад Мухтордек синчков инсонлар уни қўллаб туришибди-ку, бир гап бўлса ажабмас, — дедилар.

Мен шунда йиглаб юборганман. Миртемир домла кўз ёшларимни артиб қўйганлар...

Шуҳрат акамга омонлиқда ҳам барибир осон бўлмади. Ўзларига хос гўзал, ҳикмат тўла ёқимтой тиља ёзган романлари ҳам, айниқса «Олтин занглашас» анча ташвиш келтириди. Иродаси метин, Ватан фидоийси, ин-

сонни севгувчи, инсон йўлида ўзини аямайдиган ушбу романнинг бош қаҳрамонига осон бўлмади. У вақтларда қаттол цензура бўларди. Улар «Олтин зангла мас»-нинг журнал вариантидаёқ зулм қилишга ўтдилар. Ҳар саҳифага гугурт қути отиб кўришар, гугурт қаерга бориб тушса, ўша ерини юлиб олиб ташлашни буюришар эди. Романинги юқори ташкилотлар ва бошқа ташкилотлар эринмай қайта-қайта ўқишиади. Корректурани кўтаришиб, у идораларга Шуҳрат акам билан бирга борардим. Чиройли тузилган асар композицияси, фабуласи, ўзбекона такаллуфлар, қаҳрамоннинг кимлигини очиш йўлидаги лирик чекинишлар асфаласўфинга учради. Асарнинг боши қаёқ, охири қаёқлигини, сюжет боғлиқ йўлларини муаллифнинг ўзлари ҳам адаштириб юборишиларига оз қолди. Шу асар «Олтин зангла мас» — менинг астойдил китобим бўлса ажабмас, деб умид қилган эдилар. Йўқ, бирор бир катта юртга тебе бўлган, мустақиллиги бўлмаган юртда бутун асар ёзиш ҳам мушкул экан. Бу мушкулотлар ҳам бекор кетмади. Шуҳрат адид ва Шуҳрат инсонни катта файласуфга айлантириди. Тўгри, у кишига қийин бўлди. Биз у кишининг яқинларига ҳам мушкул бўлди, аммо у киши тўла-тўқис вояга етказди... Эсингиизда бўлса, бош қаҳрамон қамалиб қолганда уни бир хонага олиб келишиади. Ўша нимқоронги хонага — эшикни қарсиллатиб очиб итариб киритишиб юборади... Бош қаҳрамон кўрсаки, у хонада ушбу Совет тузумининг ашаддий душмани, бош қаҳрамон бутун онгли умрини сарф қилиб унга қарши курашиб, совет тузумини мустаҳкамлаш йўлида ўзини қурбон қилиб бўлса ҳам уни янчиб ташлашга уринган одам илжайиб турибди... ...Бош қаҳрамоннинг эси олинади. Терговдаги қийиноқлар, ёлғон туҳматлар, унга қилинган адсоватлар... Ҳаммаси пуч ёнгоқдай шалдираб оёқ остига тушади. Ичида юки бўлмагани учун юмаламайди, оёқ остидаёқ қолади-қўяди.

Тавба, деб ёқа ушлар экан, ўша қарама-қаршидаги одам: — Ҳа, биродар, келадиган жоймиз-ку бир экан. Ўлганда борадиган еримиз ҳам бир... Бир миллат боласи бўла туриб ёруг дунёда бир-биримизни қувди-қувдига ўлайми? — дейди. Бош қаҳрамон турган ерида ўтириб қолади...

...Тагин билмадим-ку... инсон, айниқса ёзувчи мана шу биргина «учрашув»ни инсонларга қолдириш учун яшаса ҳам умридан рози бўлиши керақдир!..

Шуҳрат ака ҳақида айтадиган гапларим кузги ҳа-
зондай мўл-кўл. Лекин ўшандай қаттол замонда ҳам
бошқа ёқлардан кўчирма қилингган гоя, тафаккур,
дунёқарашлар миллатни миллат сифатида ўлдириб
юборишни, ўзгалар гоясига фидоийлик оқибатда ўз-
ни пайхон қилиш демаклигини билдириб-бильдирмай
айта олишлик — бу катта жасорат эди. Бу жасоратни
Шуҳрат ака баралла кўрсатди! Шу таскин менга ором
беради. Гарчи у ҳаётида оғир кунларни кўп ва хўп
кўрган бўлса ҳам, ўз ўзбек юртини:

— Ўзлигингдан қолма, ўз тўнингни кийиб юр. Отабоболаринг назарлари бошинг узра доимо кўриниб
турсин, беш кунлик ҳою-ҳавасларга япроқдай енгил
одамлар учади. Сен етти пуштингта қара! — деб огоҳ-
лантира оди.

Шундан огоҳ бўлсан, азамат ва заҳматкаш, ўзбек-
нинг чин инсони ва файласуф шоир ва ёзувчиси руҳини
абадул-абад хушнуд этган бўламиз.



ЧИН ИНСОН ВА АЖОЙИБ ИЖОДКОР ЭДИ У

ШУҲРАТ номи тилга олинганда, менинг кўз ўнгимда тоталитар Совет тузумининг аччиқ меваларини ўбдан татиган виждони пок, қалами ўткир ижодкорнинг ёрқин сиймоси гавдаланади. Зеро мен дорилфунуннинг адабиётшунос домласи сифатида унинг ижоди ҳақида лекциялар ўқигандим ва уни шахсан яқиндан билардим.

Шуҳратнинг ҳаёти ва ижодий фаолиятига доир шу вақтгача кўплаб тақризлар, мақола ва рисолалар эълон қилинган, бир неча номзодлик диссертациялари ёқланган. Мен аминманки, тадқиқотчиларимиз бундан кейин ҳам Шуҳрат ижоди сирларини ўрганишни давом эттирадилар. Мен эсам у ҳақидаги хотираларимдан фақат бир неча лаҳзаларнигина қаламга олмоқчиман.

БИРИНЧИ ЛАҲЗА

Менинг илк марта Шуҳрат ака билан танишувим Тошкентда, «Шарқ юлдузи» журнали редакциясида юз берган эди. Ўша вақтларда журналнинг бош муҳаррири вазифасида ишлаган мактабдошим Асқад Мухтор:

— Раҳимжон, мана бу киши журналимиз саркотиби Шуҳрат бўладилар, танишинг! — деб бизни таништириди. Ҳали ёш бўлишига қарамасдан қора соchlарига оқ оралай бошлаган, барваста қомат ва очиқ чеҳрали саркотиб менга йирик-йирик шаҳло кўзларини тикиб, кулимсираб боқаркан, қўл бериб кўришди. Унинг қўл бериб кўришиши, кўзларида барқ уриб турган юмшоқ табассум ўша заҳоти мени ўзига тортди. Бу табассумда унинг гойибона ўқиганим шеърларидағи тиниқлик ва дилкашлик кўриниб турарди. Шу-шу бир-биримизга хат ёзадиган, ҳол-аҳволдан хабар оладиган бўлиб қолдик...

ИККИНЧИ ЛАҲЗА

Агар янгишмасам, 1963 йилнинг ёзи эди. Мен аҳли оиласм — умр йўлдошим Полина Матвеевна ва

ўғлим Маратжонлар билан Ёзувчилар союзининг Кўк-тебелдаги ижод уйида дам олардик. Кутимагандан Шуҳрат ака билан учрашдик. Ҳордиқ чиқариш кўнгилдагидай кечди. Бунга сабаб, бир ёқдан, Қора денгизнинг кўркам қирғоғида об-ҳавонинг шифобаҳш мўътадиллиги бўлса, иккинчи ёқдан, Шуҳрат акадек доно ва дилкаш суҳбатдошнинг бирга дам олганлиги эди. Ўша кезлар «Шинелли йиллар» романининг русча нашри Москвада босилиб чиққан (1959 йил, Воениздат) ва унинг муаллифи Иттифоқ миқёсида танила бошлаган эди. Ўшанда янги шеърлар ўқиб беришдан ташқари Шуҳрат ака бизга бир-неча оқшом сурункасига ўз бошидан кечган саргузаштларни ҳикоя қилиб берган эди. Ажойиб саргузаштлар. Биз, Шуҳрат ака ижодининг муҳлислари, мириқиб тинглардик. Кейинчалик билсам бу саргузаштлар забардаст адабнинг бўлажак янги романлари «Олтин зангламас» ва «Жаннат қидиргандар» учун керакли хомаки материаллар ҳам экан. Бизнинг эшитганимиз «хамир учидан патир» эди, деса бўлади.

«Олтин зангламас» романида «Маратнинг аяси» сарлавҳали бир бобча бор. Унда асарнинг бош қаҳрамони Содиқ ва иккинчи даражали персонажлардан Адолат хола. Жаннат, Мушарраф ҳамда Мирсалим иштирокидаги воқеалар Марат номли бола образи ҳам гавдаланади. Мен ҳар гал романдаги шу бобни ўқиётганимда муаллиф томонидан зўр самимият билан чизилган бу бола (Марат) қиёфасида ўз ўғлим Маратжонни кўргандай бўламан. Ахир, Шуҳрат ака ўшанда, Кўктебелда, роман устида ишлаётганда менинг ўғлим романдаги Маратга ўхшаш 13-14 яшар шўх, ёқимтойгина болакай эди-да. Энди маълум бўлишича, бу ҳассос адабнинг диққат-эътиборидан четда қолмаган экан.

УЧИНЧИ ЛАҲЗА

Бир гал мен Шуҳрат акани Самарқандга таклиф қилдим. Ўзбекистон Ёзувчилар уюшмасининг вилоят бўлими шоир ва носир Шуҳратнинг китобхонлар билан учрашувларини режалаштирганди. Мен шулардан утласини ташкил этишга мутасадди эдим.

Қизиқ, билмадим нима учун, Шуҳрат ака пайдо бўлган жойда ўз-ўзидан шеърхонлик бошланиб, байрамона кайфият ҳукм сурарди. Алишер Навоий номида-

ги дорилфунун талабалари Шуҳрат акани қарсаклар билан қарши олишди. Мен кечани очиб, шоир Шуҳратга сўз бердим. У киши ўзбек адабиётининг аҳволини шарҳлаб, тошкентлик ёзувчилардан ким қандай асар устида иш олиб бораётгани ҳақида гапириб берди... Шундоқ қараганда оддий гаплар, лекин қулоққа ёқадиган бамаъни гаплар. Шуҳрат аканинг шоирона нутқида аллақандай сеҳр борга ўхшарди, залда ўтирганларни — каттаю кичик, эркагу аёлларни мафтун этмай қўймасди. Нотиқ одатдагидай ширали тиник овоз билан аввал Ватан, Она юрт, меҳнаткаш инсон ва ўз халқига содик, фидокор одамлар ҳақидаги шеърлари билан аудиторияни ўзига жалб этди, кейин қаторасига чин муҳаббат, садоқат ва одамгарчиликни васф этувчи бир неча лирик шеърларни ўқиб, тингловчиларни ҳаяжонга солди. Қарсаклар гумбури кенгиш зал томини кўчираи-кўчираи дерди. Мен кам деганда бир яrim соат давом этган адабий кечани «ёпиқ» деб эълон қилдим. Шунга қарамасдан, талабалар тарқалишмасди. Йигит, қизлар — қўлларида Шуҳрат ака шеърий тўпламлари, муаллифдан дасхат олиш учун шоирни ўраб олишди... Мушоиранинг давоми ўша куни кечқурун шоир Шуҳрат таклифи билан «Зарафшон» меҳмонхонасининг иккинчи қаватидаги фойеда олимлар, ўқитувчилар ва театр ходимлари иштироқида янада мароқли ўтди.

Яна бир учрашув Эски шаҳарда хотин-қизлар артелида ташкил этилди. Бу мулоқотнинг тарзи ҳам, мазмун-мундарижаси ҳам батамом ўзгача, ўзига хос эди. Артелга кириб боришимиш биланоқ Шуҳрат ака тўғри ишчилар ишлайдиган дастгоҳлар томон юрди. У ерда енг шимариб қашта тикаётган, гилам тўқиётган нозанин қизларнинг ўта чаққонлик билан ишлаётганларни қизиқиш билан кузатаркан, йўл-йўлакай уларнинг шаънига илиқ сўзлар айтар, гоҳ-гоҳда ҳазил-мугонбага кўчиб, қаҳ-қаҳ куларди... Шеърхонлик бошланиб кетди. Шуҳрат ака сурункасига уч-тўртта шеър ўқиб ташлади. Қўшиқдай жаранглайтган шеърлардан ваджга келган қизлардан бири: «Муҳаббат ҳақида яна битта бўлсин!» — деган эди, янги лирик шеърлар тўлқини дастгоҳлар ўрнашган хонани тўлдириб юборди...

Олдиндан тасдиқланган режага мувофиқ шоир Шуҳрат икки кун давомида ҳаваскор шоирлар билан амалий машгулотлар ўtkазди. Биринчи куни ҳар бир ҳаваскор билан танишиб, улар шеърларини тинглаб,

тегишли маслаҳатлар берди. Иккинчи қуни машгулот кўпроқ шеър ва шоирнинг жамиятдаги мавқеи, бадий завқ, сўз устида ишлаш тариқаси каби мавзуларни қамраб олган лекциялар тусини олди.

Энди Шуҳрат ака ташрифининг кун тартибида шаҳардаги қадимий ёдгорликларни томоша қилиш, Улугбек расадхонаси зиёратига бориш турарди. Бироқ режага таҳрир киритишга тўғри келди. Меҳмонхонадан чиқаётганимизда Шуҳрат ака қўйқисдан:

— Раҳимжон, томошага жўнашдан аввал ўша ўзимизга таниш гилам тўқувчи қизлар қошига борсак, шунга нима дейсиз? Мен уларга шеър ваъда қилгандим... — деди.

— Бўлти, шеърни шеър шайдолари тингласин, кетдик! — дедим. Жўнадик. Танаффус вақтида етиб борган эканмиз. Гилам тўқиши цехига одам сигмай кетди. Шуҳрат ака ўзининг кечаси қизларга атаб битган шеърини қойилмақом қилиб қироат қилди. Гилам тўқувчи қизларгина эмас, биз-адабиётшунос домлалар ҳам Шуҳрат аканинг ўта ҳассос ва ҳозиржавоб шоир эканлигига тан бердик. Шеър эртасига «Ленин йўли» рўзномасида босилиб чиқди. Артел маъмуриятининг шоир Шуҳратга ажойиб бир гиламча тақдим этгани ҳамон ёдимда...

ТЎРТИНЧИ ЛАҲЗА

«Мусибат одамларни жипслаштиради» деган нақл бор, тўғрига ўхшайди. 1967 йил, қиши. Мен докторлик диссертацияси устида ишни давом эттириш мақсадида меҳнат таътилини Москва яқинидаги Малеевкада ўтказмоқчи бўлдим. Қўллэзмалар билан лиқ тўла икки катта чамадон ва битта портатив ёзув машинкасини кўтариб йўлга чиқдим. Электричка Москванинг Белорус вокзалидан икки соат йўл босиб Бороково станциясига етиб келди. Буёги санаторий автобусига тушиб, яна 16 километр йўл юриш керак... Оғир чамадонларни кўтариб бир амаллаб пастга тушдим. Атроф оппоқ қор, оёқ ости сирғанчиқ. Ҳамма кутиб турган автобус томон чопади. Мен ҳам унга етиб олишим керак, акс ҳолда иш чатоқ. Навбатдагисини узоқ кутишга тўғри келади... Бор кучимни йигиб, чопдим, етиб олдим... Етиб олдиму, кўкрагимда «жиз-з» этган санчиқни сездим. Санаторийга жойлашгач, дўхтурга

мурожаат этгандим, балога қолдим. Кадиограмма «инфаркт»ни кўрсатибди. Тўшакка ётқизиб, қимир этмай ётишни буюрди... Хайрият, дўстим Шуҳрат ҳам шу ерда дам олаётган экан, жонимга ора кирди... У киши биринчи галда мени юпатди. Кейин тошкентлик рус ёзувчиси Борис Пармузин билан иккаласи мендан хабар олиб турадиган бўлишди...

Мен беморлик тўшагида ётишимга қарамасдан, ўзимни унчалик ёмон ҳис этмасдим: ётган жойимда китоб ўқийман, радио тинглайман. Сал кейинроқ ҳаттоқи кўпдан бери ўйлаб юрганим драматик достон — «Хурросон алломаси»нинг «Дебоча»си ва биринчи кўринишини ёзишга киришдим. «Фан доктори бўлишни орзу қилардим. На илож, насиб қилмаганга ўхшайди. Шунисигаям шукур, ҳеч бўлмаганда мендан аллома Умар Хайём бадиий сиймосини гавдалантирувчи шу асарим ёдгор бўлиб қолади-ку» — деган ўй-андишалар билан ўзим ўзимга тасалли берардим...

Бир куни ҳар галгидаи аҳволимдан хабар олгани келган Шуҳрат акага Умар Хайём ҳақида пьеса ёзаётганимни айтиб, унинг «Дебоча»сини ўқиб бердим. У шундай мисралар билан бошланарди:

Магрибдан Машриққа қилсангиз сафар,
Минг йиллар тубига соглайсиз назар.
Сайр этиб ўтгайсиз Шому Ҳиротга,
Богдоду Нишопур, кўхна Равотта.
«Тожмаҳал» ёнидан ўтгач, муқаррар,
Ҳиндулар ҳолидан олгайсиз хабар.
Ҳимолой чўққисин қучиб бемалол,
Ганжаю Марвга қилгайсиз гузар.
Кўргайсиз навқирон Шарқ марказини,
Улугбек юртининг кўк гумбазини,
Кўргайсиз ўзига берганин оро,
Қадимий Самарқанд, кекса Бухоро...

Хомуш мириқиб тинглаган Шуҳрат ака кўзлари пирпираб, қувониб, ўрнидан туриб кетди:

— Дўстим, мана бу бошқа гап. «Ўглимга хат ёзай, Полина Матвеевнани чақиринг, етиб келишсин!» — дейиш қаёқдаю, дабдурустдан катта бир шеърий драмага қўл уриш қаёқда! — деб мени мақтади. Драма сюжети билан қизиқиб қолди... ўзи ёзаётган роман сюжетидан бироз нақл қилиб берди... Энди гўё бевосита ижодий ҳамкорлигимиз бошланган эди...

Шундай бир эпизод сира ёдимдан чиқмайди: бир куни Шуҳрат ака ўзи ёзаётган роман қаҳрамонларидан бири — жанг вақтида фашистларга асир тушган тоҷик аскарга ўзига мувофиқ бир ном топиб берини сўради. «Шундоқ ном бўлсинки, — дер эди Шуҳрат ака, — бошқа миллат жангчиларининг номидан фарқ қиласин, яъни унинг тоҷик фарзанди эканлиги билиниб турсин». Энди мен тоҷикча номларни эслашга киришдим, катта бир варақ тоҷикча номга тўлди: Сангин, Одина, Шогадо, Табар, Теша, Шогулом, Шомансур, Гулназар, Сафар, Гулом, Газанфар, Ҳабибулло, Некадам, Назаршо, Афсаҳзод, Муҳаммадизо, Раҳимдод ва ҳоказолар. Шулардан, агар янглишмасам, «Шогадо» маъқул бўлди, шекилли, энди ҳар келганида Шуҳрат ака Шогадонинг фашистлар радиостанциясида олиб бораётган яширинча ишлари ҳақида сўзлаб берарди... Бир келганида, қарасам, у киши хафа, чехрасида ҳамишагидай хушчақчақ табассум кўринмайди.

— Тинчликми? Нима бўлди, хафа кўринасиз? — деб сўрадим.

— Нимасига қувонай?! Ахир, фашистлар Шогадони фош этишди. Уни рация орқали қизил армия қўмондонлигига ахборот юбораётганида қўлга туширишди...

— Хайр, ўзингиз тасвирлаган образ-да! — дедим.

Шуҳрат аканинг изтироб чекиши ўзи яратган образ, тоҷик йигитининг ҳалокати билан боғлиқ экан... Демоқчиманки, Шуҳрат ака кинасиз юрак ва нозиктабиат эгаси, ҳақиқий ижодкор эди...

Кунлар ўтаберди. Шуҳрат аканинг олийжаноблиги туфайли мен баъзан ўзимнинг беморлик тўшагида ётганимни ҳам унтардим. Ижод қилардим, шеър тўқирдим, қофия учун сўз ахтарардим... Шунга қарамасдан, зериккан пайтларимда ҳуш-ёдим узоқда қолиб кетган Она юртим, оилам, қавм-қариндошларим билан банд эди, дўстларимни қўмсадим. «Аҳволим оғирлашиб, бирон кор-ҳол юз берса, нима бўлади? Жонсиз жасадим аёзли ўрмонзода қолиб кетадими?» — каби нохуш хаёлларга борардим.

Беморлигимнинг ўттиз еттинчи куни бошланибдиямки, дўхтур мени уйимга қайтиш уёқда турсин, ҳатто ўрнимдан тургани қўймайди. Айни жонга теккан пайт, ичимни еб ётган эдим, Шуҳрат ака хушхабар олиб келди.

— Раҳимжон, янгилик! Бизнинг санаторияга бешолти кунга, дам олиш учун, мамлакатнинг бош тера-

певти, машҳур академик Вотчал ташриф буюрибди. Мен сизни ана ўшанга кўрсатаман! — деди у.

— Эшитганман, «Вотчал томчиси» ўшаники эмасми?

— Топдингиз, худди ўзи!

— Дам олишга келган бўлса, кўнармикин?

— Кўнади! Ана кўрасиз, кўндираман! — шундай деганча, Шуҳрат ака чиқиб кетди.

Эртасига эрталаб у чиндан Вотчални бошлаб кириб келди. Кўзойнакли, оқсоқ, кичкина соқолчаси ўзиға ярашган, узун қад-қоматли академик Вотчал эшикдан кириши биланоқ:

— Қани, кўрайлик-чи, самарқандлик паҳлавон нимага чўзилиб ётибди? — дер экан, у ўзини касал кўргани келган дўхтурдай эмас, балки кўпроқ эски қадрдан дўсти билан ҳангома қуриш учун ташриф буюрган меҳмондек тутарди.

У аввал диққат билан менинг беморлик тарихимни эшилди. Кейин мени даволаётган дўхтурдан алланималарни сўраб билди... Қўққисдан менинг қўлимдан ушлаб:

— Қани, ўрнингиздан туринг-чи! — деди. Мен ҳайрон Шуҳрат акага қарадим, у киши мийигида кулиб, «Туринг!» — деган маънода имлади. Қўрқа-писа ўрнимдан турдим, юрдим, эгилдим, ҳар хил ҳаракатлар қилдим. Ўрнимга ўтиб ётмоқчи бўлгандим, академик жиддий тус олиб:

— Энди ётиш бас, мана бу ерда ўтилинг! — деб буюраркан, санатория врачига қараб: «Мен бу ерда «инфаркт» деган нарсани кўрмаяпман! Аппаратингиз янгиш кўрсатаётганга ўхшайди. Эрта Рузадаги санаторияга элтиб беморни такрор КГ-қилдиринг. Шундан сўнг бир холосага келамиз, — деди қатъий оҳангда.

Шуҳрат ака ёнимда, врач билан бирга машинада жўнадик. Хайрият кардиограмма яхши кўрсатгич берди, «инфаркт»ни тасдиқламади. Оғир юк кўтариш сабабли ундан енгилроги «стенокардия»га йўлиқсан эканман, ўтиб кетганга ўхшайди... Академик Вотчал дўхтурни: «Беҳудага ваҳима қилибсиз» — деб койирмикан дегандим, йўқ, бундай бўлмади, аксинча «Эҳтиёткорлик қилиб тўгри иш туттансиз» — деб мақтаган бўлди... Шуҳрат ака — хурсанд, худди ўзи беморлик бистаридан тузалиб тургандай.

Халоскорим, ажойиб инсон Вотчал менинг Самарқандга қайтишимга рухсат берди. Рухсат бердию, «Фа-

қат шарт шуки, Сизга маҳсус тиб ҳамшираси ҳамроҳлик қиласди... Узоқ йўл, айтиб бўлмайди...» — сўзларини қўшиб қўйди.

Бошим қотди. «Тиб ҳамширасини қаёқдан топаман? Унинг мен билан Самарқандга учиб бориб қайтиб келиши қандоқ бўларкан?» — ўйладим мен. Яна менинг алланечук аҳволга тушиб, лол қолганимни кўрган Шуҳрат ака дардимга дармон бўлди. У киши Вотчалга:

— Ҳурматли профессор дўстим Раҳимжонни уйигача мен қузатиб борсам, нима дейсиз? — деди.

— Қани шундоқ қилсангиз, «Молодец» дейман, — деди дўхтур.

— Йўқ, йўқ! Шуҳрат ака, ахир қайтишингизга ҳали яна бир ҳафта бор-ку, мени деб... — эътиroz билдиromoқчи бўлдим.

— Ҳечқиси йўқ. Роман тугаши керак эди, тугади. Бу ерда бошқа қиласидиган ишм қолмади. Ундан кеини... янгангизни согинганман-да! — гапни ҳазилга йўйди Шуҳрат ака.

Икки кундан сўнг йўлга чиқадиган бўлдик. Менинг самолётта билатим бор, Шуҳрат ака эса сотиб олиши керак... Москвагача машинада бордик. Шуҳрат ака мени қариндошларимизникида қолдириб, билет излаб кетди. Қойил қоладиган жойи шундаки, Шуҳрат ака шу рейсга, мен ўтирадиган жойнинг қаватгинасига билет олибди. Учдик. Самарқандда кутиб олишди. Ҳамма хурсанд. Шуҳрат ака миннатдорчилик билдириб, «бир кунгагина қолинг, азиз меҳмонимиз бўласиз» — дейишига қарамасдан, бошқа пайт албатта меҳмонликка келишни ваъда қилиб, Тошкентга учиб кетди...

БЕШИНЧИ ЛАҲЗА

«Туҳмат оёқ остидан чиқади, ўғлим. Эҳтиёт бўлинг!» — дер эдилар қиблагоҳим. Мен бўлсам қулоқ осмасдим. «Шу чоллар қизиқ-да, нуқул насиҳат қилишади... Устозларим ҳурматини ўрнига қўйсам, гамхўрларча иш тутиб, шогирдлар етиштирсан, ўз йўлимда тўгри юрсан, ким менга душман бўларкан» дер эдим, парво қилмасдим. Янглишган эканман. Бепарволигим бурнимдан чиқаёзди...

1973 йил ёзи эди. Ўн йил меҳнат чекиб ёзганим докторлик диссертацияси тайёр. Ёқлашгина қолган, хо-

лос... Қўққисдан менга айб қўйишиди. Ҳазилакам айб эмас, даҳшатли: имтиҳон қабули вақтида талабалардан пора олган эмишман... Қисқаси, тергов, тинтуб бошланди. Ҳаттоқи мени ҳибс қилишиди. Мен бехабарман, кейин маълум бўлди, умр йўлдошим, додини Самарқандда эшитадиган топилмагач, Тошкентта учиби. Ёзувчilar союзида ҳам, бошқа идораларда ҳам арзини эшитадиган топилмалти. Мен билан бирга дорилфунунда дарс тинглаган бир курсдошим ҳам «Кечирасиз, зарур иш билан бандман» —деб қабул қилмапти. Ана шундан сўнг ёдига Шуҳрат ака тушиб, уйига телефон қоқибди. У киши, Арабистондан қайтган ўтини кутиб олгани чиқаётган экан, шунга қарамасдан, дарҳол машина юбориб, уйига чорлабди. Янгам Турсунопа билан биргаликда воқеа тафсилотини эшитиб, уни юпатишибди, маслаҳатлар беришибди. «Марказий Комитеттага арз қилишдан бошқа чора йўқ», — деб, ариза ёзишга кўмаклашибди...

Хуллас қалом, бошимга қулфат тушганда менинг қисматимга лоқайд қарамай, жони ачиб, ёрдам қўлини чўзган чин инсон яна дўстим Шуҳрат Олимов бўлган эди.

Юқорида айтганларимга изоҳ бериб ўтиришнинг ҳожати бўлмаса керак. Мен ўз ҳаётимда кўпни кўрдим, ҳар хил одамлар, ҳар хил ижодкорлар билан мулоқотда бўлдим. Лекин Шуҳрат акага ўхшаган олийжаноб, кўнгли очик, мушкулкушо зотни, ижодий ишда эса зукко ва донишманд инсонни кўрган эмасман. Биз «Яхшилик» деймиз, Шуҳрат аканинг менга нисбатан қилган яхшилигидан ортиқроқ яхшилик бўлмаса керак. Шу боис, мен ва менинг оиласи аъзолари бу улуг инсон ва ҳақиқий дўстни сира унутмаймиз, унинг порлоқ хотирасини абадий ёдда сақдаймиз.

ШУХРАТ БУХОРОДА

Хотиранг дафтарин, дўстим, очиб тур,
У ерда сақданар қанча ёрқин нур.
Кексалик дардидан ўзинг тут йироқ,
Кексалик тун бўлса, хотира чироқ!

Ш у ҳ р а т

Истеъдодли шоир, ширинзабон носир, закий таржимон ва мақоланавис Шуҳрат биринчи марта Бухорога 1947 йилда шоир Шукрулло билан бирга келган эдилар.

Уларнинг асосий режаси Вобкент туманидаги илгор пахтакор колхозчи — звено бошлиги Рустам Бобоев билан учрашиб, унинг ҳақида бадиий очерк ёзиш эди.

У йилларда Бухорода Ўзбекистон Ёзувчилар уюшмасининг расмий бўлими йўқ эди. Бизлар (Бухоро давлат педагогика институти адабиёт ўқитувчилари) ўзбек адабиёти кафедраси ҳузурида талабалар учун ёш шоирлар ва адабиётшунослар тўгараги, айни замонда вилоят газетаси «Бухоро ҳақиқати» таҳририяти ҳузурида ёш ижодкорлар семинари ташкил қилган эдик. Бу семинарнинг аниқ режаси бўлиб, ёш қаламкашларга мавзулар топшириб, маъruzалар қилдирав, уларнинг шеър ва ҳикояларини муҳокама қилиб, бақадри ҳол маслаҳатлар берар эдик. Онда-сонда газета учун адабиёт саҳифаси материалларини танлаб ҳам берар эдик. Таниқли ёзувчиларнинг адабий кечаларини ўтказиш, шеърхонлик кечалари ташкил этишга ҳаракат қиласлар эдик.

Шуҳрат ва Шукрулло келгандаридан ҳам газета ҳузуридаги семинаримиз аъзоларини тўпладик. Институт талабалари, «Бухоро ҳақиқати» таҳририяти ходимлари, шаҳар ва яқин туманлардан келадиган адабиёт мухлислари бу семинарга йигилдилар. Қизгин савол-жавоб бўлди, Шуҳрат, Шукрулло ва маҳаллий ёш шоирлар ўз шеърларини ўқиб бердилар. Кейин Шуҳрат ва Шукрулло Вобкент туманидаги Рустам Бобоев қишлоғига бориб, бу меҳнаткаш камтар деҳқон билан танишиб, суҳбатлар қуришди. Кейинчалик Шуҳратнинг очерки «Шарқ юлдузи» журналида босилди.

Ўша йиллари мен Бухоро ДПИда ўзбек адабиёти кафедрасига мудирлик қилиш, йилида 700-900 соаттагача дарс бериш ва ижтимоий-тарбиявий ишларни олиб бориш билан бирга, Ўрта Осиё давлат университети (САГУ)нинг сиртқи аспиранти эдим, профессор адабиёт-шунос Абдураҳмон Саъдий раҳбарлигида «Захириддин Муҳаммад Бобурнинг шеърий ижоди» мавзуида номзодлик диссертацияси устида иш олиб борар эдим. Шу муносабат билан ҳар йили 2—3 марта Тошкентта бориб турар эдим. 1947 йил охири эдими, ёки 1948 йил боши эдими, Тошкентта борганимда Шуҳрат аканинг эски шаҳардаги ҳовлиларига бордим. Бу ҳовли Эски Жўвадан латта-путта бозорига борадиган кўччанинг ўнг томонидаги тор кўчалардан бирида эди. Шуҳрат ака мени очиқ пешона билан кутиб олдилар, марҳум оталири маҳсидўзлик қилган уйни кўрсатдилар. Муҳтарама оналари билан саломлашдик. Шуҳрат ака ўз ижодлари ҳақида гапириб, бир папкани кўрсатдилар. Унда «Шинелли йиллар» романининг машинкада босилган матни бор эди. У киши менинг илмий ишим билан қизиқдилар.

Орадан кўп ўтмай, менинг диссертациям иши охирланди. Ҳимоя қилиш учун оппонентлар топиш керак эди. Биринчи оппонент фан доктори ёки профессор бўлиши керак эди. Ундайлар ўша кунларда Ўзбекистонда камчил эди. Битта профессор — ўзбек адабиёти мутахассиси — менинг илмий раҳбарим Абдураҳмон Саъдий эди.

Бу вақтлар Шуҳрат ака қайси бир идорада ишлар эдилар. Излаб топдим ва оппонент борасиди қийналаёттанимни айтдим, диссертацияни кўрсатдим. У киши бироз ўйлаб туриб, юринг, мен Сизни Ойбек домла олдига олиб бораман, у киши Ўзбекистон Фанлар академиясининг ҳақиқий аъзоси — академик, биринчи оппонент бўлишга ҳақлари бор, дедилар. Мени 1-Май кўчасидаги Ўзбекистон Ёзувчилар уюшмасига олиб бордилар ва Ойбек олдига олиб кирдилар. Муддаони айтдилар. Ойбек диссертацияни олиб, бошидан бироз ўқигач, оппонент бўлишга рози бўлдилар. Жуда ҳам хурсанд бўлдим. Иккинчи оппонентликка ўша пайтда филология фанлари номзоди, таниқли драматург Иzzат Отаконович Султонов розилик бердилар (у киши Тошкентнинг Жуковскийми, Лермонтовми кўчасида яшар эди).

Бу икки оппонент ижобий тақризларини ёзиб бер-

гач, диссертацияни ёқлаш куни белгиланди — 1948 йилнинг 21 октябрида САГУ филология факультетининг илмий кенгашида диссертацияни ҳимоя қилдим.

Тошкентта командировкаларга борганимда 1930 йилдан бери Бухородан Тошкентта келиб, шунда яшаб юрган қариндошим, уруш қатнашчиси Алижон Саидов уйида туар эдим. Ҳимоя куни қариндошим (тога-бобом) Алижон Саидов уйида меҳмонларни бир пиёла чойга таклиф қилган эдим. Шуҳрат ака ҳам келдилар. У киши Алижон Саидов билан тил топиб қизгин сұхбат қилдилар. Бир-бирларидан қайси фронтларда жанг қилғанларини, қайси госпиталларда даволанғанликларини суриштириб, эсга олишди. Матъум бўлдики, икковлари ҳам Бокуда бўлишган, бир госпиталда, турли йилларда бўлишган. Шуҳрат ака профессор А. Саъдий билан ҳам қизгин гурунглашди, у кишининг университетдаги ишлари билан қизиқди.

Шуҳрат ака иккинчи марта 1958 йилда Бухорода бўлғанлар. Мен Бухородан Тошкентта илмий командировкага келган эдим шекилли, Бухорога қайтгач, Шуҳрат аканинг келиб кетганликларини касбдошларимдан эшидим.

1962 йилда Шуҳрат ака учинчи марта Бухорога келдилар. Бу сафар Шуҳрат ака бизнинг таклифимиз билан Бухорога ташриф буюрдилар. Бундан бир ярим ой один биз студентлар билан «Шинелли йиллар» романни бўйича китобхонлар конференциясини ўтказмоқчи бўлиб, у кишига хат ёзган эдик. У киши келишга розилик бергач, Бухоро педагогика институтининг кўптиражли «Илғор фан учун» газетасида шундай эълонни бостиридик: «Яқинда ўзбек адабиёти кафедрасида ёзувчи Шуҳратнинг «Шинелли йиллар» романи бўйича китобхонлар конференцияси ўтказишга тайёргарлик масалалари муҳокама қилинди. Конференцияга институтнинг барча студентлари қатнашишлари мумкин. Романни ўқиб чиқсан ҳар бир студент, агар истаса, ўз мулоҳазазаларини айти олади. Конференция бўладиган кун ҳақида яна хабар қилинади.

Ҳурматли студентлар! Романни ўқиб, конференцияга тайёрланиб келишларингизни сўраймиз. Ўзбек адабиёти кафедраси».5

Орадан бир ой ўтгач, 1962 йилнинг 21 декабрида Шуҳрат ака Бухорога келдилар.

Конференцияга жуда кўп киши келган эди: институт ўқитувчилари ва студентлари, «Бухоро ҳақиқати» газе-

таси ходимлари, билим юрти ва ўрта мактаб ўқувчилари. Бухоро Арки жанубидаги кўчада жойлашган БДГИ биносининг мажлислар залига одам сигмай қолди.

Бу сатрлар муаллифи қисқача кириш сўзи билан конференцияни очиб, маъруза учун студентларга сўз берди. Юқори курс талабаларидан Ноила Искандарова, Сафо Қодиров, Насрулло Шукруллоевлар маъруза-лишди. Студентлардан Холиқова, Ражабов, ўқитувчилардан Олим Рашидов, Омон Сафаров ҳам сўзладилар. Шуҳратга сўз берилди. У киши институт жамоасига ва маърузачилар ҳамда баҳсада қатнашганларга раҳмат айтиб, романнинг ёзилиш тарихи, ундаги айrim ҳодисаларнинг қатнашчиси ўзи эканлиги, ҳозирги кунлардаги ижодий ишлари ҳақида гапирди, саволларга жавоб берди. Институт раҳбарияти номидан ректор мувонини, Ватан уруши қатнашчиси доцент Маъди Орипович Абдуллаев шоирга миннатдорлик билдири.

1962 йилнинг 22 ёки 23 декабрида Вобкент туманинга, Рустам Бобоевни кўриш учун бордик. Унинг укаси Даврон Бобоев жамоа раиси экан. Уларнинг уйида меҳмондорчилик бўлди. Рустам Бобоев камсукум, камгап кекса киши экан. Укаси Даврон Бобоев (унинг кўксидаги ҳам бир неча нишон бор эди) ўқтам, гайратли киши экан. Даврада Тошпўлат Ҳамид ҳазил-мутойиба қилиб, ҳаммани кулдирав эди. Мезбонлар тарихий Варахша вайроналарини кўрсатмоқчи бўлишди. Туман милицияси бошқармасининг бошлиғи Ф. Зайниневнинг енгил машинасига ўтириб, Варахшага жўнадик.

Милодий бешинчи асрда шаҳар ва ҳокимларнинг кўшкни бўлган тарихий ёдгорликлардан айrim деворлар қолган экан. Уни археолог-тарихчилар қазиб текширганлар. Йирик хом гишталардан қурилган хона деярлари кўринди.

Варахша тепалигида дастурхон ёзилди, келганлар чордона қуриб суҳбат қилишди.

Гурунглашиб ўлтирган жойдан бир гильза (ичи бўш патрон) топилди Уни қўлдан-қўлга ўтказиб, турли тахминлар айтилди. Бухорога қайтгач, меҳмонхонада (ҳозир у жой тибиёт институти талабаларининг ётоқхонаси) Шуҳрат aka дам олдилар. Эрталаб у кишининг хоналарига кириб аҳвол сўрасам, у киши бу кечада бир қанча шеърлар ёзган эканлар. Бир дафтар варагининг икки бетида «Гильза. Бухоролик дўстларимга» сарлавҳали шеърни менга бердилар. Ўттиз мисралик бу шеър шундай тўртлик билан бошланади:

Бухоро чўлида бир куни ногоҳ
Бир эски гильзага кўзларим тушди.
Кўзларим тушдию ярқ этиб нигоҳ,
Хаёлим кўп олис йилларга учди.

Шеър ўртасида шундай банд бор:

Эй, дўстим, сен бунга яхши назар сол,
Лондондан шум ният бунга келтирган.
Шу гильза ўқидир, дўстим, эҳтимол,
Отангни у йиллар қонга ботирган.

Шеър қуийдаги банд билан тугалланади:

Мен уни танийман,
Сен ҳам таниб қўй,
У йиллар бешикда йиглаган дўстим!
У йиллар даҳшатин эслай, яниб қўй,
Ва дегин: — тинчлигу меҳнатда постим!!

Шуҳрат 1966 йили ҳам Бухорода бўлган. Менинг шахсий архивимда шоир Тошпўлат Ҳамид тақдим қилган бир фото-сурат бор. Бухородаги буюк тарихий ёдгорлик Исмоил Сомоний мақбараси фонида Шуҳрат ва Тошпўлат Ҳамид суратга тушишган. Бошлирида туркманча телпак, эгниларида туркманча авра-астар тўн. Орқасида Т. Ҳамид дастхати «...ноябрь, 1966 й. Бухоро».

Шуҳратнинг 50 йиллик юбилейи Бухорода кенг нишонланди. Атоқли олим ва драматург, Ўзбекистон фанлар академиясининг муҳбир аъзоси Иззат Султон (юбилей комиссиясининг раиси) бошчилигида Шуҳрат, Абдулла Орипов ва Умарали Норматов Бухорога келишди. 1971 йилнинг 26 февралида педагогика институтининг Регистондаги собиқ биноси мажлислар залида тантанали кечак бўлди.

Кечани филология фанлари номзоди, шоир Тошпўлат Ҳамид қисқача кириш сўзи билан очди. Иззат Султон, бу сатрлар муаллифи, ТошДУ доценти Умарали Норматов, Бухоро ДПИ ўзбек адабиёти кафедраси мудири доцент Тожи Қораев ўз нутқларида Шуҳрат босиб ўткан пурмазмун ижод ва жанговар йўлни таъриф ва тавсифлаб беришди. Студентлардан Сабоҳат Тўхтаева, Ойша Ҳамидова Шуҳрат асарларини мутолаа қилишдан олган таассуротларини сўзлашди. Шоир Абдулла Орипов ўз шеърларидан ўқиб берди.

Тантанали кечадан сўнг мен меҳмонларни ўз уйимизга таклиф қилдим. Биздаги ўтиришни ҳам Тошпўлат Ҳамид бошқарди.

Эртаси куни (27 февраль) Шофирикон туманига бориши учун йўлга чиқилди. Йўл устида Ситора Моҳ хоса (Бухоро амирининг собиқ ёзлик сарои ва боғи — ўша кунларда вилоят тарих музейининг филиали)га кирилди. Махосадан чиқиб, Шофириконга бордик. Унда дастлаб Пионерлар саройида уюштирилган учрашувда бўлдик. Шундан сўнг «Шофирикон» жамоа хўжалиги клубида учрашув бўлди. Лиқ тўла катта клубга йигилган туман раҳбарлари, ўқитувчи, ўқувчилар ва колхозчилар меҳмонларни қизгин олқишлидилар. Шуҳрат шаънига тўлқинлантирувчи сўзлар айтилди, Шуҳрат ва Иззат Султонга тўн кийгизилди. Туман раҳбарларидан бирининг қабинетида зиёфат дастурхони ёзилди. Бу ишларни ташкил қилишда вилоят раҳбарларидан Абдулла Музаффаров ҳамда Шофирикон тумани ижроия қўмитаси раисининг ўринбосари Ҳакима Пўлатова фаол қатнашдилар. «Шофирикон ҳақиқати» газетасида ёзувчи ва газета муҳаррири Аҳад Ҳасаннинг мақоласи босилди.

Юбилей кунларида Бухоро вилоят газеталарида ҳам Шуҳратнинг ҳаёти, ижоди ҳамда адабий кечалар ҳақида мақола, хабар ва шоирнинг шеърлари босилди.

Бундан кейин ҳам Тошкентга йўлим тушганида Шуҳрат акани кўриш учун янги уйларига бориб, биринки соат суҳбатлашар эдим. Бир гал рафиқам Хосиятхон, бошқа дафъя шоир Тошпўлат Ҳамид билан борганимиз. Ҳар гал Шуҳрат акамнинг рафиқалари Турсуной очиқ юз билан кутиб олиб, ўзбекона лутф билан меҳмон қилар эдилар.

Шуҳрат ака ўз китобларида айримларини менга дастхатлари билан тақдим қилган эдилар (бундай дастхатлардан б китоб менда сақланмоқда). Улардаги ёзувлар муаллиф асарларининг моҳиятини тушунишга ёрдам беради. Шунинг учун айримларини келтираман. «Кечки нурлар» шеърлар тўпламига ёзилган дастхатда: «Сайджон! 60 ёшим арафасида ёзилган шеърлар бўлгани учун шундай ном қўйдим. Ҳали ойдин кечалар ҳам бўлса шояд. Самимий ҳурмат ва эҳтиром ила Шуҳрат». Шуҳрат акам тирикликларида босилиб чиқсан сўнгги уч жилдлик «Танланган асарлар»нинг ҳар уччала жилдига ҳам дастхат ёзиб берган эдилар. Шу асарларнинг иккинчи жилди — «Олтин зангламас» романига бун-

дай ёзилган: «Сайджон! Бу роман ҳаётимнинг битмас очиқ яраси ва энг севган асарим». Шу асарларнинг учинчи жилди — «Шинелли йиллар» романига мана бундай ёзилган: «Сайджон! Бу китоб ёшлигим!» Ҳар уччала дастхат ҳам 1982 йил 8 апрелида ўз уйларида ёзиб берилган эди.

Бу китоблардан олдин Шуҳрат ака ўзларининг шеърлар тўплами «Сизнинг шаънингизга» (1962) ва «Ишқингда ёниб» (1964)ни дастхат билан тақдим қилинган эдилар.

Биз Шуҳрат акам билан узоқ йиллар ёзишмада эдик. У хат ва табрикномалар кўпинча байрамлар муносабати билан яхши тилакларни изҳор қилиш мазмунида эди. Менда улардан 25 таси сақланмоқда. Уларда муаллифнинг ижодий меҳнати ва ўй-орзулари ўз ифодасини топган. Уларнинг кўпчилиги Тошкентдан, бириси Кишинев, яна бириси Тбилисидан Бухорога юбориленган.

Шуҳрат ака буюк инсонпарвар, миллатпарвар, диёнатли, жасур, Ватан ҳимоячиси, ҳақгўй ёзувчи эди. Авлодлари, дўстлари, шогирдлари ва китобхонлари хотирасида шундайлигича қолади.

ДЎСТИМ, МАСЛАҲАТЧИМ ЭДИ

Шуҳрат ҳақида гап кетганида мен у кишини ҳамиша энг қадрдан дўстим сифатида, миннатдор бўлиб хотирлайман. Шуҳрат менга — ҳам дўст эди, ҳам ака эди. Қадрдонлигимиз Шивли маҳалласига қўчиб келишган олтмишинчи йиллардан бошланган эди. Шунчалик иноқ бўлиб кетдикки, ҳар куни бўлмаса ҳам, кунора кўришиб турардик. Оилавий борди-кељди қиласардик.

Шуҳрат акам нафақат шоир, балки аллома ҳам эдилар. Турмушда дуч келадиган синовларни мардонавор енгишга даъват қиласардилар. Биронинг бошига иш тушиб қолса, худди ўзлариникидек қабул қилиб, жон-жаҳдолари билан тўғри йўл кўрсатишга ҳаракат қиласардилар.

— Турмуш асфалът йўл эмас, — дердилар доим, — у худди ўзимизнинг bog кўчасига ўхшайди. Эгри-бутрилари бор, ўнқир-чўнқирлари бор. Кўзингта қараб юрмасанг, уринтириб қўяди.

Ҳаётнинг аччиқ-чучугини тортган, нима яхшию, нима ёмонлигини билардилар. Бирор бир муаммо билан мурожаат қилса, албатта у кишининг мушкули осон бўлмагунча ёнида турардилар.

Бошимга ҳар хил ишлар тушди. Ўщанда етмишинчи йиллар эди, янглишмасам. Рафиқам билан анча нариберига бориб қолдик. Шу пайтда Шуҳрат акам озмунча изтироб чекмадилар. Бизнинг оиласи сақлаб қолишига қаттиқ интилдилар. Анча насиҳат қилдилар.

— Оилада кўп нарсалар бўлади, кечиримли бўлинглар, — дердилар. — Оила қуриш осон эмас. Сув келса симириб, тош келса кемириш керак. — Аммо барча уринишлари зое кетди. Бунда эҳтимол айб мендадир, балки айб рафиқамдадир... Рафиқам рози бўлмади. Шуҳрат акам ҳам, биз ҳам аттанг, деб қолдик.

— Бўлар иш бўлди, сиз улуғ ишларга бел боғлагансиз. Оилангиз тинч бўлсин, — деб йўл-йўриқлар кўрсатдилар. Янги оила қурдим. Шуҳрат акам тўйбоши бўлиб, Раҳмат Азизхўжаев деган адабнинг қизига уйлантириб қўйдилар. Аллоҳга шукр, турмушимиз мана чорак асрдан ошди, яхши, файзли кетаяпти.

Шуҳрат акамнинг бошига оғир мусибат тушди: юрак, қон босими хуружи билан инсультта йўлиқиб, шифохонада ётиб қолдилар. Мен бир дўст сифатида, ҳам шифокор сифатида ўз бурчимни бажариб, у кишининг ҳаётларини асраб қолдик. Дўстимнинг корига яраганимдан беадад шукрлар қилдим.

Дард жуда ёпишқоқ, инжиқ бўлади. Шуҳрат акамнинг ҳаётларини сақлаган бўлсак ҳам, дара давом эта-верди. Вақти-вақти билан даволаб турдим. Юриб кетдилар. Аммо касалликнинг асорати бир қўл, бир оёқда қолди.

Қон босимлари борлигини билардим. Бу дард кўпроқ бош мияга, юракка таъсир кўрсатади. Шуҳрат акамда кейинги вақтда кўпроқ юракка нисбатан бўлиб, аҳволлари оғирлаша бошлиди. Юрак етишмовчилиги юзага келди, авж олди. Оғир аҳвозда, яна стационарга олиб келдик. Ҳаракат қилдик, бор имконни ишга солдик, аммо эплай олмадик. Ахийри, бир соат бўлса ҳам, уйда бўлсинлар, деган қарорга келдик... Яхшиям шундай қилганимиз. Дўстим фарзандлари бағрида, ёру биродарлари даврасида, ўз уйида ҳаёт билан видолашди.

Шифокорларда бир гап бор. Турмушдаги турли аламларни ўзига олаверса, уни чиқариб ташламаса, ичига ютаверса, у бирон ердан «ёриб» чиқади. Умрларининг охирги йилларида Шуҳрат акам анча азоб чекдилар. Кейинчалик хизматлари тан олинди. Юксак унвонларга мушарраф бўлдилар. Аммо кеч бўлди.

Шуҳрат акам метин иродали одам эдилар. Шифохонада ётганларида ҳам алоҳида жой, диққат-эътибор талаб қилмадилар. Дастлабига Турсуной келинайимиз парвариш қилдилар. Кейин:

— Мени одамлардан нари олманг. Улар орасида бўлай, — дедилар. Ҳамма беморлар қаторида бўлдилар.

Шуҳрат акам туфайли кўпгина адилар, шоирлар билан танишдим. Яқин бўлиб кетдим. Шуҳрат акам қандай инсон, қандай адиллигини сафарларда бўлиб билдим.

Бир сафар Асқад Мухтор, Шуҳрат ака, мен — учовлон Қўқонга бордик. Чархий домлани зиёрат қилдик. У зот ўша пайтда Муқимийнинг ҳужрасида яшар эдилар. Тили ўткир шоир эди Чархий. Шундоқ сўзларни топар эдики, нақ мўлжалга ўқдек тегарди.

Қўқондан Ўзганга ўтдик. Адабиёт ихлосмандлари «Шуҳрат келибди» деб бирпасда тўпланишди. Уларнинг

кўзида меҳр товланарди. Шундоқ меҳрни Чортоқда бирга дам олганимизда ҳам кўрдим.

Шуҳрат акамнинг бир одати — тилни бузмасдилар. Доим: «Ё ўзбекча гапир, ё русча гапир, икковини аралаштириб юборма» дердилар. Ўз тилини, ўз элини ниҳоятда яхши кўрадиган, яхши биладиган эдилар. Суҳбатлашиб тўймасдик.

— Китоб ўқиётганингизда бирорга нотаниш, ноаниқ сўз учраса, албатта шу сўзнинг магзини чақиб, кейин ўқишини давом эттиринг. Тушунмасдан зинҳор китоб ўқиманг, — дердилар. «Шинелли йиллар» романини қайта-қайта ўқийман. Ҳар гал Шуҳрат акани янгидан кашф қиласман. Янги қирраларини топаман.

Шуҳрат ака ҳаётни, одамларни севардилар. Одамлардан ажралишни истамасдилар. Маҳаллада ҳам улфатнинг жон-дили эдилар. Ҳар биримизнинг қалбимизда меҳрни, оқибатни экиб кетгандар. Бу ниҳоллар асло сўлмайди.

Бугун Шуҳрат акамни соғинсам уйларига бораман. У кишининг рафиқаси Турсун келинойини зиёрат қиласман. Фарзандлари Фикрат, Хондамир, Бобуржонларни кўраман, суҳбатлашаман. Назаримда, Шуҳрат акамирикдек. Назаримда, барчамизни меҳру оқибатта чорлаётгандек!

Дўстим, акам, ўз элининг фидойиси Шуҳрат юрагимда ана шундай қиёфада абадий муҳрланиб қолдилар.

Яна нима дейман?! Кимки Шуҳрат акамни бир оғиз яхши сўз билан эсласа, умри узоқ бўлсин, баҳти бўлсин!

ФИДОИЙ

Яхшиларни эслаш бир савоб бўлса, ўтганларнинг яхши фазилатларини эслаш ҳам бир савобдир. Пайгамбаримиз: «Ўтганларнинг яхши сифатларини эслаб юринглар» деб марҳамат қилган эканлар.

Шуҳрат аканинг газалларини жуда ҳам яхши кўраман. Эсимда, телевизор энди расм бўлаётган пайтлар эди. Бир оқшом Шуҳрат, Туроб Тўла, Гулчехра Нуруллаевалар шеърхонлик қилишди. Раҳматли аёлим:

— Яхши шоир экан Шуҳрат. Шеърларини қаранг, худди жилгага ўхшайди. Бирон жойида қоқилмай эшиласиз, — дедилар.

Унгача Шуҳрат аканинг «Шинелли йиллар» романини ўқигандим. «Наҳотки, шу дилбар романни ёзган одам Шуҳрат шеърлар ҳам битса» деб ўйладим. Излаб, кўпгина шеърий китобларини топдим. Билдимки, Шуҳрат насрда қанчалик ёрқин бўлса, назмда ҳам шунчалар дилдор экан.

«Сенинг севгинг» номли китобга кирган «Сени севдим», «Қалбимни қайтар» шеърлари менга ниҳоятда ёқди, ниҳоятда мусиқабоп экан. Иккала қўшиқ одамларнинг севимли ашуаларига айланиб кетди. Концерт берадиган бўлсам, то шу қўшиқларни айтмагунимча қўйишмасди.

Бир куни Жалолхон Махсумовнинг — атоқли рентгенолог шифокор у киши — уйида бўлдик. Шуҳрат aka рафиқалари билан келдилар. Бир рус профессори ҳам бор экан. Дўхтур янги айвон қурган эканлар, ўша айвонда ўтиредик. Мен «Сени севдим» қўшигини ижро этдим. Қувончимдан ўзимда йўқ эдим: қўшиқ барчага бирдек таъсир этган эди! Ҳатто рус профессор:

— Ё овозингиз ниҳоятда ўткир, ёки янги айвонда жуда жаранглаб чиқди. Бунақа овозни эшитмаган эдим, барака топинг! — деди.

— Яхши қўшиқ бўлибди, — деди Турсуной янга.

Шуҳрат aka ўрнидан туриб менинг ёнимга келди. Багриларига босиб:

— Яшанг, бошим осмонга етди, — дедилар.

Шу-шу икковимизнинг ижодий, инсоний муҳаббатимиз бошланди.

Шуҳрат аканинг уйларида, тўйларида жуда кўп марта бўлганман. Шу мўътабар хонадонда нон-туз еганман. Шеърларни сиёҳи қуримай эшигтанман.

Шуҳрат ака ниҳоятда эътиборлик инсон эдилар. Бир йигин қиласиган бўлиб қолдим. Домлани ҳам айтдим. Шуҳрат ака миннатдор бўлдилар.

— Фахриддинжон, мен сафарга отланиб турибман, агар кетмасам, хонадонингизга энг биринчи бўлиб кириб бораман, — дедилар.

Шуҳрат акам сафарга кетдилар. Келолмадилар. Лекин тўй куни почтачи телеграмма олиб кеди. Ўша борган ерларидан жўнатибдилар. Келолмаганларига узр сўраб, табриклаб, сўнгида «Сизни севган шоирингиз Шуҳрат» деб имзо чекибдилар. Ана эътибор, ана муҳаббат! Ўша куни юрагим тўлиб-тошиб юрдим.

Инсон боши — сойнинг тоши, дейдилар. Не-не кунларни кўрмадик. Шуҳрат ака ҳам ана шундай кунлардан «бебаҳра» қолмадилар.

Шуҳрат ака беназир ижодкор эдилар. Мен у кишининг рубоийларини Бобурга таққослайман. Ўша тиниқликни, ўша ўт-оловни Шуҳрат аканинг рубоийларида кўраман. Шоирликларини, шеърлари таҳлилини — адабиётчиларга қўяйлик, ўзим гувоҳ бўлган воқеалардан сўзлайн.

Шуҳрат акам оналарининг 80 йиллигини ўтказдилар. Ўшанда чамаси олтмишинчи йилларнинг охирида мен ҳақимда гап-сўзлар тарқалиб, мени бир четга суриб қўйишганди. Ўша тантанада кўп созандаю хонандалар йигилганди. Даврани яна бир катта шоиримиз Туроб Тўла бошқарди. Туроб ака қўшиқ навбатини биринчи бўлиб менга бердилар. Мен туриб ҳурмат сақлаган ҳолда:

— Тўйда меҳмонлар бор, биринчи бўлиб ўшалар бошлаб беришса, кейин мен хизматда бўлсам, — дедим.

Фаттоҳхон ака даврага тушдилар. Тўйда ўша пайтдаги раҳбарлардан бири ҳам бор эди. Фаттоҳхон ака ўша кишининг сўзлари билан қўшиқ айтдилар.

Навбати билан мен ҳам она ҳақида бир жуфт қўшиқ айтдим. Жамоанинг талаби билан яна бир жуфт, кейин яна бир жуфт ижро этдим. Қўшиқлар сўнгида раҳбар мени ёнига чақирди.

— Сени жуда ҳурмат қиласман, — деди у киши, —

сендаги истеъдодни, муҳаббатни, санъатни жуда қадрлайман, — деб беш-олти оғиз гапирди.

Шуҳрат ака эшитиб турган эканлар, қадаҳни кўтариб, яқин келдилар:

— Сўзларингиз ростми?

— Рост, мен икки хил гапирмайман, — деди раҳбар.

— Биз, сиз бу ҳофизни қисиб қўйгансиз, деб эшитдик-ку, — дедилар, Шуҳрат ака.

— Менда ҳеч гап йўқ, — деди раҳбар қизишиб, — мен бу йигитни яхши кўраман. Доимо бағримда олиб юришга тайёрман.

Шуҳрат аканинг мардлиги, одамийлигига шу куни яна бир бор тан берганман. Эл ичида мени номимни оқлаб олишга, обрўйимни кўтаришга интилишларини қарант!

Шеъриятнинг ўлмаслигига, умри боқийлигига яна бир карра амин бўлганимни айтай. Бир тўйда бир киши келиб, илтимос қилди:

— Фахриддин ака, иложи бўлса «Қалбимни қайтар» ашуласини айтсангиз. Бир эшитсак.

— Хўп бўлади, — деб қўлимни қўксимга қўйдим. Ижро этишни бошлаганимда ўн-ўн беш чогли одамлар биз ўтирган сўрига яқин келишди. Бояги йигит сўрининг пиллапоясида ўтириб эшитарди. Қўшиқнинг авжига чиқадиган бир жойи бор. Шу ерга келиб, авжига чиққанимда, ўрнидан туриб кетди.

— Ох, — деди у, — ҳали ҳам ўша-ӯшасиз, ака.

Келасолиб бағрига босиб раҳматлар айтди. Йигилганлар мени миннатдорчилликка кўмиб юборишли. Шу олқишларнинг дастлабкиси Шуҳрат аканини!

Ривоят қиласидиларки, бир юртнинг боғига арслон оралабди. Ҳар куни бир одамни еб кетаверибди. Шоҳ учта мукофот белгилабди. «Кимки шу арслонни даф этса, мукофотланади» деб жар солдирибди. Хуллас, бир йигит чиқиб арслонни даф этибди. Вазир ҳайрон: қайси мукофотни бериш керак? Таваккал қилиб биринчи мукофотни олиб чиқибди. Шоҳ кўз қири билан: «Иккинчисини олиб чиқ» деб ишора қилибди. Йигитни қилган хизматларига рози айлаб жўнатишгач, вазир сўрабди:

— Биринчи мукофотни шу йигитта бериш керак эди-да. Нега бермадингиз?

— Биринчи мукофот менинг айбимни, камчилигимни айттан кишига аталган, — дебди шоҳ.

— Бу мукофот ҳеч кимга насиб этмас экан, — дебди вазир.

Шуҳрат ака ҳаётида ана шундай шижаат кўрсатди. Бирор гул кўтариб бориб, сизга роҳ қазиб келса, Шуҳрат ака жуда кўпларни ўз сўзи билан, шеъри билан тўғри йўлга солиб юборган. Ҳозир ҳам у кишининг пок руҳлари шундай қиляпти.

Шуҳрат аканинг бир шеърлари бор:

Мен ўтиб кетаман, сен кейин қолиб,
Ҳақимда рост сўзни айтиб юр, шеърим.
Дўстимнинг багрига бошингни олиб,
Рақибга тош қаҳрим отиб тур, шеърим.

Ҳали сен неча уй, неча хонага,
Менингсиз бир ўзинг меҳмон бўласан.
Баъзилар талқинлаб турли маънода,
Фашингта тегади, аччиқ куласан...

«Мен Фахридинни шунинг учун яхши кўраманки, у шоирнинг қалбини тушуниб қўшиқ қилиб айтадиган ҳофиз. Газалнинг зеру забарини бузмайдиган ҳофиз», деган эди шоири дилбандимиз. Менинг баҳтим шундаки, Шуҳрат ақадек фидоий инсонга замондош, ҳамнафас бўлдим. Менинг баҳтим шундаки, Шуҳрат аканинг шеъри кириб борган хонадонга, овозим ҳам кириб боради. Шеърга, қўшиққа содик Шуҳрат аканинг руҳига ҳамиша таъзимдаман.



УМР КАРВОНИ...

Йигирма йиллар муқаддам мен бу хонадонга илк марта кириб борганимда, Шуҳрат ака нуронийлик баҳш этувчи қордай оппоқ соchlарига қарамай гоят ўқтам, магур қиёфада кўринган эдилар. Шунда домла олтмишни қора-лаёттандилар. Ўтган йиллар домланинг соchlари каби, юзларига, серсавлат келбатларига соя ташлади, хасталик қўлларига асо тутқазди. Гарчи кейинги йилларда мен домлани кўпроқ кўрган ва узокроқ сұхбатлашиш имконига эга бўлсанм-да, Шуҳрат ака кўз олдимда ўша-ӯша ўқтам қиёфада жонланиб қолдилар.

Одатда ёзувчи билан унинг асари бош қаҳрамонларининг ташки кўринишларида умумият, мутаносиблик кўп бўлавермайди. Нақл қиласидиларки, ҳамиша хаёлий, гўзал қиёфаларни тасвирлаган, «Қизил елканлар» асари муаллифи Александр Грин жуда хаста, гариб ва жуздур ҳаёт кечирган экан. Ёки деярли барча Отабек деб тасаввур этадиган улугимиз Абдулла Қодирий қаҳрамонларидек у қадар хушқад бўлмаган эканлар. Хуллас, изласа мисоллар кўп. Аммо Шуҳрат ака, Элмурод, Содик, Умматалиларга ташки портретни ўзлари кабилардан умумлаштирганлари учунми, назаримда, қаҳрамонлари муаллиф билан уйғунлашиб кетгандай ёки муаллиф қиёфаси ҳамиша қаҳрамонлари орқали жонлангандай туюлади. Дарҳақиқат, ҳар жиҳатдан шундай. Шуҳрат домла — Элмурод, Шуҳрат домла — Содик, Шуҳрат домла — Умматали. Фақат айrim романний тафсилотларда фарқ бор, холос. Шуҳрат аканинг бу дунёдан кўз юмганларига қарийб беш йил бўлди. Мен уларни буюклар қаторига қўшмоқчи эмасман. Зоро ўзлари ҳам ҳеч қачон бундай даъвода бўлмаганлар. Аммо ижодий ва инсоний заҳматларининг озроқ-қина гувоҳи бўлганим учун баъзи хотираларим, кузатишларим ва мушоҳадаларимни айтмоққа бурчлиман.

1975 йил 24 август кечагидай эсимда... Мен Тошкент Давлат университетининг филология факультети талабалигига қабул қилинди. Чамаси беш юзтадан ортиқроқ абитуриентлардан йигирма бештаси химия факультети биноси тепасидаги карнай орқали ичкарига

таклиф этиляпти. Табриқдан сўнг турли ҳужжатларни тегишли хоналарга топшириш ва гўёки талабаликка қабул қилинганигимиз эвазига эртасига ёқ шаҳар атрофи даги хўжаликлардан бирига «овош»га бориб ёрдам беришимиз кераклиги хусусида йўриқ олиш учун қатор тизилишиб турибмиз. Ёнимдаги соchlари хурпайган, калладоргина, балогатта ўтиш палласи барчада табиий бўлганидек, камина ҳам бундан мустасно эмасди, ўспирин йигит билан бир-икки сўз алмашдик. Сўнг таниша бошладик. Йигит Бобур дея исмини айтди. Яқиндан танишиб билсам, шоир Шуҳратнинг ўғли экан. Талабалик баҳтидан гангид турганимдан бу маълумот янада каловлантириб юборди. Ахир кимсан «Олтин зангламас», «Жаннат қидиргандар», «Беш кунлик куёв»ни ёзган ёзувчи Шуҳратнинг ўғли билан бирга ўқиш бу шунчаки оддий ҳодиса эмас эди мен учун.

Ўша йиллардаги талабалик умрининг teng ярми «овошу» «пахта»да ўтарди, десам муболага эмас. 30 августда Ҳасанбойдаги «овош»дан қайтиб, бир ҳафта ўқишини бошлар-бошламас, Янгийўлга узум тергани кетдик. Бир ой чамаси ўтгач, қайтиб, уч кунгина уйда бўлиб, Сирдарёга «пахта»га жўнадик. Куни эсимда йўқку, ҳар қалай янги йилга қадар «Оқ олтин» тумани далаларида «жавлон урдик». Мана шу паллаларда ўғлидан хабар олгани келган Шуҳрат акани яқинроқдан кўрдим ва танишдим. Илк таассуротим: Шуҳрат ака ниҳоятда пурвиқор, савлатли ва мендан жуда узоқда кўринарди.

Биринчи семестр бошланганда, илк бор «дарс тайёрлаш учун» Шуҳрат ака хонадонида бўлдим. Домла йўқ эканлар. Бобурни қистай-қистай ёзувчининг иш кабинетига кирдим. Кирдиму китобларнинг кўплиги ва зўрлигидан оғзим очилиб қолди. Гўё сим-сим горидаги хазинага кириб қолгандек ҳайратда эдим. Кечроқ домла келдилар. Ва ўша куни илк бор дастхатли китоб олдим: «Ўғлимнинг ўртоғи студент Шуҳратга шоир Шуҳратдан эсадалик». Бу шоирнинг 1973 йил нашр этилган «Лирика» тўплами эди.

Шу тахлит «дарс тайёрлаш» баҳона Шуҳрат ака хонадонига тез-тез бориб турдим. Деярли ҳар йили янги дастхатли китоб совга қиласдилар. Ҳозир китоб жавонимни кўздан кечирсам, биз танишган 1975 йилдан то умрлари охиригача ўтган 19 йил давоми йигирмага яқин китоб совга қилибдилар. Улар шеърий тўпламлар, сайланмалар, насрый асарларнинг алоҳида

нашрлари ва ҳоказо. Бир неча йил аввал Шуҳрат ака ҳақида ёзган мақоламда улар чоп этдирган китобларни хомчӯт қилиб, ярим асрлик ижодлари давомида 50 та китоб чиқарганларини аниқлаган эдим. Шунда ёзган эканман: «Бу бир инсон умри давомида қилиши мумкин бўлган ишдан бир неча ҳисса ортиқ бўлса борки, кам эмас». Дарҳақиқат, шундай! Айни чогда таъкидлаш жоизки, Шуҳрат аканинг шу қадар ижодий маҳсулдорлигига китобхон эҳтиёжи ҳам бор эди. Мен домланинг бирор китоби дўкон пештахталарида чанг босиб ётганини билмайман. Аксинча, ҳатто у қадар харидоргир бўлмаган шеърий тўпламлар ҳам Шуҳрат қаламига мансуб бўлса, қўлма-қўл бўлиб кеттанига далиллар кўп. Сабаби, бу шеърлар самимияти, оҳангдорлиги, китобхон қалбига тез етиб бора олиши билан ҳалқимиз ўртасида машҳур. Ўзбекнинг тўю томошаси, кую қўшиги Шуҳрат шеърлари билан ҳам қўркли, файзу футуҳлидир. Бунга ўзим бир неча бор гувоҳ бўлганим учун ёзяпман.

90-йилларнинг бошларида бир муддат Аброр Ҳидоятов номидаги театрда адабий эмақдош бўлиб ҳамкорлик қилдим. Шу кезлар театрнинг ёш актёrlари аксарият тайёр томошаларга ёки «боиси тирикчилик» тўю зиёфатларга бориб туришарди. Деярли барчаси мендан Шуҳрат аканинг шеърларини топиб беришни сўрарди. Шоирнинг менга тақдим қилинган бир неча дастхатли шеърий тўпламлари шу тариقا машҳур актёrimиз Эркин Комиловда қолиб ҳам кетди.

Шуҳрат ака умр бўйи шеър ёздилар. Ижодий таржи-маи ҳол шеър билан бошланиб, шеър билан якун топди. Наздимда домла бошлаб шоир сифатида эътироф топганлари учунми, ўзларини ҳамиша шоир ҳис этардилар. Шеър Шуҳрат аканинг кўнгил эҳтиёжи, тиласи, тиркаги эди. 80-йилларнинг бошларида оғир хасталикка дучор бўлгандан кейин, қўлларида икки-уч сониядан ортиқ қалам тутолмай қолганларида ҳам шеър ёзмай туролмадилар. Қийналиб, ҳориб, ҳижжалаб бўлса-да, шеърий сатрлар қогозга тушарди. Шеър том маънода ҳаётий эҳтиёж, мадад ва тиргак эди. Қуйидаги сатрлар сўзларимга шоҳидлик берса ажабмас:

Кечаги кунларим шеъримда қолди,
Эртаги куним ҳам унда қолади.
Мен ўзим кетаман! Ўлимим олди,
Энг сўнгти онимни шеърим олади.

Мана шу тўртликни ҳар гал, қайта ўқирканман, бир фикр хаёлимдан ўтади. Бу қадар ишонч ва қатъият қаердан?! Хаста ҳолдаги домлада бундай фикрий ўқтамликни қандай изоҳлаш мумкин?! Умуман Шуҳрат домланинг қай бир шеърини олиб кўрманг, шубҳа, иккиланиш кайфиятини сезмайсиз. Аксинча, фикр аниқ ва у ҳамиша ҳукм тарзида ифода этилади. Бу, назаримда, домланинг инсоний табиати, маслак, ишонч ва эътиқодининг мустаҳкамлигидан бўлса керак. Ана шу қатъиятли табиати боис Шуҳрат aka кўп қийинчиликларга дучор бўлди, неча бор тўғрилик ва тўгрисўзликнинг аччиқ меваларини терди. 50-йиллардаги қатагон билан боғлиқ кечмишларини айтмасак ҳам барчага маълум. Бироқ 60—70-йиллардаги хуружлар ва камсишишлардан ҳамма ҳам боҳабар бўлмаса керак. «Олтин зангламас»нинг бир қисми «Шарқ юлдузи» журналида эълон қилингач, давоми бир неча ой тўхтатиб қўйилди. «Жаннат қидирганлар» романи эса шўро воқелиги га зид, тухмат дея айрим танқидчилар томонидан қораланди. Бир чеккаси журъатли романлари, яна бир ҳақиқатгўй устози Абдулла Қаҳҳорга садоқати учун расмий доиралар эътиборидан четда юрди...

1978 йил баҳори хотирамдан сира ўчмаса керак. Домланинг 60 йиллик таваллуд саналари нишонланиши арафалари эди. Ўша кезларда шундай саналар тантаналарига яқин «юқори»нинг фахрий унвон ё тақдирлаш ҳақидаги фармони эълон қилинар эди. Шуҳрат акага авлоддош ижодкорлар бирин-кетин иттифоқ миқёсида орден ва «Халқ шоири» ёки «Халқ ёзувчиси» фахрий унвонлари билан тақдирланаётган эдилар. Бунинг учун, бошлаб, албатта, «катта»нинг қабулига кириб чиқиши лозим эди. Шуҳрат aka шу ишни ўзларига эп кўрмадилар. Шунча азобу, қийинчиликларга дучор бўлиб, ноҳақ тазиикларга учраб ҳам улардаги инсоний гурур, иззату андиша зарра йўқолмаган экан. Оқибат бўйинсунмаслик эвазига «Хизмат кўрсатган маданият ходими» унвони ҳақида фармон чиқди. Шуҳрат aka хабарни эшитиб, бир жаҳландилару, аммо бошқа бу мавзуга қайтмадилар. Жаҳлангандаги ҳам айтган сўзлари шу бўлди: «Ҳали Мирзакалон Исмоилийлар «Халқ ёзувчиси» бўлмади-ку, бизга қаёқда?! Аммо менинг хизматларимни кутубхоначининг хизматларига тенглаштиришгани галати!»! Бироқ бу аlam кўнгилга харсанг тош мисол чуқур чўккан эди. У қайтиб бошқа ташларига чиқмади, аммо орадан кўп ўтмай асоратини

кўрсатди. Домла «инсульт» деган бедавороқ бир дардга йўлиқдилар. Узоқ муолажаларга қарамай, бу дардан батамом форигланиб кета олмадилар.

Ўша 60 йиллик юбилейдаги яна бир нарса хотирамда жонланади. Тантаналар Муқимий номидаги мусиқали театрда ўтди. Табрик ва қутловлардан сўнг домланинг «Она қизим» номли пьесалари намойиш этилди. Кечанинг тантанали қисми якунида Шуҳрат акага якуний сўз берилди. Шунда домла ўзларига хос виқор билан, қатъий оҳангда айтдилар: «Ўзбек балки қачондир моддий жиҳатдан қашшоқ бўлса бўлгандир, аммо маънан ҳеч қачон қашшоқ бўлмаган. Маданияти, адабиёти ҳамиша бой бўлган. Ҳозир ҳам шундай ва бундан кейин ҳам шундай бўлишига ишонаман!» Ўша кезлар шу гапни айтиш учун ҳам анчагина журъат керак эди.

Умуман Шуҳрат ака адабиётимиздаги энг журъатли адиллардан эдилар, десам хато бўлмайди. «Олтин зангламас» ўзбек адабиётида қатагон йиллари ҳақидаги биринчи роман ва яқин-яқинларгача ягона роман бўлиб турди.

Ким билсин, ижтимоий ўзгаришлар бўлмаганда яна қанча вақт «ягона» бўлиб туради. «Олтин зангламас»ни ўзга фазилатларидан қатъи назар муаллифнинг фақат ижодий жасорати учун ҳам ўзбек романинг мумтоз намуналари қаторига қўшса арзиди. Чунки қатагон йилларини эслаб, ҳанузгача шивирлаб гаплашадиган одамлар бор. Бошидан шунча уқубатларни ўтказиб келиб, танасидан Шимол қаҳратонларининг заҳри кетмай, шулар ҳақида ошкора ёзиш бу ҳазилакам гап эмас эди. Тўғри, илимилиқ даври умумитти-фоқ адабиётида, хусусан рус адабиётида шахсга сигиниш йиллари иллатларини фош этган бадиий бақувват асарлар анчагина яратилди ва баъзилари асосан Александр Твардовский раҳнамолигида «Новый мир» журнали саҳифаларида эълон қилинди ҳам. Аммо бу тоза нафас Россиянинг чекка совет мустамлака ўлкаларида бир эпкин бериши мумкин эдию, аммо, давомчилари пайдо бўлиб, шундай интилишлар бўлишига йўл қўйилиши даргумон эди. Буни жуда яхши билгани учун Абдулла Қаҳҳордек забардаст адаб ҳам қатагон мавзуидаги «Зилзила» асарини тўхтатиб қўйган бўлса эҳтимол. Ана шу шароитда Шуҳрат ака «юрак ютиб» «Олтин зангламас»ни яратди. «Олтин зангламас»даги ҳаётни мен яхши биламан, — деб ёзади адаб ўз «Таржимаи ҳолида», — улар мен билан бирга бўлган,

менга учраган кишиларнинг ҳаёти. Мен ҳаётнинг атрофига эмас, нақ ичида бўлганман. Бу мавзуда бирон нарса яратмасам, кўнглим ўрнига тушмас эди. Буни вижданим тақозо этарди». Дарҳақиқат, адаб виждан бурчини бажарди. Ҳалол, покиза, фидойи бир инсоннинг қуруқ тухмат ва бўхтонлар туфайли чеккан машиққатларини тасвирлаб, ўзи ва ўзи билан тақдирдош бўлган юзлаб, минглаб Сталин лагерларида бегуноҳ жабр тортганларнинг эл-юрт ва фарзандлари олдида юзларини ёруг, қаддини баланд кўтариб юришларига бадиий бир шаҳодатнома берди.

Романинг қайта варақлар эканман, Шуҳрат ака билан сўнгти учрашувлар, суҳбатларни эслайман. Охирги йилларда касаллик туфайли юришга, сўзлашишга қийналишларига қарамай кўп ўқирдилар ва менинг қатагон даҳшатлари, тоталитар тузумнинг аввало ленинзм гоялари билан бошлангани ҳақидаги янги-янги далиллар асосида гоҳи лол бўлиб, гоҳи газабланиб айтган сўзларим ёки сўровларимга «барчаси ўтар экан» дегандек, қўлларини силкиб қўя қолар эдилар. Шуни ўйлаб, ўз-ўзимга савол бераман: Агар «Олтин зангламас»ни адаб ҳозир янгитдан ёзса, қандай бўлар эди? Менимча, домла баъзи жузъий ўзгариш ва таҳрирларни демаса, ўшандай ёзган бўлар эдилар. Негаки Содик нинг ҳаёти — Шуҳрат аканинг ва у кабиларнинг ҳаёти. Содик 1936 йилда қабул қилинган Сталин конституциясини «жаҳонда тенги йўқ демократик ва инсонпарвар конституция» деб билгани, «коммунизмни олий ҳаёт» тушуниб, фарзандлари унда яшашига муқаррар ишонгани, партиядан ўтганини ўқиб, умрида биринчи марта ҳўнграб йиглагани каби унга тенгдош авлод ва ҳатто кейинги яна бир неча авлод кишилари ҳам Шўро ақидаларига шубҳа билдирамай яшадилар. Романдаги маҳорат билан топиб тасвирланган вазият ва ҳолатларда, яъни Содик фуқаролар уруши йиллари босмачи-душман, деб курашган Диловархўжа қўрбоши билан ҳамоқда юзма-юз кўришганда ҳам, ноҳақ жазодан гинахонликка берилмай аксинча «эл-юртга нафи тегар» деб сургунда вижданан ишлаганида ҳам, болаларча соддалик билан «келажакка хатлар» ёзил, девор пойдеворига териб юборганида ҳам ва ҳатто иккинчи жаҳон уруши жангтоҳларида жасорат кўрсатганида ҳам унинг ўша ақидаларга эътиқоди сусаймайди, балки мустаҳкамланади, ишончи барқарорлашади. Содик каби кишилар эътиқодидан қатъи назар ҳурматга сазо-

вор шахслар. Дунёда эзгулик уруги завол топмай яшаётган экан, инсонийлик, меҳр-мурувват, олийжабоблик бор экан, бу Содиқ мисол одамларнинг шарофати. Унинг садоқати, содиқлиги аслида коммунизм тушунчаси билан пардаланган инсоний ақидаларга қаратилгандир. Вижданли, диёнатли кишилар шўро ақидаларини шундай тушуниб келдилар.

Иирик романлари ёзилиб турганда ҳам, қатор қисса ва пьесалари чоп этилиб, театр саҳналарида ўйналиб турганда ҳам Шуҳрат домла қалбини шеър, шеърий оҳанг тарқ этмади. Матбуотда ёки мўъжаз китобчалар шаклида шоир шеърлари мунтазам босилиб турди.

Адид саксонинчи йилларнинг бошларида беназир шоир, сўфий Бобораҳим Машраб ҳақида роман ёзиш тараффудига тушдилар. Узоқ ўрганиш ва изланишлардан сўнг ниҳоят асар устида иш бошланиб, яримлай деб қолганда, ўтмиш йиллар азоблари, уруш асоратлари ўз ишини қилди. Домла ўша айтганимиз — бедаво хасталикка йўлиқдилар. Узоқ муолажалардан бироз дармонга кирганларида энди иирик асарларга қувватлари келмаслигини сезиб, фақат шеър билан бўлдилар. Оиласлари тириклик тиргаги бўлган эса, шеърият маънавий суюнч, ҳамдаму ҳамдард бўлди. Сўнгти ўн йилда бирин-кетин «Кечки нурлар», «Ҳали тун узок», «Ёшлигимнинг давоми», «Қалбим жилоси» каби ўнга яқин шеърий тўпламлар дунё юзини кўрди. Уч ва иккни жиҳдлик «Сайланмалар»и нашр этилди.

Шуҳрат ака умр сўнгларида замона «ўйин»ларидан чарчаган нуроний файласуф таассуротини уйготар эдилар. Сўнгти йилларда ҳақиқатан ҳам аксар фалсафий шеърлар ёздилар, авлодларига беозор, ҳикматли панду-ўгитлар багишладилар.

Бу йўлдан ўттанлар бедисоб, сонсиз,
Биридан шон қолган, биридан армон.
Сен ўтмоқ истасанг кўз ёш, армонсиз,
Аввал бил нимадир яхшию ёмон!

Қайта қуриш алғов-далғовлари барчанинг кундалик мавзуига айланганда, Шуҳрат домла буюк Саъдий ҳикматини эслаб, «ин ҳам мегузарад» дегандек қўл силтаб қўярдилар. Фақат шу кезлари қатағон ва тургунлик йиллари губоридан форигланган буюк Чўлпон, Фитрат, Элбек, Ботулардан сўз кетса, лоқайдик ўрнини ҳаяжон эгаллаб, қийналиб бўлса-да, хотиралар сўйлашга тушардилар.

Мен ўша кезлар Ойбек уй-музейида ишлаб турганим учунми ёки авлоддошлари ичида Ойбек домла ижоди ва шахсияти кўпроқ ўзига тортармиди, ҳар қалай Шуҳрат акадан шу мавзуга оид хотираларни сўрайверадим. Улар эса хотираларини, ёдларига келган янги-янги маълумотларни гапириб берар эканлар, ҳамиша бир мулоҳазани таъкидлаб ўтардилар: «Ойбекни шеърларига яхши эътибор қилмаяпсизлар. У прозадаям, поэзиядаям шоир эди. Шеърларини ўқинг, шеърларини...»

Дарҳақиқат, Ойбекнинг шеърият дунёси ниҳоятда ўзига хос, сирли ва жозибали ҳодиса. Шуҳрат аканинг шеър услуби, йўли, йўналиши бошқачароқ бўлса ҳам улар ҳақиқий шеъриятни қай шаклда бўлишидан қатъи назар ҳамиша юксак қадрлардилар. Ҳали соглом пайтлари бир куни нима сабабданdir Бобурни йўқлаб уйларига борсан, ишлаб ўтирганларини айтишди. Бирор соатлардан сўнг қўлларида кўзойнак, иш хоналаридан чиқиб келдилар. Саломлашиб бўлгач, қандай иш билан банд эканларини сўрадим. Грузинларни ўтган асрдаги классик шоири Николаз Бараташвили шеърларини таржима қилаётганларини айтдилар. Яна ўша ўқтамлик билан: «Бор-йўғи ўттиз еттига шеъри маълум, аммо ҳар бири бир дунё. Шу кичкинагина тўплам бўладиган шеърлари билан жаҳон адабиётига кирган шоир. Грузинлар ҳам шеърни, шоирни қадрини биладиган ҳалқ. Умуман ҳақиқий шоир бир сатриданоқ билинади. Фақат бир-икки мисраси билангина шуҳрат топган шоирлар ҳам бор».

Шуҳрат домла айниқса Усмон Носирни суйиб, куийб хотирлардилар. Гоҳи шоирнинг оташин сатрларини ёддан ўқиб «ўзбекнинг Лермонтови эди» деб қўярдилар. Шундай дақиқаларда хаста, заифгина нуроний қария ўрнини яна бир вақтлардагидек виқорли, ўқтам қиёфа эгаллагандек эди. Шунда мен домланинг бош китоби қаҳрамони Содиқни кўргандай бўлардим. Эзгулик дея шаҳид бўлган Содиқ ўз муаллифи тимсолида дунёдаги энг барқарор, муқаддас тушунчалардан — ҳақиқат ўлмаслигидан, ҳақ сўз — санъаткор сўзи бокийлигидан, руҳ абадиятидан сўзлаётгандек туюларди.

Бу умр карвони доимо йўлда,
Гоҳида чўққида, гоҳида чўлда.
Манзилга бехато етиб боради,
Эътиқод машъали гар бўлса қўлда...

ДОМЛАНИНГ ҲИКМАТИ

Минг тўқиз юз саксон саккизинчи йилнинг эрта баҳори. Ҳали қишининг заҳри кетмаган, осмон булатли кунлар. Журналимиз («Шарқ юлдузи»)нинг масъул котиби Носир Фозилов мени хонасига чақириб олиб:

— Сенлар қанақасанлар ўзи, нега шеърият бўлими режасида катта шоирлар йўқ? — деб қолди.

Бунаقا пайтда биласиз, минг битта важ-карсон дар-ров тилга келади. Лекин мен осонига кўчиб қўяқолдим:

— Катта шоирлар журналимизга шеър беришмаяпти...

— Сўрасанглар беришади-да, шоир! Қани айтингчи, шахсан сиз кимдан шеър сўрадингиз?

«Ие? Шеърниам сўраб олишимиз керакми ҳали?» Ҳаёлимга шундай фикр келса-да, индамай туравердим. Носир ака ўйларимни кўзимдан уққандай, насиҳат беришга тушди:

— Катта шоирлардан шеър сўраш ҳам одобга киради, ҳам адабиётнинг ҳурмати, ҳам журналнинг обруси ҳисобланади. — У бир лаҳза тин олгач, топшириқ берди. — Боринг, Шуҳрат домладан шеър сўраб келинг. Навбатдаги сонга бериб юборамиз.

Мен Шуҳрат домланинг ҳовлисини орқаворотдан аниқлаб йўлга тушдим...

* * *

Ўтган кун ёқдан ёмгир бир қур гуллаган ўрик гулларини дув тўкиб кетган. Йўл-йўлкаларнинг у ер-бу ерида ўрик гулларига бурканган кўлмакчаларни айланиб ўтиб боряпман. Мана, Шуҳрат домланинг ҳовлилари!

Жаранг-журингни босиб, овоз бердим. Ичкаридан мулоим юзли опаҳон чиқиб, мени қарши олдилар. Домла ичкариги хонада ижодхонада эканлар, ўша ёққа ўтдик.

Мен домланинг китобларини ўқиганман, шеърлари-ни ёд олганман, насиб қилган экан, мана энди ўзлари билан ҳам учрашиб турибман. Кимсан, «Олтин зангла-

мас», «Шинелли йиллар», «Бир кеча фожеаси» каби машхур асарларни ёзган, минглаб сатр шеърлари ўқувчилар орасида ёд бўлиб кетган забардаст адид, доно шоир билан юзма-юз ўтирибман. Ўқувчи менинг юрагимдан кечаетган галаённи, ҳаяжонни англаб турган бўлса керак.

Хуллас, Шуҳрат домлага «Шарқ юлдузи»дан шеър сўраб келганимни билдиридим. Домла ниҳоятда камгап, гапирганда ҳам шивирлаб гапирар эди. Мени дастурхонга таклиф қилдилар-у, ўзлари шеър танлашга тушиб кетдилар. Ўн беш-йигирма дақиқа ўтиб, қўлимга бир даста шеър тутқаздилар-да:

— Танлаб оларсизлар, танлаб оларсизлар, — дедилар.

— Суратингиз ҳам керак, домла!

— Суратим, ҳозир... — дедилар сокин овозда шивирлаб.

Мен, журналнинг содда ходими домланинг нега шивирлаб гапириши сабабини ўйламасдим ҳам.

Домла ичкаридан шу ҳовлининг ўзида олинган суратларни олиб чиқиб, «танлаб олинг» дегандай менга узатдилар. Мен сурат танлашга тушиб кетдим: етти-саккиз хил кўринишдаги суратлар. Шуҳрат домла барча суратда костюмда, галстукда, яланг бош, қўллари кўксисда, дунёга (бизга!) бироз маҳзун тарзда тикилиб турибдилар. Маҳзунликка маҳзун-у, лекин сиймолари нурли, сермаъно...

Мен суратлардан иккитасини танлаб, домлага:

— Биттаси журналга, буниси менинг ўзимга, — деб бидилладим. Домла, бу сурат орқасига бир-икки оғиз сўз ёзib берсангиз...

Дастхат олувчиларниям, дастхат берувчиларниям кўп кўргансизлар: одатда, дастхат машҳур кишилардан олинади, унга кулиб қоғоз-қалам узатасиз, у ҳам кулиб-чарақлаб имзо чекиб, сизга қайтаради — сиз ҳам хурсанд, у ҳам, ҳаммада табассум, олам гўзал, дилрабо! Менинг Шуҳрат домладан дастхат олишим эса бошқачароқ кечди. У киши ручка билан сурат орқасига алланималарниидир ёзди-да, менга узатди. Ўқисам, шундай деб ёзилган экан:

«Укам Музаффарга! Яхши кунларда эслаб юринг. Бемор Шуҳрат».

Ўша кунлари домланинг жиiddий bemorligi-yo, ҳар бир ҳаракатни қандай қийинчилик билан бажараётганидан мен буткул бехабар эдим.

Орадан икки ярим ойча ўтди.

Бир куни Носир ака менга:

— Шоир, журналнинг янги сони чиқди. Шуҳрат акагаям элтиб беринг, хурсанд бўлади, — деди.

Шу куни ишдан сўнг иккита янги «Шарқ юлдузи»дан қўлтиқлаб, домланинг уйига равона бўлдим.

Кунлар исиб, дов-дарахтлар кўклаб, мева туғиб, баҳор бутун заминни ўз оғушига олган, дунё гўзал бир фасл ихтиёрида эди. Ҳаммаёқ кўм-кўк, ҳаммаёқда гуллар...

Дарвоза очиқ турган экан, тўппа-тўғри кириб бора-вердим. Кенг, орастга ҳовлининг бир чеккасида йигирма-ўттиз одамга мўлжаллаб стол ясатилган, дастурхон безатилган. Меҳмонлар ўтиришибди.

Ҳовлига тўсатдан кириб бориб ҳамманинг эътиборини ўзимга тортганимдан хижолат чекдим, изимга қайтдим. Домланинг икки-уч ўғли мезбонлар ортидан чиқишиди.

— Кечирасизлар, — дедим нима деяримни билмай. — Журнализмининг янги сони чиққан эди... Домланинг шेърлари бор. Шуни олиб келувдим, бериб қўярсизлар...

Мени қўярда-қўймай ичкарига олиб кириб кетишди. Қаранг, бугун домланинг тугилган куни бўлӣб, фарзандлари, қариндош-уруглари, қуда-андалари шу муборак кунни нишонлашаётган экан. Шуҳрат домла давра тўрида яшариб, бир чиройига ўн чирой қўшилиб, қуёшдай чараклаб ўтирас, келиб-кетиб турган жажжи набираларини суйганларида, юз-кўзларидан беқиёс нур тўкилар, гўё бугунги давра ҳам, атрофолам ҳам шу нурдан чарогон эди. Лекин адид камгап, камгап эдилар...

Журналларни у кишининг қўлига тутқаздим. Олиб, бағирларига босиб, мени дастурхонга таклиф қилдилар. Ўша куни Шуҳрат домла шарафига чиройли сўзлар айтилди, тўнлар кийдирилди. Мен ҳамон дастурхон ёнида қисиниб-қимтиниб ўтирас, бугун Домланинг тугилган куни деб огоҳлантирмагани учун ўзимча Носир акани айбордor ҳисоблардим. Шуҳрат домла ҳар гал менга кўзи тушганда икки қўли дарҳол кўкрагига келар, афтидан шеърлари чиққан журнални худди шу бугун олиб келганимдан ниҳоятда хурсанд эди.

* * *

Кейин билдим: Шуҳрат домла ҳам эллигинчи йиллар бошида бир гурӯҳ ўзбек зиёллари қатори миллатчиликда айбланиб қамалган, умрининг энг туллаган, айни тўлиб-тошиб ёзадиган даврини «совуқ Шамол»да совурган эканлар. Шунча азоб-уқубатларни енгиб ўтиб келганларидан кейин яна шунча ажойиб китоблар битган, ҳалқимизни ёргулик томон бошлаган, ҳалқ учун, Ватан тараққиети учун Гераклона меҳнат қилган... Кейин билдим, Шуҳрат домланинг ҳаётни ҳақиқий қаҳрамонона ҳаёт экан. Демак, адабнинг кейинги йилларда хасталикка чалинишларига ҳам сабаб кўп экан-да!

* * *

Икки кун мазам қочиб, ишда бўлмадим. Учинчи куни эрталаб ишхонага келсам, Носир ака йўлак охиридаги деразадан шаҳарни томоша қилиб турибди. Паст бўйли одам, янада пасайиб-кичрайиб қолгандай туюлди. Ёнига бориб салом бердим. «Ишда кўринмайсиз» деб ҳозир уришса керак, деб ўладим. Уришса уришар, мана ёнимда касаллик варақам бор!

— Ҳа, шоир, — деди Носир ака ҳоргин овозда. — Кеча... маъракада кўринмадингиз?

— Қанақа маърака?

— Шуҳрат аканинг дағн маросимида!

— Йўғ-ей, шунақа бўлдими? — юзимга фотиҳа тортдим.

— Нега бормадингиз?

— Мен... Икки кундан бери... Очиги, эшитмадим, Носир ака! — дедим эзилиб.

— Борманг! Борманглар! — деди Носир ака қатъий оҳангда. — Сизлар ўлмайсизлар! Бутун Тошкент боради-ю, сизлар йўқсизлар! Сизлар ўлмайсизлар!

Шундай деб, кичрая-кичрая, хонага кириб кетди.

* * *

Йиллар, асрлар ўтади. Бироқ адабиётимиздаги пахлавонлардан бири — устоз Шуҳрат домланинг номи, китоблари ҳалқимиз хотирасида сақланиб қолаверади.



ЖОНКУЯР УСТОЗ

Шуҳрат ака лирик шоир, салмоқли романлар ёзган иирик адид бўлишлари билан бирга, болалар адабиётининг жонкуяри эдилар. Устоз ижодида болаларга атаб ёзилган асарлар сезиларли ўрин тутади. Жўшқин шеър ва балладалари, ажойиб қисса ва ҳикоялари болалар адабиётининг бойишига ҳисса қўшгандир.

Шуҳрат ака узоқ йиллар «Гулхан» журналининг таҳрир ҳайъати аъзоси эдилар. Журналнинг қизиқарли, ўқимишли, бадиий етук бўлишида хизматлари катта бўлган.

Устоз журналнинг барча ҳайъат йигинларида қатнашиб, қимматли маслаҳатларини аямасдилар. Ахир, Шуҳрат ака узоқ йиллар «Шарқ юлдузи»да масъул котиб бўлиб ишлаган, журналистик тажрибага ҳам эга эдилар. Журналнинг безалишидан тортиб, ундаги ҳар бир лавҳа, шеър, ҳикояни жумлама-жумла таҳлил қилиб, камчиликларини рўйи-рост очиб ташлардилар.

— Болалар ҳикоячилигида Фарҳод Мусажон, Худойберди Тўхтабоев, Латиф Маҳмудов, Эргаш Раимов каби ёзувчilar ҳалол меҳнат қилиб, журналда фаол қатнашяптилар. Улар ҳақиқий болалар ёзувчиси, улардан кўп яхши асарлар кутса бўлади. Аммо бошқа ижодкорлар ҳақида бундай деб бўлмайди. Кўп ҳикоялар таъсирсиз, уларда қаҳрамонларниң руҳий ҳолати, ички олами очилмаган. Тили гализ, болалар ва катталар орасидаги муносабатлар ҳаққоний акс этмаган. Ҳаётий масалаларни, муҳим муаммоларни ўртага қўйган ҳикоялар кам, — Шуҳрат ака журнални варақлаб, куйиб-пишиб гафда давом этадилар. — Шеърлардан ҳам кўнглим тўлмади. Болалар шоирлари ўзининг тор қобигидан чиқиб кета олмаяпти. Шунинг учунми, шеърлар майдада-чуйда гаплардан нарига ўтмаяпти. Мазмунан саёз, ҳис-туйгусиз шеърлар кўпайиб кеттган. Уларда жонли бола образи кўринмайди. Ҳар жиҳатдан пухта, баркамол шеърлар ёзища болалар шоирларининг ё билими, ё ижодий тажрибаси етишмайди. Болалар адабиётига эътибор йўқ, дейишади. Агар яхши

асарлар ёзилса, болалар ижодкори ўз ишига масъулият билан қараса, ўқувчиларни торта билса, бу адабиёт ҳақида ҳам албатта, гапирилади...

Ўша йиллари журналда болаларга тегишлими, йўқми, ишқилиб, кўплаб расмий хабар ва маълумотлар босиларди. Бу Шуҳрат акага ёқмасди.

— Журналдан бадиий асарлар кўпроқ ўрин олиши керак, деб ўйлайман, — дердилар Шуҳрат ака. — Чунки, болалар юрагига бадиий асар, бадиий сўз тезроқ етиб боради.

Журналда адабиёт бўлимини бошқарганим учун бу гаплар кўпроқ менга тегишли эди.

Шуҳрат ака журналнинг суюнган тоги эдилар. Бирор мавзуда асарлар керак бўлса, устозга мурожаат қиласардик. «Бир кечанинг икки ҳикояси», «Икки жанговар лавҳа», «Миннатдорлик» каби бир неча ҳикоялар, «Арагва қирғоқларида», «Менинг қувончим» каби шеърлар буюртма билан ёзилган.

— Ҳадеб менга ёпишиб олмай, Қуддус ака, Асқад, Пўлатхўжаларга ҳам айтинглар, — дедилар бир куни Шуҳрат ака.

Устоз барибир журналдан кўнгил узолмас, самимий маслаҳатларини аямасдилар. Болалар учун ҳашарқисса ёзиш ташаббусини ҳам Шуҳрат ака ўртага ташлаган эдилар. Ёзувчилар бу ишга жалб этилди. Шуҳрат ака ҳашар қиссанинг мавзуини танлаб, воқеаларни пиширишда фаол қатнашиб, катта бир бобини ёзид бердилар. Қисса йил давомида устоз таҳририда чоп этилди. «Набира саргузаштлари» ҳашар-қиссани ўқувчилар томонидан жуда яхши кутиб олинди, китоб ҳолида нашр этилди.

1973 йиллар... «Гулхан» журналига бош муҳаррир этиб Тўлқин Қозоқбоев тайинланди. Ёш муҳаррир иштиёқ билан ишга киришиб кетди. Бир куни:

— Рауфжон, қўлингдаги бадиий асарларни Шуҳрат аканинг назаридан ўтказиб олиш керак, у киши ахир, таҳрир ҳайъати аъзосилар, — деб қолди.

Шу гап сабаб бўлдию чоп этишга мўлжаллаб қўйилган шеър ва ҳикояларни папкага солиб, Шуҳрат аканинг уйларига йўл олдим.

Баҳор чоглари эди. Ёқимли шамол юзларни сийпалиди, дилларга хуш кайфият бахш этади. Катта кўчадан ўнгга бурилдим. Баҳор бу сокин маҳаллага ҳам ўз ҳукмини ўтказган, кўчадаги ўрик ва шафтолилар чаман гуллаган, ариқ бўйлари ям-яшил...

Енгил кийинган, ялангбош, оппоқ соchlари ўзига жуда ярашган Шуҳрат ака ҳовлидаги гуллари қийгос ўрикка тикилганча хаёлга чўмган эдилар. Балки, фикрларини ёзилажак асар воқеалари банд этгандир, балки, шеърий сатрлар яралаётгандир...

Мен Шуҳрат акани безовта қилгим келмай, қаққайиб туриб қолдим...

Бу хонаёнга ўн йилча оддин ҳам келган эдим. Ни ма бўлди-ю, ўша куни кўчада Хайриддин Салоҳни учратиб қолдим. Салом-алиқдан кейин Хайриддин ака:

— Юринг, Шуҳрат аканикига тўйга борамиз, — деди.

Иккиланиб дедим:

— Қандай бўларкин, мен бир ҳаваскор бўлсам...

— Э, юринг, юринг, менга ҳамроҳ бўласиз, — қиссталанг қилди Хайриддин ака.

Хайриддин акага эргашиб тўйга бордим. Ҳовли тўла одам... Базм энди бошланган экан. Мен бу ерда номдор ёзувчиларни, Ойбек, Абдула Қаҳор каби улуғларни яқиндан кўриш баҳтига мусассар бўлгандим... Бу тўй ҳамон эсимдан чиқмайди.

... Шуҳрат ака мени ўйчан ҳолда қарши олдилар. Мақсадимни айтдим.

— Яхши, мен кўриб қўяман. Кейинги ҳафта хабар оларсан, — дедилар.

Кейинги ҳафтага келсам, устоз уйда йўқ эканлар. Кеннойи менга таниш папкани тутқаздилар. Кўчага чиқиб, уни очдим-да, қофозларга кўз югуртира бошладим. Ҳикоялар қалам билан таҳрир қилинган, имло хатоларигача тўгриланган эди. Баъзи шеърларнинг ёнига «бўш», «бўлмайди» деган ёзувлар битилган. Сўнгти саҳифада шундай сўзларни ўқидим: «Рауфжон, дуч келган шеърни журналда босаверманглар-да! Шеър — янги гап айтиш, кашф дегани! Шеър халқ дилидаги гапларни айтиш дегани!»

Шундагина мен Шуҳрат аканинг ижодга жуда талабчан, қаттиққўл эканликларига ишонч ҳосил қилдим.

Бир куни Шуҳрат ака шошиб таҳририятга кириб:

— Шеърларингни ўқидим, — дедилар. — Дуруст. Аммо кўп машқларингда чўзиқдик бор. Болаларга қисса ва лўнда қилиб ёз. Ҳамма гапни шеърга сигдираман, деб уринаверма. Ҳикоялар ҳам ёзиб кўр. «Коптожон»инг менга маъқул бўлди.

Болалар адабиёти ҳақида суҳбатлашиб ўтиргани-

мизда Шуҳрат ака Миразиз Аъзам, Турсунбой Адашибоев, Сафар Барноев, Ҳабиб Раҳмат, Қамбар Утаев шеърлари ҳақида илиқиссиқ гапларни айтдилар. «Уларнинг ёзганлари анча етук. Шеърларида янги гаплар, оҳорли иборалар, жиҳдий фикрлар бор».

Шуҳрат ака айниқса, адабиётта кириб келаётган ёш ижодкорларга катта эътибор берардилар. Бир гал Шуҳрат ака тавсия этган ёш шоирнинг шеъри ҳадеганда журналда босилавермади. Шунда устознинг жаҳллари чиқиб кетди.

— Менинг шеърларимни чиқазмасанглар ҳам майли, хафа бўлмайман, аммо ёшларнинг ҳаваси сўнмасин!

Мен устознинг маслаҳатлари билан ҳикоялар ёза бошладим. «Ҳамма ҳайрон», «Жирафанинг бўйи нега узун?» номи билан насрый китобларим босилиб чиқди.

1987—88 йилларда «Гунча»га ҳикоя «ундириш» учун Шуҳрат аканикига бордим. «Гунча»нинг масъул котиби Маҳмуд Муродовнинг саломларини етказдим.

Маҳмуд Муродов Шуҳрат ака билан ҳаётнинг аччиқчучукларини бирга тотишган қалин дўст эдилар. Шуҳрат ака таҳририятга келса, албатта, Маҳмуд аканинг олдига кириб ўтарди. Икковлон бир пиёла чой устида қуюқ сұхбатлашиб ўтиришганини кўп кўрганман.

Маҳмуд ака менга Шуҳрат ака ҳақида кўп гапирапди: «Шуҳрат — заҳматкаш ёзувчи. 50-йилларнинг бошида унга бўлмагур айблар қўйишиб, ноҳақ қамашган. Тақдирни қарангки, ўша пайтда мени ҳам ҳибста олишгандаи. Қамоқхонада бирга бўлганмиз».

— Маҳмуд аканинг соглиқлари яхшими? — сўрадилар Шуҳрат ака. — «Гунча» боп нарса ёзсанм ўзим қўнгироқ қиласман.

«Гунча» буюртмаси билан Шуҳрат ака «Орден» номли ҳикоя, «Ёмғир», «Онажоним, онажон» каби шеърлар ёзиб бердилар.

Шуҳрат ака болалар учун 50-йилларда чоп этилган «Бизнинг кўча» китобидан тортиб, то умрларининг кейинги йилларигача уларга асар ёзишни тарқ этмадилар.

Шуҳрат ака ижод қилиш билан бирга, жуда кўп ёшларни адабиётта бошлаб кирган, уларга йўл-йўриқ кўрсатган, ютуқларидан қувонган, камчиликларидан ташвишланган жонкуяр устоз эдилар.

ШОГИРД ТАЪЗИМИ

(Устоз таваллудининг 75 йиллигига аталган очиқ хат)

Ассалому алайкум, муҳтарам устоз, шу улуг айёмингида икки оғиз шогирдлик қаломини изҳор этиши ниятида қўлимга қалам олдим. Бунинг боиси мен ўзими Сизнинг ўнлаб шогирдларингиз қаторида ҳисоблаб юраман. Чунки, биринчи — «Ватан» сарлавҳали шеъримнинг 1950 йили, ўзингиз масъул котиблик қилаёттан «Шарқ юлдузи» журналининг 10-сонида босилишига сабабчи бўлгансиз. Яна бунинг устига, романларингизга ёзib берган дастхатларингизда менинг тўримда илиқ гапларни айтгансиз. «Шинелли йиллар»га ёзган: «Укам Наримон, мен сенинг хислатларингнинг ҳалоллигига ишонаман, Шуҳрат, 18/Х—68» деган мисраларингиз кўнглимни төгдек кўтарган бўлса, «Жаннат қидирганлар» романига битилган: «Наримон, Сенинг катта китобларингдан ҳам умидворман. Бу йил ҳам хайрли келсин, Шуҳрат, 3/І—69» сатрларингиз чиндан ҳам катта ишларга илҳомлантирган эди.

Шундан руҳданиб, каттароқ насрой асарни қораашга жазм қилдим. Уни кўтариб яна олдингизга бордим. Ўқиб чиқиб, мана бундай оқ йўл тиладингиз: «Наримон Орифжонов анчадан бери шеър, ҳикоя, очерклар ёзив келарди, анча дуруст ҳикоялари, болаларнинг кўнглини овлайдиган шеърлари ҳам бор. Мана, бугун у катта бир романга қўл урибди. Ўзи билган, ўзи яшаган ёшлар ҳаёти яна унниг диққатини жалб этибди. Таnlаган мавзусига доир ҳаётни яхши кузатган, керакли деталлар топган, тилини ҳам худди шунга мослаб, шеъриятга яқин майин бир оҳангда сақлаб боради. Бу майнликни яна тўлдирмоқчи бўлгандек, бобларнинг сарлавҳасига шеърий сатрларни олади. Демак, адаб изланади, ўзига хос бир нарса айтмоқчи бўлади. Бу ижодкор учун яхши хислат. Ишонаманки, роман китобхонларнинг диққатини тортади. Шуҳрат, 1978, июль». Сизнинг шу оқ йўлингиз билан ўша йили «Ёш ленинчи» газетаси август сонларида ундан бир неча боб босилди. Афсуски, «социалистик реализм», «типиклик», «партиявиyлик» этишмайди деб, баъзи кўзга кўринган танқидчиларимиз айюҳаннос солганликлари

учун роман ёргуғ дунё юзини кўрмади ва уни сизга тақдим этиш менга насиб қилмади...

Устоз, агар таъбир жоиз бўлса, Сизни «пири муршид» деб атаган бўлардим. Чунки, биз адабиётта кириб келаётган эллигинчи йилларда Сиз қатор насрый ва драматик асарлар яратиб, ёшларга ўрнак кўрсатдингиз. Урушни лаънатлаш ва тинчликни эъзозлаш мавзуусидаги жонли воқеаларга бой ҳикоя ва қиссалар, «Шинелли йиллар», «Олтин занглаамас», «Жанинат қидиргандар» романлари, «Беш кунлик куёв», «Қўша қаринглар», «Она қизим» каби саҳна асарлари бизга мавзу эътибори, равон тили, халқчиллиги, ҳикмат намо ибораларга сероблиги билан ижод йўли нақадар машаққатли эканлигини эслатиб турарди. Биз уларни қайта-қайта ўқиб, ҳар гал бирон янгилик топгандек бўлардик.

Урушдан кейин босилиб чиққан «Ҳаёт нафаси», «Қардошлар», «Бизнинг кўча», «Балладалар», «Сенинг севинг», «Буюк муҳаббат», «Мангулик», «Балогат» сингари ўйноқи шеърлар, ҳаяжонга солувчи балладалар, кишини хаёлга толдирувчи достонлардан иборат тўпламларингиз китоб жовонларимиздан муносиб ўрин эгаллаганлиги табиий, зеро уларда чинданам ҳаёт нафаси сезилиб туради.

Урушнинг машаққатли кунларини матонат билан енгтан, оддий аскарлиқдан батальон командири дара-жасигача кўтарилиган, Берлинни забт этишда қатнашиб, йигитлик бурчини шараф билан бажарган Элмурод олийжаноб фазилати билан китобхонни ўзига мафтун этади, шунинг учун ҳам «Шинелли йиллар» романни бир неча халқлар тилларига таржима қилингани бежиз эмас.

Ижтимоий-ахлоқий мавзуда ёзилган «Олтин занглаамас»ни ўқиганимизда, ҳаётий зиддиятларни, даҳшатли говларни енгишда матонат, эътиқодига метин садоқат кўрсатган Содиқ билан бирга қувониб, бирга йиглаганимизни унтиш қийин. Ўшанда Мирсалим қўлимга тушса, ўлдиришга ҳам тайёр эдим. Демак, бу икки образни яратишда катта маҳорат билан тер тўkkанингизни китобхон дарҳол сезиб олади.

Устоз, Сиз каромат қилиб, бундан бир неча йиллар муқаддам яратган романингиз — «Жанинат қидиргандар»нинг қаҳрамонлари бугунги кунда она Туркистон заминига ҳеч қандай тўсиқсиз қадам қўймоқдалар. Бу эса Ўзбекистонимиз мустақиллигининг шарофатидир.

Демак, Сиз ўша вақтдаёқ ўзбек диёри эркин ва мустақил бўлишини, умумтурк қавми аҳилу, биродар бўлишини, тарқоқ «бармоқлар» бир «мушт»га бирлашувини орзу қилгансиз.

...Эсимда, бир куни йиингизга бир ёш қаламкаш Искандар Раҳмоннинг илк қиссасини ўқиб беришингизни илтимос қилиб, бериб юбордим. Дарвоҷе, у вақтда мен «Гулхан» журналининг масъул котиби бўлиб ишлардим. Сиз эса таҳрир ҳайъатининг энг жонкуяр, энг меҳнаткаш аъзоси эдингиз. Ёшларни шу таҳририят атрофида жипслаштириш учун раҳматлик Гайратий, Раҳмат Файзий, Тўхтасин Жалолов, севимли устозлар Ҳаким Назир, Пўлат Мўмин, Эркин Жабборовлар қатори ҳеч вақтингизни ҳам, хизматингизни ҳам аямас эдингиз.

Уч кундан кейин телефон жиринглаб қолди, трубкадан меҳрга тўла ғамхўруна овозингиз эшигилиди:

— Наримон, юборган нарсангни ўқиб чиқдим, — дедингиз худди ўзингиз янги бир асар яратгандек қувониб. — Бало экан, у топган боланг. Ҳаётий кузатишлари тиниқ. Воқеаларни ҳам жуда усталик билан бирбирига боғлади. Бир-икки жойига қўл урган эдим, туппа-тузук қисса бўлди-қолди. Иложи бўлса, қисқартирма.

— Хўп, устоз. Фикрингизни муҳаррирга етказаман, — дедим ўзгалар учун шунчалар жон куйдираётганингизга қойил қолиб.

— Ҳа, айтмоқчи, у болани мен кўрганманми? — деб сўрадингиз бир оздан сўнг.

— Йўқ, кўрмагансиз. Ўта тортинчоқ йигит. Биринкита шеърларига кўзингиз тушдими, йўқми, билмадим, лекин бу биринчи насрий асари, — орқаворотдан таништирган бўлдим муаллифни.

— Эсимда йўқ. Лекин ҳаётни ҳозирданоқ шунчалик синчковлик билан кузатаётган бўлса, ундан яхши ёзувчи чиқади. Майли, буни қайси сонга режалаштираյпсан? — деб сўрадингиз, ҳатто қачон чиқишигача қизиқиб. Мен икки-уч сон нарини айтдим. — Иложи бўлса, олдинроқ берворавер, — деб маслаҳат бердингиз.

Бу асар журналнинг учта сонида босилди...

Ҳурматли устоз! Сиз ўқитувчilar ҳақидаги шеърингиздан:

«Агар ҳаёт бўстон бўлса, бобон муаллим,

Агар ҳаёт карвон бўлса, сарбон муаллим» — деб

устозларни эъзозлагансиз. Ўзингиз эса яраттан бадиий образларингиз орқали минглаб китобхонларга муаллимлик қилаяпсиз, уларни эзгуликка чорлаяпсиз.

Муҳтарам Шуҳрат ака! Муборак 75 ёшингиз билан чин юрақдан табриклайман, барча шогирдларингиз қатори ҳузурингизда таъзимга бош эгаман.

(Очиқ хат «Қишлоқ ҳақиқати» газетасининг 1993 йил, 24 апрель сонида босилган!)



ХОТИРА — ҚАЛБ ЁЗУВИ

Шуҳрат ака ҳақида кўп яхши гаплар айтгим келади, меҳмондўст, ширин сўз келинайим Турсуной ая ҳақида, уларнинг ажойиб фарзандлари тўғрисида кўп гапирсам бўларди. Йўқ, ўта ҳурмат-иззатга лойиқ кишилар ва уларнинг яқинлари ҳақида бир нима дейиш қийин экан. Мен Мирзакалон Исмоилий, Ҳалим Усмонхўжаев, Раҳмат Файзий, Гани Жаҳонгиров, Абдували Имомалиев, Назир Сафаров, Ўлмас Үмарбеков, Гайратий, Зулфия, Юсуф Шомансур, Анвар Эшонов сингари ажойиб ижодкорлар, олимлардек инсоний инсонлар ҳақида кўп нарсалар айтгим бор, афсус, айтолмаяпман. Худди шундай Шуҳрат ака ҳақида ҳам кўп нарсалар ёзгим бор, ёзолмаяпман...

Ҳарқалай бу сатрлар бошқаларга туртки бўлиб, ўзбек адабиёти ва маданияти, илм-фани ривожида озмунча куч сарф қилмаган алломалар ҳақида ўз хотира-ларини келажак авлодга ёзиб қолдираплар, деган умиддаман.

«Гулхан» журналига бир пайтлар худди Шуҳрат ака сингари меҳрли бўлган, унинг ходимлари билан отабола, ака-ука, опа-сингилга айланиб кетган таҳрир ҳайъатининг аъзолари — Музайяна Алавия, Ольга Ибрагимова, Нодирбек Юсупбековлар, журнал фаоллари Абдулазал Ваҳобов, Тўхтасин Жалолов, Алижон Ҳолиқов, Гайратий (уларни Тангри Ўзи ярлақаган бўлсин), Эркин Жабборов, Сайёрларнинг хизматлари оз эмас эди.

Таҳрир ҳайъати аъзоларининг иноқ бўлишига табиийки, Шуҳрат аканинг таъсири катта бўлган. Уларнинг биз таҳририят ходимлари — мендан тортиб, Наримон Орифжонов, Рауф Толиб, Темур Убайдулло, Мирвосил Одилов, Шавкат Туроб, Абдужалил Зокиров, Муҳаббат Ҳамидова, Васила Пұлатова, Зафар Комиловгача илиқ оталарча муносабатда бўлишганини эсламай ўтолмайман.

— Атрофингизга яхши одамларни тўпланг, кам бўлмайсиз, — дерди Шуҳрат ака, ота-боладек суҳбатимиз қизиганда.

Шуҳрат ака билан биринчи бор танишиш им 1972 йилда содир бўлганди.

... Қордек оппоқ соchlари ўзларига аллақандай жозиба бахш этган Шуҳрат ака билан мени «Гулхан» журналининг масъул котиби шоир Наримон Орифжонов таништирган эди. Ўшанда мен эндиғина «Гулхан»га Бош муҳаррир бўлиб юборилган эдим. Шуҳрат ака журнал таҳрир ҳайъатининг аъзоси эканлар. Бунчалар ширин табассумда, ўта маданиятли адабнинг асарлари, драмалари ва ҳатто «Муродингни айт» қўшиқлари менга таниш эди. Лекин бу сўз устаси билан шахсан танишиш, суҳбатлашиш мен учун катта баҳт бўлди! Бир-биримизга меҳримиз оша бошлади.

Шуҳрат ака ҳафтада камида бир марта таҳририятга кириб ўтардилар.

Хол-аҳвол сўрашилгандан сўнг «Бизга қандай хизматлар бор?» деб сўпар, кўпинча узоқ ўтирумай учрашувгами, бирон-бир йигингами боришларини айтиб, узр сўраб чиқиб кетардилар.

Баъзи-баъзида Шуҳрат ака билан аксинча узоқ суҳбатлашиб қолардик. Ўшанда менга насиҳатлар қиласдилар.

Ижодкорлар бир дунё одамлар, улар билан илиқ муносабатда бўлинса, фақат ютилади. Улар ширин гап учун ҳар қандай юмушингизни бажаришади, дердилар.

Бир воқеа ҳеч эсимдан чиқмайди. Тажрибасизликми ёки адабиётни чуқур билмасликми, аниқроги, иккаласи ҳам бўлиши керак, бир шоир ўртамиёна ўз шеърларини журналга олиб келди. Таҳрир ҳайъати аъзоларига ўқитмай муаллифга қайтариб беришга қарор қилдик. Шу куни Шуҳрат ака келиб қолдилар. Воқеани айтдим. Шошмай қўлёzmани ўқиб чиқдилар. Ва менга: «Сизлар ҳақсизлар, талабларингиз ҳам, ўлчовларингиз ҳам тўғри. Журналда фақат дурдона асарлар босилса, дейсизлар. Лекин ҳеч бир ёзувчи, шоир дарҳол доим дурдона асар яратмайди! Тўлқинжон, биласизми, дарё ирмоқларидан келаётган сув туфайли тўлиб оқади. Майли, бирон ирмоқдан озроқ ва хас-чўпли сув келар. Лекин келаётган ирмоқлар йигилиб дарё тўлади-да. Яхшими-ёмонми, озми-кўпми ирмоқларнинг бор бўлгани дуруст. Шундай эмасми?!» Таҳририят ходимлари тушиндик. Шеърларни устод қараб бергач, чоп этдик. Домланинг бу ишларидан ҳозиргacha хурсандман. Шеърнинг журналда босилганидан руҳланган шоир ижодга шўнгиб кетди. Ажойиб шеърлар ёза бошлади!

Демак, Шуҳрат ака шоирга қанот бердилар, бизни эса хижолат юкидан озод этдилар.

Улар бу ишлари билан нафақат шоирга, ўзбек шеъриятига, унинг яхши асарлар билан кўпайишига ҳисса қўщдилар.

Шуҳрат ака ана шунаقا инсон эди! Биз инсонларга меҳр, одамийлик сирлари, муомала маданияти каби кўп ажойиб фазилатларни Шуҳрат акадан ўрганганимиз. Бу кишида такаббурлик йўқлиги бизни қойил қолдиради. «Умр погоналари», «Чақмоқ юлдуз», «Шайдо кўнгил» ва бошқа элликка яқин китоб, «Беш кунлик куёв», «Дўстимнинг ўғли», «Она қизим», «Кўша қаринглар» каби драмалар муаллифи, яна денг ўзлари айтганларидек, «юракларининг аччиқ яраси» бўлмиш «Шинелли йиллар», «Олтин зангламас» романларининг муаллифи шунчалар камтар бўлишидан таажжубланардик. Киши қанча улуг бўлса, шунча оддий, камтар бўлади, деганлари рост экан. Шуҳрат ака бунинг жонли тимсоли эди.

Бу матонатли одам ўн йилдан ортиқроқ вақт дард билан олишибди. Шу пайтларда ҳам ижод қилди. Ўз қаҳрамонлари билан бирга кулди, бирга йиглади.

Шуҳрат ака: «Шоир — сўз уммонидан дур излайди, агар сабр билан меҳнат қилса, ўша дурни топади», дердилар. Яна: «Зиёли — элга намуна бўлмоги керак, у зиё беради», дердилар. Бу сўзларга амал қилиб Шуҳрат ака фоний дунёдан бош эгмай, халқ олдида қизармай ўтдилар...



ШУҲРАТЛИ ШУҲРАТ АКА

1961 йилнинг кузаги, ноябрнинг охирлари бўлса керак, ўзбек халқининг ардоқли фарзандлари фаҳрли бир воқеа муносабати билан жам бўлганлар. Бу воқеа атоқли навоийшунос, ўзбек маданий қадриятларини тўплаш, тадқиқ этиш ва оммалаштиришда фаровон хизмат қилган ҳормас-толмас, шижаатли ва фидоий адабиётшунос олим Ҳамид Сулаймоннинг бекиёс хизматлари эътироф этилиши — унинг докторлик диссертациясининг ҳимояси билан боғлиқ эди.

Йигинда академиклар Ҳабиб Абдуллаев, Иброҳим Мўминов, Яҳё Гуломов ва бошқа буюк олимлар қатори элда жуда машҳур шоир ва адаб Шуҳрат (Гуломжон Алимов) ҳам бор эдилар.

Уларни билганлар «Шуҳрат домла» дер, биз яқин кишилар «Шуҳрат ока» дер эдик. Шуҳрат оканинг қийин ҳаётларини ўйлаганимизда ул кишининг ирода ва матонатига қойил қолар эдик ва Айюб пайғамбар қисмати эсга тушар эди. Ул муҳтарам зотга уруш ва қатогон йиллари тортган азоб-уқуқбатлари етмагандек, умрларининг охирини ҳам инсульт касали қийногида ўтказдилар.

Дона тортган чумолига берма озор,
Жон шириндир, ўшандা ҳам ширин жон бор.

(Фирдавсий)

деган гапга бутун умр амал қилган, бирор кимсага озор бериш у ёқда турсин, барчага фақат меҳрибонлик қилган кишига, чин инсонга бу дарднинг ёпишиши адолатсизлик кўринади менга. Билмадим, бу қатагон йиллари чеккан азоблари натижаси эдими ёки Худойи таоло Айюб пайғамбар сабр — бардошини синааб кўргандек, Шуҳрат домла чидамини ҳам синааб кўрдимикан? Унда Шуҳрат ока бу синовдан мислсиз чидам, матонат ва ҳалоллик билан ўтдилар, десак ҳеч муболага бўлмас.

Энди Ҳамид Сулаймон уйидаги йигилишга қайтайлик.

Юқорида зикр қилинганидек, бу йигинда Шуҳрат ока ҳам иштирок этган эдилар.

Йигин қатнашчилари бирин-кетин чиқишиб муҳтараммом домла Ҳамид Сулаймонни табриклаб, унинг қилган ишларини таърифлаб, бу кун ўзбек маданиятининг улуғ тантанаси эканини таъкидлар эдилар. Дарҳақиқат, шундай кунлардан бири эди-да.

Шуҳрат ока ҳам бир ажиг ҳолатни бошларидан кечирар, чеҳралари мунаvvар, кўзлари ёниқ, хушчақчақ ва мамнун ўлтирас эдилар.

Суҳбатлашиб ўлтирас эканмиз, ҳар бир сўзларидан ниҳоятда юксак кайфият ифори уфириб турар эди.

Тўрт-беш киши табрик сўзини айтишгандан кейин Шуҳрат ока ҳам ўринларидан туриб, ўзларига хос салобат билан сўз бошлидилар:

— Мен Ҳамид Сулаймон оғайним билан, — дедилар оҳиста, — узоқ сафарда танишганман. «Дўстингни сафарда сина» деган гап бор. Мен бутун виждоним билан айтаманки, дўстим, дўстлик ва одамийликнинг барча жиддий синовларидан менинг наздимда шараф билан ўтган. Зеро, у жуда оғир, адолатсиз сафар синовлари эди. Унда бизларни ватанга хиёнатда айблаб, ўз тукқан халқимизга қарши қўйишмоқчи бўлган эдилар.

Мен ўзимга нисбатангина эмас, дўстимга нисбатан ҳам бу айбларнинг батамом қуруқ бўхтондан иборат эканини билар, бунга имоним комил эди.

Мана менинг эътиқодим тамом исботланди. Ҳақ жойига қарор топиб, қадрдан дўстим сафардан қайтиб келгач, маданиятимиз ва маърифатимиз учун қанчадан-қанча қадриятларимизни тиклаб берди. Халқимиз олдидаги бурчини адо этди.

Мен ҳам қайтиб келгач, халқим олдидаги бурчимни оқлашга ҳаракат қилиб меҳнат қилдим. Мана шу меҳнатим самараларидан бир қисмини қадрли дўстимга тортиқ қилмоқчиман...

Шуҳрат ока ёnlарида курси устида турган бир бойлам китобларни олиб, Ҳамид Сулаймонга армугон этдилар.

Улар орасида «Шинелли йиллар» романи, «Мангумлик», «Кавказ дафтари», «Сенинг севгинг» ва бошқа лирик шеърлар, балладалар тўпламлари ҳам бор эди.

Уларда шоир уруш хотиралари, сафар таассуротлари, ёр, диёр, ватан согинчи каби муқаддас туйгуларни ниҳоят инсоний бадиий пардаларда тараннум этганлигини ўқиганлар яхши биладилар.

Мазкур воқеа бот-бот менинг эсимга тушиб туради. Қандай жирканч вақтларни бошимиздан ўтказган эканмиз, ҳалқимизнинг икки буюк ўғлонига қуруқ тұхмат уюштирилғанлиги эсга тушган сари қалбим зирқираб кетади ва мустақиллікка минг-минг шукурлар қиласман.

Шұхрат окани мен шахсий равища кейинроқ танидим. Бошқа ёзувчиларни ҳам шундай. Сабаби шундаким, мен ўрта мактабни битиргач, армияга чақырған здим. Армия хизматим тугамай уруш бошланды ва мен саккиз-түккіз йил армияда қолиб кетдим. 1947 йилдагина армиядан қайтиб университеттеңде үқишигә кирдим ва уни тутатдым. Шундан сұнгтина адабиётшунос бўлиб республикамиз адабиёт оламига кирдим.

Урушдан олдинги ва уруш йилларида мен Шұхрат ока шеърларини газета, журналларда кўрсам ўқиб юрар ва шундай шоир борлигини билар здим, холос. Ул кишининг меҳру садоқатдан баҳс этувчи кичик лирик шеърлари менга ёқар, урушда кўкрагимдан ўқ тегиб, оғир яраланиб қайтганимда ва муолажада бўлган пайтларимда ҳам ул шоирнинг севги, вафо, садоқат, сабру қаноат ҳақидаги шеърларини севиб ўқир здим.

Мана, мен ишга тушгач, бошқалар қатори ул киши билан ҳам танишдим.

Мен ул киши билан бир жойда ишламаган бўлсан ҳам ёзувчilar уюшмасидаги мажлисларда ёки нашириёт йўлакларида кўп учрашар, баъзан бир дам сухбатлашар здик. Эсимда бор, Наврўз байрамини тиклаганимизда мени топиб табриклаган ва алоҳида шодлик изҳор қилган здилар.

Бу шундай бўлган зди.

«Совет Ўзбекистони» (ҳозирги «Ўзбекистон овози») газетасида «одоб-ахлоқ» қўмитаси тузилган зди. Унга машҳур олимимиз академик Қори Ниёзий раҳбарлик қилар здилар. Мен ҳам аъзо здим. Олтмишинчи йиллар боши. Бир куни Қори Ниёзий домла менга қараб:

— Наврўз байрами динийми? — дедилар.

— Йўқ, у диний маросимларга кирмайди, — дедим мен. — У мусулмончиликдан анча аввал таъсис этилган. Бу ҳақда Фирдавсий «Шоҳнома»сида ҳам маълумот бор.

— Ҳа, мен ҳам шундай деб биламан, у умуман

дэхқонлар, меҳнаткашлар байрами. Мана, шу байрамни тикласак бўлмасмикин?

— Яхши бўлади, — дедим.

Кейинги йигилишимизда домла менга:

— У кунги гапимиз бўйинча мен тегишли идоралар билан гаплашдим. Рози бўлишди, — дедилар, — Энди телевизорга бир чиқиш тайёрласак, ўзим олиб бора-ман, сиз Наврўз тарихини гапириб берасиз, Карим Маҳмудов Наврўз таомлари ҳақида. Мен эсам илгари-лари қишлоқларда Наврўзни қай тартибда байрам қилишгани ҳақида гапираман, — дедилар.

Шундай бўлди. Феврал ойининг охирги кунлари телевизорда қирқ беш дақиқалик кўрсатув ташкил қилдик.

Шундан кейин Шуҳрат ока мени табрилаган ва:

— Жуда соз бўлди-да, буни бутун халқимиз севинч билан қабул қиласди, — деган эдилар.

Дарҳақиқат, халқ катта қувонч билан қабул қилди ва барча вилоят, қишлоқларда катта-катта сумалак қо-зонлари қайнатилиб, Наврўз кутиб олинадиган бўлди.

Шароф Рашидовдан кейин келган баъзи Республика раҳбарлари яна Наврўзга ҳужум уйиштирилар.

Шуҳрат окага келсақ, мен шул воқеа муносабати билан ва кейинчалик, борди-кечдиллик дўст бўлиш натижасида, ул кишининг ўзбек халқининг урф-одатла-рига ва бошқа қадрияларига қанчалик содиқ ва уму-ман ўзбекона танти ва диловар киши эканликларини тушунган эдим. Бу ўринда мен яна бир нарсани эсла-шим лозим.

Шароф Рашидовнинг таклифлари билан «Шарқ мумтоз адабиёти намуналари» силсиласида китоблар нашр этила бошланди. Бу иш менга топширилган эди. Биринчи тўрт китоб — Умар Хайём, Алишер Навоий, Саъдий Шерозий, Маҳтумкули шеърларидан тўплам-лар ўзбек ва рус тилларида 1976—1977 йилларда нашрдан чиқсан эди. Буни кўрган Шуҳрат ока ҳам ажиб бир севинч билан мени табрилаган ва бу ишда оқ йўл тилаган эдилар.

Бу силсила ҳам халқ орасида катта эътибор қозонди ва жуда машҳур бўлиб кетди. Унда чиқсан ҳар бир китобни мен Шуҳрат окага ҳам тақдим қиласди, ўша шоирлар ҳақида суҳбатлашар эдик.

Эсимда бор, Умар Хайём рубоийлари, Саъдий Шерозий «Гулистан»и ҳақида гаплашганимизда кўплари-ни ёддан билишлари гувоҳи бўлдим.

Шуҳрат оқа устозлари мактабининг содиқ шогирди сифатида мумтоз адабиётимизни теран фаҳм этар, кўп шоирлар асарларини ёд билар эди.

Адабиётимиз ва маданиятишимизга сидқи дилдан фидокорона ҳизмат қилган ва авлодлар учун эскирмас бадиий мерос қолдирган бул зот, заргарона ижод соҳиби бошига қандай иш тушмасин, ўзини ижодга уриб, меҳнатга берилиб, сабот ва эътиқод билан, сабру қаноат билан енгар эди.

Унинг романлари, очерклари, балладалари, лирик шеърлари ҳам кишини ҳаётга, эркка, ҳалолликка, адолатга, инсонга меҳрибонликка ундайди ва чуқур фалсафий мушоҳадаларга чорлайди.

Шу ерда ул кишининг ажаб лирик шеърлари ҳақида икки оғиз сўз айтгим келди-ю, лекин форсларнинг «шенидан кай бувад монанди дийдан» («Эшигтган кўргандек бўлолмас ҳаргиз») деган гаплари эсимга тушиб, Шуҳрат оканинг Абдулла Қаҳҳорга багишланган «Мажнунтол» шеърини келтириб қўя қолай дедим.

Зеро, бу шеър муаллифнинг нақадар нозик таъб шоир, нақадар садоқатли дўст эканлигини ҳам кўз-кўз қилиб туради. Ўқувчилар унинг файзу фасоҳатидан яна бир бор баҳраманд бўлгайлар:

МАЖНУНТОЛ

Абдулла Қаҳҳорга

—Мунчалар, шунчалик кўркам шохингни
Қуёшга кўтармай пастга эгибсан?
Соябон мисоли ерга тегибсан,
Ер узра ёзисан ўз қучогингни!

Ё сенинг қуёшдан тилинг қисиқми?
Ўзгалар рашқидан кўрқасанми ё?
Ё кўркам қаддингдан қилдингми ҳаё?
Ё қуёш нафаси сенга иссиқми?

Севиштан йигит-қиз этсин, деб суҳбат,
Ё чодир қурдингми уларга атай?
«Уларни бегона кўздан беркитай»,
Дея ё қилдингми ўзингта ният?

Ё бошинг эгдими ҳасрат, алам, роз?
Ё ерга йиглайсан ўз қисматингдан?
Мунчалар кўп экан ҳасратинг чиндан,
Тутгамас ўтса ҳам неча қишу ёз!

— На қайгу, на ҳаё, на ўзга нарса
Қаддимни эттандир ер узра чодир.
Мард, дердим қаддимни бирор баҳодир
Шу хилда умрбод эгиб туролса!

Тупроқдан ниш уриб ўсдим кундан-кун,
Қуёш нурларида ўрдим кокилим,
Ва тонг елларида яйради дилим,
Охири умримга ясадим якун:

Улгайган тупроқдан йироқлаш уят!
Шу она тупроққа айтай деб раҳмат,
Бу йўлда чексам ҳам минг турли заҳмат,
Ер узра атайин этганман қомат.

Бу менинг меҳримдир, ташаккуримдир
Камолга етказган она тупроққа.
Қўй энди, эй дўстим, тутма сўроққа
Дея — Қоматингни этганлар кимдир?

1956



МУНДАРИЖА

Бобур Алимов. Муборак хотира	3
Абдулла Орипов. Шуҳрат сиймоси	7
ШУҲРАТ. МАШРАБ. Роман	11

АДИБ ҲАЁТИГА БИР НАЗАР

Сайд Аҳмад. Уч мунгли қўшиқ	95
Шукур Холмирзаев. Ай, Шуҳрат акам-а	104
Темур Убайдулло. Устоз Шуҳрат ҳақида насрый достон	120
Тўлан Низом. Бир тўкин боғ эди	140
Зулфия Мўминова. Шоир қалбининг фариштаси	142
Шукур Даҳаш. Олтин зангламас	143

ХОТИРАЛАР

Ҳаким Назир. Ўчмас хотира	147
Шукрулло. Ижодкор матонати	152
Пиримқул Қодиров. Маънавий жасорат	159
Иброҳим Раҳим. Сиймоси ҳамон кўзим оддида	166
Мирмуҳсин. Улкан истеъдод	170
Нуриддин Муҳитдинов. Орзулари кўп эди	172
Ўтқир Ҳошимов. Ҳалоллик	174
Пўлат Мўмин. Шуҳратнинг шуҳрати	177
Матёқуб Қўшжонов. Ўтдан ҳам, сувдан ҳам...	181
Умарали Норматов. Адибнинг баҳти	188
Малик Мурод. Ҳамиша уйғоқ адаб	198
Маъруф Жалил. Сабоқ	201
Ойдин Ҳожиева. Яхшилик	206
Йўлдош Сулаймон. Баҳорнинг оппоқ-оппоқ гуллари	210
Муҳаммад Али. Сўнмас чироқ	215
Ҳафиз Абдусаматов. Ватанпарвар адаб	219
Наим Каримов. Дунёнинг шоддиги шоир мулкидир	224
Сайёр. Мехрибоним	243
Раҳим Муқимов. Чин инсон ва ажойиб ижодкор эди у	251
Сайд Алиев. Шуҳрат Бухорода	260
Абдуманнон Раҳимжонов. Дўстим, маслаҳатчим эди	267
Фахриддин Умаров. Фидоий	270
Шуҳрат Ризаев. Умр карвони	274
Музаффар Аҳмад. Домланинг ҳикмати	282
Рауф Толиб. Жонкуяр устоз	286
Наримон Орифжонов. Шогирд таъзими	290
Тўлқин Муҳитдин. Хотира — қалб ёзуви	294
Шоислом Шомуҳамедов. Шуҳратли Шуҳрат ака	297

ШУҲРАТ

МАШРАБ

(роман)

Адид ҳаётига бир назар

Х о т и р а л а р

«Шарқ» нашриёт-матбаа концернининг
Бош таҳририяти
Тошкент — 1998 йил

Мусаввир: *Михаил Самойлов*

Бадийи мұхаррір: *Феруза Башарова*

Техникавий мұхаррір: *Лина Хижова*

Мусаҳҳиҳлар: *Ж. Тоирова, Н. Мұхамадиева*

Теришга 18.02.98 да берилди. Чоп этишга 24.03.98 да рухсат берилди. Бичими $84 \times 108^1 / 32$. «Балтика» гарнитураси. Офсет босма. Шартли босма табоги $15,96 + 1,68$ вкл. Нашриёт-хисоб табоги $16,27 + 1,57$ вкл. Буюртма № 2162. Адади 10.000 дона. Баҳоси ўзаро келишув асосида.

«Шарқ» нашриёт-матбаа концернининг босмахонаси,
700083, Тошкент шаҳри, «Буюк Турон» қўчаси, 41.